

DISPUTATIONUM

ROBERTI

BELLARMINI

POLITIANI,

SOCIETATIS...

Roberto Bellarmino









Disputationum
ROBERTI BEL-
LARMINI POLITIANI,
Societatis IESV,

DE CONTROVERSIIS

CHRISTIANAE FIDEI, ADVERSUS

huius temporis Hæreticos,

Partinet ad Pon. P. Papi in monte aureo
Tomus secundus, *17^{mo} APR*

AD S. D. N. SIXTVM V. *1688*

PONT. MAX. *R 38.*



Cum PONT. MAX. CAESAR. MAI. REGIS GALLIAE,
& Reip. VENETAE Gratia & Privilegio.

INGOLSTADII, EX TYPOGRAPHIA
DAVIDIS SARTORII.

Anno Domini M. D. LXXXIX.

VNIVERSIS CHRISTI fidelibus præsentis li-
 teras inspecturis salutem, & Apostolicam benedictionem. Di-
 lectus filius DAVID SARTORIUS Typographus INGOLSTA-
 DIENSIS in BAVARIA, nobis exponi fecit, habere se in mani-
 bus librum Disputationum dilecti filij ROBERTI BELLAR-
 MINI, Societatis IESV Presbyteri & Theologi, de fidei Con-
 trouersis aduersus hæreticos conscriptum, quem ad publicam
 omnium vtilitatem rogatu piorum virorum magna sua cum
 impensa, & labore excudere, & in lucem edere statuit: ac pro-
 pterea humiliter nobis supplicauit, vt pro nostra parte eius in-
 demnitati consulere de benignitate Apostolica dignaremur.
 Quare nos eius supplicationibus inclinati omnibus & singulis
 Bibliopolis ac librorū impressoribus ditioni temporali S. R. E.
 subiectis, & in ea commorantibus, sub ducentorum Ducato-
 rum auti, partim Cámeræ nostræ Apostolicæ, & partim dicto
 DAVIDI Typographo applicandorum, & insuper amissionis
 librorum pœnis ipso facto incurrendis, auctoritate Apostolica
 tenore præsentium inhibemus, ne quis eorum per decennium
 proximè futurum, à data præsentium computandum, dictum
 Disputationum librum ROBERTI BELLARMINI excudere,
 aut ab alio quàm ab ipso SARTORIO eiusue hæredibus excu-
 sum, vendere aut venalem habere, seu proponere quoquomodo
 audeat, vel præsumat, mandantes prouinciæ nostrarum Le-
 gatis & Vicelegatis, ciuitatumq; & terrarum gubernatoribus,
 & aliis ad quos spectat, vt quoties pro parte DAVIDIS SAR-
 TORII Typographi præfati vel eius hæredum fuerint requisiti,
 prædicta omnia aduersus inobedientes, omni mora cessante,
 ad effectum perducere faciant; contrariis non obstantibus qui-
 buscunque. Datum ROMÆ apud S. PETRVM sub annulo
 Piscatoris, diē V. Februarij, M. D. LXXXVI. Pontificatus
 nostri anno primo.

Ioan. Bapt. Canobius.

SVMMA PRIVILEGII CÆSAREI.

RVDOLPHI II. Romanorum Imp̃eratoris
 ſemper Auguſti, &c. diplomate cautum eſt **DAVIDI SARTORI** Typographo **INGOLSTADIENSI**, nequis uſpiã in omnibus ſua Cæſ. Maieſtatis regnis, hæreditariis prouinciis, atque aded vniuerſo Romano Imperio, quindecim annorum ſpacio Diſputationes **ROBERTI BELLARMINI** de Controuerſiis fidei; ſine ipſius **DAVIDIS SARTORII** permiſſu imprimat, aut alibi impreſſas, intra fines Imperij, regnorum aut prouinciarum ſuarum uendere ſeu diſtrahere quouis modo auſit, ſub pœna cõfiſcationis & amiſſionis librorum, ac multa ſuper hac re in priuilegiis expreſſa, &c. Datum in arce Regia **PRAGAE**, **XIII.** die Menſis Ianuarij, Anno M. D. **LXXXVI.**

Rudolphus.

*Ad Mandatum ſacra Cæſarea
 Maieſt. proprium.*

V. S. Viecheuſer D.

A. Erſtenberger.

EXTRAICT DV PRIVILEGE DV ROY.

PAR grace & priuilege dũ Roy a eſté permis a Maĩſtre **ROBERT BELLARMINVS** Profeſſeur en Theologie a Rome de la ſocietẽ du nom de **IESVS** qu'il puiſſe par **DAVID SARTORIUS** Imprimeur dẽ meurãt a Ingolſtatt faire imprimer le deuxieſme & troiſieſme tẽme d'vn ſien liure intitulẽ. Diſputationes de Cõtrouerſiis Chriſtiane fidel aduerſus huius tẽporis hæreticos; & iceulx liures faire vendre & diſtribuer au Royaulme de France, durãt le temps & eſpace de dix ans a compter du iour qu'ilz ſeront acheuẽz d'imprimer, & eſt defendu a toutes perſonnes de quelque qualite qu'ilz ſoient d'iceulx liures imprimer, ny expoſer en uentẽ aultres quã ceulx qui auront eſtẽ imprimetz par le dict **SARTORIUS**, ſur peine de mjl eſcez d'amende, cõfiſcation dẽs dictz liures, deſpens, dommages & interreſtz, coĩne il appert plus amplement par lettres patentes de ſa Maieſtẽ donneetz au Camp de large, au le deuxieſme iour de Nouẽbre l'an de grace mil cinq cens quatre vingts & ſept. Signẽertz. Par le Roy **Henry.** Et plus bas. De Neufuille. Seellẽertz du grand ſeau a ſimple queue.

SVMMA PRIVILEGII REIPV-
BLICÆ VENETÆ.

PASCHALIS Ciconiæ, Dei gratia Ducis Vene-
tiarum, &c. Priuilegio cautum est, ne quis R. P. ROBERTI BEL-
LARMINI Politiani, Societatis IESV, Disputationes à DAVIDE
SARTORIO Typographo INGOLSTADIENSI impressas, in
ciuitate VENETA, vel aliis dominiis Reipub. eiusdem, sine ipsius
DAVIDIS SARTORII permissu, intra quindecim annos im-
primat, vel alibi typis excusas diuendere aut distrahere præsu-
mat, sub pœna amissionis omnium librorum, & trecentorum
Ducatorum multa, vt videre est in ipso diplomate super hoc
concesso. Datum VENETIIS in Ducali Palatio, die IV. Ianua-
rij, Indictione XIV. Anno M. D. LXXXVI.

Hieronymus Otthobon
Secretarius.

BEATIS-



BEATISSIMO
PATRI SIXTO V.

PONT. MAX.

ROBERTVS BEL-
LARMINVS.

Nadfero, BEATISSIME
PATER, alteram partem earum
disputationum, quæ ante hoc
fermè biennium in sanctissim o
tuo nomine in lucē, te annuen-
te, prodierunt. Equum enim ef-
se censui, vt quemadmodum ea volumina, quæ de
Christo, & Ecclesia scripta erant, Christi ipsius
Vicario, & Ecclesiæ summo Præsidi dicata sunt:
ita libri, quibus Sacramentorum omnium tracta-
tio comprehenditur, nō alij, quàm sacrorum An-
tistiti primo, & maximo dicarentur: quanquam
vel me tacente, nemo non intelligit, partem ope-
ris tibi vni consecratam existimari debere, cui to-
tum opus semel sit iure optimo consecratum.

Et verò licet opus ipsum alioqui impolitum,
& tenue, dignum non sit, quod Principi omnium


maximo, & doctissimo offeratur: duæ res tamen
 facile effecerunt, vt in spem magnam venirem,
 fore vt Beatitudini tuæ non contemnendum vi-
 deretur. ALTERA est, incredibilis benignitas
 tua, qua me primam huius operis partem ad sa-
 cros pedes tuos offerentem, humanissimè com-
 plexus, multis magnisque beneuolentiæ signifi-
 cationibus, non modò munusculum quod obtu-
 leram, gratum Sanctitati tuæ fuisse declarasti; sed
 etiam me ad reliquum opus perficiendum quasi
 quibusdam additis calcaribus incitasti. ALTERA:
 ingens vtilitas huius generis scriptionum. Tibi
 enim pro salute vniuersi Christiani gregis, dies ac
 noctes excubanti, nihil gratius accidere solet, ni-
 hil minùs contemnendum videri, quàm id, quod
 sit cum Ecclesiæ non mediocri vtilitate coniu-
 ctum. Hoc verò tempore, quo tot syluestres fere
 non desinunt fremere ad Dominici gregis caulas,
 atque ad diripiendas tanto pretio redemptas o-
 ues, aditus vndecunq̃ue rimari: nihil esse videtur
 vtilius, quàm pestilentibus, atque insidiantibus
 Hæreticorum scriptis, (vt sancti Augustini verbis
 vtar) medentia, & munientia scripta prætere-
 re, quibus rabies qua furunt, aut etiam ipsa sanetur,
 aut à ledendis aliis repellatur: Ego autem pro mei
 particula muneris, proque iis viribus, quas Do-
 minus subministrare dignatus est; quod his tem-
 poribus Christiano populo vtilissimum esse cre-
 didi, ad id cogitationes meas, laborem, studium-
 que conuerti. Itaque operam dedi, vt in eare, in
 qua potissimum nostro hoc seculo hæreticorum
 omnium


*Lib. I. ad
 Bonifacium,
 cap. I.*

DEDICATORIA.

omnium debacchatus est furor, quanta maxima à me adhiberi potuit perspicuitate & breuitate, nihil omninò prætermitterem, quod vel ad fraudes, & mendacia Christi hostium detegenda, vel ad nodos, & argumenta ipsorum dissoluenda, vel ad Catholica Orthodoxæ Ecclesiæ dogmata explicanda, & communienda pertinere posse videretur.

Accipe igitur, PATER SANCTISSIME ATQUE OPTIME, alteram hanc mei laboris partem, ea benignitate qua cetera soles, quæ tibi à deuotiss tuis seruulis deferuntur. Atque interea dum tertiam partem, Deo bene iuuante, molior, assidue precari non desinam, vt felix viuas; & gloriæ Dei, gregisque tui incolumitati, vt facis, seruias; ac tuis apud Deum iam partis promeritis maximum indies benemerendo cumulum adiicias.





PRÆFATIO

IN SCHOLIS HABITA:

DE HAERETI- CORVM LEVITATE

in re Sacramentaria.



HAERETICOS HOMINES,
ut est apud Isaiam Prophetam,
cap. 19. spiritu vertiginis agitari,
& tanquā Babylonica turris ædi-
ficatores, sic inter se linguis, &
moribus esse diuisos, ut alius alium non agnoscat;
nullare magis, quā disputatione Sacramentaria
comprobatur. Etenim cū de Sacramentis agitur,
siue nomen, siue natura, siue numerus, siue efficaci-
tas, siue quid aliud in cōtrouersiam adducatur, non
modò inter se acerbissimis contentionibus altercan-
tur, sed etiam ita ineptè, atq; absurdè plerunq; di-
sputant, ut de stultitia palma contendere, vel de
gloria imperitiæ dimicare velle videātur. Et quo-
niam præfationem à nobis solito pleniorē, ac iu-
cundiorē noui huius Gymnasij amplitudo, noua
studiorum auspicia, noui auditorum concursus, ipse
propemodum sedes, ac parietes postulare videntur,
non mediocriter lator, hoc se mihi hodierna die ad
dispu-

disputandum argumentum obtulisse. differendum est enim de hæreticorum huius temporis vanitate, & leuitate, idq; in re Sacramentaria, id est, summis grauissimisq; nostræ fidei controuersis. Quæ sanè disputatio nec iucunditate vacua esse poterit, cùm spectaculum furiosorum inter se, & cum sanis concertantium exhibeat: nec sua etiam utilitate priuabitur, cùm hoc exemplo luculenter ostendat, in quas errorum tenebras incidant, quaq; ad præcipitia absurdissimarum hæreseon ruant, qui semel à præclarissima, munitissimaq; Catholica veritatis arce recesserint.

PRINCIPIO igitur cùm Sacramenti vocabulum in quæstionem apud Hæreticos nostros venisset, & MARTINVS LVTHERVS in Babylone sua eam vocem haud multùm sibi probari significasset, cōtinuò discipuli eius, qui Lutherum, non ut hominē quendam vulgarem, sed ut nouum Prophetam de cælo lapsum suspiciebant, eiusq; non sententias tantùm, sed etiam nutus tanquam oracula obseruabant, Sacramenti nomen apertè improbare, ac repudiare cæperunt. Itaq; ANDREAS CAROLOSTADIVS in lib. de imaginibus & Sacramentis, Sacramenti nomen palàm oppugnavit. PHILIPPVS MELANCHTHON in locis primùm editis, cap. de signis: Quæ, inquit, alij Sacramenta, nos signa appellamus, quòd si signi nomen displicet, & φεαυί d'ας appelles. ZVINGLIVS in lib. de vera & falsa religione:

P R Æ F A T I O.

Vocem istam, inquit, Sacramenti, magnopere cuperem Germanis nunquam fuisse receptam. CALVINVS, ut ceteris grauior & sapientior videatur, et si nomen hoc parum probet lib. 4. Instit. cap. 14. non tamen existimat operapretium, de nomine litigare. Non diu post exorta inter Lutherum, & Sacramentarios grauissima simultate, cum animaduerneret Lutherus Sacramenti nomen vehementer Sacramentariis improbari; probare ipse cepit, acerrimeq; tueri, ac propugnare, ut ex eo libro cognosci potest, quem contra Andreæ Carolostadium scripsit: quem quidem Andreæ, aureum aliquando amicum suum, in Absalonem & Iudam postea conuersum miserè deplorat.

LUTHERVM opinione mutata, Sacramenti vocabulum defendentē, sequutus est eius Achates, Philippus MELANCHTHON, q in locis posterius editis Sacramenti nomine passim utitur: sequuti etiā ceteri, qui propriè Lutherani dici, atq; à Sacramentariis distinguui volunt, Brentius, Tilmannus, Kēnitius, alij.

Sed audite, si placet, quibus argumentis Sacramenti nomē vel oppugnet CAROLOSTADIVS, vel defendat Lutherus: Non placet, inquit ille, vox ista; neq; enim Deus in sacris literis vsquam imperauit, ut eiusmodi voce vteremur; nec licet in rebus diuinis vsurpare nomina, quæ Deus non iusserit vsurpari. Contrà LUTHERVS: Immò verò, inquit, placet vox ista; nec enim
Deus

P R Æ F A T I O.

Deus in sacris literis vsquam prohibuit, ne
 eiusmodi voce vteremur: & quis tandem es,
 Caroloſtadi, vt te ponas loco Dei, & nobis
 prohibeas, quod ille non prohibuit? *Vter in-*
eptior, Auditores? Nam si non licet in rebus diuinis
his vocibus uti, quas Deus in sacris literis non insti-
tuit, indicet nobis CAROLOSTADIVS, vbinā legerit
in Scripturis Trinitatē, essentiā, personas, ὁμοῦσιον,
aliaq; id genus, qua trita sunt & promulgata, non
magis apud Catholicos, quā apud ipsos hæreticos Sa-
cramentarios? & si non licet Baptismū, & Eucharis-
tiā vocare Sacramenta, q̃ Deus non iusserit ita vo-
cari, cur ipsi Baptismum & Eucharistiam signa, sym-
bola, tesseras, σφραγίδας appellant? neq; enim locum
indicare poterunt in Euangelio, vel in Apostolo, vbi
eiusmodi vocibus, vel Baptismus, vel Eucharistia
nominetur. Sed nec LVTHERI ratiocinatio multo
plus habet ponderis, aut soliditatis. Etenim si prohi-
bere non licet ea vocabula, qua Deus in sacris literis
non prohibuit; non igitur prohibeantur Ariani Fi-
lium Dei dicere ἐπεὶ σίον Patri: sinantur Macedo-
niani Spiritum sanctum vocare creaturam: liceat
Michaeli Seructo Verbum aternū definire: idealem
rationem Christum hominem representātem: libe-
rum sit Valentino Gentili Deum Patrem essentiato-
rem, Deum Filium essentiatum nominare: conceda-
tur denique, vt alia pratermittam, nouis Samo-
satenis, vt vocent imagines Trinitatis, Cerberos-
trici.

P R Æ F A T I O.

tricipites, & tricorpores Geriones siquidem nihil horum in sacris literis Deus prohibuisse legitur.

Quantò grauiùs, maturiùs, sapientiùs ECCLESIA Catholica nomen Sacramenti retinet, quòd eam vocem aptissimè quadrare intelligat in Baptismum, & Eucharistiam, aliaq; eiusdem generis sacra mysteria; quodq; eadem voce usos esse videat Tertullianum, Cyprianum, Lactantium, Ambrosium, Hieronymum, Augustinum, & quotquot iam inde ab initio Christiani nominis, de sacris nostræ fidei rebus Latine scripserunt? Sed de nomine satis multa. ad Sacramenti naturam, atq; vim accedamus.

*Scriptores Catholici tanta consensione docent, ac semper docuerunt, nouæ legis Sacramenta instrumenta quædã esse nostræ iustificationis, ut id etiam Aduersariorum nostrorum testimonio comprobe-
tur. Sicenim CALVINVS loquitur lib. 4. Instit. cap. 14. § 14. Magno consensu Sophisticæ scholæ tradiderunt, Sacramenta nouæ legis iustificare, & conferre gratiam, modò non ponamus obicem peccati mortalis. Quæ sententia dici non potest quàm sit exitialis & pestilēs, eoq; magis, quòd multis antè seculis magna Ecclesiæ iactura, in bona orbis parte obtinuit. Hæc ille: qui, ut videtis, licet pro suo more Catholicos, sophistas; & Ecclesiæ fidem, pestem ac perniciem vocet: tamen negare non potuit magnum esse inter Catholicos omnes consensum; ac sententiam nostrã multis*

multis iam seculis in bona orbis terrarum parte viguisse: cùm de ipsis contrà rectissime, verissimeq; dicamus, nihil apud eos antiquum, nihil certum, nihil ferè ab omnibus communi consensione receptum, sed omnia noua, incerta omnia, eaq; breuissimis, atq; angustissimis finibus circumscripta. Nam etsi permulti, ac penè innumerabiles hoc tempore longè, lateq; grassantur Hæretici; tamen in tot minutissimas sectas sunt ipsi diuisi, atq; dissecti, vt nullum fermè sit eorum dogma, quod admodũ latè pateat, quodq; non aliqua certa regione definiatur. Sanè Martinus KEMNITIVS in 2. par Examinis Tridentini Concilij de Sacramenti natura & potestate disputans, summam inter suos, id est, Lutheri posteros ac discipulos, discordiam esse ingenuè confitetur. Et verò nimium impudens fuisset, si quod est solis luce clarius, inficiari voluisset. numerantur enim apud Aduersarios, ipso etiam consentiente Kemnitio, vt minimum sex diuersa, atq; absurdissima, & inter se pugnantes opiniones, dum aliud somniat Lutherus, aliud sibi fingit Carlostadius, aliud delirant Anabaptista, aliud Zuuinglius, aliud Calvinus, aliud alij comminiscuntur. Inspiciamus paulisper, ac leuiter discutiamus ineptias singulorum.

Princeps LUTHERVS, cùm in Babylone, tùm in assertione Articulorum, nihil aliud Sacramentum esse voluit, nisi diuinum testimonium ad excitandam vel nutriendam fidem, institutum, quod instar
mira-

P R Æ F A T I O.

miraculi confirmet, & instar sigilli obsignet promissionem gratia. Quocirca Sacramenta ferè conferre solet cum vellere Gedeonis, cum signo, quod Isaias obtulit Regi Achaꝝ, cū aliis eiusmodi miraculis atq; prodigiis, quibus ad faciendam fidem Propheta, & Apostoli utebantur.

Sed hac sententia tam est absurda, ut nihil ferè cogitari possit absurdius. Nam signa atque prodigia ad confirmandam prædicationem meritò adhibentur, cū sint ex se nota, & illustra, neq; à prædicatione vlla ratione dependant: contrà autè Sacramenta nullam ex se vim habent, ac ne Sacramenta quidem esse intelliguntur, nisi testimonio verbi confirmentur. Itaq; qui à prædicatore diuini verbi vel morbos repètè curari, vel Dæmones verbo pelli, vel cæcos illuminari, vel ab inferis mortuos reuocari conspiciunt, ipsa miraculi vi tanquam fulgore quodam ita percelluntur, ac prosternuntur, ut vel inuiti verbis tanti viri fidem habere cogantur. Qui verò aquis hominem ablui, quod in Baptismo facimus, vident, nihil mirantur, neq; facile credunt in ea lotionem aliquid sublimius latere, nisi verbo Dei antè crediderint. Quòd si non antè Sacramenta suspicere incipimus, quàm verbo Dei fidem habeamus: quo pacto, quæso, fieri potest, ut Sacramentis diuina eloquia confirmentur? Annò ridiculus esset, qui Ethnico diceret: Ut credas vera esse quæ dico, amphorã istam aqua super caput tuum effundã? Egregia sanè proba-

probatio: nisi enim ex Dei verbo disceremus lotionē illam, & illam unctionem ad purgandos animos valere, quis id crederet? quis non rideret? neq; enim id habet aqua natura, ut morbos animi curet, & cordis maculas eluat; sed quidquid in hoc genere potest, ex institutione diuina potest, diuinam autem institutionem diuina eloquia patefaciunt.

Porro comparatio illa, qua verbum diplomati, Sacramētum sigillo ab aduersariis passim confertur, tam est inepta, ut nihil ineptius fingi queat; multoq; rectius verbum Dei, sigillum Sacramenti, quàm Sacramentum, verbi Dei sigillum dici possit. Nam ut sigillum, etiam sine diplomate vim suam habet, atq; agnoscitur, & honoratur; diploma sine sigillo non agnoscitur esse diploma, nec vim ullam habet: sic etiam verbū Dei sine testimonio Sacramenti, suam, eamq; summam habet auctoritatem; Sacramentum verò sine verbi testimonio, nullam. Non igitur Sacramentum, ut illi volunt, sigillum verbi, sed verbum sigillum Sacramenti nominari debuisset.

Deinde si Sacramentum, ut Lutherani volant, nihil est aliud, nisi excitāda vel alenda fidei instrumentū, quorsum infantes, amentes, dormientes interdū in Ecclesia baptizantur? nūc ea vis est in Sacramentis, ut iis etiā qui vsum rationis non habent, fidem persuaideant? an potius rectē docent ANABAPTISTÆ solis adultis, sanis, ac vigilantibus Sacramenta prodesse? Minimè verò, inquiunt LUTHERANI, quin

quin potiùs grauitèr cfrant Anabaptistæ, homines fanatici ac furiosi, dum infantes baptizari prohibent. Nam etsi paruuli alio tempore iudicio rationis carent, tamen dum baptizantur, sic in earum mētibus operatur Deus, vt & verbum Dei audiant, & Deum etiam agnoscant, ac diligant; quemadmodum olim S. Ioannes in vtero mātis, Christi præsentiam sensit, & præ gaudio exultauit. *En vobis quò se miseri præcipitant: nec est omninò locus alius, quò se recipiant: urgent enim vehementer Anabaptistæ, & sic vndique Lutheranos clausos tenent; vt vel capi debeant, vel in huius noui erroris foueam spontè cadere. Sed neque ita effugiunt: nam in ista ipsa fouea armato dilemmate obruuntur, atque conficiuntur Lutherani. Vidistis opinor aliquando, infantes dum baptizantur, quàm refugiant, eiulent, obluētentur. Quæro igitur, vel intelligunt quid agant, vel non intelligunt. Si non intelligunt, nec credunt: si non credunt, perperam baptizantur; & vicerunt Anabaptistæ. Si intelligunt; sacrilegi sunt, qui sic peruicaciter Sacramenta recusant, nec tam purgantur, quàm maculantur. non igitur baptizentur; & vicerunt Anabaptistæ. Quid? quod has ineptias iam olim in epistola ad Dardanum risit AVGVSTINVS, & ad exemplum S. Ioannis, qui singulari miraculo in vtero exultauit, argutè respondit; aliquando etiam a sinam Balaam*

Balaam sapienter esse loquutam, nec tamen ob id admonitos esse homines in deliberationibus suis asinina expectare consilia.

Sed Lutherum dimittam, si unum ab eo quaesiero, in quonam Euangelio, vel Apostolo, vel Propheta legerit, Sacramenta nouae legis esse testimonia, vel sigilla verbi Dei? Nos quidem passim legimus Ioan. 3. Actor. 22. 1. Cor. 6. Ephes. 1. Tit. 3. 1. Petr. 3. Baptismo renasci, ablui, purgari, sanctificari, renouari, saluari fideles: obsignari promissiones nusquam legimus, nisi fortè in Euangelio secundum Lutherū. Neg, potest Lutherus hoc argumentum contemnere, cum in libro aduersus Ioannem Cochleum scriptum reliquerit, in rebus sacris vehementissimum, & robustissimum locum esse, argumentum ducere ab auctoritate negatiuè. Vel igitur locum indicet in verbo Dei, ubi Sacramenta nouae legis, testimonia nominentur; vel certè argumento vehementissimo, & robustissimo sententiam suam nos refutare fateatur.

Venio nunc ad ZVINGLIUM. Is in libro de vera & falsa religione, ubi Lutheri sententiam, aliasq, nonnullas satis acriter oppugnauit, aperit mentem suā, ac docet, Sacramenta nihil esse aliud, nisi quandam oppignerationē, ac veluti iusiurandum, quo se homines Christo, & eius Ecclesiae fideles fore publicè profitentur; ex quo illud sequitur, in Sacramentorum celebratione nihil Christum

agere, & non modò non purgare peccata, neq³ homines renouare, vt volunt Catholici, sed ne attestari quidem nostra iustificationi, vt docet Lutherani. Quæ sententia tantū abest, vt ullo Scripturæ testimonio confirmari queat, vt cū vniversis Scripturis apertissimè pugnet. Nam si Baptismus mea tantum est oppigneratio, non autem Christi actio, quid est quod ait Ioannes: Hic est qui baptizat? quid est illud, quod ait Apostolus: Christus dilexit Ecclesiam, & tradidit semetipsum pro ea, mundās eam lauacro aquæ in verbo vitæ? & si Baptismus non purgat peccata, sed testimonium solum præbet futura fidelitatis, cur Paulo Ananias dixit: Baptizare, & ablue peccata tua? cur ipse Paulus Baptismum definiuit lauacrum regenerationis? & quid sibi vult illud, quod iam citauimus, Mundans eam lauacro aquæ in verbo vitæ? Deniq³ vt alia multa præteream, res est in Ecclesia explorata, ac certa, & ipsis etiā fœminis, ac pueris nota, Sacramenta Christiana ex Christi passione, ac meritis vim habere: atq³ in eius rei signum sanguinem, & aquam ex Christi latere profluxissè. Tunc, inquit S. LEO epist. 4. cap. 6. regenerationis potentiam sanxit, quando de latere eius profluxerunt sanguis redemptionis, & aqua Baptismatis. quod idem Ambrosius in Lucam, Augustinus, Chrysostomus, Cyrillus, Theophylactus in Ioannem, annotârunt. Atq³ hinc Apostolus

Paulus

P R Æ F A T I O.

Paulus duo illa coniūxit: Tradidit semetipsum pro ea; & Mundanſcam lauacro aquæ: quia videlicet nihil eſſet aqua, niſi aqua, niſi vim quandam mirificā ex illius ſanguine traheret, qui tradidit ſemetipſum in mortem, vt exhiberet ipſe ſibi glorioſam Eccleſiā. Hinc deniq; & Ioannes clamat: Hic eſt qui venit per aquam, & ſanguinē. & rurſum repetit: Non in aqua ſolū. nimirū, vt quondam Ioannes Baptiſta: Sed in aqua & ſanguine. id eſt, in aqua admixta ſanguini, atq; ob eum ſanguinem ad omnia eluenda peccata efficaciſſima. Sed ſi vera eſt noua Theologia Zuuinglij, errat Ioannes, fallitur Paulus, hallucinātur Patres vniuerſi, inanis eſt confeſſio populorum, ac gentium, Chriſtus ipſe fruſtra latus ſuum aperiri, & ſanguinem & aquā inde manare voluit. Quid enim opus fuit Chriſti paſſione, ac morte ad Sacramenta inſtituenda, ſi nihil ſacrum, nihil diuinum habent, nihil poſſunt, nihil efficiunt, nec ſunt aliud niſi teſtimonia, vel pignora quadam humana?

Iam verò IOANNES CALVINVS mira calliditatē; cū Lutherum ſimul ac Zuuingliū amplecti velle videatur, ab utroq; diſſentit, atq; utroq; reiectō; ſuum ac propriū dogma conſtituit. his enim verbis affirmat in 4. lib. Inſtitut. cap. 14. §. 1. veram, propriā ſimplicem definitionem Sacramenti contineri: Sacramentum, externum eſt ſymbolum, quo beneuolētię erga nos ſue promiſſiones

P R Æ F A T I O.

conscientiis nostris Dominus obsignat, ad
sustinendam fidei nostræ imbecillitatem, &
nos vicissim pietatem erga eum nostrā tam
coram eo, & Angelis, quàm apud homines
testamur. *Quis non iuraret, Caluini sententiam
ex Lutheri, Zuuingliq; sententia esse conflata?*
Quod enim Calvinus ait, Sacramento promissio-
nē beneuolentia à Domino obsignari ad sustinen-
dam fidei imbecillitatem, ex Luthero sumptum
videri potest: quod verò addit, eodem nos Sacra-
mento testari nostram erga Dominum pietatem,
ad Zuuinglij sententiam pertinet. Sed non tanta
erat vel in Caluino modestia, vel in Luthero, &
Zuuinglio auctoritas, ut horum ille discipulus aut
esse, aut haberi se pateretur. Itaq; licet Zuuinglio
Calvinus concedat, Sacramenta esse quandam ve-
luti professionem nostræ erga Deum fidelitatis: in
eotamen ab eo dissentit, quòd negat hunc esse vel
solum, vel primarium Sacramentorum usum, &
ea de causa, nomine Zuuinglij prætermisso, eius
sententiam loco notato palàm oppugnat, omniq;
ipsius argumēta sigillatim diluit. Inter Lutherum
autem, & Calvinum hoc interest, quòd cùm uter-
que Sacramenta faciat testimonia, vel sigilla diui-
næ promissionis; eam promissionem esse vult Lu-
therus iustificationis præsentis, Calvinus electio-
nis æternæ. Quamobrem in Antidoto Concilij,
sess. 6. cap. 5. infantes baptizati dicit, non ut in
adoptione.

P R Æ F A T I O.

*adoptionem filiorum à Deo recipiantur, sed ut ob-
signetur promissio vitæ, quæ ad eos per gratiam
prædestinationis iam antè pertinebat. & sessio. 7.
can. 7. ad eum finem Sacramenta referenda esse
affirmat, ut certos nos reddant perpetuæ adoptio-
nis, & gratiæ, ad quam videlicet ante mundi con-
stitutionem prædestinati sumus.*

*Sed hæc sententia multis nominibus falsa, ab-
surda, perniciosa, impia est. Nam & cum Scriptu-
ris apertè pugnat, & multis regnum cælorum clau-
dit, & Sacramentum falsum, ministros sacrilegos,
Deum mendacem, & quasi periurum facit. Si fal-
sum non est, Sacramenta solum ad præteritum, id
est, ad gratiam electionis referri, cur Ananias in
præsenti dicit: Exurge, & baptizare, & ablue
peccata tua? cur Baptismum Paulus vocat laua-
crum regenerationis? cur eundem Baptismum Pe-
trus accipi dicit in remissionem peccatorum? Et
quæ tandem est ista temeritas, vel furor potius, &
amentia, prouocare Catholicos ad Scripturas, &
tamen quid Scripturæ omnes clament nolle audi-
re, id verò obstinatè asserere, actueri, quod nus-
quam in diuinis literis ostendi queat?*

*Absurdam verò sententiam esse, per Sacra-
menta obsignari conscientis promissiones, fieri po-
test ex paruulorum Baptismo planissimum. Siqui-
dem ritè, atq; utiliter paruulos baptizari, Calui-
nus contra Anabaptistas multis in locis docet, cum*

P R Æ F A T I O.

tamen paruuli ut usur rationis, ita etiam conscientia careant; quod ne ipse quidem Calvinus negare ausus fuit in 4. lib. Institutionis, cap. 16. Et verò si promissio diploma quoddam est, Sacramentum sigillum, & conscientia cera, vel charta, ut Calvinus significat; egregium sanè miraculum Calvinistæ faciunt, cum paruulos baptizant: nam & diploma scribunt sine charta, & sigillum imprimunt sine cera.

Esse autem eandem sententiam multis ac potissimum paruulis perniciosam, dubitari certè non potest. Nam cum Sacramenta Calvinus, filiis præsertim hominum fidelium, quos iustos ac sanctos nasci docet, ad accipiendam Christi gratiam minimè necessaria esse, multis persuaferit, id consequutum est, ut non pauci eadem Sacramenta contempserint, atq; indies magis contemnant, atque interim multorum animæ paruulorum, quæ sanctæ à Caluino esse finguntur, non expiata salutariibus aquis, in æternis sordibus perseuerent.

Sed illud grauissimum, quòd ista Caluini sententia Sacramentum, ut dixi, falsum, ministrum sacrilegum, Deum mendacem facit. Etenim si Sacramentum diuinum est iusiurandū, atq; sigillum, quo electionis æternæ promissio obsignatur: quoties contingit (contingit aut frequētissimè) ut reprobi baptizentur, toties item contingit, ut Sacramentalia verba sint falsa, & ore ministri mentiatur.

Deus.

*Deus. Fingite animis adesse iam hoc loco Philip-
pum Diaconum, qui Magum Simonem baptizet:
certè cùm Philippus aquam aspergit, ac dicit, Ego
te baptizo: eodem ipso momento, si Caluino credi-
mus; & Deus dicit, Ego Deus aternus testor, ac
iuro, & sigillo meo diuino confirmo, te Simonem
à me iam inde ab aternitate electum, & ad re-
gnum cælorum irreuocabiliter prædestinatum.
Atqui falsum hoc testimonium, falsum iusu-
randum, fallax sigillum fuisse, nemo est qui ne-
sciat, cùm Simon ille impius, Hæresiarches, &
Magus tandem perierit. Neque verò satis sibi
cauet Calvinus, cùm ait, Deum quod ad se attinet,
verum sigillum, ac testimonium offerre. nam non
offert solum, sed etiam reipsa præbet, cùm reipsa
homines baptizantur, neque enim Sacramentum
oblatio, sed testificatio est diuinæ beneuolentiæ;
ut idem ipse docet Calvinus in Catechismo bre-
uiore. Itaque tùm offert testimonium, cùm offert
Sacramentum: cùm autem Sacramentum præbet,
ac dicit, Ego te baptizo; non offert, sed præbet te-
stimonium, & quidem falsum, & fallax, cùm re-
probi baptizantur.*

*Tres adhuc supersunt excutienda opinioniones; sed
eas, quia magna pars horæ præterisse videtur, bre-
uiter leuiterq; attingam. Igitur ANDREAS
CAROLOSTADIVS, ut ipse quoque dux noui
agminis haberi posset, nouum dogma excogitauit.*

nimirum asseruit, nihil esse aliud Sacramenta Christiana, quàm symbola quædã, ac tesseras, quibus internoscuntur Christiani à Iudeis, Mahometanis, paganis: quales erant olim apud Romanos toga, pallia apud Philosophos, & nunc apud Christianos vestimenta varia Monachorum. Neque multum ab hac sententia discrepat, quod ANABAPTISTÆ de Sacramentis disputant. siquidem Sacramenta esse volunt allegorias, ut ipsi loquuntur, operum bonorum: non enim alia de causa homines baptizari, & corpus Domini sumere, nisi ut admoneantur ea caeremonia, sibi crucem & mortem pro Christo, si res tulerit, forti animo esse tolerandam.

Sed non est quod multum laboremus in his sententiis refellendis, cùm eas Lutherus, Philippus, Zuuinglius, Calvinus, Kemnitius, atq; alij ex Adversariis ita confutarint & exploserint, ut penè etiam extinxerint, ac sepelierint. Et sanè si non est alia Sacramentorum utilitas, nisi ut Ecclesiam ab aliis hominum catibus diuidant, vel operum bonorum fideles admoneant, adeò parùm valent, ut penè superuacanea dici possint. Habemus enim alia symbola multò quàm Sacramenta sint, illustriora, & efficacia. Quid? an non confessio fidei melior tessera est, quàm Baptismus, cùm confessio vera fidei Catholicorum propria sit, Baptismum autem communè cum hæreticis habeamus?

annon

PRÆFATIO.

annon etiam longè efficacius mouent ad opera bona exhortationes, & exempla, quàm caremonia illa Sacramentalis? Et quid opus erat, vt Sacramenta ex Christi latere perfosso manarèt, si nihil maius effectura erant, quàm allegoria quedam, vel quàm Romanorum toga, vel pallia Philosophorum?

Vnus restat SVVENCHFELDIUS, qui vt vno verbo contentiones omnes dirimeret, & noua dogmata cudendo Haresiarcha iure saluari posset, omnia simul Christiana Sacramenta repudiavit: quippe homo supra modum spiritalis, atque Angelicus, solo spiritu viuendum putat. Nec mirum si Sacramēta ei corporalia sordeant, qui Scripturarum etiam diuinarum literas, et verba contemnit. Illud magis admiror, cur non tacita mentis cogitatione contentus, verbis & literis corporalibus dogmata sua explicanda putauerit: non enim decet virum tam spiritalem, pulmone ac palato, lingua, ac dentibus, sapientia sua arcana committere. Huc videlicet Aud. Sathan spectabat, huc tendebat longo illo ambitu heresum variarum, vt fontes illos salutes, thesauros illos charismatum diuinorū, pharmaca illa cœlestia Christi sanguine comparata omninò Christianis eriperet. Sed si non planè isti spirituales homines hominem exuissent, intelligerēt profectò, nihil magis appetitum à diuina prouidētia institui potuisse, quàm vt

homines, qui spiritu & corpore constant, per corporalia signa ad dona spiritualia peruenirēt: Si tu, inquit sanctus Ioannes CHRYSOSTOMVS, homilia octuagesima tertia in Matthæum, incorporeus esses, nuda tibi Deus, & incorporea dona tradidisset: sed quoniā corpori adiunctū spiritum habes, in rebus corporalibus spiritualia tibi traduntur. Quid? quod ipsa etiā Sacramenta non omninò corporalia, sed magna ex parte spiritualia sunt? corporale est elementum, corporale etiam verbum, sed mirifica illa virtus & potestas, qua fit, ut aqua corpus tēgat, & cor abluat, ut sanctus loquitur AVGVSTINVS, planè spiritualis est. Itaq; Dominus Nicodemo, non ex aqua solū, sed ex aqua & spiritu renascendum esse pronunciauit, nimirum, ut Gregorius NAZIANZENSIS in oratione de Baptismate annotauit, idè ex aqua & spiritu, quia medicamentum partim corporale, partim spiritale, aptissimè cōuenit in eos egrotos, quorum natura corpore, & spiritu continetur.

Diximus Aud. de nomine, diximus etiam de natura, & efficacitate Sacramēti. Quòd si iam de numero Sacramentorum, hæreticorum sententias enumerare vellem; hinc etiam facile demonstrarem, quanta eorum vanitas, & stultitia sit; cū vnus Lutherus modò vnū, modò duo, modo tria, modò etiam septem Sacramenta numerauerit. Si verò etiam ritus, ac caeremonias eorum explicare aggre-

P R Æ F A T I O.

*aggrederer, tum verò maximè, quamuis in reſe-
ria, rideretis. Tot enim fermè apud eos exſtât for-
mæ Sacramentorum adminiſtrandorum, vt nu-
merari vix queant. & quod ſummis Pontificibus
tribui poſſe negât, vt ritum aliquẽ in Eccleſia ſta-
tuant, id ſibi apud eos quiuis homuncio paſſim af-
ſumit. Quod ſi poſtremò quid de Sacramentis ſin-
gulis hæretici ſentiât, explicandũ ſuſciperem, nullũ
unquã exitum reperirem. Quamobrem vnũ tan-
tũ è tam multis ſeligemus, eoq³ breuiter pertra-
ctato, prætermiſſis ceteris ſinẽ diſſerẽdi faciemus.*

*Laborant totis viribus cùm Lutherani, tũ
Caluiſiſtæ, vt verã Chriſti carnem in Sacramen-
to nobis communicari doceant; & tamen Eccleſia
Catholica ſententiam de conuerſione panis in car-
nem peruiacibus animis reiiciũt. Itaq³ CALVINVS
adeò implicatam, obſcuram, mirabilem, incredibi-
lem rationem excogitauit, qua Chriſti vera caro,
per neſcio quas fiſtulas, & canales ad nos de cœlo
deriuari, & quaſi diſtillari poſſit; vt ego ſanè eti-
amſi Iudeus, vel Paganus eſſem, multò facilius ca-
pere, & credere me poſſe conſiderem conuerſionem
panis in carnem, quam docet Eccleſia, quàm Cal-
uiſtiſticum illud, ſine auctoriſtate, & ſine ratione
fabricatum figmentum.*

*LUTHERANI autem aliud monſtrum longè eti-
am tetrius Eccleſiæ pepererunt. Nam vt facile eis
eſſet veram Chriſti carnem in Sacramẽto habere
præſen-*

P R Æ F A T I O.

presentem, eandem carnem ab ipsa sua Conceptione ubique fuisse, ac semper, omniaq; omninò loca, eo modo quo Deus facit, replere docuerunt. Quod portentum (neque enim dogma, vel sententia, vel opinio, vel simplex etiam hæresis nominari debet) Scripturis repugnat, aduersatur Patribus, euertit Symbolum, Christi naturas cum Eutyche te confundit; & ipsum denique, quod mirandum videtur, Sacramentum destruit, pro quo astruendo fabricatum est. Nam si Christi corpus ab ipsa sua Conceptione semper ubiq; fuit, mentitur certè qui illud alicubi aliquando non fuisse affirmat: ergo Angelus, cùm apud Marcum ait: Surrexit non est hîc. quomodo enim hîc non est, qui ubique est? Dominus ipse mentitur, cùm ait: Lazarus mortuus est, & gaudeo propter vos, ut credatis, quia non eram ibi. quomodo enim Domine ibi non eras, qui ubique eras? Porro sanctus AVGVSTINVS, ut de ceteris taceam, in epistola ad Dardanum ex proposito hoc tractans, copiosè docet, esse Christum, ut ipse loquitur, per id quod Deus est, ubique, per id quod homo est, non ubique.

Iam verò Symbolum fidei monstrosa ista Vbiquitas, (hoc enim barbaro vocabulo barbarus error nominari meruit) ita corrumpit, atque deprauat, ut Christi Conceptionem, Ortum, Passionem, Obitum, Sepulturam, Descensionem ad inferos, Reuer-

P R Æ F A T I O.

Reuerſionem ab inferis, Aſcenſionem in cælum; Reuerſionem à cælo, non vera, & propria, ſed metaphorica, ac penè phantaſtica cum Marcione, & Manichæo nobis efficiat. Id enim habet de Chriſti Conceptione Symbolum rectæ fidei, in ſolius Beatiffimæ Virginis utero Chriſti corpus nouem illis menſibus fuiſſe. Atqui idem illud corpus in uteris omnium fæminarum, immò etiam, & virorum fuit, ſi ubique ſemper fuit. De Ortū verò id Symbolum docet, Chriſti corpus nono exaëto menſe verè, & propriè ex utero prodiſſe; & eo modo verè, & propriè natum eſſe. At ſi vera ſomniant Vbiquiſta, ante nonum menſem, erat extra uterum, & poſt nonum menſem adhuc erat in utero; neq; inde unquam verè prodiit, aut prodire poteſt, cū id quod verè ubiq; eſt, nulla ratione verè moueri queat. Quemadmodum igitur Deus cū apparet alicubi, non eò veniſſe propriè, ſed metaphoricè dicitur, quia ubique cū ſit, non venit ubi non erat, ſed apparet ubi non videbatur: ſic etiam Chriſti ortus non verus, ac proprius, ſed apparens, ac metaphoricus dicendus erit; cū non venerit illa caro ubi non erat, nec locum deſeruerit, ubi erat, ſed cerni tantū cæperit, ubi antea minimè cernebatur. Quod idem de Paſſione, de Morte, de Sepultura, de ceteris fidei capitibus intelligi debet. Qui enim ſemper ubique fuit, non verè, & propriè, ſed metaphoricè ſolū

tran-

P R Æ F A T I O.

transiit de Cœnaculo ad hortum; de horto ad Concilium Iudæorum, de concilio ad Prætorium, de Prætorio ad Caluariam, de Caluaria ad Crucem, de cruce ad Sepulchrū, de sepulchro ad Montem, de monte ad Cælum. Nec potuit verè in morte corpus ab anima separari: & cum utrumq; ubiq; fuerit, id efficitur, quod est absurdissimum, ut fuerit Christo mortuo, corpus cum anima in inferno, & anima cum corpore in sepulchro.

Quid iam de ipsa humana Christi natura, deq; illo summo, atq; Angelis adorando mysterio dicā? Nam si humana Christi natura non modò ubique est, sed (ut aduersarij docēt) illam ipsam habet diuinam immensitatem, quam Deus habet, ut infinita spatia replere queat, erit ipsa verè, & absolutè immensa, & infinita: & cum mole corporea non sit infinita, quippe quæ tota ubiq; est, erit sine dubio infinita virtute; virtus autem infinita naturam sequitur infinitam: igitur Christi caro natura est infinita. quare vel duæ iam erūt infinite natura, quod fieri nequit, vel quod solū restat, humana in diuinam transeunte natura, & naturarū confusio, & totius mysterij labefactatio consequetur. En nobis quàm facile hæresis hæresim parit, & eò tandem errando venit, ut ipsa prima fidei fundamenta radicitus euertantur.

Quid, quod portentosa ista Vbiquitas, Sacramentum ipsum, ut dicebam, tollit, pro quo asserendo fa-

do fabricata est? Nam si in ipsa priuata domo in pane, in vino, in pomis, in piscibus, in oleribus, in omni ciborum genere, in ipso aëre quem attrahimus, Christi carnē verē sumimus; quid necesse est in Ecclesiam conuenire? quid panem frangere, & vinum miscere? quid verba illa sacra pronunciare? quid habet sacra Cœnæ præ vulgari prandio? quid panis Eucharistia præ pane pistoris? quid altare præ mensa?

Atq; ut magis adhuc Lutheranorum sapientiam admiremini, nouum hoc monstrū intra paucos annos, in vna eademq; Provincia, iisdem auctoribus Lutheranis prodiit, periit, reuixit; siquidem ab ipso Luthero, ut ex multis eius testimoniis Brentius probat, excogitatum, eodem regnante Luthero feliciter in Saxonia floruit: Luthero deinde mortuo, ac rerum potiente Melanchthone, paulatim languescere, ac deficere cœpit; donec tandem in ipsa Saxonia in Dresdensi Lutheranorum Concilio, quod ante annos tredecim habitum est, publico decreto damnatum, explosum, exterminatum est: sed his proximis annis Melanchthonico euerso imperio, atque imperante in Saxonia Smidelino, rursus ab inferis reuocata, & in suam sedem restituta magno cum honore Vbiquitas est. Ista videlicet est constantia fidei Lutherana, ut nunc sacrosancta fidei dogmata esse debeant, quæ ante annos tredecim pestilētissima hæreses erant.

Sed

P R Æ F A T I O.

Sed finis sit, nolo enim in eiusmodi nugis percensendis orationem ponere longiorem. quæ tamen si ut verè sunt, sic ab omnibus hominibus haberentur pro nugis; labore nos atque negotio magno leuarent. Sed quoniam tanta est Satanae versutia, tanta hæreticorum fallacia, tanta populorum ad res nouas propensio, ut permultis iam, nõ in quã hominibus, sed populis, Prouinciis, Regnis, cum summa Ecclesiæ Catholicæ iactura, & honoris Dei, Christiq; meritorum obscuracione persuasæ sint; idcirco nobis totis viribus enitendum est, ut in hac ipsa studia, ita diligenter incumbamus, ut aliquando hæreticorum fraudes detegere, Christi gloriam amplificare, Ecclesiam propagare, damna resarcire, Satanam confundere Christo duce, & adiutore valeamus.




APPRO-

APPROBATIO.

Opus hoc R. P. ROBERTI BELLARMINI, Societatis IESV, quoniam omnes Christianæ fidei Controuersias aduersus huius temporis hæreticos, ita copiosè, orthodoxè, eruditè ac solidè explicat, vt non immeritò integerimum, pulcherrimum, absolutissimumque Controuersiarum omnium Corpus appellari queat, dignum profectò cum primis est, quod ad plurimorum vtilitatem multò maximam typis procudatur.

*Ita sentio ego ALBERTVS HVNGERVS,
S. Theologiæ D. Professor, & Procancellarius in alma Academia Ingolstadiensis.*



Cùm D. ROBERTI BELLARMINI Politiani, Societatis IESV, exactissima Controuersiarum, quæ Catholicis cum hæreticis & nouatoribus intercedunt, discussio, singularem Christianæ veritati lucem afferat, ad maiorem Reipub. Christianæ vtilitatem, maximam verò Sectariorum confusionem publicari potest & debet.

Ita censeui PETRVS STEVARTIUS Ledius, SS. Theologiæ D. & Professor, ac eiusdem facultatis Ingolstadij pro tempore DECANVS.



INDEX GENE- RALIS TOMI SECVNDI.

<i>De Sacramentis in genere,</i>	<i>Lib. II.</i>
<i>De Baptismo,</i>	<i>Lib. I.</i>
<i>De Confirmatione,</i>	<i>Lib. I.</i>
<i>De Eucharistia,</i>	<i>Lib. IIII.</i>
<i>De Sacrificio Missæ,</i>	<i>Lib. II.</i>
<i>De Pœnitentia,</i>	<i>Lib. IIII.</i>
<i>De Extrema unctione,</i>	<i>Lib. I.</i>
<i>De Ordine,</i>	<i>Lib. I.</i>
<i>De Matrimonio,</i>	<i>Lib. I.</i>



1
SECUNDI TOMI
P R I M A
CONTROVER-
SIA GENERALIS,

DE SACRAMENTIS
IN GENERE,

DVOBVS LIBRIS
EXPLICATA.

A R. P. ROBERTO BEL-
LARMINO POLITIANO,
Societatis IESV.

2000

1811

1812

1813

1814

1815

1816

1817

1818

1819

1820

1821

1822

LIBRORVM ET CAPITVM PRIMÆ CONTROVERSIÆ.

PRÆFATIO,

De hæreticorum leuitate in re Sacra-
mentaria.

LIBER PRIMVS,

Qui est de natura & causis Sacramentorum.

- CAP. I. De erroribus.
II. De mendacijs & calumnijs Aduersariorum.
III. Mendacia Philippi.
IV. Mendacia Caluini.
V. Mendacia Kemnitij.
VI. Mendacia Tilemanni Heshusij.
VII. Sítne vtendum nomine Sacramenti.
VIII. De etymologia & notione Mysteriorum & Sacramenti.
IX. Quid requiratur ad Sacramentum nouæ legis constituendum.
X. Possítne Sacramentum propriè definiri.
XI. Quæ sit definitio Sacramenti.
XII. An definitio Sacramenti vniuocè conueniat Sacramentis legis veteris & nouæ.
XIII. Soluuntur argumenta Kemnitij.

XIV.

INDEX LIBRORVM

- XIV. *Refellitur definitio Lutheranorum.*
- XV. *Refelluntur definitiones Anabaptistarum & Zuuinglianorum.*
- XVI. *Refellitur definitio Caluini.*
- XVII. *Refelluntur argumenta Aduersariorum.*
- XVIII. *Sacramenta componi ex rebus & verbis, vt materia, & forma.*
- XIX. *Verbum quod cum elemento Sacramentum facit, nō esse concionale, sed consecratorium.*
- XX. *Soluuntur obiectiones.*
- XXI. *Res & verba Sacramentorum ita determinata esse, vt nihil addere, minuere, aut mutare liceat.*
- XXII. *De fine, & necessitate Sacramentorum.*
- XXIII. *Auctorem Sacramentorum solum esse Christū.*
- XXIV. *Ministram Sacramentorum ordinarium, non esse quemlibet hominē, etiam baptizatum.*
- XXV. *Soluuntur argumenta Lutheri.*
- XXVI. *Non requiri fidem, aut probitatem ministri, vt Sacramenta efficacia esse possint.*
- XXVII. *Requiri intentionē faciendi quod Ecclesia facit.*
- XXVIII. *Soluuntur argumenta.*

LIBER SECVNDVS,

De effectu, numero, & ceremoniis Sacramentorum.

Partitio huius libri.

- CAP. I. *Quis sit status questionis de efficacia Sacramentorum.*
- II. *Sententia hereticorum de efficacia Sacramentorum.*

III.

ET CAPITVM.

- III. *Quòd Sacramenta ex opere operato conferant gratiam, prima classis testimoniorũ ex nouo Testamento.*
- IV. *Secunda classis testimoniorum: vaticinia Prophetarum.*
- V. *Tertia classis argumentorum ex Conciliis.*
- VI. *Quarta classis, ex Patribus Græcis.*
- VII. *Idem probatur ex Latinis.*
- VIII. *Sexta classis ex ratione.*
- IX. *Soluuntur obiectiones ex Scripturis depromptæ.*
- X. *Soluuntur obiectiones ex Patribus.*
- XI. *Soluuntur obiectiones ex ratione depromptæ.*
- XII. *Explicatur controuersia de differentia Sacramentorum, legis nouæ & veteris.*
- XIII. *Explicantur sententiæ Catholicorum.*
- XIV. *Probatur nullum Sacramentum legis naturæ, aut Scriptæ, iustificasse ex opere operato.*
- XV. *Idem probatur ex Patribus.*
- XVI. *Idem probatur rationibus in Scriptura fundatis.*
- XVII. *Soluuntur obiectiones.*
- XVIII. *De Charactere.*
- XIX. *De Charactere, sententiæ Catholicorum.*
- XX. *Probatur Character ex Scripturis.*
- XXI. *Idem probatur ex Patribus.*
- XXII. *Idem ostenditur ratione.*
- XXIII. *Quid hæretici sentiant de numero Sacramentorum.*
- XXIV. *Ex Scripturis & Patribus probatur veritas Catholica, de numero septenario Sacramentorum.*
- XXV.

INDEX LIB. ET CAP.

- XXV. *Septem esse Sacramenta, probatur ex posterioribus Conciliis, & Doctoribus.*
- XXVI. *Idem probatur ex congruentiis.*
- XXVII. *Soluuntur obiectiones.*
- XXVIII. *De ordine & comparatione Sacramentorum nouæ legis inter se.*
- XXIX. *De nomine, definitione, & partitione ceremoniarum.*
- XXX. *De statu causæ.*
- XXXI. *Explicatur, & defenditur veritas.*
- XXXII. *Soluuntur obiectiones contra ceremonias.*





DE SACRAMEN- TIS IN GENERE.

LIBER PRIMVS.

Qui est de natura & caussis
Sacramenti.

DE SACRAMENTIS
bipartita Disputatio est. PRIMVM
enim generatim de omnibus. DEIN-
DE seorsim de singulis explicandum
erit. Ac generalis quidē Disputatio duo
habebit quasi prolegomena. VNVM
de erroribus circa Sacramenta. ALTERVM de mendaciis,
& calumniis recentium hereticorum. Deinde sex contine-
bit principales controuersias. VNAM de nomine, & signifi-
catione Sacramenti. ALTERAM de natura, & definitio-
ne. TERTIAM de caussis tum intrinsecis, tum extrinse-
cis. QVARTAM de effectis, id est, gratia, & charactere.
QVINTAM de numero. SEXTAM de caremoniis.

Scripserunt de hoc argumento plurimi, sed præcipui in-
ter hereticos mihi videntur Lutherus in lib. de captiuitate
Babylonica, & in assertione articulorum. Philippus in locis,

& in Apologia Confessionis Augustana. Ioannes Caluinus, lib. 4. Institut. cap. 14. & seq. Martinus Kemnitius tomo 2. Examinis Concilij Tridentini.

Ex nostris præter Scholasticos in IV. Sententiarum Thomas VValdensis tomo 2. toto; Gulielmus Parisiensis in lib. de Sacramentis; Ioannes Eckius, in homiliis de Sacramentis; Ioannes Rossensis in refutatione articulorum Lutheri; Hofius Cardinalis in Confessione Polonica; Ruardus Tapper in explicatione articulorum Louanienfium; Iodocus Tiletanus in refutatione Examinis Kemnitij; Gulielmus Alanus in lib. de Sacramentis in genere; Gulielmus Lindanus in Pano-
plia lib. 4. Petrus Soto, de Instit. Sacerdotum.

CAPVT PRIMVM.

De erroribus.



ANTIQVI errores de Sacramentis ad quatuor capita reuocari possunt. **PRIMVM** enim quidam omnia Sacramenta de medio tollere conati sunt. ij fuerunt quos Epiphanius hæresi 40. Archonticos, Theodoretus li. I. de hæreticorum fabulis cum Archonticos, tum etiam Ascodritos, seu Ascodrupitas appellat. Isti enim auctore quodam Petro Anachoreta Syro, Baptismum & Eucharistiam execrabantur, Epiphanio teste, necnon (vt addit Theodoretus) omnia alia signa sensibilia, & corporalia, ac solum in cognitione eius quod est, veram redemptionem constituebant.

Huc etiam pertinet error Fratricellorum, seu Beguinorum, qui Sacramenta Ecclesiastica despiciebant, vt testatur Ioannes Papa XXII. in Extrauaganti, sancta Romana, de religiosis domibus.

Huc denique pertinent Pauliciani, qui teste Euthymio in 2. parte Panopliæ, tit. 21. tollebant de medio omnem Sacramentorum materiam; aquam, vinum, panem, oleum, & solum verbis quibusdam loco Sacramentorum utebantur: vt
exempli

exempli gratia, Baptismum esse dicebant illa verba: *Egò sum aqua & uin.*

SECUNDA hæresis est eorum, qui Sacramenta omnia non quidem execrabantur, nec tollebant, sed virtute & efficientia spoliabant. Hi Messaliani, qui & Euchitæ ab oratione dicti sunt. Scribunt de hac hæresi Epiphanius hæresi 80. Augustinus hæresi 57. & Theodoretus lib. 4. de hæreticis fabulis, sed fusiùs & ex libris ipsorum decerptis erroribus, Ioannes Damascenus in lib. de hæresibus, ubi testatur, dogma Messalianorum esse, peccata non purgari diuinis Sacramentis, sed solis precibus, quæ ab ipsis rectè funduntur. Itaq; sine Baptismo, sine Eucharistia, sine Sacerdotum absolutione profitebantur, se statim suis precibus homines posse iustificare: tamen etiam Sacramenta illa admitterent.

Eandem ferè hæresim tribuit Guido in sua Summa Arménis, & quibusdam recentioribus Catharis. siquidem eos negare dicit, Sacramenta nouæ legis gratiam conferre.

TERTIA hæresis eorum fuit, qui aliqua Sacramenta de mēdio tollebant. Multi enim Baptismum reiecerunt, ut ij, quorum hæresim Gaianam appellat Tertullianus initio libri de Baptismo: item Manichæi, teste Augustino hæresi 46. & Seleuciani apud eundem Augustinum hæresi 59. & alij, de quibus postea.

Rursus quidam reiecerant Sacramentum Confirmationis, ut Nouatiani, Theodoro teste, li. 3. de fabulis hæreticorum.

Alij Sacramentum Eucharistiæ nullum esse dixerunt. Scribit enim Petrus Cluniacensis in libro contra Petrobrusianos, vnum ex erroribus Petrobrusianorum fuisse, corpus Christi ex pane semel tantum factum esse, ea videlicet nocte, qua Dominus traditus est: deinceps autem nec factum esse, nec fieri posse. Scribit etiam Euthymius in Panoplia par. 2. tit. 23. vnum ex erroribus Bogomilum fuisse, Eucharistiam nihil esse aliud, quam Pater noster.

Alij Sacramentum Pœnitentiæ sustulerunt, ut Nouatiani, teste Epiphanio hæresi 59. & Augustino hæresi 38. Alij Sacramentum Ordinis nihil omnino esse dixerunt, ut quidam Taudemi sectatores, ut refert is, qui Sigeberti Chronicum supplēuit, ad annum Christi 1124.

Alij Extremam unctionem detestati sunt, ut Albigeneses, teste S. Antonino 4. par. tit. 11. cap. 7. §. 5. Summæ Theologicæ; &

4 *Cap. I. De Sacram. in genere. Lib. I.*

postea Flagellantes, teste Bernardo Lutzburgensi in Catalogo hæreticorum.

Alij denique Matrimonium sustulerunt, vt Enkratitę, teste Augustino hæresi 33. Manichęi, eodem Augustino teste hæresi. 46. & alij permulti.

QVARTA hæresis eorum fuit, qui certa Sacramenta non quidem tollebant, tamen non rectę intelligebant, vel administrabant. In iis erant Marcosij à Marco quodam, vetustissimi hæretici, qui Baptisum conferendum esse dicebant, non in nomine Trinitatis, sed in nomine ignoti Patris, in veritate matre omnium; in IESU, qui descendit; in vnitatem, & redemptionem, & potestatem communionem. ita refert Theodoretus lib. 1. de fabulis hæreticorum. Item Marcionitę, qui secundo & tertio homines baptizabant; vt Epiphanius refert hæresi 42.

Sic etiam permulti circa Eucharistiam errarunt, volentes quidem Sacramentum esse, sed non continere verum Domini corpus; vt quidam olim ipso ferę tempore Apostolorum, vt referunt Ignatius in epist. ad Smyrnenfes, & Theodoretus in 3. Dialogo, circa medium: ac deinde Berengarius, teste Lantfranco in lib. aduersus Berengarium: postea Ioannes Viclefus, teste Concilio Constantiensi sess. 8.

Quidam circa Pœnitentiam errabant, etiam si eam non tollerent, vt Audiani, qui confessiones audiebant, & à peccatis absoluebant, sed pœnitentiam non iniungebant, vt Theodoretus refert lib. 4. de fabulis hæreticorum.

Quidam errabant circa Ordines, quos etiam fœminis conferebant, vt Pepuritę, teste Epiphanius hæresi 49.

Hęc generatim de erroribus veterum dicta sint. similia nostro hoc seculo vidimus. Nam imprimis non defuerunt, qui omnia Sacramenta sensibilia, & corporalia contemnerent, qui certę noui Archontici nominati possent: id enim de Svvenckfeldianis testantur Fridericus Staphilus in lib. de concordia discipulorum Lutheri, & David Chytręus præfatione Commentariorum in Apocalypsim.

Lutherani ceteri, & Calvinistę omnes, etsi Sacramenta non tollunt omnia, omnia tamen virtute, & efficacia spoliant, vt olim faciebant Messaliani: vt enim illi orationi, ita isti fidei omnia tribuunt, Sacramentis autem planę nihil, nisi vt sint nuda signa, eaq̃ue non omninõ necessaria. Sic enim scribit

LUTHERVS in assert. I. articuli: *Hæretica, sed & sitata sententia est, Sacramenta noua legis dare gratiam iis, qui non ponunt obicem. Scriptura enim dicit: Iustus ex fide sua uiuet, non dicit, ex Sacramentis uiuet.* Hæc ille. Neque ab hac sententia vllus, quod sciam, ex hæreticis huius temporis dissentit.

Rursus non defuerunt hoc tempore, qui tollant è medio aliqua Sacramenta, licet non omnia. Nam Svvenckfeldianis exceptis, ceteri omnes duo Sacramenta recipiunt, Baptismū, & Eucharistiam; duo rejiciunt, Confirmationem, & Extremam vnctionem: Matrimonium recipiunt quidem, sed non pro Sacramento: de Pœnitentia, & Ordinatione inter se contendunt, vt postea explicabimus.

Denique non defuerunt etiam qui certa Sacramenta reciperent, sed erroribus admixtis. Nam Anabaptistæ Sacramentum Baptismi recipiunt, sed pro adultis, non pro infantibus. Zvvingliani recipiunt Sacramentum Eucharistiæ, sed corpus Dominicum esse negant. Lutherus Sacramentum Absolutionis non negat, sed nec integram confessionem, nec vllam satisfactionem requirit, aut admittit; nec verum ministrum Sacramenti huius agnoscit, vt patet ex assertione articulorum, quinti, sexti, septimi, octauī, noni, decimi. Deniq; ordinationem ministrorum omnes admittunt, sed nec agnoscunt verum ministrum, nec verum ritum huius Sacramenti.

Ita videmus omnes quatuor hæreticorum classes, quæ variis temporibus per M. D. annos Ecclesiam Catholicam vexauerunt, omnes simul hoc nostro seculo contra eandem Ecclesiam conspirasse. Sed quo duce de veteribus illis Catholica triumphauit, de nouis etiam sine dubio triumphabit: quandoquidem idem ille dux, nec vires amittere potest, & Ecclesiæ suæ semper se ad futurum certa testificatione promissit.

CAPVT SECVNDVM.

De mendaciis, & calumniis aduersariorum.

NCESSARIO prorsus annotanda sunt mendacia præcipuorum hostium Ecclesiæ, quodd hoc multum valeat ad auctoritatem detrahendam, ipso teste Luthero, qui ita scripsit quondam in libro contra Empserum: *Si semel deprehēderer, ita mentitus, falsus,*

6 Cap. II. De Sacram. in genere. Lib. I.

Et crasse stolidus; iam tota mea doctrina, Et honor, Et fides, Et fidelitas, sinem penitus haberent: Unusquisq; me pro nequam, Et infami nebulone, Et a quum est, habiturus esset: tum etiam, quod hoc ipsum vitium Catholicis tribuere impudentissimo mendacio Lutherus non erubuerit. Si enim scribit in libro aduersus Cochlaeum: Sed ego planè hoc tribuo diuinis Consiliis, Et Papa, Et Papista ferè nullos habeant patronos, nisi, qui vel insigni inscitia, vel mendaciis impudentibus semper suam auctoritatem iraducant, ne quis amplius per abominationem Romanam decipiatur. Et infra: Plorandam certè sortem Papa, quod sui non nisi mendaciis protecti in arenam descendunt. Hæc ille. Quæ verba in ipsum Lutherum aptissimè conueniunt, ut enim Ioannes Cochlaeus testatur in actis Lutheri anni XXIII. nullus ferè Catholicorum in Lutherum scripsit, quin cum multorum mēdaciōrum coarguerit, è quibus vnus Dieterbergius è duobus Lutheri libellis supra octingenta collegit mendacia. Denique nulla re magis nocent illi Ecclesiæ, quàm cum suis mendaciis persuadent populis, nos aliter sentire, & docere, quàm reuera sentiamus, & doceamus. Proinde res vtilissima est, eorum mēdacia detegere. Nos igitur solùm de Sacramentis mendacia quædam crassiora breuiter annotabimus:

Igitur LUTHERVS in lib. de captiuitate Babylonica cap. I. quod est de Eucharistia. PRIMO mentitur, cum ait: Non minor Concilium Constantiense, cuius auctoritas si valet, cur non valet Et Basileensis, quod cōtra statuit, Bohemis licere vtramque speciem sumere: quod iste adulator ignorans adducit pro suo somnio. Hæc ibi. Et sanè quod Constantiense, & Basileense Concilium inter se pugnent, quantum ad Communione[m] sub vna specie, mendacium impudentissimum est. Idem enim omnino statuunt Concilium Constantiense, sess. 13. & Basileense, sess. 30. nimirum laicos non teneri diuino iure ad vtramq; speciem sumendam, proinde seruandam esse Ecclesiæ legem, vel consuetudinem: quibus decretis non repugnat, quod Basileense Concilium concesserit Bohemis vtriusque speciei vsum, modò fateretur id sibi concedi ab Ecclesia, non autem ad hoc teneri diuino iure.

SECUNDO mentitur ibidem, cum ter, aut quater repetit, S. Thomam auctorem esse illius sententiæ, quam omnes Catholici tenent, quod in Sacramento altaris, non sit substan-

ria panis, & vini, sed accidentia solùm: quod est crassissimum mendacium. Nam Innocentius III. in Lateranensi Concilio, cap. I. (vt omittam testimonia antiquiora) hoc ipsum definiuit anno M. C. C. X V. quo tempore S. Thomas nondum erat natus.

TERTIO mentitur ibidem, cap. 2. quod est de Baptismo, cùm ait loquens de Scholasticis: *Afferunt impij homines, non debere hominem esse certum de remissione peccatorum, seu gratia Sacramentorum: qua impietate orbem totum demerant.* Hoc mendacium est ipso Luthero teste. Nam paulò infra idem ipse verissimè sic dicit: *Omnes tamen admittunt Sacramenta esse signa efficacia gratia.* Non igitur iubemus homines dubitare de gratia Sacramenti, cùm dicamus esse signa efficacia gratiæ. Iubemus quidem dubitare de propria dispositione, & proinde de consequutione gratiæ; sed hoc non est dubitare de gratia Sacramentorum. Non enim efficacia Sacramenti pendet ex mea dispositione, sed ex diuina institutione: quomodo qui oculos claudit, non potest videre solem, & tamen non ppter ea dubitat de efficacia solis ad illuminandum. Neque hoc Lutherani negare possunt; nam Lutherus in libro contra rebaptizantes, quem edidit anno M. D. XXVIII. sic ait: *Baptismus non est fundandus supra fidem baptizantis, vel baptizati, quia vterque incertus est de fide, aut saltem in periculo, & tentatione consistit.* Et in sermone de Baptismo, habito anno XXXV. *Vt Baptismus, inquit, certus sit nobis, ideò non fundat eum Deus supra fidem nostram, cùm illa possit incerta, & falsa esse; sed supra Verbum, & institutionem suam.* Hec ille. Non ergo dissentimus à Lutheranis (vt Lutherus mentitur) quod nos dubitemus de gratia Sacramenti, illi non dubitent; sed quòd nos dubitemus de consecutione gratiæ, ob nostram indispositionem, illi autem nò dubitent, mira temeritate, cùm fateantur sine fide Sacramenta non prodesse, & simul admittant facilè hominem decipi, cùm putet se credere, & tamen reuera non credat.

QUARTO mentitur ibidem, cùm sic ait: *Esto contemptor Magistri Sententiarum cùm omnibus suis scribentibus, qui tantum de materia, & forma Sacramentorum scribunt, dum optimè scribunt, id est, mortuam, & occidentem literam Sacramentorum tractant: ceterum spiritum, vitam, & usum, id est, promissionis diuinæ veritatem, & nostram fidem prorsus*

intacta relinquunt. Mendacium est apertissimum; nam de fide suscipientis Sacramenta, & recto usu multa disputat Magister sententiarum libro 4. dist. 4. & 9. & Scholastici ibidem. Verius de Magistro scripsit Franciscus Stancaricus in libro de Trinitate, & Mediatore: Ego, inquit, indico Unum Petrum Lombardum pluris esse, quàm centum Lutheros, ducentos Melanchthones, trecentos Bullingeros, quadringentos Petros Martyres, & quingentos Calvinos: qui omnes si in mortario contunderentur, non exprimeretur Una Vncia Vera Theologia, praesertim in articulo de Trinitate, Incarnatione, Mediatore, & Sacramentis.

QVINTO mentitur, cùm ibidem sic loquitur: *Et hinc impulsus sunt tantum tribuere Sacramentis noua legis, & ea statuerent, prodesse etiam iis, qui in peccatis mortalibus sunt, nec requiri fidem, aut gratiam, sed sufficere, non posuisse obicem, hoc est, actuale propositum denuò peccandi. Et infra: Prodesse dicunt ea etiam impiis & incredulis, modò non ponant obicem, quasi ipsa incredulitas non sit omnium obstinatissimus, & hostilissimus obex gratiae.* Hæc ille. Quam sententiam sæpe repetunt tum ipse, tum etiam filij, & sectatores eius; nec solum veri Lutherani, sed etiam Calvinus iisdem verbis utitur in Antitoto, scels. 7. can. 5. & 6. Vbi tria nobis tribuunt. VNVM quòd dicamus, Sacramenta prodesse iis, qui sunt in peccato mortali: quod quidem verissimum est, modò peccatores pœnitentiam agere velint; nam Baptismus & Absolutio ad hoc sunt instituta, vt peccata remittant. Et certè mirum est, hoc nobis tanquam errorem tribui à Lutheranis, cùm ipsi velint omnia Sacramenta habere promissionem reconciliationis, ac remissionis peccatorum: de qua re infra dicemus. Si verò loquantur de peccatoribus impœnitentibus, est merum mendacium, quod Catholici dicant, Sacramenta prodesse peccatoribus: omnes enim Catholici requirunt pœnitentiam, tanquam dispositionem ad gratiam recipiendam.

DEINDE nobis tribuunt, quòd dicamus non requiri gratiam ad hoc, vt nobis prosint Sacramenta: quod quidem mendacium est manifestum. Nam si per gratiam intelligant fauorem Dei, vt ipsi ordinariè intelligunt, omnes Catholici dicunt, iustificationem à peccatis dari in Sacramentis ex gratia Dei, & merito Christi, non ob merita accedentis. Si verò per gratiam intelligant inhaerentem qualitatem, qua formaliter iustifica-

iustificamur; Fatemur hanc non requiri ante perceptionem aliquorum Sacramentorum, vt Baptismi, & Pœnitentiæ, quod etiam ipsi fateri coguntur, qui volunt Sacramenta habere promissionem remissionis peccatorum: tamen hanc ipsam dicimus infundi in ipsa perceptione Sacramenti; proinde mera calumnia, & mendacium est, quod Catholici non requirant gratiam, vt Sacramenta profint.

TERTIO nobis tribuunt, quòd dicamus non requiri fidem, & quòd incredulitatem non habeamus pro obice impediēte Sacramentum: in quo etiā apertissimè mentiuntur. Nam vel loquuntur de substantia Sacramēti, vel de fructu Sacramenti: si de substantia, nec nos, nec ipsi, requirimus fidem. Nam omnes Catholici docent cum S. Augustino lib. 4. de Baptismo, cap. 12. verum esse Baptismum, quē sine vera fide hæretici recipiunt. Et idem docet Lutherus in homiliis de Baptismo, & in lib. contra rebaptizantes; necnon etiam Caluinus lib. 4. Instit. cap. 14. §. 16. Si verò loquuntur de fructu Sacramenti, falsum est, Catholicos nō habere pro obice incredulitatem: omnes enim Catholici requirunt necessariò in adultis actualem fidem, & sine ea dicunt neminem iustificari. Vide Magistrum lib. 4. dist. 4. & S. Thomam 3. par. q. 68. artic. 8. Item Ius canonicum, quod Lutherus combussit, de consecratione dist. 4. per multos canones.

Occasio huius fraudis fuit, quòd Catholici non requirant in Sacramentis fidem illam specialem, quam aduersarij solam esse putant veram fidem iustificantem. Sed (vt omittam quòd ista non est vera fides, sed opinio temeraria) si idè verè nobis tribui posset, quod non requiramus fidem in Sacramentis, quia non requirimus fidem illam specialem; nos etiam illi tribuere possemus, quòd non requirant fidem in Sacramentis, quia non requirunt eam fidem, quam nos solam docemus esse veram fidem.

Ceterum si candidè agendum sit, distinguendæ sunt quæstiones. Aliud enim est quærere, an in Sacramentis requiratur vera fides, aliud autem, quānam sit vera fides. Et quidem in priore quæstione conuenimus, in posteriore dissidemus.

Porro de infantibus non potest esse quæstio, tum quia ipsi nec ponunt, nec possunt ponere obicem incredulitatis: incredulitas enim non est non credere, sed nolle credere: tum etiam quia infantes sicut peccauerunt aliena voluntate, & sunt

auerſi à Deo habitualiter; ita ſatis eſt, ſi credant aliena voluntate, & conuertantur habitualiter per infuſionem fidei, ſpei, & charitatis. Vnde Philippus in locis anni XLI. cap. de vſu Sacramentorum dicit, de adultis ſolùm eſſe intelligẽdum, quòd oporteat eos actu credere.

SE^XT^O mentitur in aſſertione i. articuli, vbi Scotum facit auctore illius ſententiæ, quòd Sacramenta conferant gratiam non ponenti obicem: quam ſententiam ipſe hæreticam vocat. Sed mentitur apertiſſimè. Nam Innocentius III. idem docuerat, cap. Maiores, de Baptiſmo, & eius effectu; longo tẽpore antè quàm Scotus naſceretur: necnon S. A^VG^VSTINVS in epiſt. 23. ad Bonifacium, vbi poſteaquam dixerat, paruulis prodeſſe Baptiſmum etiam ſi actu non credant; ita loquitur: *Hoc qui non credit, et fieri non poſſe arbitrat, profeò infidelis eſt, etiam ſi habeat fidei Sacramentum: & longè melior eſt ille paruulus qui etiam ſi fidem nondum habeat in cogitatione, non tamen ei obicem contraria cogitationis opponit; Vnde Sacramentum eius fideliter percipit.*

SE^PT^IM^O mentitur ibidem, cùm ait, Scotiſtas nõ requirere in vſu Sacramenti fidem, nec bonum propositum, ſeu bonum motum cordis. Quod mendacium refellit Roſſenſis ex ipſis verbis Scoti, qui in 4. diſt. 4. q. 2. diſertis verbis docet, requiri fidem & contritionem, ſeu attritionem. Vide etiam q. 5. in principio, & in reſponſ. ad vltimum. item diſt. 17. q. 1.

OC^TA^VO mentitur in homil. vlt. de Baptiſmo, vbi ſic ait: *Huc impietatis ventum eſt, & ſali, & aqua contra verbum & mandatum ſacrata, tãtundem virtutis & energia tribuerint, quantum venerabili Baptiſmi Sacramento.* Hic ſunt duo mendacia. V^NV^M, quòd nos contra Dei mandatum, & verbum cõſecremus ſalem, & aquam; nullum enim verbum, ſeu mandatum exſtat, quo id prohibeatur. Quid, quòd ipſe idem Lutherus lib. de captiuit. Babyl. cap. de Extrema vnctione, contrarium docet? Sic enim ait: *Igitur, inquit, hoc Vnctionis extrema noſtrum Sacramentũ non damno, ſed hoc eſſe, quòd ab Apoſtolo Iacobo præſcribitur, conſtanter nego, cùm nec forma, nec & ſus, nec virtus, nec finis eius cum noſtro conſentiat: numerabimus tamen ipſum inter ea Sacramenta, quæ nos conſtituimus; & ſunt ſalis, & aqua conſecratio, & aſperſio: neq; enim negare poſſumus, creaturam quamlibet per verbum Dei, et orationem ſanctificari, quod Apoſtolus Paulus nos docet.* Hæc ille.

ALTERVM mendacium est, quòd eandem vim tribuamus aquæ benedictæ, & Baptismo: id enim nullus vnquam Catholicorum docuit; alioqui non septem Sacramenta, sed multò plura faceremus. Hæc pauca ex Luthero sufficiant.

CAPVT TERTIVM.

Mendacia Philippi.

PRIMO in ipsa Confessione artic. 13. damnat Scholasticos, quòd non doceant requiri fidem in vsu Sacramentorum. Sed fusiùs, & clariùs exposuit mètem suam in Apologia eiusdem articuli, vbi sic ait: *Hic damnamus totum populum Scholasticorum Doctorum, qui docent, quòd Sacramenta non ponenti obicem, conferant gratiam ex opere operato, sine bono motu Srentis. Hac simpliciter Iudaica opinio est, sentire, quòd per ceremoniam iustificemur, sine bono motu cordis, hoc est, sine fide; & tamen hac impia, & superstitiosa opinio magna auctoritate docetur in toto regno Pontificio.* Hæc ille.

Hoc mendacium est longè impudentius mendaciis Lutheri. Nam Lutherus non accusabat omnes, sed Scotistas tantum. Philippus autem totum populum Scholasticorum damnat; immò etiam totum regnum Pontificium. Esse autè mendacium apertissimum, tam est manifestum, vt probatione nõ egeat. Nam, vt suprà diximus, omnes Scholastici cum Magistro lib. 4. dist. 4. requirunt actualem fidem, quæ sine motu cordis esse non potest: & ipse idem Philippus in Apologia articuli de Pœnitentia, dicit, Catholicos requirere contritionem vel attritionem. Et quid est cõtritio, vel attritio, nisi motus cordis?

SECUNDO in ipsa etiam Confessione Augustana in articulo de Missa: *Falsò, inquiunt, accusantur Ecclesia nostra, quòd Missam aboleant: retinetur enim Missa apud nos, & summa reuerentia celebratur.*

Hoc esse mendacium, probare possumus ex articulis Smalchaldicis, qui non minoris sunt auctoritatis apud Lutheranos, quàm ipsa Confessio; vnde etiam simul cum ipsa Confessione ponuntur in libro Concordiæ. In illis igitur articulis sic legimus: *Ceterum Draconis cauda ista (Missam intelligo) peperit multiplices abominationes, & idololatrias.* Et paulò antè: *Abrogan-*

12 *Cap. III. De Sacram. in genere. Lib. I.*

Abroganda merisò Missa est. Hæc illi. Si igitur Missa, vt cauda Draconis abroganda est, cur eam non abrogârunt? aut, si abrogârunt, cur queruntur accusari se, quòd Missam aboleuerint? **DICENT** fortassè se Missam Papisticam aboleuisse Christianam autem retinere; nimirum Sacramenti distributionem, & perceptionem: hoc enim Philippus vocat Missam in Apologia. **AT** non accusantur à nobis Lutherani, quod istam Missam, id est, Communionem aboleuerint, sed quod veram Missam, id est, oblationem, & totum Canonem sustulerint. Itaque si per Missam intelligunt, Communionem, mendacium est, quòd accusentur: sin autem intelligunt, oblationem, mendacium est, quod falsò accusentur.

TERTIO mentitur in eodem articulo: *Veteres, inquit, ante Gregorium non faciunt mentionem priuata Missæ.* Idem repetit in Apologia eiusdem articuli.

Sed si per Missam priuatam intelligat Missam, quæ dicatur nomine priuato, aut quæ vni tantùm prosit, mentitur eiusmodi Missam cœpisse post Gregorij ætatem: nulla enim est, nec fuit vnquam Missa priuata ad istum modum: omnis enim Missa publica est, cùm celebretur à Sacerdote, vt est publicus minister, & pro communi, & publica vtilitate totius Ecclesiæ. Si verò per Missam priuatam intelligat Missam, quæ ab vno Sacerdote dicatur sine distributione Eucharistiæ populo facta, mentitur eiusmodi Missas non fuisse ante Gregorij tempora. Nam **AVGVSTINVS** lib. 22. ciuit. cap. 8. meminit Missæ priuatae: scribit enim vnum ex suis presbyteris sacrificium corporis Domini obtulisse in domo rustica cuiusdam nobilis viri, quæ vexabatur infestatione malignorum spirituum, & continuo eam domum liberatam fuisse: *Perrexit, inquit, vnus, obtulit ibi sacrificium corporis Christi, orans quantum potuit, & cessaret illa vexatio, Deoq; protinus miserante cessauit.* Hæc ille. Hic certè Augustinus qui ducentis annis Gregorium præcessit, meminit Missæ dictæ ab vno, in loco priuato, sine distributione Sacramenti populo facta; & quæ Deo gratissima fuerit, vt euentus probauit.

QUARTO mentitur in eadem Confessione Augustana, in artic. de Confessione, vbi sic ait: *Antea immodicè extollebantur satisfactiones, fidei Verò, & meriti Christi, ac iustitia fidei, nulla fiebat mentio.* Atque ita quidem loquitur in Confessione, in Apologia autem artic. 11. ita rem exaggerat: *Nunc, inquit,*

quit, de hac fide consequente remissionem peccatorum, nulla est syllaba in tanta mole Constitutionum, Glossarum, Summarum, Confessionalium, nusquam ibi Christus legitur. Et infra in Apologia artic. 15. *Exstant, inquit, immensi libri, immò bibliotheca tota: nullam syllabam de Christo, de fide in Christum, &c.*

Hæc tam magna sunt mendacia, vt mirū sit, si ea tota Germania capere possit. Nullus enim est liber Catholicus, in quo de Sacramento vllō agatur, quin in eo sæpe fides, & Christus nominentur. Certè S. Thomas, qui minimè obscurus est auctor, 3. par. q. 62. artic. 5. dicit, & probat Sacramenta omnia vim habere ex meritis Christi, & eiusdem Christi merita per fidem nobis applicari.

CAPVT QVARTVM.

Mendacia Caluini.

VENIO nunc ad CALVINVM, qui lib. 4. Instit. cap. 14. §. 14. sic ait: *Magno consensu Sophistica schola tradiderunt, Sacramenta noua legis iustificare, & conferre gratiam, modò non ponamus obicem peccati mortalis. Qua sententia dici non potest, quàm sit exitialis, & pestilens, eoq; magis, quod multis antè seculis magna Ecclesia iactura in bona orbis parte obtinuit. Planè certè diabolica est; nam dum iustitiam citra fidem pollicetur, animas in exitium precipites agit.* Hoc est mendacium PRIMVM, quòd citra fidem polliceamur iustitiam in Sacramentis: quod suprà refutatum est. Interim obseruanda sunt, quæ Calvinus confitetur vera, nimirum magnum consensum esse inter Catholicos, item multis seculis doctrinam nostram viguisse, denique in bona orbis parte receptam: cùm de ipsis omnia sint contraria, nimirum nullus est inter eos cōsensus; doctrina recens, & hoc seculo nata; & vix vnā, aut alterā prouinciā occupauit: etsi enim multi sunt hoc tempore hæretici, nulla tamen vna hæresis admodum latè patet.

SECUNDVM mendacium est in eodem cap. §. 17. *Interim inquit, illud tollitur figmentum, quo iustificationis caussa, virtusq; Spiritus sancti elementis, ceu Vascularis, ac plaustris includitur.* Hoc verè figmētum est, quod nobis Calvinus affingit,

Non

14 *Cap. IV. De Sacram. in genere. Lib. I.*

Non enim Catholici dicunt, causam iustificationis in Sacramentis, ut in vasis includi, sed ipsa Sacramenta causas instrumentales iustificationis faciunt. Sed nec virtutem Spiritus sancti, id est, vim illam, quam Deus tribuit Sacramentis ad iustificandum, ullus Catholicus docet contineri in Sacramentis, sicut in vasis, virtus enim illa est id, per quod Sacramentum operatur. Sed fortè Caluinus ex eo mentiendi ansam accepit, quòd interdum Catholici gratiam in Sacramentis, ut in vasis contineri dicunt. Gratia enim effectus est Sacramenti, proinde in Sacramento continetur, ut quilibet alius effectus in sua causa: omne autem quod continet, saltem metaphoricè, vas dici potest. Adde quòd potest etiam vas accipi pro instrumèto: qua significatione elegàter Dauid Psal. 7. vocat sagittas, vasa mortis, & Ezechiel, cap. 9. vocat arma, vasa interitus, quia sagitta, ceteraque arma causæ instrumentales sunt mortis. Neque id negare potest Caluinus, cùm in Antidoto Concilij Tridentini, sess. 7. can. 4. & 5. affirmat Sacramenta esse causas gratiæ conferendæ instrumentales.

TERTIUM mendacium est in eodem cap. §. 26. vbi sic ait: *Quidquid de opere operato nugati sunt Sophista, non modò falsum est, sed pugnat cum Sacramentorum natura, qua instituit Deus, ut fideles vacui bonorum omnium, & inopes, nihil præter mendicitatem eò adferant. Vnde sequitur, ea recipiendo nihil istos agere, unde laudem mereantur, vel in hac actione, qua eorum respectu merè passiva est, nullum illis posse opus adscribi.* Hoc mendacio testatur ignoratiam, vel malitiam suam Caluinus: non enim opus operatum vocant Theologi opus aliud meritorium eius, qui Sacramentum suscipit, vel ministrat, ut Caluinus dicit; id enim opus operantis appellamus. Quid autem sit opus operatum, infra suo loco dicemus. Illud hoc loco notasse sufficiat, opus operatum non pendere à bonitate ministri, meritum autem pendere.

QUARTUM est mendacium, cap. 17. §. 43. vbi dicit in Sacramento Eucharistiæ primum, qui azymo pane uti cœpit, fuisse Alexandrum Romanum Pontificem: *Primus, inquit, azymo pane delectatus est: quia id ratione, nò video, nisi ut plebis oculos in nouo spectaculo in admirationē traheret magis, quàm ut animos probare religione institueret.* Hoc verò mendacium cum Euangelio apertè pugnat. Scribunt enim Matthæus cap. 26. Marcus 14. & Lucas 22. Dominum cœnā fecisse primo

primo die azymorum proinde non Alexander Papa, sed Christus primus fuit, qui azymo pane in Sacramento usus est.

QVINTVM est cap. 19. §. 12. vbi sic ait: *Veteres dum propriè loquuntur, nusquam plura duobus Sacramētis recensent.*] Refellit hoc mendacium S. CYPRIANVS (vt nunc ceteros omittam) qui lib. 2. ep. 1. nō solūm Baptismum, & Eucharistiam, sed etiā Confirmationē vult esse propriè Sacramētum. Nam de Confirmatione sic loquitur: *Tunc plenè sanctificari, et esse Filij Dei possunt, si Sacramento & itaq; nascātur.* Et S. AVGVSTINVS lib. 2. contra literas Petiliani, cap. 104. *Sacramentum Christianitatis, inquit, in genere visibilibus signorum, sacrosanctum est, sicut ipse Baptismus.*

SEXTVM est ibidem, vbi Calvinus addit de ipsa Confirmatione: *De manu impositione loquuntur veteres, sed an Sacramentum vocant? Augustinus apertè affirmat, nihil aliud est, quàm orationē.*] Refellunt hoc iidem auctores verbis citatis.

SEPTIMVM est in eodem cap. 19 §. 34. vbi sic ait: *Matrimonium, & à Deo institutum, fatentur omnes, ita pro Sacramento datum, nemo &sq; ad Gregorij tempora viderat.*] Atqui sanctus AVGVSTINVS, qui CC. ferè annis S. Gregorio vetustior fuit, lib. de bono coniugali, cap. 18. sic ait: *In nostrarum nuptiis plus valet sanctitas Sacramenti, quàm fecunditas &teri.* Et lib. 1. de nuptiis, & concupiscentia, cap. 10. ter Matrimonium Sacramentis annumerat: vt etiam alibi passim.

OCTAVVM est in Antidoto Concilij, less. 7. cau. 13. vbi sic ait: *Conqueruntur, vel saltē gemunt omnes p̄j, pluris in Baptismo fieri Chrisma, cereum, salis saporem, sp̄sū deniq; quàm aqua lauacrum, quo tota constat Baptismi perfectio.* Idem repetit in lib. de formula ministrandi Sacramēta. Hic Calvinus Lutherum mentiendo superare studuit. Ille enī (vt suprā notauimus in vltimo mendacio) solūm dicebat, nos æquare has cæremonias Baptismo; iste autem dicit, nos antepone. Sed vterque mentitur. Nam Catholici adeò non anteponunt, vel æquant ista Baptismo, vt dicant esse præparationes ad Baptismū; item accidentales cæremonias, si conferantur cum ipsa ablutione, in qua consistit substantia Baptismi. Denique fatentur omnes Catholici, simplicem Baptismum sine cereo, sine sale, sine oleo, aliisque rebus sufficere ad iustificationem: res autem illas omnes non sufficere. Vide Magistrum, & Doctores ceteros in 4. dist. 6.

CAPVT QVINTVM.

Mendacia Kemnitij.

MARTINUS KEMNITIVS multa repetit ex mendacijs Lutheri, & Caluini; multa etiam addit propria. Sed quia longum esset omnia referre, solum pauca quædam annotabo ex principio 2. partis Examinis, vbi agit de Sacramentis in genere.

PRIMO igitur in Examine edito anno M. D. LXVI. in octauo, pag. 14. sic mentitur: *Quomodo per Matrimonium, quod Syricius Pontifex definit, esse secundum carnem viuere, quod Deo placere non possit; quomodo, inquam, iustitia fidei per Matrimonium, vel incipit, vel augetur, vel reparatur iuxta ipsorum Sacramenti descriptionem in decreto positam.*] Desumptum est hoc mendacium ex epist. i. Syricij, cap. 7. vbi sanctus ille Pontifex probare volens, debere Sacerdotes continere se etiam ab vxore, assumit pro argumento illa verba Roman. 8. *Qui in carne sunt, Deo placere non possunt.* Hinc igitur deducit Kemnitius, Matrimonium, auctore Syricio, nihil esse aliud, quam vitam secundum carnem, quæ Deo placere non potest.

Sed debuit Kemnitius aduertere, Syricium non loqui de coniugio iusto, & legitimo, sed de coniugio Sacerdotum, quod illegitimum est, & solo nomine coniugium, re autem ipsa facrillega impudicitia. Nam in eadem epist. cap. 4. iam antè dixerat, legitimas nuptias in Ecclesia per Sacerdotem benedici: & cerè non voluit dicere, benedici in Ecclesia vitam secundum carnem, quæ Deo placere non potest. Itaq; legitimi coniuges possunt ita viuere, vt placeant Deo, & dicantur non esse in carne, sed in spiritu, si vxore sua legitima legitimè vtantur: at Sacerdotes, quibus nuptiæ interdictæ sunt, nō possunt vxores ducere, aut illis vti, quin Deo displiceant, & secundum carnem viuant: & hoc est, quod verissimè scripsit Syricius.

SECUNDO mentitur pag. 39. vbi loquēs de Ordinis & Matrimonij Sacramentis, sic ait: *Et si Richardus disputat etiam per istos ritus conferri gratiam gratum facientem: reliqui tamen agnoscunt, hoc subsistere non posse.*] Hoc mendacium impudentissimum est, cum omnes ferè Theologi idem dicant, quod Richardus dicit. Sufficiet hoc loco testimonium sancti THOMAE, qui 3. par. q. 65. artic. i. docet, & probat, septem esse nouæ

nouæ legis Sacramenta; & in responsione ad vltimum sic ait:
In quolibet Sacramento noua legis gratia infunditur.

TERTIO mentitur pag. 40. vbi quærens de aqua benedicta, rosa benedicta, ense benedicto, & similibus rebus; cur non sint Sacramenta, sic ait: *Aliquid quidẽ respondet Scholastici, aliud aliud, sed tamẽ nec seipfos expediunt, nec Lectoribus satisfaciunt, nisi quod Gabrielis ingenuitas probatur, qui dicit, aquam benedictam non esse Sacramentum, quia desit diuina institutio.*

DVO sunt hîc mendacia. VNUM quod Scholastici multum laborent, vt ostendant, cur aqua, & rosa, & similia, cum in Ecclesia benedicuntur, nõ sint Sacramenta. At Scholastici aded leuiter hoc expediunt, vt multi ne attingant quidem vt per se notum, alij obiter tantum explicent. Nihil enim horum est signum efficax gratiæ iustificantis, quod est præcipuum in omnibus Sacramentis.

ALTERVM est mendacium, Gabrielem ingenuè confiteri, nihil deesse aquæ benedictæ, quo minus sit Sacramentum, nisi diuinam institutionem. Est, inquam, hoc verissimum mendacium, quia Gabriel in 4. dist. 1. q. 1. artic. 1. vbi de hac re agit, dicit quidem, aquam benedictam non esse à Dco institutam, sed ab Ecclesia, & ided non esse Sacramentum, sed non dicit, nihil aliud ei deesse, nisi diuinam institutionem, immò aperte indicat, alia etiam multa ei deesse. Nam non disputat eo loco propriè de aqua benedicta, sed explicat definitionem Sacramenti: & quia dixerat, ad Sacramenta requiri diuinam institutionem, inde deducit à Sacramenti definitione excludi aquam benedictam, lotionem balnei, & omnia signa naturalia. Quocirca sicut non licet colligere ex hac eius disputatione nihil deesse ad lotionem balnei, quod minus sit Sacramentum, nisi diuinam institutionem, ita non licet colligere, nihil deesse ad aquam benedictam, nisi diuinam institutionem, quod minus sit Sacramentum.

QUARTO mentitur pag. 94. & 95. vbi tot sunt ferè mēdacia quot verba: *Quidam, inquit, Et Alensis, Thomas, Durandus, etc. senserunt ipsis externis Sacramentorum elementis per Verbum conferri quandam Virtutem supernaturalem.*] At non videtur legisse hos auctores: Siquidem Durandus contrarium docet, & S. Thomam oppugnat in 4. dist. 1. q. 4.

QUINTO mentitur ibidem, cum ait: *Addunt autem, Et ostendans, nec se, nec alios, quod discunt intelligere, esse ens in-*

completum (Sic inditam Sacramentis) quod per se non sit in aliquo ex decem prædicamentis.] Sed Kemnitium non intelligere quid Scholastici dicant, facile credi potest. Illos autem ipsos non intelligere motionem, hanc enim plerique vocant vim Sacramentis inditam, esse ens incompletum, quod per se in nullo prædicamento sit, mendacium est manifestum. Non enim ullus est vel mediocriter peritus Physicæ, aut etiam solius Logicæ, quin sciat motum esse ens incompletum, & ad nullum prædicamentum per se pertinere.

SEXTO mentitur ibidem, cum ait, Cyprianum existimasse, Baptismum esse inutilem, qui conferebatur ab hæreticis, & malis ministris. Nam Cyprianus ubique distinguit malos ministros Catholicos ab hæreticis, & malos quidem affirmat inutiliter baptizare, hæreticos autem ⁱⁿutiliter. Malè igitur Kemnitius coniungit ex sententia Cypriani, quos Cyprianus ipse disiungit. Vide Augustinum explicantem Cypriani sententiam, lib. 4. de Baptismo, cap. 10. & lib. 6. cap. 12. & ipsum Cyprianum in epistolis ad Iubaianum, ad Pompeium, ad Stephanum, & ad Quirinum.

SEPTIMO mentitur pag. 95. cum sic ait: *Illæ Verò opinio, quod in ipsis Sacramentorum elementis gratia essentialiter continetur, sicut medicina in pixide, ita & Virtus Sacramentorum sit vel essentia, vel qualitas hærens in corporalibus Sacramentorum elementis; etiam inter Scholasticos Scriptores, non fuit omnibus probata, & Bonaventura, Richardo, &c.* Hic satis prodit suam imperitiam Kemnitius, & simul audaciam, cum ea reprehendit, quæ non intelligit. Nam imprimis confundit gratiam cum virtute Sacramentorum, cum tamen sint res diversissimæ. Gratia enim est effectus Sacramenti, virtus autem id, per quod Sacramentum operatur. Quocirca gratiam contineri in Sacramentis nullus Catholicus negat, virtutem autem illam Physicam non omnes admittunt. Deinde gratiam essentialiter, id est, ipsam essentiam gratiæ hære in Sacramentis, ut medicinam in pixide, nullus etiam Catholicorum dicit: Fatentur enim omnes gratiam hære in anima, non in Sacramentis. Ponunt tamen, ut supra diximus, eam in Sacramento, ut in vase, metaphoricè accipiendo nomen vasis; quomodo dicuntur tela vasa mortis, quia in eis mors continetur, ut effectus in causa.

OCTAVO mentitur ibidem, cum ait: *Fuerunt etiam qui*
Virtu-

Virtutem Sacramentorum in ipso opere, quo Sacramenta vel celebrantur, vel suscipiuntur, constituerunt: ita ut Sacramenta dicerentur conferre gratiam ex dignitate, & merito operis, quod exercet vel is, qui celebrat, vel qui suscipit. Hoc etiam mendacium testis est imperitiæ Kemnitianæ, quanquam nō est eius proprium, sed à Caluino illud accepit. Vide suprā in 3. Caluini mendacio. Plurima sunt alia in Kemnitio, hæc enim solū ex initio libri decerpta sunt.

CAPVT SEXTVM.

Mendacia Tilemanni Heshusij.

Tilemannus HESHVSIVS, qui se Episcopum Sambiensem vocat, librum scripsit de sexcentis erroribus Pontificiorum; qui liber non habet vel vnam micam salis: colligit enim errores tam inconsideratē, vt vel sint mera mendacia, vel contradictorij eorum sint hæreses apud omnes Lutheranos.

Ac vt solum, caussa exempli, discutiamus locū 15. qui est de Sacramentis, tertius error, quem notat, est desumptus ex CATECHISMO Romano in hæc verba: *Virtutem, quæ ex passionē Christi manat, hoc est, gratiam, quam ille nobis in ara crucis meruit, per Sacramenta, quasi per aluum quandam in nos ipsos deriuare oportet.* Hæc ille. Vbi primum corripit verba Catechismi Romani; siquidem ex alueo, quæ vox est in Catechismo, iste fecit aluum, vt sordidam, & ridiculam faceret Catechismi sententiam. Deinde sententia Catechismi non potest damnari, quin damnentur etiam omnes Lutherani. Sume enim sententiam contradicentem, quæ sine dubio hæc erit; Christus in cruce non meruit nobis gratiam, vel si meruit, ea tamen non deriuatur ad nos per Sacramenta quasi per alueum. At certè hanc sententiam Lutherani omnes damnant, quippe qui volunt gratiam ex Christi passione nobis per verba & Sacramenta offerri, & applicari. Neque refert quod ipsi non nominant alueum: nam nominant instrumentalem causam, quod est longè amplius, quàm alueus. Vide Kemnitium in 2. parte Examinis, pag. 97. & Caluinum in Antidoto Concilij, sess. 7. can. 4.

Quintus error apud Tilemannum est, quod Sacramenta veteris legis non impresserint characterem, qui est signum spirituale.


rituale. Sume igitur contradicentem, nimirum; Sacramenta veteris legis imprimebant characterem spirituales; & quære si vel ab vno ex Lutheranis approbetur. Lutherani enim non anteponunt vsquam, licet ferè æquent, Sacramenta legis veteris Sacramētis nouę legis; & tamen summo consensu negāt, Sacramenta nouę legis imprimere characterem. Id quod negat etiam ipse Heshusius ibidem in 7. errore.

Nonus error est, quòd non requiratur bonus motus interior in suscipiente Sacramentum. Hunc errorem tribuit Heshusius Gabrieli lib. 4. sent. dist. 1. q. 3. Sed verba Gabrielis, quæ ipse citat, detegunt fraudem. Nam Gabriel non dicit non requiri motum interiorem, cùm apertè requirat fidem, & pœnitentiam cum omnibus aliis Doctoribus, sed dicit cum Scotto, non requiri motum interiorem, qui sit meritorius gratiæ de congruo, vel de condigno. Scotus enim, & Gabriel, & multi alij docent, motus quosdam interiores esse meritorios de congruo iustificationis, sed addunt, quod si aliquādo isti motus non sint tam perfecti, vt mereantur, de cōgruo, tamen sufficere cum Sacramento ad iustificationem.

Decimus error est, quod Sacramenta veteris legis nō contulerint gratiam, neque ex opere operato, neque ex opere operantis, seu per modum meriti, etiam si in fide, & charitate fierent. Hæc ille. Sed accipe contradicentem propositionem, & dic; Sacramenta legis veteris contulerunt gratiam ex opere operato, vel ex opere operantis, seu per modum meriti. Atqui hæc tota est hæretica omnibus Lutheranis. Nam omnes excrantur, quod dicimus de opere operato; & multò magis, quod dicimus de opere operantis. Sacramenta enim gratiam conferre ex opere operantis, est gratiam conferre ex dignitate, & merito operis; ipsi autem nullum agnoscūt opus dignum aut meritorium, sed omnia esse volunt peccata mortalia, atq; in primis idem Heshusius in eodem lib. tit. de iustificatione, de lege, de operibus.

Decimus tertius error est ex Concilio TRIDENTINO desumptus, sess. 7. can. 13. *Docent, inquit, sine externis Papisticis ritibus, nec veritatem, nec dignitatem, nec efficaciam Sacramentorum consistere.* Hæc ille. At hæc impudētissima impostura est: Concilium enim nihil eiusmodi docet. Hæc enim sunt verba Concilij, quæ ibidem ponit Heshusius, vt nimirum non solum sit, sed etiam habeatur impostor: *Si quis dixerit rece-*

rit receptos, & approbatos Ecclesia Catholica ritus in solenni administratione Sacramentorum adhiberi consuetos aut contemni, aut sine peccato à ministris pro libito omitti, aut in novos alios per quemcunque Ecclesiarum pastorem mutari posse, anathema sit.



CONTROVERSI A

P R I M A,

De nomine Sacramenti.

CAPVT SEPTIMVM.

Sitne vtendum nomine Sacramenti.



DE NOMINE SACRAMENTI DVAE SVNT controuersia hæreticorum, tum ipsorum inter se, tum nobiscum. VNA, Sitne hoc nomen vsurpandum. ALTERA, quid propriè significet hæc vox Sacramentum.

Quod attinet ad priorem, Martinus Lutherus initio nouæ suæ prædicationis visus est ab hoc nomine non parum abhorre- re. Nam in lib. de captiuit. Babyl. quam edidit anno XX. cap. de Matrimonio: *Non habet*, inquit, *vn- uersa Scriptura sancta hoc nomen Sacramentum in ea signifi- catione, qua noster & sus, sed in contraria. Vbiq; enim significat, non signum rei sacra, sed rem sacram, secretam, & absconditã.* Deinde in lib. de abroganda Missa, quem edidit anno XXI. *Pia*, inquit, *& fidelis conscientia meritò & dignè pauere de- bet, ne hoc sacrificium appellet, aut credat, quod certissima est apud Deum & in Scripturis non dici sacrificium, & hoc solum appellet sacrificium, quod constat à Deo vocari sacrificiũ.* Qua enim furentior est temeritas, quàm sic os in cælum ponere, & hoc sacrificium, & cultum Dei dicas, quod ille non dicit sacri- ficiũ & cultum Dei? Hæc ille. Cùm igitur Lutherus affirmet, vocem Sacramentum non esse in Scriptura in eo sensu, quo Ecclesia vtitur Sacramentis, & simul affirmet, furentem esse temeritatem vti nominibus in rebus Dei significandis, quibus

22 *Cap. VII. De Sacram. in genere. Lib. I.*

Deus ipse in Scriptura non utatur: certè colligitur non ei placuisse, ut hoc nomine uteremur.

Quocirca Melanchthon Lutherum sequutus in locis communibus editis anno XXI. & XXII. caput in quo agit de Sacramentis, inscribit de signis; & in medio eius capitis: *Qua alij,* inquit, *Sacramenta, nos signa appellamus.* Quin etiam tanta erat cupido istorum hominũ omnia nouandi, ut mallet Græca voce, & Latinis prorsus inaudita dici *σφραγίδας*, id est, sigilla, quàm Sacramenta.

Andreas item Carolstadius in lib. de imaginibus, & Sacramentis, eundem Lutherum sequutus, ex professo agit contra nomen Sacramenti.

Porro Zvinglius pater Sacramentariorum in lib. de vera & falsa religione, edito anno XXV. dicit quidem se nolle tumultuari ob hoc nomen, apertè tamen reprehendit. Sic enim habet in cap. de Sacramētis: *Vocem istam, Sacramentum, magnopere cuperem Germanis nunquam fuisse receptam.*

Sic etiam Calvinus lib. 4. Instit. cap. 14. §. 13. dicit se nolle contendere de nomine Sacramenti, & tamen non obscure reprehendit, dum ita loquitur: *Abundè liquet Veteres, qui Sacramentorum nomen signis indiderunt, minimè respexisse, quis fuisset Verbi huius & sus Latinis Scriptoribus: sed nouam hanc significationem pro suo commodo affinxisse, qua simpliciter sacra signa designarent.* Hæc ille.

Ceterum Lutherus cùm vidisset Carolstadium, & Zvinglium, cum quibus inimicitias gerebat, abhorrere à voce Sacramenti, mutauit citò sententiam, & nomen Sacramēti approbare cœpit. Sic eĩ scribit in lib. contra cœlestes Prophetas part. 2. *Dicit, inquit, Carolstadius, Christum & Apostolos non appellasse cœnam Sacramentũ, Velle se habere nomē ex Bibliis: Deum imponere suis creaturis nomina, nos qui homines sumus, nõ debere indere nomina rebus diuinis.* Et infra: *Age animicida, tu & spiritus peccati, fatemur quidẽ Deum non dixisse Sacramentum, nec precepisse Et Sacramentum diceretur: Sed dic nobis contrà, Vbi prohibuit Sacramentũ dici? Quis ergo tibi dedit potestatem prohibendi, quod Deus non prohibet? Annõn est Verus animicida, qui se ponit loco Dei super nos, & aufert nostram libertatem?* Ac deinde asserit, & probat, licere vti hoc nomine, immodò & oportere vti. Quæ omnia non magis contra Carol-

Carolstadium pugnant & Zvinglium, quàm contra ipsum Lutherum, à quo illi didicerant, ut ostendimus.

Luthero autem sententiâ mutante, mutarunt etiam ceteri Lutherani. Nam & in Confess. August. recipiunt nomē Sacramenti: & Philippus in locis anno XXXVI. inscribit caput de Sacramētis, quod antea inscripserat de signis. Brentius quoque in Confessione VVirtembergen. cap. de Sacramētis, idem nomen retinet. Ac demum Kemnitiuss in 2. part. Examinis nō procul ab initio, vocabulum hoc ὁ ὕψιστος, id est, non scriptum in diuinis literis esse dicit, & tamen retinendum, & cōseruandum. Solū ergo controuersia restat cum Sacramentariis, & cum priore sententia Lutheri.

Sed faciliē probare possumus, nomen hoc esse vsurpādum, & cōseruandum. PRIMO, quia reperitur in Scripturis. Sunt autem duo notanda antequam hanc rationem explicemus. PRIMO quidem Scripturas sacras nō Latinè, sed vel Hebraicè, vel Græcè à Prophetis, & Apostolis scriptas fuisse: proinde non esse demonstrandam ex Scripturis vocem Latinam, Sacramentum, sed Græcam, quæ illi respondet, nimirū μυστήριον. Idem enim omninō est Latinis Sacramentum, quod Græcis Mysterium. Neq; in hoc vlla dissensio est: fatentur enī aduersarij idem esse Sacramentum, & Mysterium, & idē vtrumq; vocabulum dicunt esse ὁ ὕψιστος in nostra significatione.

SECUNDO, aliter ex Scripturis probari posse nomen Sacramenti apud Catholicos, aliter apud hæreticos. NAM apud Catholicos, qui fatentur Matrimonium esse Sacramentum propriè dictum, probamus nomen Sacramenti esse in Scripturis, non solū in genere, sed etiam in specie, id est, ut significat res illas septem, quas propriè Sacramenta vocamus. Ait enim Apostolus ad Ephes. 5. *Propter hoc relinquet homo patrē, & matrem suam, & adhærebit uxori suæ, & erūnt duo in carne vna. Sacramētum sine(ut habetur Græcè) Mysterium hoc magnum est, ego autem dico in Christo, & in Ecclesia. Vbi Apostolus Concil. Trident. teste, sess. 24. Sacramentum propriè dictum vocat Matrimonium, seu coniunctionem viri & fœminæ: est enim ea coniunctio signum rei sacræ, & arcana, id est, coniunctionis Christi cum Ecclesia. Neq; obstat, quod Paulus videatur loqui de coniugio Adami, & Eux, quod quidem Sacramentū nouæ legis non fuit. Nam Paulus etiam allegat verba*

24 *Cap.VII. De Sacram.in genere. Lib.I.*

Adami, tamen ea accommodat ad coniugia sui temporis: omni enim coniugio conuenit quod Adam dixit: *Erunt duo in carne vna*. Vnde non ait Paulus, Sacramentum hoc magnum fuit, sed Sacramentum hoc magnum est, nimirum posteaquam à Christo addita est illi promissio gratiæ.

Apud hæreticos autem, qui Matrimonium non admittunt esse Sacramentum propriè dictum, non possumus probare ex Scripturis nomen Sacramenti; vt est nomē specificum, & proprium nostrorum Sacramentorum. Nusquam enim in Scriptura Baptismus, aut Eucharistia, aut Pœnitentia, aut Ordo, aut etiam Confirmatio, aut Vnctio, Mysterium, vel Sacramentum appellatur. Possumus tamen ex Scripturis ostendere nomen Sacramenti, vt est nomen genericum, & commune ad nostra septem Sacramenta, & alias res quasdam; nimirum vt significat signū rei sacræ, vel arcana: quod quidem satis est, vt possimus hoc nomine vti, etiā testimonio Scripturarū. Nomē enim genericū verè conuenit rei, licet non soli illi conueniat.

Id igitur nomen in Scripturis haberi contra Lutherum demonstramus ex Daniele, cap. 2. vbi sæpissimè vocatur Mysterium, vel Sacramentum statua Nabuchodonosor, quia erat signum rei latentis, id est, successionis quatuor regnorum, & regni Christi post illa exoritur. ex quo colligimus, vocabulū מִסְתֵּרִים Hebraicum, & מִסְתֵּרִים Chaldaicum, non solum significare rem secretam, vt Isaia 24. *Secretum meum mihi*: Sed etiam signum rei secretæ, vt hoc loco Danielis: quamquam etiam hoc loco non negauerim, aliquando significare rem secretam. Nam interdum Scriptura vocat Mysterium ipsum somnium oblitum, & proinde absconditum, & secretum: interdum ipsam statua illius, quæ per somnium apparuerat, significationem.

Item probamus ex illo Apocal. 17. *Et in fronte eius nomen scriptum: Mysterium*. Et infra: *Ego dicam tibi Sacramentum mulieris*. Hinc enim habemus mulierem illam forma meretricia, quam Ioannes vidit, fuisse quoddam Sacramentum, id est, signum rei latentis, nimirum Romani Imperij, vel Antichristi, vt alibi exposuimus. Non enim res ipsa latens, sed mulier, quæ videbatur, appellatur Mysterium, & Sacramentum, ob significationem, quam cōtinebat, vt patet ex nomine scripto in fronte.

Idem

Idem probatur ex illo 2. Theff. 2. Nam *Mysterium iam operatur iniquitatis*. Vocat enim Apostolus Mysterium iniquitatis, persequutiones Ecclesiæ primitiæ ab Imperatoribus, & hæreticis excitatas, quia significabant persequutiones excitandas in nouissimis diebus ab Antichristo. Ita enim exponunt eum locum Chrysostomus, Theophylactus, Ambrosius, & alij ferè omnes.

Deniq; idem probatur efficacissimè ex illo Ephes. 5. *Sacramentum hoc magnum est*. Tametsi enim Erasmus, & Calvinus Mysterium à Paulo dici contendunt, non coniunctionem viri & sceminæ, sed Christi, & Ecclesiæ, cò quòd addat Apostolus: *Ego autem dico in Christo, & in Ecclesia*: tamen apertissimè falluntur. Quod enim Paulus Sacramenti nomen non tribuat Christo, & Ecclesiæ, sed coniunctioni viri, & sceminæ, patet tum ex relatiuo pronomine, hoc. Refert enim id quod dictum fuerat, nimirum: *Erunt duo in carne vna*: tum etiam quia periret tota ratio Apostoli: vult enim probare, debere viros diligere suas vxores; id verò probat, quia illud: *Erunt duo in carne vna*, est magnum Sacramentum in Christo, & in Ecclesia. Quod si totū hoc Mysterium est in coniunctione Christi, & Ecclesiæ, & ad coniugium nihil pertinet, quid, quæso, Paulus probat? Vide commentarium Hieronymi, Chrysostomi, Oecumenij, & aliorum Patrum in hunc locum. Coniunctio igitur sensibilis, & externa viri & sceminæ, Sacramentum est, id est, signum rei sacræ spiritualis, & latentis, id est, coniunctionis Christi, & Ecclesiæ. Quocirca Kemnitius his testimoniis persuasus, fatetur nomen Sacramenti vt genericum est, scriptum esse, licet vt specificum, non sit scriptum.

Falsum igitur est, quod Lutherus dicebat, Sacramentum in vniuersa Scriptura significare rem sacram, secretam; nusquam autem signum rei sacræ, secrete. Nec minus falsum est, quod ibidem addidit, Catholicos vbicunque in Scriptura inuenerunt nomen Sacramenti, ex eo fecisse signum: non enim vbique dicimus, Sacramenti nomine significari signum, sed solū quibusdam in locis, alibi autem significare rem secretam, vt Tob. 12. *Sacramentum Regis abscondere bonum est*. Et Ephes. 1. *Vt notum faceret nobis Sacramentum voluntatis suæ*. Et 1. Timot. 3. vocat Incarnationem, magnum pietatis Sacramentum. Neq; id ignorârunt Scholastici, quin potius omnes cum Magistro indicant has acceptiones varias Sacramenti

26 Cap.VII.De Sacram.in genere.Lib.I.

secundum Scripturas. Vide in 4. dist.1. & S.Thomam 3. parte quæst.60. art.1.

Quod si Sacramentum dicatur à sacrando, & initiando, quod placet Zyvinglio, vt postea dicemus, habetur in Scriptura Testamenti veteris vox Hebræa nostræ Latine voci respondens, nimirum כִּלְיָהּ seu כִּלְיָהּ, id est, ritus consecrationis, Exod.28. Leuit.8. & alibi.

SECUNDA ratio sumitur ex Patribus. Antiquissimi enim Patres hoc nomine vsi sunt ad significandum Baptismum, Eucharistiam, & alia id genus sacra Symbola. TERTULLIANVS vetustissimus Latinorum, lib. de præscriptionibus, cap.16. *Ipsas quoq;, inquit, res Sacramentorum diuinorum, in idolum mysteriis diabolus amulatur: tingit & ipse quosdam, signat in frontibus milites suos, &c.* Vide etiam lib.1. in Marcion. ante medium. S.CYPRIANVS, li.2. epist.1. de Baptismo, & Confirmatione dicit: *Si Sacramento & troq; nascantur.* Lib.2. epist.3. ad Cæciliū: *Quo & ipso, inquit, Sacramento (Eucharistia) populus noster ostenditur adunatus.* Et lib.4. epistola 7. ad Magnum: *Neque enim sic in Sacramento saluari delictorum contagia, & in lauacro carnali, & seculari sordes cutis, & corporis abluuntur.* Eadem vtuntur voce LACTANTIUS lib.4. cap.17. HILARIUS in illud Psal.121. *Et abundantia diligentibus te.* HIERONYMVS in cap.44. Ezech. & in cap.1. Malach. AVGVSTINVS in epist.118. & lib.2. doctrinæ Christianæ, cap.3. & deum omnes posteriores.

Ex quibus Patrum sententiis colligimus, nomen hoc esse antiquissimum, & proinde retinendum, etiam si in Scripturis non haberetur: quomodo retinemus multa alia nomina, quæ non sunt in Scripturis, vt Trinitatem, consubstantialē, personam, &c. Periculosissima enim est vocum nouarum libertas in Ecclesia, cū paulatim ex nouis vocibus, nouæ etiam res oriantur, cū vniciq; licet in rebus diuinis nomina fingere. Vnde & B. Paulus prohibet prophanas vocum nouitates, 1. Tim.6. & S.AVGUSTINVS li.10. ciuit. cap.23. *Liberis, inquit, vocibus loquuntur Philosophi; nec in rebus ad intelligendū difficillimis offensionem religiosarum aurium pertimescunt: nobis autem ad certam regulam loqui fas est, ne verborum licentia, etiam de rebus, quæ his significatur, impiam gignat opinionem.*

Rursus colligimus, tum ex Scripturis, tum ex Patribus citatis, Kemnitium falsa, & pugnātia de hoc nomine loqui. Nam

pag. 28. sic ait: *Augustinus primus fermè cœpit vocabulum Sacramenti in hac quidem materia extendere, & latius & surpare, quàm antiquitas fecerat. In epistola enim quinta ad Marcellinum de signis loquens, inquit: Quæ cùm ad res diuinas pertinent, Sacramenta appellantur. Vt igitur Augustino aliquid sit Sacramentũ, satis est, si rei alicuius diuina vel sacra signum sit.* Hæc ille. At falsum esse, primum Augustinum fuisse, qui extenderit hoc nomen ad alia sacra signa, quàm ad Baptismũ, & Eucharistiam, patet ex omnibus Scripturis citatis, & ex Tertulliano, Cypriano, ac Lactantio locis notatis: & præterea patet ex ipso Kemnitio, qui paulò antè, id est, pag. 22. sic ait: *Coniunctio Viri & vxoris in coniugio, est Sacramentũ coniunctionis Christi, & Ecclesie, ad Ephes. 5. Et infra: Omnes figuras, & allegorias significantes aliquid, Patres vocant Sacramenta. Tertullianus lib. 5. contra Marcionem vocat Sacramenta figurarum, & allegorias Sacramentorum, & ibi de duobus Abraha filiis loquitur. Aduersus Iudæos, vocat Sacramentum ligni, disputans de securi Elisæi, & de ligno Adæ.* Hæc ille, qui viderit quàm benè cohæreat, Augustinum auctorem illius rei facere, quæ apud Tertullianum, aliosque vetustos Patres, & apud ipsum Apostolum Paulum inueniatur.

Adde postremò, quòd omnes lingue vulgares in Latina Ecclesia hoc nomen retinuerunt, vt Italica, Gallica, Hispanica, Germanica, & aliæ. quod est argumentum semper fuisse hoc nomine Sacramentum, in Ecclesia, venerabile. Sed de hac prima Quæstione satis.

CAPVT OCTAVVM.

De etymologia, & notione Mysterij & Sacramenti.

QUIA certũ est prius in Ecclesia fuisse voces Hebræicas, & Græcas, quàm Latinam, Sacramentum, & Latinos nihil aliud voluisse exprimere per Sacramentum, nisi quod Hebræi, & Græci exprimebant per sua vocabula, PRIMVM de Hebraica, DEINDE de Græca, POSTREMO de Latina voce dicendum erit.

Hebræi tres habent voces, quibus Sacramenta sua significare solent. PRIMVM enim omnes cæremonias, inter quas numerantur Sacramenta, vocant קִדְּשׁ vel חֻקִּים vt patet Exodi 12. 28. & alibi. Sed hoc nomen non tam ipsam cæremoniam, quàm

quàm legem cæremonialem significat; nam קִדְּשָׁה statuere significat, & קִדְּשָׁה legislatores. Vnde in Testamento nouo semper cæremoniæ Iudæorum dicuntur leges, vt *Matt. xi. Lex & Propheta & sive ad Ioannem*, id est, Figuræ illæ cæremoniarum, & vaticinia Prophetarum vsque ad Ioannem. Et *Galat. 5. Confessor omni circumcidenti se, quod debitor est vniuersæ legis facienda*. Id est, qui admittit circumcisionem, debet eodem iure admittere omnes cæremonias.

ALIUD vocabulum est מְלֵאכָה & מְלֵאכָה quod consecrationem, seu initiationem significat, & habetur *Exodi 28. & Leuit. 8.* vbi agitur de consecratione Sacerdotis. Deducitur autem hæc vox à verbo מָלַא quod significat implere, & perficere; quia qui Sacramentum suscipit, perficitur, vt sit idoneus ad sacram functionem peragendam.

TERTIA vox est סֵתֶר & סֵתֶר quæ magis in vsu est Chaldæis, quàm Hebræis. Vnde Hebræi nondum inuenerūt veram eius radicem; sed, vt suprà diximus, satis apertè colligitur ex *cap. 2. Danielis*, ea voce significari tum rem ipsam secretam, tum etiam signum rei secretæ.

Porrò etymologiam Mysterij explicans Clemens Alexandrinus in oratione exhortatoria ad Gentes, cuius etiam meminit Eusebius in 2. de præparatione Euangelica, cap. 5. dicit, μυστήριον dici à μύσος , quod scelus, & execrationem significat. Reprehendit Dominicus à Soto hanc etymologiam in 4. dist. 1. quæst. 1. art. 1. quod μυστήριον per iota significet scelus, & odium: μυστήριον autem scribatur per ipsilon. Sed non erat opus, vt homo Latinus cum auctoribus grauissimis, atque Græcis, de Græcæ vocis etymologia contenderet. Nam etsi μυστήριον odium, μύσος tamē scelus propriè significat: porrò Clemens à μύσος deduxit μυστήριον , non à μυστήριον , licet posterioriorem hanc vocem habeant aliqui Latini codices Eusebij, ex errore librariorum. Præterea Clemens non voluit eo loco propriam, ac germanam etymologiam Mysterij explicare, sed de industria posuit quandam minus propriam, sed valdè aptam ad irridenda sacra Gentilium, quod tum agebat. Itaque cum vellet sacra illa ridere, ac detestari, dixit vel appellari $\text{μυστήρια ἀπὸ τοῦ μύσος}$, quòd scelestæ, & execranda essent; vel dicta esse μυστήρια , quasi μυθώρια , id est, fabulosa.

Alij deducunt *μυστήριον* à verbo *μύω*, quod est claudio, & *σῶμα*, quod est os: quasi Mysteria silentio honorāda sint: vel à *μυσειν*, & *τηρεῖν*, id est, abscondere & seruare, quod sint occultè seruandæ res sacræ.

Possent etiam non ineptè deduci à *μνέω μνίσσω* quod est initio, seu sacris imbuo, vnde est *μύσθης*, id est, sacrorum antistes, qui alios initiat.

Sunt autem tres huius vocis significationes. PRIMA ac præcipua est, vt *Mysterium* dicatur ea cæremonia, qua homines sacris initiantur. Quocirca à M. T. lib. 2. de legibus dicuntur etiā initia: & S. Ambrosius librum scripsit, de iis, qui *Mysteriis* initiantur. Et hæc significatio respondet etymologiæ, quam posuimus à verbo *μνέω*, & huic voci in hac significatione respondet vox Hebræa *קדש*, id est, consecratio. Quia verò *Mysteria* Gentilium noctu celebrabātur, & secreta esse oportebat, indonata est.

SECUNDA significatio, qua *Mysterium* dicitur id omne, quod arcanum, & secretum est. Hinc est illud Apostoli i. Cor. 13. *Si nouerim Mysteria omnia*. Matth. 13. *Vobis datum est nosse Mysteria regni Dei*: Et respondet verbum Hebræum *סוד* in priore significatione, vel etiam *סוד* quo frequentius vrutur, id est, secretum.

TERTIA significatio ex secunda nata est, qua videlicet *Mysterium* dicitur omne signum externum rei arcane, & latentis: qua significatione omnes figuræ Testamenti veteris dicuntur *Mysteria*, necnon parabolæ, & similitudines quæ habentur vel in Euangelio, vel in Apocalypsi, vt testimonia supra allata ostendunt. Et huic respondet vox illa *סוד* in posteriore significatione.

Iam verò Sacramenti etymologia notissima est; dicitur enim à sacro: sed significationes multæ sunt. PRIMÆ est, vt Sacramentum dicatur pignus à litigantibus in loco sacro positum. Vt enim scribit Varro li. 4. de lingua Latina prope finem, mos erat apud Romanos, vt cùm duo litigabant, tum qui affirmabat, tum qui negabat, deponeret quingētos æris in loco sacro apud Pontificem; finita verò lite, qui vicerat, depositum suum reciperet, qui vinceretur, perderet, eiusque depositum ærario cederet in pœnam iniustæ litigationis. Illa ergo depo-

sita Sacramenta dicebantur, quod in loco sacro seruarentur. Hæc significatio præter ceteras placuit Zvinglio, in libro de vera & falsa religione, cap. de Sacramentis: *Sacramentum*, inquit, *nihil aliud est, quàm initiatio, & oppignratio. Sicut enim qui litigaturi erant, certū pecunia pondus deponebant; sic qui Sacramentis initiantur, sese obstringunt, & oppignerant.*

SECUNDA acceptio est, vt Sacramentum idem sit, quod iuramentum, quod quidem nisi per rem aliquam sacram fieri non potest, cum Deum ipsum testem citet omnis, qui iurat. Est autem hæc acceptio frequentissima in iure ciuili, & Canonico, & in auctoribus tum Gentilibus, tum etiam Christianis. Hæc acceptio Caluino placuit, lib. 4. Instit. cap. 14. §. 13. Sic tamen, vt Sacramentum non tam sit iuramentum, quo se homo obstringit Deo, quàm quo se Deus obstringit homini. Vnde Nicolaus Selneccerus in 2. p. Pædagogicæ, cap. de Sacramentis dicit, *μυστήριον*, dici à *μύω*, quod est claudo, quia Sacramenta quasi Dei sigilla claudunt, & obstringunt diuinas promissiones.

TERTIA significatio est, vt Sacramentum idem sit, quod Mysterium; & proinde significet tria illa, quæ Mysterij voce significari diximus; nimirum, rem secretam, & signum rei secretæ, & rem sacramentem & initiantem.

Quæ omnes acceptiones conueniunt nostris Sacramentis, sed maximè propria est ea, quam vltimo loco nominauimus. Nam illa PRIMA Varronis & Zvinglij non est aliena à nostris Sacramentis. Verè enim per Sacramenta nos obstringimus, & oppigneramus Deo, tamen hæc acceptio nec inuenitur in Scripturis, nec est ita propria, vt solis Sacramentis nostris conueniat. Multa enim sunt alia præter Sacramenta, quibus nos oppigneramus Deo, vt omnia vota.

SECUNDA acceptio Caluini, quadrat etiam in nostra Sacramenta. Nam in Sacramentis, vt nos Deo obstringimus ad obsequium, ita se nobis ille quodammodo obstringit ad protectionem. Sed neq; hæc habetur in Scripturis, neq; est propria nostrorum Sacramentorum, cum etiam sine Sacramentis per simplicem promissionem se Deus obstringere soleat.

TERTIA & QUARTA acceptio, qua Sacramentum dicitur quæcunq; res sacra, arcana, vel signum rei sacræ, & secretæ, habentur in Scripturis, vt suprà ostendimus, & Sacramentis nostris conueniunt. Nam omnia nostra Sacramenta, & sacra sunt,

sunt, cùm Dei sint; & arcana sunt, cùm solis fidelibus nota sint, nec debeant aliis facilè prodi, vt docet Dionysius de Eccles. hierar. cap. i. & Cyrillus lib. 7. in Iulianum, extremo, & alij Patres passim, & deniq; rem sacram, & occultam significant, nimirum gratiam. Sed neq; hæ acceptiones sunt proprię nostris Sacramentis, cùm plurima sint alia signa sacra, arcana, & quę res sacras, & arcanas significant, vt omnes ferè figurę Testamenti veteris.

QVINTA igitur acceptio, qua Sacramentum significat cæremoniam initiantem, & consecrantem hominem Deo; siue (quod ferè est idem) signum rei sacrę, non cuiuscunq;, sed rei sacrę sacrantis, & initiantis hominem, propriissima est. Nam IN PRIMIS solis Sacramentis conuenit, vt postea fusius ostendemus.

DEINDE respondet apertissimè etymologię Mysterij, & Sacramenti: nam Mysterium deduximus à μυστήριον, quod est initio; & Sacramentum rectissimè deducitur à sacrando. Vnde S. AUGUSTINVS lib. 15. de ciuit. Dei, cap. 26. Vnde, inquit, *Sacramenta manarunt, quibus credentes initiantur*: vbi dicit, initiari Sacramentis nouę legis. Et epist. 23. dicit, Sacramenta nouę legis consecrare homines Deo. Et TERTULLIANVS lib. de præscriptionibus, ostendere volens quemadmodum diabolus Deum imitari studeat: *Tingit, inquit, & ipse quosdam, & itaq; credentes, & fideles suos; expiationem delictorum de lauacro repromittit, & sic etiam initiat Mithra.* Hęc ille: vbi Baptismi Sacramentum initiationem appellat. Et S. AMBROSIVS librum, in quo de Sacramentis Baptismi, & Eucharistię tractat, inscribit, De iis, qui initiantur Mysteriis. Item MAGISTER in 4. dist. 1. & cum eo Doctores plurimi dicunt, Sacramentum dici à sacrando. S. THOMAS in 1. 2. quęst. 102. art. 5. *Sacramenta, inquit, propriè dicuntur illa, quę adhibebantur Dei cultoribus ad quandam consecrationē, per quam scilicet deputabantur, quodammodo ad cultum Dei.*

Denique Sacramenta veteris legis nunquam vocantur in Scriptura Testamenti veteris secreta, vel signa rei secretę, id est, סֵדֶר vel סֵדֶרֶד sed semper appellabantur consecratio-

nes, & initiationes, id est, מִלְאִים vel cære-

monię, id est, חֻקִּים.



CONTROVERSIÆ S E C V N D A,

De definitione Sacramenti.

CAPVT NONVM.

*Quid requiratur ad Sacramentum nouæ legis
constituendum.*

DIXIMVS DE NOMINE, NVNC DE RE IPSA dicendum erit. Tres autem erunt partes disputationis de natura Sacramenti. PRIMO enim exponendum erit, quid requiratur ex communi sententia omnium Catholicorum ad Sacramentum nouæ legis constituendum. DEINDE dissendum erit de ipsa formali, & artificiosa definitione Sacramenti. POSTREMO examinandæ, & refellendæ variæ hæreticorum sententiæ, & deprauationes circa naturam, & definitionem Sacramenti.

Quod igitur ad PRIMVM attinet, Catholici Doctores etsi dissentiant in rebus quibusdam Philosophicis, & minutis, vt; An Sacramentũ sit vnum per se; An sit ens rationis, &c. tamen in re Theologica mirificè conueniunt, cùm hæretici contrà inter se mirificè dissentiant, vt mox videbimus.

Igitur quæ ad Sacramentum nouæ legis constituendum necessariò requiruntur, hæc sunt. PRIMVM vt sit signum, dicitur autem signum, vt S. AVGVSTINVS definit lib. 2. cap. 1. doctrinæ Christianæ: *Res præter speciem, quam ingerit sensibus, aliud aliquid ex se faciens in cogitationem venire.* Quocirca debet signum esse res aliqua cognoscibilis, debet item ducere in cognitionem alterius. Et quia hoc secundum, ducere videlicet in cognitionem alterius, in signo est potissimum, vt idem Augustinus docet lib. 1. cap. 1. doctrinæ Christianæ, idè oportet signum, quatenus signum est, imperfectius esse re illa, quam significat, & magis illā, quàm seipsum representare. Quare non dicitur homo signum suæ imaginis, licet

licet ex cognitione hominis sepe cognoscantur imagines; sed contra imago dicitur signum hominis. Iam verò quod Sacramentum signum quoddam sit, patet tum ex Scriptura, cum Genes. 17. circumcisio dicitur signum fœderis. Rom. 6. Baptismus dicitur signum sepulturæ, & resurrectionis, 1. Corinth. 11. Eucharistia dicitur signum passionis, & mortis Christi. Ephes. 5. Matrimonium dicitur signum coniunctionis Christi, & Ecclesiæ: tum ex Patribus. Nam Dionysius cap. 1. Eccles. hierar. & alij Patres Græci, Sacramenta vocant *συμβολα*, id est, signa, & S. Augustinus, nunc vocat signacula, vt de catechizandis rudibus, cap. 26. nunc verba visibilia, vt lib. 19. contra Faustum, cap. 16.

SECUNDUM est, vt hoc signum sensibile sit: sunt enim signa quedam etiam inuisibilia, vt character animæ impressus. Sed Sacramenta visibilia, seu sensibilia signa esse debere, certissimum est. Solus fermè est Gulielmus Okam, qui in 4. dist. 1. fatetur quidem, Sacramenta esse signa sensibilia, sed non putat id esse de essentia, quia posset Deus instituere Sacramentum in re spirituali, vt si statueret, vt oratio mentalis, aut meditatio passionis Christi conferret gratiam ex opere operato. At fallitur Okam, quia illa oratio, vel meditatio haberet quidem effectum Sacramenti, sed Sacramentum non esset. Sacramentum enim intrinsecè, & essentialiter est cæremonia religionis; cæremonia autem est actus externus. Vnde sancti Patres passim docent, Sacramentum esse vestigia quedam, & manuductiones ad spiritualia, & inuisibilia, vt patet ex Dionysio, & Augustino locis notatis, necnon ex Chrysostomo homil. 83. in Matth.

TERTIUM est, vt hoc signum sit voluntarium, siue datum, non naturale. Quedam enim signa sunt naturalia, quæ non pendent ex noua institutione, sed ex natura sua significant, vt est fumus signum incendij, & odor signum rei odoratæ præsentis, & aurora signum vicini solis: alia signa sunt ex arbitrio instituentis, vt nomina, & verba omnia, vexilla militum, & omnia insignia familiarum. Porro Sacramenta signa esse posterioris generis docet Augustinus lib. 2. doctrinæ Christianæ, cap. 3. & lib. 3. cap. 9. neque vllus contradicit. Res enim ipsa per se exclamat.

QUARTUM est, vt hoc signum habeat cum re, quam significat, analogiam, & similitudinem aliquam. Tria enim inue-

niuntur signorum genera. *QVAEDAM* enim tantam habent cum re significata similitudinem, ut sine ulla institutione naturaliter significant; quomodo imago Christi, signū est Christi, & vestigium in arena impressum, signum est pedis.

QVAEDAM alia nullam habent cum re significata similitudinem, & ided tota pendent ab institutione: hoc modo verba sunt signa rerum, & sonus campanæ signum senatus habendi.

QVAEDAM denique medio modo se habent. Nam habent quidem aliquam analogiam cum re, sed tam indeterminatam, & confusam, ut magis apta sint ad significandum, quam actu significant, nisi determinentur ab aliquo: quo modo imago hominis non facta ad alicuius particularis hominis similitudinem, neminem in particulari significat, & tamē quemlibet significare potest, si determinetur adscripto nomine alicuius, aut addito vestimento, aut alio signo particularis hominis.

Huius tertij generis sunt omnia Sacramenta. Nam nec per se significant actu, nisi determinentur, & tamen apta sunt significare, si determinentur. Id patet discurrendo per singula. Nam ablutio externa internæ ablutionis similitudinem gerit; proinde aptissima est ad eam significandam, si ad id adhibeatur. Idem de Vnctione, alimento corporis Dominici, aliisque Sacramentis dici potest.

Solum est Sacramentum Pœnitentiæ, quod cū in solis verbis consistat essentialiter, non videtur habere naturalem analogiam cum re significata; sed habet tamen. Non enim illa verba, *Ego te absoluo*, Sacramentum sunt, quatenus significant ex humana institutione, id est, quatenus verba sunt: sed quatenus sunt veluti res quædam à Deo institutæ ad significandam, & efficiendam iustificationem à peccatis. Habet autem analogiam exterior absolutio, quæ ore pronuntiatur, cum interna iustificatione, quæ à Deo efficitur. Itaque absolutio significata per verba, Sacramentum est, non ut per verba significatur, sed ut significat ipsam absolutionem internam.

Vnde S. AUGUSTINVS in epist. 23. ad Bonifacium: *Si Sacramēta*, inquit, *quandam similitudinem earum rerum, quarum Sacramenta sunt, non haberent, omninò Sacramenta non essent.* Et Græci Patres, passim Sacramēta vocant ὁμῖτις, quod

quod vocabulum significat rem ita similem alteri, vt cum illa quasi certare videatur de forma. vt si depicta imago ita probè, & quasi ad viuum rem exprimat, vt non imago, sed res ipsa videatur. Sic enim accipit hanc vocem Nazianzenus in 2. orat. de Pascha, vbi noctem Paschalem ob infinitam ardentium cercorum multitudinem, quibus illuminabatur, vocat antitypam firmamenti cœlestis, vbi infinita stellarum lumina conspiciuntur. Sic etiam ante Gregorium S. Petrus in epist. 1. cap. 3. vocat Baptisina nostrum antitypum respectu arcæ Noë, vbi noster interpres rectè vertit, similis formæ. Cùm ergo Patres Sacramenta vocant *ἀντίτυπα* earum rerum, quarum Sacramenta sunt, nihil aliud sibi volunt, quàm habere Sacramenta maximam similitudinem cum his rebus, quarum sunt Sacramenta.

QVINTVM est, vt hoc signum repræsentet rem aliquam sacram, non prophanam. Sunt enim Sacramenta cæremoniæ religionis: vnde etiam illa violare, omnium consensu, sacrilegium est. Id quod etiam patet ex nomine: nam Sacramentum a sacro dicitur. Deniq; S. Augustinus in epist. ad Marcellinum dicit, signa cùm ad res diuinas pertinent, Sacramenta nominari.

Porrò res illa sacra, quam Sacramenta nouæ legis significant, triplex est: gratia iustificans, quæ vt præsens demonstratur: passio Christi, quæ est causa gratiæ, & vt præterita commemoratur: & vita æterna, quæ est effectus gratiæ, & vt futura præfiguratur. Ita docet S. Thomas 3. part. quæst. 60. art. 3. & omnes alij Doctores. Ac de Baptismo quidem, & Eucharistia res notissima est. Nam Rom. 6. quod Baptismus sit memoria passionis, ostendit Paulus, cùm ait: *Quicumque baptizati sumus in Christo, in morte ipsius baptizati sumus.* Et infra de gratia iustificationis: *Qui mortuus est, iustificatus est à peccato.* Et: *Consepulsi enim sumus cum illo per Baptismum in mortem, & quomodo Christus resurrexit à mortuis, ita & nos in nouitate vitæ ambulemus.* Deniq; de vita æterna ibidem: *Si complantati sumus similitudini mortis eius, simul & resurrectionis erimus.*

Pari ratione de Eucharistia, Luc. 22. *Hoc facite in meam commemorationem*, id est, in memoriam passionis: nam vt expōnit Paulus 1. Corinth. 11. *Quotiescunque manducamus panem hunc, mortem Domini annuntiamus.* Item de gratia, Ioan. 6.

Qui manducat me, & ipse viuet propter me. De gloria: Si quis manducauerit ex hoc pane, viuet in aeternum. Vnde Ecclesia canit: O sacrum conuiuium, in quo Christus sumitur: Recolitur memoria passionis eius: Mens impletur gratia: Et futura gloria nobis pignus datur.

De aliis Sacramentis non est ita notum: tamen certum est, saltem implicite, illa omnia significare; quia cum omnia significant gratiam, consequenter etiam significant principium, & finem eiusdem gratiae.

Est autem hoc loco NOTANDUM, id quod praecipue & essentialiter significatur per Sacramentum nouae legis, esse solam gratiam iustificante. Nam ut infra dicemus, Sacramenta nouae legis efficiunt, quod significant: at non efficiunt passionem Christi, nec vitam beatam, sed solam iustificationem: passionem enim praesupponunt, & vitam beatam promittunt; iustificationem autem proprie adferunt.

PRÆTEREA Sacramenta, ut mox dicemus, sunt instituta ad sanctificandum. At quo proprie, & formaliter sanctificamur, gratia est; passio Christi, & vita beata extrinseca sunt.

DENIQUE id proprie Sacramenta significant, quod per verba exprimitur: verbis autem Sacramentorum iustificatio sola plerumque exprimitur. Id enim significat, Ego te abluo, Ego te confirmo, Ego te absoluo, &c. Neque obstat, quod verba Eucharistiae, *Hoc est corpus meum*, non videantur sonare sanctificationem, sed ipsum Domini corpus. Nam illud significant, ut cibum animarum, & spirituales mentis refectionem, quæ per internam gratiam fit.

Atque ex hoc capite multa sacra signa excluduntur à ratione Sacramenti, ut res creatæ omnes, quæ signa sunt poenitentiae, & sapientiae; nam: *Celi enarrant gloriam Dei*, Psalm. 18. Item omnes sacrae imagines Christi, & Sanctorum; sacrae literæ; signum crucis, & alia id genus, quæ sunt quidem signa sacra, & rerum sacrarum; sed non significant proprie gratiam sanctificantem animas.

SEXTUM est, ut hoc signum non solum significet sanctificationem, sed etiam ita significet, ut quæ tunc fiat, dum Sacramentum adhibetur. Omnes enim Theologi conueniunt, quod Sacramenta nouae legis significant sanctificationem, quæ tunc fiat; id enim verba ipsa ostendunt, Ego te absoluo, Ego te abluo, &c. Et hinc multa signa sacra sanctificationem significan-

tia excluduntur à ratione Sacramenti. Nam exempli causa, Manna quod pluebat Israëlitis, significabat spiritualem refectiōem, & dulcedinem, quam præbet Eucharistia; tamen Sacramentum non erat, sed figura Sacramenti, quia significabat eam refectiōem, ut futuram, non ut quæ tunc daretur. Sic etiam columba, quæ super Christum apparuit in Baptismo, signum erat sanctitatis, & innocentiae Christi, sed non quæ tum primùm inciperet, vel cresceret: iam enim ab incarnatione plenus fuerat gratia.

SEPTIMUM est, in quo etiam omnes conueniunt, ut Sacramenta nouæ legis, nō solūm significant sanctificationem, quæ tunc fiat, sed etiam, quæ fiat vi ipsius Sacramenti, ita ut Sacramentum sit causa instrumentalis sanctificationis; id quod postea probandum erit contra hæreticos. Hinc autem excluduntur à ratione Sacramenti linguæ illæ igneæ, quæ apparuerunt super Apostolos in die Pentecostes: significabant enim charitatem ardentissimam, quæ tum Apostolis infundebatur vnā cum sapientia, & eloquentia planè diuina, sed Sacramentum non erant, quia non vicarum linguarum infundebatur illis charitas. Quæstio solūm remanet, an dari gratiam ex vi Sacramenti, sit proprium Sacramentis nouæ legis, an verò conueniat Sacramentis in genere. Sed de hoc postea agendum erit: nunc satis est conuenire omnes Doctores, quod Sacramenta nouæ legis id habeant.

Est autem hic NOTANDUM, quòd cū dicimus de ratione Sacramenti esse ut sanctificationem significet, & efficiat; id intelligitur non de actu, sed de naturali aptitudine. Potest enim fieri, ut dū infans baptizatur, nemo sit qui cogitet, quid Sacramentum significet; quocirca nihil tunc actu significabit, tamen ex se aptum erit ad significandum. Potest etiam fieri ut Sacramenti effectus impediatur. Nam cū quis accedit ad Baptismum, vel alia Sacramenta cum animo perseuerandi in peccato, is certè non sanctificatur actu: tamen Sacramentum verè significare, immò etiam efficere sanctificationem dici potest, quia ex se id significat, & efficit: per accidens autem est ex indispositione sulcipientis, ut non sequatur effectus.

OSTAVVM ac postremum, quod ad rationem Sacramenti pertinet, est, ut sit cæremonia religionis statuta, ac solennis, quæ hominem Deo consecret. Ita docet S. Thomas in 1. 2. q.

102. art. 5. & facillè probari potest. Nam vt S. Augustinus docet lib. 19. contra Faustum, cap. 11. & libro 4. de Baptismo contra Donatistas, cap. 22. Sine Sacramentis religio esse non potest, proinde tamdiu durare debent Sacramenta, quamdiu religio durat. Quocirca Exod. 12. & alibi, dicuntur Sacramenta eius temporis ritu perpetuo seruanda, id est, nunquam finem habitura, nisi in aduentu Christi, quando vetus ipsum Testamentum finem habiturum erat. Sic etiam 1. Corinth. 11. de Eucharistiæ Sacramento Paulus dicit: *Quotiescunque manducabitis panem hunc, aut calicem biberis, mortem Domini annuntiabitis, donec Veniat.* Id est, durabit hic ritus, quo mortem Domini commemoramus, donec mundus ipse finiatur, & Dominus ad iudicandum veniat. Non igitur Sacramenta sunt aliqua signa ad breue tempus ostensa, sed solæ cæremoniæ durabiles, solennes, ac statæ.

Atque hinc intelligimus, eum Sacramentum non fuisse illud Christi verbum ad peccatricem: *Remittuntur tibi peccata tua*, Lucæ 7. & illa insufflatio in Apostolos cum illis adiunctis verbis: *Accipite Spiritum sanctum, &c.* Ioannis 20. Nam ista Christus semel fecit, non autem inde cæremoniam in Ecclesia frequentandam instituit, & fortè non adhibuit illam insufflationem, & illa verba tanquam instrumenta ad sanctificationem, sed solùm expressit per nuda signa, quod volebat: fortè etiam adhibuit ea, vt instrumenta, vt alias lutum ad illuminandum cæcum, & manus impositionem ad curandos ægrotos: sed (vt dixi) adhibuit tunc, quia ita ei placuit, qui potest qualibet re vtī ad quidlibet faciendum, non tamen inde cæremoniam instituit, proinde nec Sacramentum. Hæc sunt igitur quæ ad rationem Sacramenti nouæ legis pertinent.

CAPVT DECIMVM.

Possitne Sacramentum propriè definiri.



Is ita constitutis, agendum est de ipsa formali, & artificiosa definitione Sacramenti: ac tria breuiter tractanda sunt. PRIMO; An Sacramentum propriè definiri possit. SECUNDO; Quæ sit propria definitio Sacramenti. TERTIO; An ea conueniat tantum Sacramentis nostris, an omni Sacramento in genere.

Igitur

Igitur PRIMA quæstio est; An Sacramentum verè, & propriè definiri, an solum crasso quodam modo describi possit. Ratio difficultatis est, quia Sacramentum vel est aggregatum quoddam per accidens, cum constet ex rebus, & verbis; vel est ens rationis, si consideretur formaliter, vt signum ex arbitrarîa institutione significans. Non possunt autem propriè definiri, nisi entia realia, & quæ sunt vnum per se.

Tres sunt Doctorum sententiæ. QUIDAM existimant, Sacramentum propriè definiri non posse ob causas iam dictas. Ita Okam, Maior, Richardus in 4. dist. 1. ALII volunt, Sacramentum esse quidem ens rationis, tamen vnum per se: proinde definiri posse saltem imperfectè. Ita Scotus dist. 1. quæst. 2. & Sorus dist. 1. quæst. 1. art. 2. Tamen enim multa sint in Sacramentis, quæ significant, tamen significatio vna est ex variis illis rebus conflurgens, quemadmodum vna est figura domus, licet multa sint quæ ad domum faciendam concurrunt. ALII denique volunt, Sacramentum propriè definiri posse. Ita Martinus Ledesmius in tractatu de Sacramentis in genere, quæst. 1. art. 2.

Vt autem breuiter dicam quod sentio, bifariam considerari possunt Sacramenta. VNO modo, Physicè. ALIO modo, moraliter: quemadmodum etiam homo aliter consideratur à Physico, aliter à Politico.

Et quidem secundum Physicam considerationem, quæ non est propria huius loci, nec multum ad Theologum pertinet, longè probabilissimam esse arbitror sententiam primam. PRIMO, quia ad rationem, & essentiam Sacramenti non pertinet sola significatio, sed etiam res ipsa sensibilis, quæ substantia quædam est, & cum adiuncta significatione ens per accidens constituit. Nam si in sola significatione consisteret essentia Sacramenti, res ipsa sensibilis nihil esset, nisi subiectum Sacramenti. At longè aliud nos docet Ecclesia, cum in Concilio Florentino, & in scriptis omnium Doctorum affirmat, Sacramenta constare ex rebus, & verbis, & illas esse materiam, ista esse formam. Quomodo enim ad essentiam Sacramenti non pertinent ea, quæ materia, & forma Sacramenti dicuntur, & sunt?

SECUNDO, Sacramentum, vt Sacramentum, non solum significat, sed etiam sanctificat; vt Catholici omnes docent, de Sacramentis nouæ legis. At significare, & sanctificare,

res sunt diuersorum prædicamentorum, nimirum Relationis, & Actionis: non ergo vnum per se facere possunt.

ADD E, quòd qui ponunt in Sacramentis realem quandam, & Physicam qualitatem, necessariò coguntur Sacramenta componere ex ente reali, & rationis. Significatio enim Sacramenti, cùm ex institutione arbitraria pendeat, non potest non esse ens rationis. Quid modo autem esse potest vnum per se id, ad cuius essentiam pertinet ens reale, & ens rationis?

At verò si Sacramentum consideremus moraliter, vt verè à Theologo considerari debet, est ens reale, & suo modo vnum, atque eo modo definiri potest. Vt enim apud morales Philosophos definitur regnum, & ciuitas, & familia, & de his omnibus passiones demonstrantur, licet illa omnia sint entia per aggregationem, si Physicè considerentur: ita etiam Theologi definiunt Ecclesiam, Concilium, Sacramentum, & alia id genus, licet Physicè ista definiri nequeant.

Porro Sacramentum moraliter ideo est vnum, quia est vnum medium, siue instrumentum ad iustificandos homines. Et si enim aqua, & verba, agere, & significare, sint res in se diuersissimæ, tamen vt faciunt vnum instrumentum iustificationis, vnum sunt: atque hoc vnum ex genere, & differentia componi dicitur, & rursus ex materia & forma, ob similitudinem compositi Metaphysici, & Physici, quam habet. Vt enim in composito Metaphysico sunt duo prædicata, vnum vniuersalius, & imperfectius, aliud minus commune, & magis perfectum: sic etiam Sacramentum duo prædicata habet, vnum magis commune, & minus perfectum, nimirum, esse signum. Omne enim Sacramentum signum est, sed nò omne signum est Sacramentum: alterum minus commune, & magis perfectum, nimirum, sanctificans instrumentaliter, & per modum cæremoniæ: id enim solis Sacramentis conuenit. Proinde signum, est veluti genus; sanctificans, veluti differentia. Pari ratione vt in composito Physico sunt duæ partes, quarum neutra prædicatur de toto, & vna est indeterminata, altera determinans; illa materia, hæc forma dicitur: sic etiam in Sacramentis sunt res, veluti materia, & verba, veluti forma; quia res ipsa, vt causa exempli, aqua, indifferens ex se ad multa significanda, vel etiam efficienda, per verba determinatur ad vnum significandum, & efficiendum. Vnde est illud

AVGVSTINI tract. 80. in Ioannem: *Accedit Verbum ad elementum, & fit Sacramentum.*

Itaque non oportet nimis anxie discutere, an rota ratio, & omnes proprietates generis, & differentiae, materiaeque; ac formae conueniant partibus Sacramenti: quia (vt diximus) non Physicè, sed moraliter Sacramenta à Theologo consideranda sunt.

CAPVT XI.

Quæ sit definitio Sacramenti.

SECUNDA difficultas est; Quibus verbis concipi debeat definitio Sacramenti. Sunt enim plures definitiones apud Theologos, quæ breuiter proponendæ, & explicandæ sunt. VNA est; *Signum rei sacræ.* ALTERA, paulò explicatior; *Inuisibilis gratia & visibilis forma.*

Hæ definitiones colliguntur ex AVGVSTINO, ita scribente lib. 10. de ciuit. Dei, cap. 5. *Sacrificium visibile inuisibilis sacrificij Sacramentum*, id est, sacrum signum est; & communes sunt apud Catholicos, vt patet ex Hugone, lib. 1. parte 9. cap. 2. Bernardo in sermone de cœna Domini; sancto Thoma 3. par. quæst. 60. artic. 1. & 2. & ex Thoma VValdensi tomo 2. cap. 20. Atque hæ quidem definitiones si accipiantur, vt verba absolute sonant, imperfectæ sunt. Multò enim plura sunt signa rerum sacrarum, aut inuisibilis gratiæ, quàm sint Sacramenta: tamen si accipiantur, vt sonant secundum sensum, & intentionem Ecclesiæ, & Doctorum, bonæ sunt, & legitimæ. Si quidem per signum, intelligunt signum sensibile, institutum practicum, rei signatæ similitudinem gerens: per rem sacram intelligunt gratiam iustificantem. Quanquam (vt rectè monet Hugo loco notato) qui primus dixit Sacramentum esse rei sacræ signum, non tam rem ipsam accuratè definire, quàm nominis interpretationem explicare voluisse videtur. Quocirca non rectè faciunt, qui pro hac definitione defendenda nimium altercantur: præsertim cum S. Augustinus loco citato de Sacramento loquatur, tam ampla significatione, vt etiam sacrificium comprehendat.

TERTIA definitio est HVGONIS loco notato, qui sic definit: *Sacramentum est corporale vel materiale elementum, foris sensibi-*

sensibiliter propositum, ex similitudine representans, & ex institutione significans, & ex sanctificatione continens aliquam inuisibilem, & spiritalem gratiam. Vbi duo notanda sunt. PRIMO, per elementum non debere accipi elementum, quomodo accipitur cum dicimus, quatuor esse mundi elementa, sed rem quamlibet, ut à verbo distinguitur, iuxta illud AUGUSTINI: *Accedit verbum ad elementum, & fit Sacramentum.* Vocat autem Hugo, & quidam alij, elementum, materias omnium Sacramentorum, quia in primo Sacramento, id est, in Baptismo, verum elementum aquæ, materia est: à materia enim primi Sacramenti, materias omnium Sacramentorum nominare voluerunt. Vel etiam quia elementum materiam aptissimè significat, cum sit corpus imperfectum, & natura sua ordinatum ad componendum mixtum: vnde etiam Aristoteles materiam primam elementum vocauit.

SECUNDO notandum est, Hugonem, cum ait, Sacramentum ex sanctificatione vim habere conferendi gratiam, non intelligere per sanctificationem, ut perperam intellexit Kemnitius, pag. 94. aliquam benedictionem, vel consecrationem præcedentem, ut est illa, qua benedicatur aqua (nam etià sine ista benedictione Sacramentum Baptismi conferri potest) sed verbum Dei quod est veluti forma perficiens Sacramentum: illis enim verbis dicitur elementum sanctificari, quia per illa efficitur Sacramentum. Porro hæc definitio, etsi potuisset fortasse paucioribus verbis comprehendere, tamen satis integrè complectitur totam naturam Sacramenti.

QUARTA definitio est MAGISTRI Sententiarum lib. 4. dist. I. ubi sic ait: *Sacramentum est inuisibilis gratia visibilis forma, eiusdem gratia imaginem gerens, & causa existens.* Quæ definitio, quod ad sensum attinet, nil differt à priore. Solum enim in hac definitione desiderari videtur explicatio signi, naturale ne, an ex institutione sit: sed hoc manifestè colligitur ex illa particula, *causa existens.* Nullum enim signum sensibile potest esse causa gratiæ, nec illam infallibiliter significare, nisi ex Dei institutione, ut notum est.

QUINTA definitio est CATECHISMI Concilij Tridentini: *Sacramentum est res sensibus subiecta, quæ ex Dei institutione sanctitatis, & instituta significanda, tum efficienda vim habet.* Quæ definitio pulcherrima est, cum & breuissima sit, & tamen comprehendat omnia illa octo capita, quæ
ad na-

ad naturam Sacramenti pertinere diximus. Nam PRIMO, quòd Sacramentum sit signum, patet ex illa particula, *significanda*. SECUNDO, quòd sensibile, ex illa, *sensibus subiecta*. TERTIO, quòd voluntarium, ex illa, *ex Dei institutione*. QUARTO, quòd rei sacræ, ex illa, *sanctitatis, & iustitiæ*. QUINTO, quòd sanctitatis, quæ tunc fiat vi ipsius Sacramenti, ex illa, *Sim habet*. SEXTO, quòd sit cæremonia solennis, ex eo colligitur, quod dicitur esse res sensibus subiecta, instituta ad sanctificandum. SEPTIMO, quòd similitudinem gerat rei significatæ, non habetur expressè in hac definitione, tamen colligi potest ex illa particula, *significanda*, & ex illa, *ex Dei institutione*. Deus enim qui suauiter omnia disponit, nunquam instituisse rem vnã ad aliam significandam, nisi cum ea analogiam aliquam haberet.

Exstat alia definitio apud Gratianum, l. q. i. Can. Multisecularium: *Sacramentum est, per quod sub tegumento rerum visibilium, diuina virtus secretius salutem operatur*. Hæc definitio à Gratiano tribuitur Gregorio; à S. Thoma in 4. dist. i. quæst. i. tribuitur Augustino. Sed nec huius, nec illius est, sed ISIDORI: habetur enim iisdem verbis apud Isidorum lib. 6. etymologiarum, cap. 18. nisi fortè Isidorus illam acceperit ex libro aliquo nobis incognito Augustini, aut Gregorij. Sed cuiuscunq; sit, non est cur multum laboremus, cum satis constet ab Isidoro allatam, ad explicandam nominis significationem, non ad rem ipsam accuratè definiendam.

CAPVT XII.

An definitio Sacramenti vniuocè conueniat Sacramentis legis veteris, & nouæ.

SEQVITVR TERTIA & postrema quæstio; An definitiones positæ conueniant Sacramento in genere, an Sacramentis tantum nouæ legis. Duæ sunt Theologorum sententiæ. PRIMA est Magistri in lib. 4. dist. 1. & ibidem Alberti, Thomæ, Bonauenturæ, & aliorum, qui docent, nullam definitionem cõuenire vniuocè Sacramentis nouæ & veteris legis, sed omnes cõuenire propriè, & perfectè Sacramentis nouæ legis, easdem verò conuenire Sacramentis legis veteris analogicè, & imperfectè.

Funda-

Fundamentum huius sententiæ est, quia existimant auctores citati, de ratione Sacramenti, etiam in genere, non esse solum significare, sed etiam efficere sanctificationem: & rursus censent, Sacramenta veteris legis non efficere veram sanctificationem, sed solum sanctificationem quãdam legalem, quæ est figura veræ sanctificationis, quam sola Sacramenta nouæ legis efficiunt. Ex his enim duobus rectè concludunt, Sacramentum dici analogicè de Sacramentis veteris & nouæ legis, sicut ipsa sanctificatio, ad quam significandam, & faciendam sunt instituta, dicitur analogicè de vera sanctificatione animæ, & de sanctificatione typica, & legali.

ALTERA sententia est S. Thomæ 3. part. q. 60. art. 1. & 2. (is enim satis apertè sententiam mutauit) necnon Dominici à Soto, & Martini Ledesmi dist. 1. q. 1. art. 1. & 2. Qui docent definitionem illam, *sacra rei signum*, vniuocè conuenire Sacramentis nouæ legis, & veteris: proinde esse illam definitionem Sacramenti in genere.

Fundamentum eorum est, quia existimant ad rationem Sacramenti in genere non requiri, vt sit causa sanctificationis, sed solum, vt eam significet. Porro addunt, Sacramenta legis veteris fuisse verissima signa verissimæ sanctificationis, quia nimirum significabant gratiam iustificantem nobis dandam per Christum. Atque ex his rectè concludunt, Sacramenta legis veteris vniuocè conuenire cum nostris in genere, licet in specie distinguantur; quia nostra efficiunt sanctificationem, vetera non efficiebant. Vtraque sententia partim placet, partim etiam displicet: pono igitur sequentes propositiones.

PRIMA propositio: *Ad rationem Sacramenti in genere non satis est, vt significet, sed requiritur etiam, vt efficiat sanctitatem, seu sanctificationem: immò magis proprium est Sacramenti sanctificare, quàm significare.* Hæc est pro prima sententiâ. Probatur PRIMO, quia (vt supra diximus) in Testamento veteri Sacramenta raro dicuntur significare; frequentissimè autem dicuntur consecrare, & sanctificare, seu initiare, vt patet Exod. 28. & Leuit. 8. In Testamento etiam nouo Baptismus dicitur lauacrum regenerationis, ad Titum 3. Et certè regenerare magis efficere, quàm significare est.

SECUNDO, ab etymologia: Nam omnia nomina similia Sacramento, actionem significant, non signum: vt patet de nomine vestimenti, calceamenti, impedimenti, ornamenti,

firma-

firmamenti, fundamēti, & ceteris eiusdem formæ; Sacramentum igitur à sacrando dicitur, non à significando.

TERTIO, quia tota ratio, cur posterior sententia velit, Sacramentum in genere nihil esse, nisi signum; est illa definitio: *Sacramentum est signum sacra rei*: ubi non tribuitur Sacramento efficere rem sacram, sed solum significare. At iam nos ostendimus istam definitionem non esse perfectam, cum ipse AVGVSTINVS, qui eius est auctor, eam condemnet, quandoquidem vult eam conuenire etiam sacrificio.

SECUNDA propositio: *Sacramenta Veteris legis non ideo Sacramenta sunt, quia significant gratiam iustificantem, sed quia significant & efficiunt sanctitatem legalem*. Hæc est etiam pro prima sententia contra secundam. Et probatur PRIMO ex præcedente conclusione. Si enim ad Sacramentum in genere magis requiritur sanctificare, quam significare, profectò Sacramenta vetera, si vlllo modo Sacramenta erant, non solum significabant, sed etiam efficiebant.

SECUNDO, quia significare gratiam aliis dandam, non est Sacramenti, vt Sacramentum est, sed vt figura, & typus rei futuræ. Nam Sacramentum, vt Sacramentum, dicit ordinem ad eum, qui Sacramento initiatur, non ad alios: vt rectè docet S. THOMAS 1.2. q. 101. art. 4. & q. 102. art. 5. figura autem dicit ordinem ad futura. Et confirmatur; quia significare gratiam dandam aliis, non erat proprium Sacramentis veteribus, sed etiam sacrificiis, aliisque obseruantis Hebræorum, vt S. AUGUSTINUS demonstrat, lib. 19. contra Faustum, cap. 8. 9. 10. & 11. Nec solum illa, sed etiam serpens æneus significabat curationem à peccatis, quam Christus allaturus erat, Ioan. 3. Manna dulcedinem Eucharistiæ, & transitus maris rubri, salutem per Baptismum, 1. Cor. 10. & tamen nec serpens ille, nec manna, nec arca Sacramenta erant Testamenti veteris, aut noui.

TERTIA propositio: *Sacramentum est genus vniusmodi ad Sacramenta legis Veteris, & noua; proinde Sacramenta Vetera erant simpliciter, & absolute Sacramenta*. Hæc est pro secunda opinione contra primam. Probatur PRIMO. Sacramentum in genere nihil aliud requirit, nisi cæremoniam significantem, & efficientem alicuius consecrationis, seu sanctificationis: non autem requirit, vt illa sanctificatio sit per gratiam mundantem animam à peccatis; ista enim specialis sanctificatio constituit speciem quandam Sacramenti, non ipsum

46 *Cap. XII. De Sacram. in genere. Lib. I.*

ipsum genus absolutè. Sacramenta autem veteris legis verè significabant, & efficiebant quandam consecrationem. Nam per Circumcisionem initiabantur Iudæi, & consecrabantur Deo, vt essent populus eius peculiaris; per Vnctionem sacerdotalem verè consecrabantur Deo filij Aaron, vt fungerentur sacerdotio, atque idem de aliis eorum Sacramētis dici potest; de quibus vide S. Thomam, 1. 2. q. 102. artic. 5. Erant igitur illa verè, & propriè Sacramenta.

SECUNDO. Nulla esse potest religio sine Sacramentis, vt S. Augustinus docet, lib. 19. contra Faustum, cap. 11. Sed in Testamento veteri erat vera Ecclesia, vera religio, verum sacrificium, cur igitur non etiam vera Sacramenta?

NEQUE obstat, quòd omnia contingebant Iudæis in figura, 1. Corinth. 10. ac proinde sacrificia, Sacramenta, ritus omnes, typi quidam erant nostri sacrificij, nostrorum Sacramentorum, ac rituum; vnde videtur colligi, non fuisse illa sacrificia, & Sacramenta, nisi per analogiam ad nostra. Hoc, inquam, non obstat; siquidem Sacramenta Iudaica erant quidem figura Sacramentorum nostrorum, sed non solùm figuræ, verùm etiam res per se; nam alioqui non tantùm genere, sed etiam specie conuenirent cum nostris: homo enim viuus, & homo pictus eiusdem speciei sunt, licet non vniocè, sed analogicè. Itaque Circumcisio non solùm erat figura Baptismi, sed etiam erat per se cæremonia instituta ad initiandos homines illius temporis, & adiungendos populo Dei; quare erat imperfectius Sacramentum, quàm sit Baptismus, tamen absolutè, & propriè Sacramentum erat. Nam etiam bos est animal imperfectius, quàm sit homo, & tamen bos absolutè, & propriè animal est: sic etiam ordinatio Aaronica non solùm figura erat ordinationis nostræ, sed etiam per se cæremonia consecrans homines ad sacrificia offerenda. Et ipsa quoque sacrificia non solùm figura erant sacrificij nostri, sed etiam per se sacrificia, instituta ad cultum Deo exhibendum, vt summo rerum omnium principio, & fini. Denique ipse etiam populus Iudaicus figura erat populi Christiani, 1. Corinth. 10. & tamen quis ambigere potest, an non fuerit etiam per se verus quidam populus?

Itaque non debent cõferri res Iudaicæ cum nostris, vt imago picta cum homine viuo, vbi nihil est imago, nisi res alterius: sed vt filij paruuli conferuntur cum viris perfectis, vt facit

Aposto-

Apostolus, Galat. 4. Est enim Filius imago Patris, & tamen etiam per se homo: & ut comparantur certamina, atque exercitationes pueriles cum certaminibus, & exercitationibus viro- rum: Sunt enim certamina puerilia imagines quædam maiorum certaminum; tamen habent etiam suam oblectationem, & vtilitatem illi tempori congruentem.

QUARTA propositio: *Illæ definitio (Sacra rei signum) conuenit vniucè Sacramentis omnibus tum veteribus, tum nouis.* Hæc est pro secunda opinione contra primam. Notandum est autem tribus modis posse exponi definitionem illam. PRIMO, ut per signum intelligatur signum practicum; per rem sacram, gratia iustificans. Et hoc modo non conuenit definitio propriè, nisi Sacramentis nouæ legis; veteribus autem solum secundum quid, & analogicè: quia videlicet illa erant signa practica munditiæ legalis, quæ non est gratia iustificans, nisi typicè, ut imago hominis dicitur homo. Sed ista expositio nõ est ad mentem S. Augustini, ut suprà diximus.

SECUNDO potest sic exponi, ut per signum, intelligatur signum practicum, per rem sacram, consecratio in genere, non descendendo ad iustificationem internam, vel legalem: & hoc modo definitio conuenit vniucè omnibus Sacramentis. Sed neque hæc expositio est ad mentem sancti Augustini; non enim loquitur ipse de signo practico, ut sanctus Thomas rectè aduertit.

TERTIO potest sic exponi, ut per signum, intelligamus nudum signum; per rem sacram, gratiam iustificantem: & hoc modo conuenit vniucè definitio illa omnibus Sacramentis; & hoc dicimus in Cõclusionẽ, sequuti B. Thomam. Ceterùm ista definitio, ut suprà monuimus, non est perfectæ, cum conueniat etiam sacrificio, eodem teste Augustino, loco citato.

Porro definitiones ceteræ, id est, Hugonis, Magistri, & Catechismi Romani, non conueniunt nisi Sacramentis nouæ legis: tamen facillè possent accommodari ad Sacramentum in genere, si loco, *inuisibilis gratia*, seu, *iustitia*, poneretur, *consecrationis cuiusdam*, hoc modo; Sacramentum est res sensi-

bus subiecta, quæ ex Dei institutione consecrationis cuiusdam, tum significandæ, tum efficiendæ vim habet.



CAPVT XIII.

Soluuntur argumenta Kemnity.

His autem quæ diximus, facilè responderi potest ad calumnias Kemnitij. Is enim in 2. parte Examinis, cap. de numero Sacramentorum, reprehendit omnes definitiones, quas attulimus, excepta illa Catechismi Tridentini, cuius nullam facit mentionem; & præterea addit definitiones duas, vnam Scoti, alteram Gulielmi Okam, quas etiam reprehendit.

PRIMUM igitur, pag. 38. arguit definitionem Isidori: *Quomodo*, inquit, *iuxta hanc definitionem Matrimonium erit Sacramentum?* RESPONDEO. Aptissimè convenire hanc definitionem Matrimonio: nam sub tegumēto visibilium rerum, id est, coniunctionis sponsi, & sponsæ, significatur gratia invisibilis, per quam Deus cum anima iungitur, eamque iustificat, siue iustitiam infundat, siue infusam augeat. Neq; his repugnat, quod Apostolus dicit, Matrimonium signum esse cōiunctionis Christi cum Ecclesia: siquidem idem Sacramētum plurium rerum signum esse potest.

SECUNDO, arguit definitiones Hugonis, quodd non rectè Sacramentum dicatur, elementum corporale, quandoquidem Sacramentum Eucharistiæ secundum Catholicos non sit substantia aliqua, sed sola accidentia panis & vini. RESPONDEO. Nec ipsa substantia panis, & vinum est elementum propriè dictum, id est, corpus simplex, sed mixtum. Sed, vt suprà ostendimus, elementum vocavit Hugo rem quamlibet sensibilem, quæ adhibetur ad Sacramenta perficienda.

TERTIO, arguit definitionem Magistri Sententiarum, quodd non rectè habeat, Sacramentum esse formam visibilem. Nam in Matrimonio Catholici volunt materiam esse verba exprimentia consensum: verba autem nec visibilia sunt, nec elementum dici possunt iuxta Hugonem; si elemētum distinguitur contra verbum, iuxta illud: *Accedit Verbum ad elemētum, & fit Sacramentum.*

RESPONDEO. Non desunt Catholici multi, qui materiā in Sacramento Matrimonij esse volunt ipsas personas contrahētes, verba autem solū esse formam: proinde materiam visibilem, & quæ elementum dici possit, assignant. Vide Pe-

trum Paludanum in 4. dist. i. q. 4. Quod si etiam sola verba essent in Sacramento Matrimonij, adhuc nihil efficeret Kemnitij argumentum. Nam verba quoque elementa dici possunt, quatenus materiæ locum habent: id enim elementum dicimus, cum de Sacramentis agimus, quod est ex se indeterminatum, & per certa verba, quasi per formam determinatur. Nec minus asserimus verba, visibilia dici posse, cum visibile ad omnia sensibilia, & sensus ipse videndi vilitate ad omnem sensum transferatur. Vt enim docet Augustinus, lib. 10. Confess. cap. 35. rectè dicimus; Vide quomodo luceat, quomodo oleat, quomodo sapiat, quàm sit durum, quàm benè sonet: non tamen contrà dicimus; Audi quomodo luceat, gusta quomodo splendeat, olfac quàm niteat, palpa quàm fulgeat.

QUARTO, arguit easdem duas definitiones, quòd non rectè habeant, Sacramentum esse signum inuisibilis gratiæ, si per gratiam intelligatur gratia gratum faciens. Nam etiam si Richardus disputet, in Matrimonio, & Ordinatione, vt in alijs Sacramentis, dari eiusmodi gratiam: *Reliqui tamen*, inquit Kemnitius, *agnoscunt hoc subsistere non posse*. SED hoc est impudens mendacium, vt supra diximus, cap. 2.

QUINTO, arguit definitionem Scoti, & Okam: SED immeritò, cum nihil falsi illæ contineant, & solùm verbis, non autem sententia discrepent à definitione communi.

SEXTO, oppugnat omnes definitiones simul: *Si enim*, inquit, *Sacramentum est signum significans effectum Dei gratuitum efficaciter; quomodo non erunt Sacramenta, benedictio Monachorum, aqua benedicta, rosa benedicta, ens benedictus, Agnus Dei, benedictio herbarum, campanarum, imaginum, inunctio regalis, consecratio templi, camiterij, altaris? &c.* Illa enim sunt certis consecrationibus, & finguntur habere spirituales effectus. SED hæc omnia facilè refelluntur ex duplici capite. PRIMO, quia nec benedictio Monachorum, nec alia enumerata significant, aut efficiunt gratiam iustificantem, sed alios quosdam effectus, vt deletionem venialium, & protectionem contra Dæmonem, quos effectus præcipuè habet aqua benedicta. SECUNDO, quia hos ipsos effectus non habent infallibiliter; non enim ex diuina institu-

tione, sed ex Ecclesiæ precibus
vim habent.

CAPVT XIV.

Refellitur definitio Lutheranorum.

ACCEDAMVS nunc ad excutiendas, & refellendas aduersariorum definitiones: sunt enim in hac re valde discordes; quod est manifestum signum eos recessisse à veritate, quæ est vna. Certè Kemnitius, qui alioqui conatur tegere, vel conciliare discordias suorum, in secunda parte Examinis, cap. de efficacia Sacramentorum, pag. 96. enumerat quinque diuersas sententias Lutheranorum præter suam, quæ est sexta.

PRIMA igitur sententia Lutheri est in lib. de captiuitate Babylonica, cap. vltimo, vbi dicit, propriè Sacramentum esse promissionem signo externo annexam. Eam recipiunt communiter Lutherani, sed paulò magis explicant. Sic enim definit Apologia Confessionis Augustanæ, art. 13. *Sacramentum est ritus, qui habet mandatum Dei, & cui est addita promissio gratia.* Similia habet Petrus Martyr, quamuis alioqui Caluinista, in cap. 4. ad Rom. in cap. 10. & 11. 1. ad Corinth. & in explicatione Symboli Italica, artic. 9. & 10. Sed Martinus Kemnitius accuratissimè conatur explicare omnia, quæ ad naturam Sacramenti pertinent.

Et quia tum in Apologia, tum in locis Philippus præfatur, se nominis interpretationem dare, & sæpe variat verba suæ definitionis, vtilius erit ea proponere, & excutere, quæ ad naturam Sacramenti requiri Kemnitius docet. PRIMO ergo, vult Sacramentum esse debere externum materiale, seu corporale, & visibile elementum, seu signum, quod certo externo ritu tractetur.

SECUNDO requirit, vt illud signum habeat expressum mandatum, seu institutionem diuinam.

TERTIO, vt illud mandatū sit in Testamento nouo: quod idem docet Philippus in locis, cap. de Sacramentis, vbi dicit, Sacramentum esse cæremoniam in Euangelio institutam.

QUARTO requirit, vt Sacramentum non sit cæremonia temporaria, sed duratura vsque ad mundi consummationem.

QUINTO requiri dicit, promissionem de gratia, effectu, seu fructu Sacramenti.

SEXTO dicit, eam promissionem debere esse annexam signo, & eo quasi vestitam, diuina ordinatione.

SEPTIMO addit, eam promissionem esse debere non de quocunque dono Dei, sed de reconciliatione peccatoris, & peccati remissione, quam etiam partem vrgent valde Lutherus in captiuit. Babylonica, & Philippus in locis, cap. de numero Sacramentorum.

OCTAUA requirit, vt promissio, quę alioqui generalis est, per Sacramentum applicetur, & obsignetur in particulari singulis, qui cum fide vtuntur Sacramentis. Hanc particulam clariùs explicant Lutherus, & Philippus, & ipse etiam Kemnitius infra cap. de efficacia Sacramenti: volunt enim Sacramenta esse testimonia infallibilia gratiæ Dei, ad hoc instituta, vt excitent & nutriant fidem, ad eum modum, quo miracula facere solent. Vnde Philippus in locis anni XXII. comparat Sacramenta miraculis, quibus Deus olim fidem confirmabat: & in Apologia articuli 13. dicit, Sacramentum esse testimonium infallibile, ac si Deus nouo miraculo de cœlo promitteret, se velle ignoscere. Et Lutherus in lib. contra Cochleum: *Vult, inquit, Petrus per Baptismum, seu signũ externum, fidem pronocari, & exerceri, quæ saluet*; & in libro de captiuitate Babylonica, cap. de Baptismo, confert Sacramenta cum vellere Gedeonis, cum Iride, quam Noë in signum accepit, & cum signo quod Isaïas obtulit Regi Achaz, Isaïæ 7. In ipsa etiam Confessione Augustana, artic. 13. *Sacramenta, inquit, sunt instituta, vt sint signa, & testimonia voluntatis Dei erga nos ad excitandam, & confirmandam fidem, in his qui vtuntur*, proposita. Et Kemnitius loco citato, pag. 102. dicit, verbum & Sacramentum monstrare, vbi fides debeat quærere, & inuenire Christum Mediatorem; & pag. 101. & 105. dicit, Sacramenta esse sigilla promissionis. Hęc igitur est ipsorum sententia.

Excogitauit hanc definitionem Kemnitius, vt ostenderet solum Baptismum, & Eucharistiam esse Sacramenta propriè dicta: sed nondum obtinuit quod voluit. Nam facilè demonstrare possumus, ne his quidem duobus Sacramentis eam definitionem conuenire, & absolutè malam esse.

PRIMA igitur particula vel accipit elementum visibile, & tractabile pro qualibet re sensibili, vt accipiunt Catholici, & cum etiam Absolutio sacerdotalis erit Sacramentum propriè

priè dictum. Est enim Absolutio res sensibilis, cùm auribus percipiatur: vel accipit (vt reuera accipit) elementum visibile, & tractabile pro re, quæ sensu videndi, & tangendi percipitur; & tum fingit sibi definitionem sine vlllo testimonio Scripturæ. Scriptura enim nusquam habet, Sacramentum non esse, nisi rem visibilem, & palpabilem.

Neque alio modo probat Kemnitius hanc particulam nisi ex eo, quod Baptismus, & Eucharistia, quæ sunt vera Sacramenta, signa sunt visibilia, & tractabilia. Quæ argumentatio aut assumit, quod probandum est, & quod ex ipsa definitione postea idem Kemnitius probare conatur, nimirum Baptismum, & Eucharistiam sola esse Sacramenta: aut si hoc non assumit, nihil probat. Vt enim non sequitur; Homo & avis sunt bipedia, igitur omne animal est bipes: ita nõ sequitur, Baptismus, & Eucharistia sunt signa visibilia, & tractabilia, igitur omne Sacramentum est signum visibile, & tractabile. Satis est igitur ad Sacramenti naturam, quatenus signum est sensibile, vt aliquo sensu percipiatur, nec debet excludi sensus audiendi, cùm excellentissima omnium signorum sint ea, quæ hoc sensu percipiuntur, vt S. Augustinus docet, lib. 2. doctrinæ Christianæ, cap. 3.

SECUNDA particula, quæ requirit expressum mandatum, seu institutionem diuinam, aut requirit, vt hoc mandatum sit expressum in Scripturis, aut satis est, si constet Deum hoc mandatum dedisse, licet in sacris literis non habeatur ita expressè. Si hoc secundum sufficiat, admittimus particulam, sed tunc probabimus omnia septem Sacramenta. Licet enim nusquam scriptum sit, Deum mandasse, vel instituisse Sacramentum Confirmationis, tamen quia legimus, Actor. 8. per manus impositionem Apostolorum datum fuisse baptizatis Spiritum sanctum, idque ordinariè, certò colligimus, à Deo id fuisse institutum: nec enim potest vlla creata potestas efficere, vt per impositionem manus, hominibus detur Spiritus sanctus. Quod idem probare possemus de aliis Sacramentis, accedente præsertim antiqua traditione, & Ecclesiæ declaratione.

Sin autem vult Kemnitius (vt reuera se velle significat) requiri mandatum Dei expressum in diuinis literis; falsa est ea particula. Nam per accidens est ad mandatum, siue institutionem diuinam, quod sit scripta, vel non scripta: nam alioqui

non fuissent vera Sacramenta, Baptismus, & Eucharistia, quā Christus, & Apostoli dabant antequam scriberentur Euangelia. Siquidem certum est non fuisse scriptum Euangelium, quando Christus baptizabat, Ioan. 3. & quando Eucharistiam discipulis dedit, Matth. 26. nec etiam quando S. Petrus iussit baptizari tria millia hominum, Actor. 2. quo etiam tempore cœpit frequentari Sacramentum Eucharistiæ, vt ibidem indicat sanctus Lucas.

TERTIA particula, vt hæc institutio sit in Testamento nouo, vera quidem est absolute, tamen destruit sententiam aduersariorum. Ipsi enim communi consensu contra communem consensum Ecclesiæ Catholicæ, docent, Baptismum Ioannis habuisse eandem vim, & efficaciam cum Baptismo Christi; ac proinde Christum non tam instituisse Baptismi Sacramentum, quàm illud iam à Ioanne institutum approbasse. Ita Calvinus docet, lib. 4. Instit. cap. 14. §. 7. Kemnitius in 2. par. Examinis, cap. de Baptismo Ioannis, Philippus in locis, cap. de Baptismo Ioannis & Apostolorum.

At certè, si res ita se habet, non est Baptismi Sacramentum in nouo Testamento institutum: noui enim Testamenti auctor, & princeps Christus est, vt Apostolus ait ad Hebr. 9. propter quod & Isaia 11. dicitur Pater futuri seculi. Si igitur Baptismus, quo utimur, à Ioanne cœpit, qui ante Christum venit, & eius præcursor, & prænuntius fuit, sequitur vt hoc Sacramentum non sit in nouo Testamento, sed in veteri institutum.

QUARTA particula, quòd Sacramentum debeat esse cœremonia perpetua, id est, duratura quamdiu religio ipsa durat, mihi non displicet: nam etiam nos suprà idem docuimus.

QUINTA particula, quod ad Sacramentum necessariò requiratur promissio gratiæ, duobus modis intelligi potest. Vno modo de promissione gratiæ, quæ sit effectus Sacramenti, ita vt idem sit; promissio gratiæ in Sacramentis; & institutio Sacramenti, vt signi efficacis, seu instrumenti iustificationis. ALIO modò de promissione gratiæ præcedente, quæ Sacramento tanquam sigillo obsignetur. Sicut enim aliud est promittere, sigillum aliquod fore efficax ad imprimendum; aliud promittere centum aureos, & syngrapham sigillo obsignare: ita aliud est promittere gratiam verbis, & deinde hanc promissionem signo externo cōfirmare; aliud verò

54 *Cap. XIV. De Sacram. in genere. Lib. I.*

promittere Sacramentum fore instrumentum efficax ad iustificandum. Porro Kemnitius confundit hæc duo. Nam in hac particula quinta dicit, requiri promissionem de gratia, seu fructu Sacramenti, vbi videtur loqui de promissione efficacie Sacramenti; tamen infra, vbi cum ceteris Lutheranis dicit, Sacramentum esse sigillum promissionis, loquitur de promissione præcedente, de qua sine dubio loquuntur omnes Lutherani.

Et quidem promissio de efficacia Sacramenti inuenitur in verbo Dei secundum Catholicos, quantum ad omnia Sacramenta; non autem secundum aduersarios. Catholici enim agnoscunt pro verbo Dei, etiam traditiones; aduersarij autem, qui solas Scripturas recipiunt, non facile ostendent promissionem istam de gratia & fructu Sacramenti, in omnibus Sacramentis. Exemplo nobis sit Eucharistia, quæ apud aduersarios etiam est Sacramentum propriè dictum. Nam habentur quidem multæ, & insignes promissiones, Ioan. 6. vt illa: *Qui manducat hunc panem, & viuet in æternum.* Sed aduersarij non admittunt in hoc 6. capite Ioannis, agi de Eucharistia. Sic enim loquitur Lutherus lib. de captiuitate Babylonica, cap. de Eucharistia: *Primum, inquit, caput 6. Ioannis, in totum est seponendum, & quod nec syllaba quidem de Sacramento loquitur.* Quod idem docent Caluinus, & alij hæretici huius temporis in commentario eius loci. Eo capite seposito, nullam inuenient promissionem. Nam Matth. 26. Marc. 14. & Luc. 22. vbi habetur institutio Sacramenti, non habetur vlla promissio; solum enim hæc verba habentur: *Hoc est corpus meum, quod pro vobis tradetur.* Et: *Hic est sanguis meus, qui pro vobis, & pro multis effundetur in remissionem peccatorum.* Vbi promissio de traditione corporis, & effusione sanguinis non refertur ad Sacramentum, sed ad sacrificium, quod tunc Deo offerebatur in cœna, & postea offerendum erat in cruce. Non enim Dominus dicit, corpus suum dari Apostolis in remissionem peccatorum; sed dari pro illis, nimirum Deo, in remissionem peccatorum; & similiter non dicit sanguinem propinari Apostolis, sed effundi pro illis in remissionem peccatorum.

Promissio autem præcedens, quæ à Sacramento tanquam sigillo obsignetur, non est necessaria, nec in omnibus Sacramentis inuenitur: proinde falsa est ex hac parte definitio aduersariorum.

ierfariorum. Nam in Baptismo, qui Sacramentum est, omnium consensu, non facile inuenietur eiusmodi promissio.

Lutherus in visitatione Saxonica, & Philippus in locis, cap. de Baptismo, adfert illam promissionem, Marci ultimo: *Qui crediderit, & baptizatus fuerit, saluus erit.* Sed ista non est promissio præcedens, sed est explicatio efficaciarum Sacramenti. Et præterea ista verba post resurrectionem à Domino dicta sunt: Baptismi autem Sacramentum etiam ante passionem Christi institutum est, & in mores induci cœptum, ut patet Ioan. 3. & 4.

DICENT fortasse, haberi aliam promissionem Ioan. 3. illis verbis: *Nisi quis renatus fuerit ex aqua, & Spiritu sancto, non potest introire in regnum Dei.* Sed hæc non tam promissio, quam comminatio est, ex qua colligitur quidem necessitas, & virtus Baptismi; sed non promissio aliqua præcedens, quæ Baptismo obsignetur. Adde quòd etiam ante ista verba fuit Baptismus Ioannis, quem aduersarij volunt vim habuisse nostri Baptismi.

Eucharistiarum quidem inuenitur promissio quædam (ut Lutherus notat in Saxonica visitatione) præcedens signum. Nam Lucæ 22. & 1. Corinth. 11. habemus Eucharistiam esse signum corporis Domini pro nobis traditi, & sanguinis pro nobis effusi. Sed eo loco non habemus, Eucharistiam esse signum testificatiuum, & confirmatiuum promissionis, quale ipsi requirunt, ut patet ex vltima particula; sed signum commemoratiuum tantum. Sic enim Dominus ait: *Hoc facite in meam commemorationem.*

SEXTA particula, quòd promissio debeat esse annexa signo diuina ordinatione, falsa est. Nam verbum, quod diuina ordinatione annectitur, & quasi vestitur signo, ut inde fiat Sacramentum, nunquam est promissorium, sed assertorium, vel deprecatorium. Cum enim aqua aspergitur in Baptismo, non dicitur: *Qui crediderit, & baptizatus fuerit, saluus erit,* quam aduersarij promissionem appellant; sed dicitur: *Ego te baptizo, in nomine Patris, & Filij, et Spiritus sancti,* Matth. 28. quæ verba non sunt promissoria. Et Dominus cum primò Eucharistiam fecit, & dedit, non ait: *Qui manducat hunc panem, & uiuet in æternum,* aut aliquid eiusmodi, sed ait: *Accipite, & comedite, hoc est corpus meum.* In Sacramento autem Confirmationis, & Extremæ unctionis, utimur verbo deprecatorio,

quia sic docent nos Acta Apostolorum, cap. 8. & Iacobus cap. 5. in Sacramento Ordinis, imperatorio: *Accipe potestatem.* ii. reliquis, assertorio.

Quod si aduersarij, antequam Sacramenta ministrent, verbum prædicant, & remissionem peccatorum annuntiant, ac deinde sigillum adhibent Sacramentorum, vt Calvinus præscribit in libello de formula Sacramentorum ministrandum; id faciunt ex capite suo, non autem (vt Kemnitius requirit) ex diuina ordinatione. Nusquam enim exstat diuina Ordinatio, qua iubeamur non dare Eucharistiam, aut Baptismū, nisi post concionem. Nam nec Dominus Matth. 26. nec Paulus 1. Corinth. 11. vbi tradunt ritum Eucharistiæ administrandæ, docent, concionem præcedere debere: & certè in Baptismo infantium, frustra adhiberetur concio.

SEPTIMA particula, quòd illa promissio debeat esse de remissione peccatorum, falsa etiam est: & quidem Kemnitius hanc particulam addidit, vt excludat Ordinationem à numero Sacramentorum propriè dictorum. Nam quia in Scripturis inuenitur signum externum, quo confertur Ordinatio, nimirum impositio manus; & etiam collatio gratiæ, cum Apostolus dicat, 1. Timoth. 4. *Noli negligere gratiam, qua in te est, qua data est tibi per prophetiam cum impositione manuum presbyterij,* non putauit Kemnitius posse excludi Ordinationem à Sacramentis propriè dictis, nisi adderet, eam gratiam debere esse remissionem peccatorum. At si vera esset ista particula, excluderet etiam Eucharistiam à Sacramentis propriè dictis: siquidem Eucharistia non est instituta propriè ad remittenda peccata, sed ad charitatem nutriendam, & augendam. Ideò enim datur sub specie panis, & vini, quæ nutriunt viuos, non excitant mortuos. & B. Paulus 1. Corinth. 11. iubet, vt homines probent se, nimirum an sint absque peccato, antequam ad eam mensam accedant: *Qui enim manducat indignè, iudicium sibi manducat.*

OCTAVA particula, quòd Sacramentum obsignet instar sigilli, & confirmet instar miraculi promissionem gratiæ, ad excitandam & alendam fidem iustificantem; æquè falsa est, & diligenter refutanda, tum quod sit præcipua, tum etiam, quòd eam ponat Calvinus quoque in sua definitione.

PRIMO, si Sacramenta confirmarent promissiones Dei instar miraculi, vel sigilli, essent notiora, & efficaciora ad fidem

fidem persuadendam, quàm sint ipsa Dei verba: hoc autem falsum est, igitur & illa particula falsa est. Probatur propositio, tum quia frustra adhiberetur vnum ad confirmandum aliud, nisi esset eo notius, & firmitus: tum etiam, quia hæc est vis sigilli, & miraculi. Semper enim sigillum Regium notius est, & firmitus, quàm literæ Regis: sigillum enim omnes norunt discernere, literas non omnes discernunt; & sigillum sine literis auctoritatē habet, literæ sine sigillo non habent. Sic etiam miraculum notius est, & efficacius, quàm prædicatio. Omnes enim qui vident cæcum illuminari, aut mortuum excitari, intelligunt illud esse opus supernaturale, & diuinum, & proinde mouentur ad credendum id, quod tali testimonio confirmatur: non autem omnes, qui audiunt prædicantem, continuo intelligunt, illa esse verba Dei.

Vbi NOTANDUM est, miraculis, quæ fiunt ad confirmandam fidem, non confirmari diuinam auctoritatem, quasi magis credendum sit miraculo, quàm Deo dicenti; omnes enim sciunt, Deum non posse mentiri, & nihil esse maius diuina auctoritate, sed confirmari auctoritatem proponentis fidem. Magis enim mouemur ad credendum verè esse à Deo reuelata, quæ prædicator proponit, si miracula videamus, quàm si sola proponentis auctoritate nitamur. Vnde Marc. ult. legimus: *Illi autem profecti, prædicauerunt vbique Domino cooperante, & sermonem confirmante sequentibus signis.* Vbi vides, Deum confirmare signis non suam ipsius auctoritatem, sed prædicatorum sermonem.

Probatur iam assumptio argumenti, quodd videlicet falsum sit Sacramēta esse notiora, & efficaciora ipso Dei verbo. Nam PRIMO nihil fingi potest maius, & efficacius Dei verbo. SECUNDO experientia docet, facilius intelligi, si quid verbo dicatur, quàm si nutu significetur. Quid autem sunt Sacramenta, si cum verbis comparentur, nisi nutus quidam? Pari ratione experientia docet, magis persuadere verba, quàm muta signa, modò nō sint miracula. Vnde Lutherus ipse fatetur, multò efficaciora esse promissionis verba, quàm Sacramenta, quæ sunt mutæ conciones: *Verbum ipsum* (inquit in libro contra Ioannem Cochleum) *quod longe praualeat signo visibili, nulum tamen per sese iustificat, nisi credentem.*

RESPONDET Caluinus lib. 4. Instit. cap. 14. §. 3. Sacramenta non confirmare promissiones ex parte Dei, sed ex parte no-

stra: quia licet vt à Deo sunt, certissimæ sint, tamen vt à nobis recipiuntur, ob nostræ fidei imbecillitatem, non ita certò accipiuntur, nisi confirmentur testimonio Sacramentorum.

SED hoc facilè reiicitur. Nam quod promissiones Dei ex parte nostra egeant confirmatione, vel sit, quia nescimus, quæ sint Dei promissiones, idq; ex Sacramentis discimus, aut quia cum sciamus & illas promissiones Dei, & hæc Sacramenta esse; tamen magis credimus Sacramentis, quàm promissionibus. Atquæ hoc posterius iam refutatum est. Non enim solum credimus, sed etiam scimus euidentissima ratione, Deum non posse mentiri, proinde nihil esse certius promissionibus Dei: neque id aduersarij negare possunt. Illud autem prius, æquè facilè refutari potest: siquidem falsum est, promissiones Dei disci ex Sacramentis, cum contrà potiùs Sacramenta ex verbo Dei discantur. Iam verò, si sigillum Regium esset ignotum, & solum posset cognosci ex literis, quibus est appensum; esset planè superfluum. Nam vel credunt homines literas illas esse Regis, secluso sigillo, vel non; si credunt, quid facit sigillum? si non credunt, certè neque credunt sigillum esse Regium: nihil igitur confert. Pari ratione, cum Sacramenta non sciantur esse Dei sigilla, nisi quia Scriptura hoc dicit, si creditur verbo sine Sacramentis, quorsum Sacramenta? si non creditur, certè nec Sacramenta creduntur esse Sacramenta: proinde nihil operantur.

AD hoc argumentum respondet Calvinus lib. 4. Institut. cap. 14. §. 5. in diplomatibus, quoque nihil valere sigillum sine literis, vt patet si appendatur chartæ, in qua nihil sit scriptum: & tamen cum appenditur diplomati scripto, multum valere ad illud confirmandum. Et addit, nihil esse mirandum, si promissiones Sacramentis confirmentur, cum etiam interdum vna promissio per aliam confirmetur.

SED hæc responsio non diluit argumentum. Nam vt incipiam à posteriore exemplo, promissio promissionem confirmat, quia vna non pender ab alia. Confirmauit Angelus, Luc. 1. promissionem conceptus Virginei, ex promissione conceptus, qui iam præcesserat in scæmina anu, & sterili. Non enim pendente inuicem duo ista opera mirabilia: proinde vnum, quod iam præcesserat, magnam vim habuit ad confirmandum alterum, quod nondum venerat. At Sacramenta, vt diximus, simpliciter pendent ex verbo. Quod verò attinet ad
simili-

similitudinem sigilli, & diplomatis, nihil omninò est, quod Calvinus dicit. Nam sigillum appensum chartæ non scriptæ, nihil quidem confirmat, tamen non ideò pender à literis, aut nihil est. Immò hinc intelligimus, quàm ineptè aduersarij Sacramèta sigilla appellant, cùm omninò contrariam habeant proprietatem. Nam diplomatum sigilla habent suam auctoritatem sine literis diplomatis, literæ autem non habent sine sigillo: contrà verò in verbo, & Sacramētis, verbum Dei etiam sine Sacramentis, infallibilem habet auctoritatem; Sacramenta sine verbo, nullam habent. Quare verbum potius appellandum esset sigillum Sacramenti, quàm Sacramentum, sigillum verbi.

DICENT fortasse, Esto, Sacramenta non confirment promissiones more miraculi, vel sigilli: tamen iuuant, & confirmant saltem eo modo, quo actio externa iuuat, & confirmat orationem docentis. Negari enim non potest, quin aliquid conferat ad explicandum, & persuadendum ipsa actio, & motus manuum, & oculorum, licet primas partes teneat oratio. Erunt igitur Sacramenta, quasi actio quædam Dei, quæ simul cum verbo, magis mouebit ad fidem, quàm solum verbum.

RESPONDEO, ne id quidem concedi posse. Nam actio in hominibus ideò iuuat orationem, quia oratio humana imperfecta est, vt sunt omnes res creatæ, & etiam quia actio non habet vim suam à verbo, sed à se. Quocirca magis credebant Ethnici oraculis Apollinis, quæ falsa putabant esse non posse, quamuis solis verbis ederentur, quàm orationi, & actioni cuiuslibet oratoris. Cùm ergo verba Dei sint per se summæ auctoritatis, & Sacramenta omnem vim suam habeant à verbis, nihil addere possunt ipsi verbo.

Verum est tamen, quod Catholici dicunt, Deum voluisse dare gratiam suam per signa sensibilia, vt per ea instrueret homines, & deduceret ad intelligenda spiritualia. Aliud enim est docere spiritualia per similitudines rerum corporalium, aliud confirmare rem firmissimam per aliam minus firmam.

SECUNDVM argumentum. Essentia, & natura Sacramentorum non potest aliunde melius colligi, quàm ex verbis illius, qui ea instituit. Sed in Scripturis sanctis, quæ sunt verba Dei auctoris Sacramentorum, nusquam dicuntur Sacramenta testimonia promissionum, sed vbiq; describuntur, vt instrumenta iustificationis. Nam Ioan. 3. dicimur nasci denuò per Baptis-

60 *Cap XIV. De Sacram. in genere. Lib. I.*

Baptismum, & similiter ad Ephes. 5. dicit Apostolus, Ecclesiam sanctificatam, & mundatam lauacro aquę in verbo vitę: & ad Tit. 3. vocat Apostolus Baptismum, lauacrum regenerationis, & renouationis. Sic etiam de Eucharistia Ioan. 6. dicitur: *Qui manducat hunc panem, & uiuet in æternum*; atque idem de aliis probare possemus. Non possunt autem nisi absurdissimę istę sententię ita exponi, vt Sacramenta regenerare, mundare, dare vitam æternam, nihil aliud sit, quàm testimonium dare diuinarum promissionum: Quis enim ferret eum, qui ita diceret; Baptismus regenerat, id est, dat testimonium diuinę voluntatis? vel, Ego te baptizo, id est, ego testificor? Estq; hoc argumentum contra Lutheranos efficacissimum: siquidem Lutherus, quem ceteri in hac re libenter sequuntur, in lib. contra Cochlæum, sic ait: *In rebus sacris & vehementissimus, & robustissimus locus est, arguere ab auctoritate negatiuę*. Vel igitur proferant locum, vbi Sacramenta dicantur testimonia promissionum, aut certę fateantur vehementissimum, & robustissimum argumentum nos habere.

Tria tantum loca proferre solent, quę speciem aliquam videantur habere. Vnus est Genes. 17. vbi Circumcisio dicitur signum fœderis. ALTER Rom. 4. vbi Circumcisio dicitur
 „ signaculum iustitię fidei. TERTIVS I. Pet. 3. vbi Petrus dicit,
 „ saluos facit Baptisina, non carnis depositio sordium, sed conscientię bonę interrogatio, siue (vt ipsi reddunt) stipulatio, vel pactum cum Deo.

SED in his locis non nominatur promissio, vel testimonium, neque hæc loca ad rem faciunt, vt infra ostendemus in solutione argumentorum.

TERTIVM argumentum. Si solum essent Sacramenta testimonia promissionis, & gratiæ, vel superuacanea, vel certę parum necessaria essent. Nam habemus alia testimonia longę efficaciora: siquidem bona opera sunt testimonia adeptę iustitię longę meliora, quàm ablutio aquę, vel sumptio Eucharistię. Nam multi impij baptizantur ficto corde, & Eucharistiam sumunt, qui proinde peiores sunt, & magis inuisi Deo, quàm antea. 2. Cor. 1. *Gloria nostra hæc est, testimonium conscientiæ nostrę*. 2. Pet. 1. *Satagite, & per bona opera certam Vestrę Vocationem, & electionem faciatis*. 1. Ioan. 3. *Qui facit iustitiam, iustus est, & qui natus est ex Deo, non peccat*.

QUARTVM argumentum. Si Sacramenta solum essent testi-

testimonia promissionum, ad excitandam fidem instituta, frustra baptizarentur infantes, & amentes, quos certum est, non modò non credere, sed nec posse credere actu. At Lutherani omnes pugnant pro Baptismo paruulorum contra Anabaptistas: non igitur verè tradunt iidem Lutherani, quid sit Sacramentum. Hoc argumentum coëgit Lutherum in libro contra Cochlæum, & Lutheranos ceteros asserere, infantes actu credere dum baptizantur; quod tamen adedè est absurdum, vt S. Augustinus in epist. 57. ad Dardanum scripserit, eos iniuriam facere humanis sensibus, qui hoc dicunt. Videmus enim infantes ad contactum aquæ sanctæ plorare, refugere, ac reniti, quantum possunt: quod certè si facerent vsus rationis habentes, non modò non purgarentur ab originali peccato, sed adderent etiam proprium actuale.

QVINTVM argumentum. Si Sacramenta essent testimonia gratiæ, quæ in particulari confertur alicui, sæpenuerò falsa essent, nimirum cùm Sacramentum ministratur homini, qui fingit se credere, cùm reuera non credat. Proinde non liceret vllum baptizare, ne cogeremus Deum testificari falsum: de nullo enim certò scimus, credâtne verè, an fingat se credere.

DICENT fortasse, Sacramentum testimonium esse gratiæ non absolutè, sed si is, qui suscipit Sacramentum, credat promissioni.

SED contrà, probò testimonium esse absolutum, non conditionatum. PRIMò, Lutherus in assert. i. art. dicit, cum qui non credit verbo ministri dicentis; Ego te baptizo, vel, Ego te absoluo, facere Deum mendacem, cuius illa verba sunt. At si illa verba intelligerètur cum conditione, si aliter credat; non essent falsa, nec fieret Deus mendax.

SECUNDO, si essent illa verba conditionata, rueret fides iustificans Lutheranorum. Nam ipsi volunt hominem debere credere absolutè sine vlla hæsitatione, se esse iustum: ergo Deus absolutè testatur illum esse iustum; non enim debet homo credere, nisi quod Deus testatur. Et præterea fides debet esse certa, ergo non debet pendere à conditione, si homo credat. Nam nemo certus est secundum Lutherum, de se an verè credat: sic enim scribit Lutherus in libro contra rebaptizantes edito anno M. D. XXVIII. *Baptismus non est fundandus supra fidem baptizantis, vel baptizati, quia uterque incertus est*

est de fide. Et infra: Ita euenit, & solet fieri de fide, ut qui arbitratur se credere, nihil omnino credere sapé conuincatur, & e contra, qui nihil se putat credere, is omnium maximè credat.

TERTIO. Aduersarij ita de hac re loquuntur, vt omnino absolutum esse testimonium Dei in Sacramentis credere videantur. Sic enim loquitur Philippus in locis, cap. de Baptismo: *Ego, inquit minister, mandato diuino, & loco Christi baptizote, id est, hoc signo testificor ablui peccata tua, & tereconciliatum esse vero Deo, &c.* vbi nullam facit mentionem conditionis. Atque hæc de definitione Lutheranorum.

CAPVT XV.

Refelluntur definitiones Anabaptistarum, & Zuinglianorum.



ALTE sententia de natura Sacramenti est quorundam, quos Lutherus, & Calvinus passim phanaticos vocant. Hi docent Sacramenta nihil esse aliud, quàm signa quædam instituta ad discernendum populum Christianum à Iudeis, & paganis, quomodo Romanis olim toga erat signum, quo discernebantur à Græcis, & quo modo nunc diuersæ formæ, & colores vestium distinguunt diuersa genera Monachorum. Auctorem huius sententiæ Andream Carolstadium facit Lutherus in serm. de verbis cœnæ: *Hoc est corpus meum.* Qui Andreas fuerat olim ex primis Lutheri discipulis, & amicis: quare in secundo scripto contra Regem Angliæ vocat eum suum Absalonem, & Iudam, quòd sicut Absalon Dauidi patri, & Iudas Christo præceptor, ita Carolstadius sibi rebellis, & infidelis fuerit.

Ab hac sententiâ non abhorruit initio Philippus Melancthon, vt patet ex locis anno XXII. editis, vbi hanc sententiam probabilem putat. Cap. de signis, in fine: *Probabilis, inquit, & illi voluntatis, qui symbolis, seu tessèris militaribus hæc signa comparauerunt, quod essent nota tantum, quibus cognoscerentur, ad quos pertinerent promissiones diuina.* Tamen si postea eam oppugnaverit in Apologia Confessionis art. 13. & in locis ultimo editis.

Vbi NOTANDVM est duas primas sententiâs, quas Kemnitius enumerat; VNA videlicet, quòd Sacramenta sint signa, quibus

quibus distinguuntur Christiani à non Christianis; ALTERA, quòd sint signa symbola quædã Christianæ societatis: rectius à Philippo locis notatis, vnam sententiam fieri. Nam illi duo tantũ agnoscunt Sacramenta, Baptismum & cœnã. Et Baptismum quidẽ symbolum faciunt; quo discernamur à non Christianis, cœnam autẽ symbolum Christianę inter nos societatis.

Hęc sententia partim est vera, partim etiam falsa. Etsi enim Sacramenta illum vsum habeant, quòd distinguunt religionẽ veram à quibusdam falsis, tamen non est hic solus, vel præcipuus Sacramentorum nostrorum vsus. Nam PRIMO in Scripturis nusquam legimus, Baptismum, Eucharistiam, aut alia Sacramenta instituta esse, vt distinguant populum Christianum ab aliis populis: legimus autem frequenter in eum finem esse instituta, vt iustificent homines, Mar. ult. *Qui crediderit, & baptizatus fuerit, saluus erit:* Non dixit, discernetur ab aliis, sed saluus erit. Act. 2. *Pœnitentiam agite, & baptizetur vnusquisque vestrum in nomine IESU Christi, in remissionem peccatorum vestrorum, & accipietis donum Spiritus sancti.* Et Act. 22. *Baptizare, & ablue peccata tua inuocato nomine ipsius.* Adde loca suprà citata, quæ idem docent, Sacramenta videlicet instituta ad iustificandum.

SECUNDO alia signa sunt meliora ad distinguendum populum Dei ab aliis populis, vt confessio fidei, quę solis conuenit veris Catholicis; cùm Baptismus communis sit cum hæreticis; vt etiam charitas mutua, quæ in solis Catholicis est, cùm Sacramenta omnia sint communia cum schismaticis. Quare Dominus, Ioannis 13. non ait: *In hoc cognoscent omnes, quòd discipuli mei estis,* si Baptismum habueritis, aut Eucharistiam, sed si dilectionem habueritis adinuicem.

TERTIO, Sacramenta omnia vim habent ex Christi passione, in cuius rei signũ ex latere Domini perfollo manauit sanguis, & aqua, Ioan. 19. Aqua enim Baptismum significauit, vt Ambrosius li. 10. in Luc. c. 105. Chrysostomus, Cyrillus, Theophylactus in c. 19. Ioan. Leo epist. 4. c. 6. Damascenus lib. 4. cap. 10. Hieronymus epist. 83. ad Oceanum, & Augustinus docent, tract. 120. in Ioan. qui etiam tract. 15. hoc idem probat ex illis verbis Pauli ad Ephes. 5. *Christus dilexit Ecclesiam, & tradidit semetipsum pro ea, mundans eam lauacro aqua in verbo vite.* & lib. 15. ciuit. cap. 26. idem probat aliis testimoniis. At certè si solùm distinguere debebant, quomodo togæ distinguunt, nõ

64 Cap. XV. De Sacram. in genere. Lib. I.

erat opus Christi passione, sed satis erat humanum beneplacitum.

DENIQUE illa sententia longissimè abest à sensu, & verbis omnium Patrum: quorum nomine vnum AVGVSTINVM audiamus, quæst. 84. in Leuiticum: *Sine sanctificatione inuisibilis gratia, & invisibilia Sacramenta quid prosunt?* & lib. 19. contra Faustum, cap. II. *Sacramentorum & is inenarrabiliter valet plurimum, & ideo contempta sacrilegos facit; Impie quippe contemnitur, sine quo non potest perfici pietas.*

TERTIA definitio est Anabaptistarum, qui docent, Sacramenta nihil esse aliud, quàm allegorias, & quasi signa quædam bonorum operum, & vitæ ac morum spiritualium. Volunt enim baptizati homines, vt significant debere Christianos sustinere aduersa, & ipsam mortem pro Christo. Referunt hunc errorem Philippus in locis anni XXXVI. & XLI. cap. de Sacramentis, Ioannes Brentius hom. 23. in cap. 3. Luc. & Kemnitius in 2. parte Examinis, pag. 96.

SED nullo negotio hæc sententia refelli potest. Nā etiam si hanc utilitatem cum aliis habent Sacramenta, vt admoneant homines bonorum operum, & virtutum (nam certè negari non potest, quinmersio in Baptismo, & emersio, admoneat mortis, qua mori debemus peccato, & resurrectionis, qua resurgere debemus ad nouam vitam: cuius rei meminit etiam Apostolus, Rom. 6. & Eucharistia admonet pacis, & amicitiae, quæ inter nos esse debet: *Sumus enim vnum corpus, qui de vno pane participamus.* I. Corinth. 10. tamen non est iste solus, nec præcipuus Sacramentorum vsus: proinde nec in eo posita est essentia, & natura Sacramenti.

Et probatur hoc iisdem argumentis, quibus aduersus Carolstadium vsi sumus. PRIMO, quia Scriptura dicit, Sacramenta instituta ad iustificandum. I. Cor. 6. *Abluti estis, sanctificati estis.* Ephes. 5. *Mundans eam lauacro aquæ in verbo vitæ.* SECUNDO, si solum deberent esse allegoriæ, non erat opus, vt manarent ex latere Christi; sufficiebat enim humanum beneplacitum. TERTIO, quia non deerant aliæ vtiliores, & efficaciores admonitiones ad benè viuendum, vt exhortationes, & exempla Christi, & Sanctorum. Adde QUARTO, quòd si ea sententia vera esset, Sacramenta non essent signa nisi futurarum rerum. At sunt etiam signa rerum præteritarum, & præsentium; nam Eucharistia repræsentat Christi mortem, I. Cor.

II. & Baptismus significat internam abluionem, quæ tunc perficitur, cum exterius baptizamus, iuxta illud Act. 22. *Baptizare, & ablue peccata tua.*

QUARTA definitio est aliorum, qui volunt, Sacramenta esse signa gratiæ, non quæ tunc percipiatur, sed quæ iam antea percepta fuerit. Hanc sine nomine auctoris referunt, & refellunt Zvinglius in lib. de vera, & falsa religione, cap. de Sacramentis, & Kemnitius loco citato in Exam. pag. 96. Et facile refutari potest; quia Scriptura disertis verbis docet, Sacramenta in præsentem gratiam adferre. Act. 22. *Ablue peccata tua.*

QUINTA definitio est Zvinglij, & sectatorum eius, excepto tamen Petro Martyre, ut supra diximus. Zvinglius igitur in libro de vera, & falsa religione, cap. de Sacramentis, posteaquam refutauit sententiam Catholicorum, & Lutheranorum, aperit mentem suam, ac docet, Sacramenta nihil esse aliud, nisi initiationem, quandam, & oppignerationem, qua videlicet homines se obligant Christo, & eius militiæ nomen dant. Ex quo deducit, Sacramenta non esse testimonia iustitiæ, propriè ei, qui Sacramenta suscipit, ut Lutherani dicebant; sed esse testimonia publica toti Ecclesiæ de obligatione, & fidelitate, quam ille debet Christo, cui se consecrauit. Eandem sententiam sequitur Martinus Bucerus in commentario 3. cap. Matth. xi, & in præfatione secundæ editionis eorundem commentariorum, ubi addit: *Quod si ij, qui baptizantur, sunt prædestinati, tum Sacramentum non solum est signum, quod illi dent nomen Christo, & recipiantur in externa Ecclesia, sed etiam adfert quandam consolationem; si Verò non sunt prædestinati, tum Sacramentum est nudum signum, quod illi recipiantur in externa Ecclesia, non autem à Deo.* Vnde etiam deducit, infantibus non prædestinatis, nihil prodesse Baptismum, sed perire eos, licet sint baptizati.

Hæc sententia similis est superioribus. nam adfert quidem aliquid veri (neque enim negari potest, quin per Sacramenta iniciemur, & nomen Christo demus, & publicè testemur, nos esse membra Ecclesiæ) sed in eo errat, quod non agnoscit alium finem sublimiorem institutionis Sacramentorum: & proinde non rectè explicat naturam Sacramenti. Et probatur hoc PRIMO ex sententia Zvinglij, Christus nihil agit, sed solum homo testatur se fore fidelem. At Ioan. 1. dicitur: *Hic est qui baptizat.* Et Ephes. 5. *Mundans eam, &c.*

SECUNDO, quia Zvvinglius requirit, vt homines antequam Sacramenta recipiant, sint iustificati, & coniuncti Christo interiùs, & solùm per Sacramenta exteriùs testentur, & profiteantur se velle Christo militare, & Ecclesiæ externæ adiungi. At Scripturæ testantur Sacramenta esse instituta ad sanctificandum, & mundandum hominem interiùs. Id enim significat Apostolus, cùm ait, Ephes. 5. *Mundans eam lauacro aquæ in Verbo vite.* Ad quem locum respiciens S. AUGUSTINVS tract. 80. in Ioannem scripsit: *Vnde hac tanta virtus aquæ, & corpus tangat, & cor abluat?* Item Ioan. 3. & ad Tit. 3. dicitur Baptismus lauacrum regenerationis, & renouationis. Ex quibus locis habemus, per Baptismum hominem renasci, quod ad interiorem hominem pertinet, & non solùm exteriùs testari se esse fidelem. Huc etiam pertinent Scripturæ citatæ contra alios errores, Actor. 2. & 22. 1. Cor. 6.

TERTIO probatur hoc idem. Nam Apostolus Rom. 6. aper- tissimè dicit, Baptismum significare mortem, & resurrectionem Christi: & 1. Cor. 11. dicit Eucharistiam institutam in memoriã passionis Domini: Non igitur Sacramenta significant solum hominem initiari Deo, vel coniungi cum Ecclesia.

CAPVT XVI.

Refellitur definitio Caluini.

POSTREMA definitio, ac sententiã est Ioannis Caluini, qui lib. 4. Institut. cap. 14. §. 1. his verbis dicit, simplicem, & propriam contineri definitionem Sacramenti: *Sacramentum, externum est symbolum, quo beneuolentiã erga nos suã promissiones conscientis nostris Dominus obsignat, ad sustinendam fidei nostræ imbecillitatem: & nos vicissim pietatem erga eum nostram tam coram eo, & Angelis, quàm apud homines testamur.*

Est autem OBSERVANDUM, Caluini sententiam compositam videri ex Lutheri, & Zvvinglij sententiis. Nam quod ait, symbolum obsignare promissiones ad sustinendam fidei imbecillitatem, ex Luthero sumptum est; quod addit in fine, eodem symbolo nos testari apud homines pietatem nostram erga Deum, ex Zvvinglio est acceptum: tamen re ipsa plurimum dissentit Calvinus ab utroq;. Nam etiam si cum Zvvinglio agnoscit, Sacramento nos testari hominibus pietatem nostram,

nostram, tamen negat hunc esse solum, vel primum usum Sacramenti, & acerrimè pugnat, cap. 14. à §. 5. vsque ad 14. pro sententia Lutheri, & soluit omnia argumenta, quæ Zwinglius, & Bucerus faciunt contra Lutherum, tametsi neminem eorum nominat. Pari ratione, licet cum Luthero affirmet Sacramenta esse testimonia gratiæ, & remissionis peccatorum: tamen id longè aliter intelligit, quàm Lutherus. Hic enim semper loquitur de gratia, quæ tunc datur homini, cum Sacramenta percipit: at Calvinus loquitur de gratia prædestinationis, ac proinde vult Sacramenta esse testimonia prædestinationis, ad eam fidem alendam instituta, qua homo certò credit se esse prædestinatum; ex quo sequitur id, quod Bucerus dicebat, Sacramenta non esse vera signa, nec prodesse nisi prædestinatis.

Fundamentum autè huius rei est, quod existimet Calvinus (vt ipse fusè tractat li. 3. Instit. cap. 2.) veram fidem semel habitam, nunquam posse amitti: hinc enim sequitur veram fidem, sine qua Sacramenta nihil prosunt, esse propriam prædestinatorum, nec eam vllò modo haberi posse à non prædestinatis. Vnde in Antidoto Concilij, sels. 6. cap. 5. dicit, Baptismum dari infantibus, quia censentur iam membra Ecclesiæ, cum sint à Deo adoptati in filios, nimirum per gratiā prædestinationis: & ibidem sels. 7. can. 7. de Baptismo, dicit, Sacramentum reddere nos certos de perpetua adoptionis gratia: & clarissimè in lib. de consensione inter Tigurinos, & Geneuenses in re Sacramentaria, sic ait Calvinus: *Sedulo docemus, Deum non promiscuè vim suam exerere in omnibus, qui Sacramenta recipiunt; sed tantum in electis. Nam quemadmodum non alios ad fidem illuminat, quàm quos præordinauit ad vitā, ita arcana spiritus sui virtute efficit, ut percipiant electi, quæ offerunt Sacramēta.*

His explicatis refellenda est hæc definitio: tota enim est vitiosa, vt perspicuum erit, si percurramus singula verba. PRIMUM verbum est: *Symbolum externum*. Quod quidem verum est absolutè, non tamen in eo sensu, quo accipitur à Caluino. Ille enim intelligit esse nudum symbolum, id est, symbolum quod solùm significet, non autem operetur aliquid: nam in tota definitione non ponit alios effectus huius symboli, nisi obsignare Dei promissiones, & testificari pietatem nostram. Neque obstat, quod Calvinus dicat in Antidoto Concilij Tridentini, sessione 7. canone 5. Sacramenta esse instrumenta

iustificationis; nam intelligit esse instrumenta, quia excitant, vel alunt fidem; idq; non per aliquam efficientiam, sed merè obiectivè. Id quod explicat clarissimè Theodorus Beza, in libro de summa rei Sacramentaria, quæst. 2. cùm sic ait: *Vnde efficacia illa Sacramentorum? à Spiritus sancti operatione in solidum, non autem à signis, nisi quatenus externis illis obiectis interiores sensus moventur.* Hæc ille. Qua ratione certè signa etiam, quæ in foribus publicorum hospitiorum pendent, instrumenta dici possunt cœnationis, quia movent hominem, ut cogitet in ea domo paratam esse mensam, &c.

At Scripturæ passim docent, Sacramenta esse res quasdam operantes, nimirum quæ mudent, lauent, sanctificent, iustificent, regenerent, Ioan. 3. 1. Cor. 6. Ephes. 5. ad Tit. 3. Actor. 22. immò nusquam Scripturæ dicunt, Sacramenta esse testimonia promissionum Dei, & nostræ pietatis; aut certè non tam expressè hoc dicunt, ut id quod nos asserimus, nimirum quoddam sint causæ iustificationis.

ALTERUM verbum est, *benevolentia erga nos sua.* Quod verbum duplici nomine non rectè ponitur in definitione Sacramenti. PRIMÒ; Quia ex hoc verbo sequitur, semper Sacramentum esse signum rei præteritæ, seu potius æternæ. Id quod ipse non potest negare, cùm per benevolentiam intelligat gratiam prædestinationis; & præterea id apertè concedit in Antidoto, sels. 6. cap. 5. *Non à Baptismo, inquit, initium habet eorum salus, sed qua iam in verbo fundata erat, Baptismo obsignatur.* Et ibidem: *Nisi enim iam antè ad eos pertineret vita promissio, Baptismum prophanaret, quisquis illis daret.* Itaq; concedit ipse, Sacramentum esse sigillum præteritæ, immò æternæ Dei benevolentia. Neque hoc pugnat cum eo quod ipse dicit in Antidoto, sels. 7. can. 4. & 5. & Sacramenta esse instrumenta iustificationis. Nam vult quidem Sacramenta, quatenus fidem sustentant & alunt, confirmare, vel augere iustificationem; (fides enim est, quæ iustificat apud ipsos) tamen non vult Sacramentum esse sigillum huius iustificationis, quæ habetur per fidem, sed gratiæ prædestinationis; nec vult Sacramentum adferre primam iustificationem, sed solùm augmentum, & confirmationem, ut clariùs ipse idem docet in paruo Catechismo. Prima enim iustificatio habetur per fidem conceptam ex concione præcedenti.

At hoc totum repugnat apertissimis Scripturis, quæ tribuunt

buunt Sacramentis vim adferendi primam iustificationem. Quidenim aliud est regenerare, quod tribuitur Baptismo, Ioan. 3. & ad Tit. 3. quàm ex homine mortuo in peccatis, facere hominem viuum vita gratiæ? Sed de hoc infra suo loco fusiùs.

DEINDE non rectè ponitur in definitione Sacramenti illa promissio gratiæ prædestinationis, tum quia sæpe contingeret, Deum falsò testificari, tum quia nemo posset sine peccato alium baptizare. Nam Baptismum prophanat, (vt Calvinus dicit in Antidoto, sels. 6. cap. 5.) qui illud confert ei, ad quem non pertinet promissio: nam cogit Deum testificari falsum, nimirum se eum diligere, quem reuera non diligit. At nemo potest certus esse de alio, si tñe prædestinatus, an non: ergo vel neminem debet vllus baptizare, vel temerè, & infideliter agit, cùm se periculo exponat prophanandi Baptismum.

AD HOC argumentum responderet Bucerus, ministros non habere intentionem baptizandi, nisi prædestinatos: sic enim ipse dicit in præfatione commentariorum in Matthæum.

AT HOC non satisfacit. Nam IN PRIMIS hoc excusat ministrum, sed non Deum, nisi fortè etiam Deus aliquando baptizet sine intentione baptizandi, quod est ridiculum. DEINDE ex sententia Lutheranorum, & Calvinistarum omnium, Sacramenta nō pendent ab intentione ministri. Scribit enim Lutherus in lib. de captiuitate Babylonica, de Baptismo; Baptismum esse verum, & ratum, etiamsi minister intendat non baptizare, sed ludere. Nec dissentit Calvinus in Antidoto Concilij, sels. 7. can. 11.

Calvinus aliter RESPONDET, lib. 4. Instit. cap. 15. §. 16. & 17. Deum videlicet ex parte sua verè offerre promissionem, & sigillum promissionis omnibus, qui baptizantur, siue illi recipiant, siue non; proinde Deum semper esse veracem. Nec ministros etiam peccare diceret, si Baptismum conferant iis, qui profitentur se credere, si adulti sint, vel qui filij sint fidelium parentum, si sint infantes; nam filios fidelium, sanctos nasci credit Calvinus, ex illa promissione Dei, Genes. 17. *Ero Deus tuus, & seminis tui*. Ratio autem, cur non peccent ministri, est, quia habent probabilem rationem, vnde colligant illos, quos baptizant, esse prædestinatos & sanctos.

SED hæc solutio non satisfacit. Nam IN PRIMIS, si quis Baptismum præbeat ei, ad quem scit non pertinere diuinas promissiones, prophanat Baptismum, vt ipse Calvinus dicit,

quia falsum testificatur: cur non prophanat Deus ipse Baptismum, & falsum testificatur, cum illum præbet ei, quem scit se non prædestinasse? Non enim aliud agit hic Deus, aliud minister, sed vnum est, quod agant: Deus enim per ministrum agit, vt patet Ioan. I. *Hic est, qui baptizat in Spiritu sancto.*

PRAETEREA Sacramentum non solum offert, sed etiam præbet testimonium beneuolentiæ; sic enim idem Calvinus ait in Catechismo paruo: *Sacramentum est diuina erga nos beneuolentia testificatio.* Præbet igitur Deus sigillum beneuolentiæ ei, qui baptizatur, etiam si ipse non credat. Nam sine fide non percipitur quidem fructus, & res Sacramenti, tamen percipitur verum Sacramentum, vt Calvinus etiam docet, lib. 4. Institution. cap. 15. §. 16. vbi contra Anabaptistas agnoscit verum Sacramentum dari, & suscipi apud Catholicos, vbi non putat ipse vllam esse veram fidem. Si igitur Deus reuera præbet sigillum, & testimonium beneuolentiæ ei, quem non diligit, quomodo non mentitur, & Sacramentum prophanat?

PRAETEREA, quod minister peccet, probatur. Nā etiam si habeat probabilem rationem credendi, eum qui profitetur fidem, esse prædestinatum, tamen non habet certitudinem. Potest enim fieri, vt ille mentiatur se credere; potest etiam fieri (vt Calvinus fatetur, lib. 3. Instit. cap. 2. §. 10.) vt putet se credere, & tamen reuera non credat. At ad testificandum nomine Dei aliquid, requiritur verissima certitudo, nec sufficit probabilis opinio: vt patet in simili de iuramento; non enim licet iuramento, id est, Dei testimonio vti in re, quam opinamur veram, sed solum in re, quam certissimi sumus esse veram. Immo longè maior adhuc requiri deberet certitudo in Sacramento secundum aduersarios, quàm in iuramento nostro: nam Sacramentum est, quasi iuramentum Dei. Differt autem iuramentum Dei à nostro, quod cum homo iurat, ipse est, qui asserit aliquid, licet Deum in testem aduocet. Vnde potest esse falsum iuramentum nostrum, sine vlla Dei iniuria; vt si quis iuret, quod putat se certò scire, & tamē re ipsa decipiatur: tunc enim Deus non dat testimonium, nec ille peccat, qui Deum in testem falsitatis citauit, quia credebat omnino se esse certum; vt si fortè vidit vnum ab alio occidi, qui erat simillimus alteri, quem ipse nunquam viderat. At in Sacramentis secundum aduersarios, Deus ipse affirmat, & quodammodò iurat

rat illum, qui Sacramentum suscipit, esse electum, & iustum. Deus autem non potest vlllo errore decipi. Ergo grauissimè peccat, qui Sacramentum confert ei, quem non certò scit esse iustum, & electum, quia cogit Deum mentiri.

PRAETEREA etiam si minister certò sciret eum, qui profitetur fidem, vel est filius hominis fidelis, esse iustum, & electum, tamen quid faciet si offeratur illi baptizandus infans, qui sit filius Turcæ, aut Iudæi; & parentes eius, licet infideles, libenter patiantur eum baptizari, & manere apud Christianos? Nam si eum baptizet, prophanat Baptismum, cum nulum habeat signum, quo intelligat illum esse prædestinatum: si verò non baptizet, facit contra vsum totius Ecclesiæ.

SED obiiciet fortassis aliquis pro Caluino, in iisdem angustiis versari Catholicos, cum etiam ipsi Sacramenta præbeant iis, quos nesciunt an sint dispositi, & tamen affirmant, esse signa gratiæ diuinitus instituta.

RESPONDEO; Nullas patiuntur Catholici angustias. Ipsi enim dicunt, Sacramenta esse causas gratiæ efficaces, nisi ponatur obex; & simul significare eiusdem gratiæ infusionem, quantum est ex parte ipsius Sacramenti: denique esse eadem Sacramenta signa eius effectus, quem facit gratia, vbicunque adest. Vt enim abluit corpus aqua Baptismi; ita abluit animam gratia Saluatoris: quod quidem perpetuum, & infallibile est, neque à dispositione pendet. Dispositio enim iuuat, vt gratiam quis recipiat, sed quod gratia, vbicunque est, abluat sordes animæ, si quas inueniat, intrinsecum est illi, & inseparabile.

TERTIUM verbum in definitione Caluini erat, *Promissiones*. Et quidem de promissione remissionis peccatorum disseruimus in refutatione definitionis Lutheranorum, sed Calvinus loquitur de promissione benevolentiae prædestinationis, quæ longè facilius refutari potest. Nam nulla exstat eiusmodi promissio in tota Scriptura: omnes enim promissiones includunt conditionem aliquam, vt fidei, aut pœnitentiæ, aut alterius virtutis, & in his omnibus conditionem perseuerantiæ. Nam: *Qui perseuerauerit usque in finem, hic saluus erit*, Matth. 24. Nemo autem est, qui sine speciali reuelatione sibi promittere possit perseuerantiam.

Atque hinc refutari possunt omnia planè testimonia quæ illi adferunt. Primarium est illud, Genes. 17. *Ego ero Deus*

tuus, & seminis tui post te. Sed hoc etiam requirit conditionem fidei, & perseverantiæ; nam: *Semen Abrahæ* (vt exponit Apostolus, Rom. 4. & 9. *non sunt filij carnis, sed fidei*; id est, qui imitantur Abrahamum in fide, illi sunt eius semen, cum quo intercedit pactum Dei. Et certè, vt quis incipit esse semen Abrahæ, cum incipit credere, ita desinit esse, si desinat credere. Quis autem certò sibi potest persuadere, se nunquam à fide discessurum? præsertim cum & fides, & perseverantia in fide, dona Dei sint.

QUARTVM verbum est: *Conscientiis nostris*, cum quo verbo iungi potest illud aliud, *ad sustinendam fidei imbecillitatem.* Hæc verba non rectè poni in definitione Sacramenti, testatur Baptismus paruulorum, qui est verissimū Sacramentum, etiam apud Calvinum, & tamen in paruulis non est conscientia, nec actualis fides, ad quam sustentandam sit necessarium Sacramentum. Et sanè si promissio est veluti diploma, & Sacramentum veluti sigillum, conscientia erit veluti charta, vel cera: quomodo igitur, vbi nulla est charta, diploma scribi poterit, vel obsignari? Porro, quod Lutherani dicunt, paruulos actu credere, dum baptizantur, iam est suprà refutatum, neque id Calvinus affirmare audet, tametsi nec reiicere voluerit, vt patet ex lib. 4. Instit. cap. 16. §. 19.

RESPONDET igitur Calvinus, Baptismum paruulorum operari in conscientiis paruulorum, cum primum illi vsum rationis habere incipiunt, etiamsi antea collatus fuerit: recordantur enim postea Baptismi accepti, & eo signo nutriunt, & sustentant fidem suam, lib. 4. cap. 16. §. 20. & 21. Quod etiam dicit de illis, qui apud Catholicos baptizati sunt, & postea fiunt Calvinista, lib. 4. cap. 15. §. 17. At saltem rectè probamus, non rectè facere Calvinistas, quòd baptizent infantes: nam longè vtilius esset, eos baptizare adultos, quando fidei sunt capaces. Baptismi enim, què in infantia accipimus, nullam habemus notitiam, nisi ex narratione aliorum: proinde nec certitudinem habemus, nisi fidei humanæ, quæ fallere potest. Deinde etià si certissimi essemus, tamen magis mouent res visæ, quàm auditæ; quare melius esset ad fidem alendam, baptizari adultum, quàm infantem. Sed alere fidem est primarius finis, & vsus Baptismi, vt ex definitione patet; malè igitur illi baptizant infantes.

Nec possunt respōdere, baptizari infantes, ne fortè pereant ante-

antequam adoleſcant, & eo modo decedant ſine gratia Dei: nam Caluinus in Antidoto, ſeſſionis 6. cap. 5. & alibi, docet, paruulos prædeſtinatos etiam ſine Baptiſmo ſaluari, nõ prædeſtinatos autem, etiam cum Baptiſmo perire.

Nihil igitur dicere poteſt, niſi baptizari infantes ea ſolùm de cauſſa, vt admittantur in externa Eccleſia, ſeu profiteantur ſe eſſe membra Eccleſiæ externæ. At hoc etiam non ſoluit argumentum. Nam ex ſententia Caluini lib. 4. Inſtit. cap. 14. §. 5. & ſequentibus, ſinis principalis Sacramentorum eſt, obſignare promiſſiones ad alendam fidem; ſinis minus principalis eſt, profiteri ſe eſſe membrum Eccleſiæ externæ. Non autem debet ſinis minus principalis impedire finem magis principalem; non igitur debent infantes baptizari apud Caluiſtas; ſiquidem apud eos in Baptiſmo infantium ob finem minus principalem, impeditur ſinis magis principalis.

QVINTVM verbum eſt, *Obſignat*, de quo verbo multa diximus in refutatione ſententiæ Lutheri; vt etiam de reliquis verbis ſuprà diximus in refutatione ſententiæ Zvinglij. Superreſt igitur vt argumenta eorum refellamus.

C A P V T XVII.

Refelluntur argumenta aduerſariorum.

AR G V M E N T A, quibus cùm Lutherani, tum Caluiſtæ vtuntur, vt probent Sacramenta eſſe ſigilla promiſſionũ, hæc ſunt. PRIMo loco adfert Caluinus lib. 4. cap. 14. Inſtitut. §. 5. verba Apoſtoli ad Roman. 4. vbi Circumciſionem vocat *σφραγίς*, id eſt, ſigillum eius pacti, cuius fide iam antea Abraham fuerat iuſtificatus.

RESPONDEO PRIMo; Quæ de ſola Circumciſione dicuntur, non poſſunt trahi rectè ad omnia Sacramenta. Rectè em̃ argumentamur à genere ad ſpeciem, non contrà.

SECUNdo; Apoſtolus nullam facit mentionem promiſſionis, aut pacti, cùm loquitur de ſigillo Circumciſionis: vocat enim eam ſigillum iuſtitix fidei, non ſigillum promiſſionis, & pacti. Vocatur autem ſigillum iuſtitix fidei, vel quia (vt Origenes in hunc locum ſcribit) Circumciſio obſignabat, & claudebat iuſtitiam fidei, quæ ſuo tempore patefacienda erat; id eſt, ſub figura, & typo Circūciſionis illius carnalis occultè

significabatur, & proinde velabatur Circumcisio cordis, quæ est vera iustificatio, quã Christus allaturus erat: vel, (vt Chrysostomus, & Theophylactus, & alij docent) vocatur sigillum iustitiæ fidei, quia fuit data Abrahamo in signum, & testimonium iustitiæ, quam sibi acquisierat per fidem.

TERTIO dico; Fuisse hoc priuilegium solius Abrahamæ, & non posse transferri ad alios, quasi Circumcisio (vt hæretici volunt) in quocunque esset, testificatio esset iustitiæ illius. Nam priuilegium Abrahamæ fuit, vt ipse esset pater omnium fidelium, tam præputiatorum, quàm circumcisorum. Et quia iam erat pater præputiatorum fidelium, quia fidem habuerat adhuc præputiatus existens, vt patet Genes. 12. & ex hoc loco Pauli: *Accepit ipse primus omnium signum Circumcisionis, & hoc modo esset etiam pater omnium circumcisorum.* Quia verò hoc priuilegium habuit merito iustitiæ, quam acquisierat per fidem, ideo fuit illi signum Circumcisionis sigillum iustitiæ fidei. Porro, ceteris Iudæis Circumcisio est quidem signum quoddam, nimirum quod sint filij Abrahamæ, sed non est illis sigillum iustitiæ fidei, sicut non sunt omnes Iudæi patres multarum gentium.

Hæc esse vera, patet **PRIMO**; Quia Paulus hæc duo coniungit, cum ait: *Accepit signum Circumcisionis, signaculum iustitiæ fidei, & sit pater omnium credentium.* Non igitur habent signaculum iustitiæ fidei omnes circumcisi, cum non omnes sint patres omnium fidelium.

SECUNDO; Quia Paulus distinguit signum à signaculo, seu sigillo. Nam cum ait: *Accepit signum Circumcisionis, signaculum iustitiæ fidei*; pro signo, in Græco est σημεῖον, quod signum in genere significat; pro signaculo est σφραγίς, quod propriè sigillum exprimit. Cur autem distinxit hæc vocabula, nisi vt indicaret Circumcisionem semper, & omnibus esse signum quoddam, non tamen omnibus, sed soli Abrahamæ fuisse sigillum iustitiæ.

TERTIO; Scriptura, cum sæpissimè loquatur de Circumcisione, nusquam tamen vocat sigillum, nisi hoc loco, vbi de Abrahamo agitur: quod est argumentum manifestum, soli Abrahamo fuisse Circumcisionem sigillum. Accertè, cap. 3. ad Romanos, cum Paulus quæreretur: *Quæ utilitas Circumcisionis?* & responderet: *Multum per omnem modum.* debuisset se-

cundum

eundem aduersarios primo loco ponere hanc primariam utilitatē, quod sit sigillum diuinæ promissionis: at huius neminit quidem.

SECUNDVM argumentum Caluinus, ibidem §. 6. sumit ex Genes. 9. vbi arcus cœlestis dicitur signū fœderis inter Deum, & Noë; & ex cap. 17. vbi Circumcisio dicitur signum fœderis inter Deum, & Abraham, posterosque illius. Si enim Iris, & Circumcisio sigilla fuerunt confirmantia pactum, ac promissionem Dei, cur non idem de Baptismo, & Eucharistia dici possit. Et confirmat argumentum, quia inter homines quoque id usitatum est, vt pacta sanciantur signo externo, vt porca cæsa, vel contactu dexteræ, quæ signa nihil essent, nisi præcederent verba pacti.

RESPONDEO; Iris, & Circumcisio signa fœderis erant, sed ad memoriam iuuandam, non ad fidem confirmandam: quæ admodum nos etiam suprâ docuimus, Baptismum, & Eucharistiam esse signa commemoratiua passionis, & mortis Domini. Multum autem interest, inter signum commemoratiuum, & confirmatiuum. Nam signum commemoratiuum esse potest id, quod oculis obiicitur, etiam si tota eius efficacia pendeat à promissione; at signum confirmatiuum non potest esse, si omninò pendeat à promissione. Fuisse autem signa commemoratiua tantum, Iridem, & Circumcisionem, patet. Nam ita pendebant à verbo Dei, vt si quis non crederet verbo Dei, aut non crederet illud esse verbum Dei, non etiam crederet illa esse signa; & contrâ, si quis crederet verbo, non egeret illis signis.

Adde quod S. Ioannes CHRYSOSTOMVS ita exposuit hæc loca: sic enim ait de Circumcisione, homil. 39. in Genes. *Dato, inquit, eis perpetuo memoriali inierit cum eis Circumcisionis signum.* Et infrâ dicit, signum Circumcisionis non esse datum à Deo, vt homines ei crederent, sed fuisse postulatum à Deo ab hominibus, quia Deus non credebat hominibus: *Quando, inquit, non habemus aliquibus fidem, curamus, & ab ipsis signum, pignoris loco accipiamus: similiter & omnium Dominus sciens mentium inconstantiam, hoc ab eis signum perere voluit.* Hæc ille. Porro de signo Iridis, homil. 28. in Genesim, sic loquitur: *Quid dicis, inquit, ô beate Propheta? Recordabor, inquit, Testamenti mei, id est, pacti mei, promissionis, pollicitationis: non quia ipse opus habeat recordatione, sed &*

76 ' Cap. XVII. De Sacram. in genere. Lib. I.

nos ad illud signum respicientes, nihil durum suspicemur, sed statim recordemur diuinae promissionis, & robaremur, & confidamus.

SED obiiicies eundem Chrysostomum ibidem, qui sic ait: *Si sermo meus non sufficit, ecce & signum do, &c.* vbi videtur velle, Iridem fuisse signum confirmatiuum. Sed hæc obiectio paulò pòst diluetur.

Ad confirmationem ex humana consuetudine RESPONDEO, multum interesse inter pacta Dei, & hominum. Nam ab homine, quia non videmus eius animum, & timemus, ne fortè nos decipiat, aut obliuiscatur pacti, quærimus signum externum, vt eo illum conuincamus, si negauerit, aut oblitus fuerit: at Deum non posse fallere, vel obliuisci, certissimi sumus.

TERTIVM argumentum sumit Lutherus in libro de Babylonica captiuitate, cap. de Baptismo, ex signis mirabilibus, quibus Deus confirmare solitus est promissiones suas: quale fuit signum in rore, & vellere datum Gedeoni, Iudicum 6. & in vmbra horologii retrocedente datum Ezechia, 3. Reg. 20.

SED hæc & similia non sunt ad rem. Nam miracula, quia non pendent à verbo, sed ex se vim habent, cùm sint opera supra naturam, idè rectè adhibentur ad probandum, Deum esse, qui promisit, vel Deum reuera aliquid promisisse: Sacramenta verò nullam vim habent (vt suprà diximus) sipe verbo. Atque hinc intelligimus, cur CHRYSOSTOMVS putauerit, Iridem esse signum non tantùm memoriale, sed etiam confirmatiuum. Existimauit enim ipse Iridem rem esse nouo miraculo institutam; sic enim ait: *Etsi aquarum magna sit inundantia; neq; sic metuendum, sed confidendum nobis ad miraculum respicientibus.* Hæc ille. Quia tamen probabilius est, Iridem rem esse naturalem, idè diximus, signum fuisse tantùm memoriale.

QUARTVM argumentum sumunt Lutherani ex illis verbis prioris epistolæ Petri capite tertio: *Quod et vos similis forma saluos facit Baptisma, non carnis depositio sordium, sed conscientia bona interrogatio in Deum.* Lutherus enim in commentario huius loci, Græcam vocem ἐρωτημα, quam noster interpres vertit interrogationem, vult significare pactũ, & hoc modo exponit: *Baptismus saluos nos facit, non quate-*

nus lauat corpus, sed quatenus obsignat pactum, quod habet animam cum Deo, dum fide accipit promissiones eius. Ex quo sequitur, Baptismum esse sigillum promissionis. Eodem modo exponit Calvinus, licet vocem ἐπερώτημα, non pactum, sed responsionem, & testimonium significare velit.

RESPONDEO; Locus hic præfens admodum obscurus est, tamen nihil iuuat causam aduersariorum. Oecumenius in commentario huius loci, per interrogationem videtur intelligere pignus, & arrabonem. Dicit enim Baptisma esse quasi pignus bonæ conscientiæ, id est, qui Deo inspirante conceperunt bonum desiderium, illi vitam immaculatam sectantur, eamque ubique exquirunt, & de ea interrogant: unde cum audierint per Baptismum mundas animas, mox accurrunt ad Baptismum, ut purgentur sordes ipsorum, atque hac ratione est Baptisma pignus bonæ conscientiæ.

Hæc expositio non fauet hæreticis, ut patet; tamen non videtur ad mentem S. Petri. Nam S. Petrus longè amplius tribuit Baptismo, quàm ut sit pignus bonæ conscientiæ, cum ait, per Baptismum nos saluari.

Est ALIA expositio Lxxani, Gagnæi, & Ioannis à Louanio, qui per interrogationem bonæ conscientiæ, intelligunt interrogationes, & responsiones, quæ fiunt ante Baptismum. Interrogat enim sacerdos catechumenum; Credis in Deum? & respondet, Credo. Abrenuncias Satanæ, & pompis eius? Abrenuncio, &c. Qui enim bona conscientia respondent his interrogationibus, illis prodest Baptismus; aliis non prodest.

Hæc etiam non fauet hæreticis, sed non videtur literalis; nec est Ambrosij, Basilij, & Augustini, ut putauit Ioânes à Louanio. nam beatus Petrus antithesin facit, cum ait: *Non carnis depositio sordium, sed conscientia bona interrogatio.* Et sine dubio formalis antithesis hæc erat futura; Non ablutio sordium carnis, sed ablutio sordium mentis: qua antithesi distinguitur Baptismus noster à Baptismo Iudæorum, qui erat exterior tantum. Porro illa pars huius antithesis, nimirum (ablutio sordium mentis) à beato Petro non est expressa propriis verbis, sed figuratis, ut omnes concedunt. Oportet igitur descriptam esse per causam, vel per effectum: si per effectum, tunc non habet locum expositio istorum. Nam interrogatio illa, & responsio, de qua ipsi agunt, siue etiam fides, & charitas,

78 *Cap. XVII. De Sacram. in genere. Lib. I.*

tas, quæ per illas interrogationes, & responsiones deteguntur, præcedunt Baptismum, & proinde ablutionem mentis, quam facit Baptismus: non igitur sunt effectus illius ablutionis. Ergo necesse est ut dicant, illam ablutionem describi per causam, ac proinde interrogationem illam, quæ præcedit Baptismum, esse causam illius ablutionis. At hoc dici non potest. Nam tunc Sacramentum haberet efficaciam ex opere operantis, non ex opere operato; tribueretur enim iustificatio præcedenti fidei, & dilectioni suscipientis Baptismum, non ipsi ablutioni Sacramentali: nec esset differentia inter Baptismum nostrum, & Iudaicum; nam Baptismus Iudaicus, licet ex opere operato non iustificaret, tamen ex fide, & dilectione suscipientis iustificare poterat, ut quodlibet opus meritorium.

DICENT fortasse, interrogationem, seu fidem præcedentem non esse causam efficientem ablutionis internæ, sed esse dispositionem. At istud quidem rectè dicitur, sed non quadrat verbis Apostoli: ipse enim tribuit efficientiam huic interrogationi bonæ conscientie, maiorem; quam ipsi ablutioni externæ, quæ tamen instrumentum est iustificationis.

Est igitur ALIA expositio, quam puto esse Sanctorum, Augustini tract. 80. in Ioan. & serm. 30. de verbis Domini, & Basilij libro de Spiritu sancto, cap. 15. ut videlicet exprimatur à sancto Petro ablutio mentis, quæ per antithesin opponitur ablutioni carnis, non per causam, ut volebat præcedens opinio, sed per effectum. Est enim usitatissima figura metonymia, qua per effectum intelligimus causam. Vocat igitur Petrus ablutionem internam, interrogationem; seu responsionem bonæ conscientie in Deum, quia ex illa munditia oritur pax, & quies conscientie; & proinde responsio bonæ conscientie, & etiâ interrogatio apud Deum, quia audet cum fiducia Deum accedere, & interrogare, id est, cum eo colloqui, eumque rogare pro se, & pro aliis.

Adde SCYND0, locum hunc non favere aduersariis, sed nobis, etiam si per *ἐν πρώτῃ* accipiatur testimonium, vel pactum. Nam IN PRIMIS sanctus Petrus non loquitur de testimonio, vel pacto Dei, sed conscientie nostræ: ipsi autem probare deberent, Sacramentum esse sigillum testimonij, seu pacti Dei. Multum autem interest inter testimonium, seu pactum Dei, quod illi obsignari volunt Sacramento, & testimonium,

nium, seu pactum conscientia nostræ. Illud enim est verbum Dei scriptum, quod præcedit Sacramenti vsum, & fructum, id est, iustificationem: testimonium autem conscientia sequitur iustificationem, & proinde Sacramenti vsum, & fructum.

SECUNDO; Sanctus Petrus non dicit, Baptismo obsignari pactum, seu testimonium; sed dicit, saluari animas, & effici iustificationem, ex quo oritur testimonium bonæ conscientia. Id quod probatur ex illo verbo, *similis forma*. Vult enim Apostolus eo modo nos saluari per aquas Baptismi, quomodo per aquas diluuij saluati sunt, qui erant in arca Noë. Porro aquæ diluuij non saluârunt arcam Noë, testificando, vel obsignando promissiones, sed reipsa eleuando arcam in sublimem, ne obrueretur cum ceteris ædificiis huius mundi: sic igitur & Baptismus saluos nos facit, non obsignando, & testificando, sed reipsa iustificando animam; vnde sequitur, vt diximus, testimonium, siue interrogatio conscientia bonæ in Deum.

QVINTVM argumentum esse posset pro aduersariis, testimonium sanctorum Patrum, qui non rarò Sacramenta vocant sigilla, seu signacula.

RESPONDEO; Longè alia significatione loquuntur Patres de signaculis Sacramentorum, quàm hæretici faciant. Patres enim nunquam Sacramenta vocant signacula, vel sigilla promissionum Dei, vt hæretici volunt; sed aliquo horum trium modorum loquuntur de signaculis. PRIMO signacula vocant Sacramenta, quia obsignant fideles, & tanquam nota quædam eos separant ab iis, qui non sunt de grege, vel de exercitu Domini. Ita accipit hanc vocem Basilii in exhortatione ad Baptisum: item Hieronymus in cap. 4. ad Ephes. & Augustinus lib. 19. contra Faustum, cap. 11. & alibi passim. Ita quoque accipit Gregorius Nazianzenus, oratione de Baptismo, non procul ab initio, vbi dicit, Baptismum vocari posse sigillum, quia ita conseruat hominem baptizatum, vt notæ regis conseruant res obsignatas. Nemo enim audet contingere eas quæ magni alicuius Regis sigillum habent.

SECUNDO vocant Sacramēta signacula, quia claudunt intra se rem sacram, id est, inuisibilē gratiam. Id em̄, quod clauditur, obsignari solet, iuxta illud Apocalypsis 5. *Liber signatus sigillis septem*. Atque hac significatione vocat Augustinus Sacramenta sacra signacula in libro de catechizandis rudibus,

80 *Cap. XVII. De Sacram. in genere. Lib. I.*


cap. 26. & Scholastici, sigillum Confessionis. Hoc etiam ferè modo Gregorius NAZIANZENS, oratione de Baptismo, prope finem, vocat sigillum Baptisma, eò quòd obsignet, & claudat multa myſteria, quæ ſolis fidelibus deteguntur: *Cetera, inquit, intus addiſceſ, quæ etiam ipſa apud reipſum occulta, clauſaque habebis, Baptiſmo obſignata, atque reſenta.*

TERTIO vocant Baptiſmum ſigillum, vel obſignationem fidei, quia Baptiſmus eſt publica approbatio, & teſtificatio fidei eiꝯ, qui baptizatur. Sic enim vtitur hac voce Terrullianus in libro de Pœnitentia, vbi dicit, catechumenos diu probari an credant, & tandem vbi conſtiterit, eos verè, & conſtanter credere, Baptiſmum illis dari in obſignationem, & approbationem fidei. Quomodo etiam vtitur eadem voce Baſilius in 3. libro contra Eunomium, vbi dicit, primùm oportere credere, & tum demum accipere ſigillum fidei Baptiſmum. In libro quoque de Spiritu ſancto, cap. 12. vocat Baptiſmum ſigillum fidei, quia iſ qui baptizatur, eo ſigno teſtificatur ſe credere.

DENIQUE vocari poteſt etiam Baptiſmus ſigillum fidei, quia perficit, & abſoluit quodammodò hominem fidelem: quomodo veteres vocabant mortem, ſeu occiſionē pro Chriſto, ſignaculum martyrij, vt Euſebius refert lib. 5. hiſtoriæ, cap. 3. Confefſio enim Martyrum, & ſupplicia pro Chriſto non habent perfectam laudem, dum periculum eſt inconſtantia, & mutationis, ſed tunc demùm perfectæ, & quaſi ſigillo quodam munita, & obſignata cenſentur, quando morte precioſa conſummantur. Atque hætenus de definitione.



CONTRO.



CONTROVERSIA

TERTIA.

De causis Sacramenti.

CAPVT XVIII.

Sacramenta componi ex rebus, & verbis, ut materia, & forma.

DE CAUSIS SACRAMENTI DISPUTATVR, PRIMVM de intrinsicis causis dicam. DEINDE de extrinsecis. Ac de intrinsicis tres erunt quæstiones. PRIMA; An Sacramenta consistunt ex rebus, ut materia, & verbis, ut forma. SECUNDA; Quæ sint illæ res, & illa verba. TERTIA; An res illæ, & verba ita determinata sint, ut nihil in eis mutari possit.

PRIMA quæstio; Vtrum Sacramenta cõstent rebus, & verbis, tanquam materia, & forma; etsi solùm inter Catholicos disputatur, non tam ob discordiam eorum, quàm ut res explicetur: est tamen quæstio utilissima, vel etiam necessaria propter calumnias hæreticorum, qui ex hoc dogmate Catholicorum, quo requirimus res, & verba in Sacramentis, conantur ostendere, multa non esse Sacramenta ex his, quæ nos habemus pro Sacramentis. Sunt igitur variæ Doctorum sententiæ.

PRIMA est quorundam recentiorum, qui volunt propriè in Sacramentis materiam, & formam nō esse res & verba, sed rem sensibilem esse materiam, siue sit res, siue verbum, siue vtrumque, significationem autem esse formam. Quod verò cõmuniter dicitur, rem in Sacramẽto esse materiam, verbum esse formam, volunt explicandum esse de Sacramento materialiter sumpto. Ita docet Dominicus à Soto in 4. dist. 1. q. 1. artic. 1. & 2. quod idem videtur dicere Caietanus in 3. part. q. 60. art. 6. nisi quodd Caietanus affirmat, significationem Sacramenti esse vnā & simplicem, resultantem ex composito sensibili ex rebus, & verbis; quod Sotus non dicit.

32 Cap. XVIII. De Sacram. in genere. Lib. I.

ALTERA sententia est aliorum, qui docent, Sacramētum ipsum, & non solū eius partem materialem, constare ex rebus vt materia, & verbis vt forma. Ita sanctus Thomas 3. parte quæst. 60. artic. 6. ad secundum, & veteres Theologi communiter.

RURSUS quidam existimant, non omnia Sacramenta cōstare rebus, & verbis, sed solū quædam. Ita Durandus in 4. dist. 1. quæst. 3. & Adrianus q. 2. de Baptismo.

ALII docent omnia Sacramenta nouæ legis, constare rebus, & verbis. Ita Alexander Alensis 4. parte summæ, quæst. 8. memb. 3. art. 1. & 3. & Theologi communiter in 4. dist. 1. vel 3.

ALII denique volunt omnia Sacramenta constare rebus, & verbis, si res, & verba accipiantur largo modo pro iis signis, quæ aut sunt veræ res, & vera verba, aut certè vicem eorum gerunt; si verò accipiantur in rigore, non constare omnia Sacramenta rebus, & verbis. Ita docet Dominicus à Soto in 4. dist. 1. quæst. 1. art. 6. & alij quidam recentiores. Sed istæ opiniones magna ex parte conciliari possunt.

Sit igitur PRIMA propositio: *Sacramenta Veteris legis probabile est non habuisse res, & Verba, sed solas res.* Hæc est sancti Thomæ 3. parte, quæst. 60. art. 6. ad vltimum. Ratio est, quia in Scriptura veteri, vbi præscribuntur præcipui ritus Sacramentorum, nulla fit mentio verborum, vt patet Genes. 17. vbi præscribitur ritus Circumcisionis. Exod. 12. vbi præscribitur ritus Agni Paschalis. Leuit. 8. vbi præscribitur ritus Ordinationis. Præterea ratio postulare videbatur, vt Sacramenta noua ab ipso Christo instituta, signa essent clariora, quàm vetera, quæ Moses, vt Dei minister instituit.

Possent OBICERE, quod Leuit. 4. vbi præscribuntur sacrificia pro peccato (quæ erant etiam Sacramenta Testamenti veteris, ac respondebant Sacramento nostro Pœnitentiæ, vt diuus Thomas docet, 1. 2. quæst. 102. art. 1.) præscribitur etiam, vt oraret sacerdos pro iis, quorum est sacrificium. SED respondetur, orationem illam sacerdotis non fuisse de essentia sacrificij pro peccato, sed solū addi debuisse in vsu, seu administratione Sacramenti illius ad facilius impetrandum. Id quod ex eo colligitur, quodd, vt ibidem habemus, in sacrificio pro peccato sacerdotis nulla oratio adhibebatur, sed solū in sacrificio pro peccato aliorum de populo. Illud autem quod habetur Num. 5. de verbis præscriptis in cæremonia Zelotypiæ, nō
est ad

est ad rem. Illa enim cæremonia non erat Sacramentum, cùm non esset instituta ad sanctificandum, sed ad inuestigandum, & puniendum adulterium.

SECUNDA propositio: *In Sacramentis omnibus noua legis inueniuntur res, & materia, & Verba, & forma.* Hæc propositio saltem quoad modum loquendi, negari non debet. Habetur enim expressè in Concilio Florentino, in instructione Armenorum, quæ facta est, ipso approbante Concilio, vt ibidem legimus. **P R A E T E R E A** habemus in Scripturis, expressè res, & verba in quatuor Sacramentis, nimirum in Baptismo, Matth. 28. *Baptizantes eos in nomine Patris, & Filij, & Spiritus sancti.* In Eucharistia, Matth. 26. vbi ponitur panis, & verbum; *Hoc est corpus meum.* In Confirmatione, Actor. 8. vbi ponitur manus impositio, & oratio, quæ verbis fit. In Extrema vnctione, Iacobi 5. vbi ponitur vnctio, & oratio. Credibile igitur est alia etiam Sacramenta constare rebus, & verbis, licet non habeantur ita expressè in Scripturis. **I T E M** est communis sententia veterum Theologorum, vno Durando, vel aliis paucis exceptis, quorum loquendi modus corrigendus est, licet in re non multum discrepent à ceteris.

T E R T I A propositio: *Non solum quod est materiale in Sacramento, sed ipsum totum Sacramentum rectè dicitur constare ex rebus, & materia, & Verbis, & forma.* Hæc est aliquo modo contra Caietanum, & Sotum: quamuis quod ipsi dicunt, etiam aliquo modo sit verum.

N O T A N D U M igitur, Sacramentum propriè nō esse compositum aliquod Physicum, neque artificiosum, sed cum vtroque habere similitudinem quandam. Et quidem si conferrur cum composito artificioso, tum sine dubio forma eius partim est significatio, partim virtus operatiua; materia verò sunt res ipsæ, & verba, in quibus residet significatio, & virtus illa operatiua. Vt enim in composito artificioso tota substantia dicitur materia, forma verò est quoddam accidens: ita Sacramentum, vt signum, formaliter dicit significationem; vt causa, dicit vim operatiuam; reliqua omnia ad materiam, seu subiectum pertinent. Et hoc modo accipiendo Sacramenta, rectè dicunt Caietanus & Sotus.

Tamen potest etiam Sacramentum considerari, vt est simile composito Physico. Nam vt in cōposito Physico materia præcedit: forma accedit, ita in Sacramento accedit verbum

84 *Cap. XVIII. De Sacram. in genere. Lib. I.*

ad elementum. **ITEM** vt in composito Physico materia est indeterminata, sed coarctatur à forma; ita in Sacramēto verbum determinat indifferentiam elementi. **DENIQUE**, vt in composito Physico materia est imperfecta, forma est perfecta, & dat esse rei: ita in Sacramēto verba sunt rebus perfectiora, cū sint signa multò clariora, & præstantiora.

Et hoc modo totum verbum cum sua significatione est forma, & totum elementum cum sua significatione, est materia. Id quod probatur **PRIMO**, quia ita loquitur Concilium Florentinum, & veteres Theologi. Nam ipsi dicunt, Sacramentū constitui ex re, & verbo, vt ex materia, & forma. At remota significatione, nulla est compositio ex re, & verbo; non enim est alia coniunctio rerum, & verborum, nisi quatenus rei significatio indeterminata, determinatur per significationem verbi. Non igitur Concilium, & Theologi volunt solum subiectum significationis constitui ex rebus, & verbis, sed totum ipsum Sacramentum etiam vt signum est formaliter.

PRAETEREA compositio ex re sensibili, & significatione, non est compositio ex materia & forma, vt partibus essentialibus, sed est compositio ex subiecto, & accidente. At Concilium, & Theologi dicunt, Sacramenta constare ex materia & forma, non ex subiecto, & accidente: sæpe etiam addūt, idèd non posse ab Ecclesia mutari materiam, aut formam Sacramentorum, quia sunt de essentia, seu substantia.

SECUNDO probatur ratione. Nam significatio Sacramēti, non est vna significatio simplex, vt Caietanus falsò docet, sed duæ sunt partiales, ex quibus vna totalis componitur. Ergo ipsa etiam significatio ex materia, & forma constitui dici potest: proinde totum Sacramentum ex materia & forma componetur, vt ex partibus essentialibus.

Antecedens probatur dupliciter. **PRIMO**: Antequam fiat coniunctio elementi, & verbi, vtrumq; habet suam significationem: Sed ex coniunctione non perit vlla significatio: Non enim potest verbum tollere significationem elementi, quæ est naturalis, sed solū eam determinare, nimirū, vt cum aqua, exempli causa, naturaliter significare possit quamlibet purificationem, determinetur à verbo ad significandam purificationem à peccatis. Manet igitur vtraque significatio, sed coniunguntur inter se, ita vt ex duabus partialibus, fiat vna integra, & totalis.

SECVNDO: Tam verbum, quàm elementum in Sacramentis significat aliquid, vt omnes docent, & patet etiam ex sancto Thoma 3. part. quæst. 60. ad primum & secundum. Sed verbum non cōmunicat elemento suam significationem, neque verbo elementum: duæ sunt igitur, non vna. Assumptio probatur. Quia elementi significatio naturalis est, vt ibidem ait S. Thomas, verbi autē voluntaria. Non igitur significatio elementi comunicatur verbo, quia tum naturalis esset, nō voluntaria verbi significatio: & contrā, significatio verbi non comunicatur elemento, quia tum elemēti significatio esset merē voluntaria, & nullo modo naturalis.

QVARTA propositio: *Vt Sacramenta constare dicantur rebus, & Verbis, non est necesse, vt res non sint Verba, & Verba non sint res, sed sat est si aliquid fungatur vicerei, aliud vice Verbi.* Hæc propositio conciliat tres vltimas sententias. Nam vt Ledesmius rectē monet, quæst. I. art. 6. non est quæstio inter Durandum, & alios, nisi de nomine.

Probatur propositio. Nam in Sacramento Pœnitentiæ potest fieri, vt nulla sint alia signa præter verba. Ex communi enim consensu Theologorum, in Sacramento Pœnitentiæ, forma est absolutio; materia remota sunt peccata; materia proxima sunt actus pœnitentis, id est, contritio, confessio, & satisfactio, quatenus signo externo produntur. Potest autem fieri, vt quis nō habeat nisi peccata verbo commissa; & tunc materia remota erunt sola verba. Potest etiam fieri, vt nō ostendat signa contritionis, confessionis, & satisfactionis, nisi verbis. Non em̃ est de essentia Sacramenti, vt pœnitens ploret, suspiraret, flectat genua, &c. sed si tantum verbo dicat sua peccata, & dicat se esse contritum, & velle satisfacere, potest absolui: quare materia etiam proxima tunc non erunt, nisi verba. Verē tamen dicuntur esse in eo Sacramento res, & verba, quia peccatum verbo commissum, non vt verbum, sed vt peccatum, est materia confessionis: peccatum autem formaliter non est verbum, sed res à verbi ratione valde distincta. Sic etiam confessio non est propriē materia Sacramenti, vt oratio quædam, sed vt actio pœnitentis. Nam vt eleganter docet S. Thomas in 4. distinct. 14. quæst. I. artic. I. singulare est in hoc Sacramento, vt actio susipientis sit pars essentialis Sacramenti. Vt enim inter corporalia medicamenta, quædam sunt omninō extrinseca, vt emplastra, quæ applicantur a grotis, & non requi-

runt eius actionem, vt partem medicamenti; quædam alia partim sunt extrinseca, partim intrinseca, vt quædam portiones, quæ requirunt vt partem medicamenti, ambulationem: sic etiam quædam Sacramenta omni ex parte applicantur, & conferuntur à ministro, vt Baptismus, Eucharistia, &c. sed Sacramentum Pœnitentiæ partim applicatur à ministro per absolutionem, partim requirit ipsius ægroti actionem, nimirum confessionem, &c.

Idem iam de forma ostendere possumus; nam in Sacramento Matrimonij omnium consensu, loco verborum sufficiunt nutus, aut literæ; modò sufficienter exprimitur consensus vtriusq; partis. Quod verò aiunt Nicolaus Papa 27. quæst. 2. canon. Sufficiat; & Alexander Papa, cap. Cùm locum, de sponsalibus, & matrimoniis; solum consensum efficere Matrimonium; non ita est accipiendum, quasi consensus interior sufficiat sine signo externo: siquidem idem Alexander, cap. Licet, de sponsa duorum, docet necesse esse, vt consensus, verbis cõfuetis exprimitur. Itaq; illa particula: *Solus consensus dicitur efficere Matrimonium*; non excludit signum, quò exprimitur consensus, sed excludit consensum parentum, & solēnitatem, & alia, quæ non sunt de essentia Matrimonij.

QVINTA propositio: *Non est necesse, vt in omni Sacramento, & Verba ita coniungantur, vt partes essentielles eiusdem rei.* NOTANDUM est hoc loco, Sacramentum habere quandam similitudinem cum rebus naturalibus, quæ ex materia & forma constant: tamen non esse reuera compositum naturale, & idcirco non esse requirendas omnes proprietates materiæ, & formæ, sed satis esse, si aliquæ reperiantur.

Probatur hæc propositio ex Eucharistiæ Sacramento. Siquidem in Eucharistia omnium consensu inueniuntur res pro materia, id est, panis, & vinum, & verba pro forma: *Hoc est corpus meum: Hic est sanguis meus.* & tamē nunquam resistæ, & verba ita coniunguntur, vt materia, & forma in rebus naturalibus. Nam vel Sacramentum Eucharistiæ est, solum res ipsa consecrata, id est, species panis, & vini, vt continent corpus, & sanguinem Christi: vel etiam cõsecratio, aut sumptio, vt quidam volunt, Sacramenta dici possunt. Si consecratio dicitur Sacramentum, tum verba habemus, sed rem non habemus, ex qua Sacramentum componatur: tota enim consecratio in verbis consistit; nam panis, & vinum non concur-

runt, vt pars consecrationis, sed vt subiectum circa quod agit Sacerdos, & in quo recipitur actio consecrantis. Cùm verò Sacramentum dicitur res ipsa consecrata, vel sumptio, tunc rem habemus, verba non habemus, ex quibus Sacramentum componatur. Verba enim respectu rei consecratæ, non sunt pars essentialis, sed principium productiuum; pars enim essentialis manet cum ipsa, verba autem non manent cum re consecrata, immò tunc primùm incipit esse res consecrata, cùm verba desinunt esse. Quocirca Concilium Florentinum in instructione Armenorum, non dicit, verba Eucharistiæ esse formam Sacramenti, sed formam consecrationis. Ex quo intelligimus, quando idem Concilium docet, in omni Sacramento esse res pro materia, & verba pro forma, non debere hoc intelligi ita propriè, vt intelligeremus in vero composito naturali.

Idem ostendi posset ex Sacramento Confessionis. Nam nò solùm, vt diximus, in eo Sacramento materia sunt verba, quæ gerunt vicem rerum; sed etiam potest fieri, vt vno die fiat confessio, & altero die detur absolutio, ac proinde tum simul sint materia, & forma: quod in nullo composito verè Physico reperitur. Quocirca tum Concilium Florètinum in instructione Armenorum, tum etiam Tridentinum sess. 14. can. 4. dicunt, in Sacramento Confessionis actus pœnitentis esse quasi materiam: nec audent absolutè dicere esse materiam.

Ex quibus omnibus apertissimè colligimus, materiam & formam in Sacramentis largo modo esse accipiendam: atque hinc etiam facilè soluuntur omnia, quæ contrà obiici solent.

CAPVT XIX.

Verbum quod cum elemento Sacramentum facit, non esse concionale, sed consecratorium.

DIXIMVS in Sacramentis res, & verba requiri, in quo cum aduersariis conuenimus. Neque dubitatio vlla superest de re, quid sit illud videlicet, quod in Sacramentis adhibendum est, vt sensibile signum; fatentur enim nobiscum in Baptismo aquam, in Eucharistia panem, & vinum adhibendum. De materiis aliorum Sacramentorum

rentorum non est opus hîc differere, quoniam ea non habentur ab aduersariis pro Sacramentis.

Vnum hîc addam, ridiculè Brentium in confessione VVirtembergensi, cap. de Baptismo, excludere Chrisma ab usu Sacramenti, quod dicat ad elementa mundi pertinere, & in usu fuisse Iudæis in cæremoniis Testamenti veteris. Nam si ea ratio quidquam valeret, excludere oporteret etiâ aquam. Nam aqua magis pertinet ad elementa mundi, quàm oleum, cùm sit ipsa vnum ex quatuor elementis mundi, oleum verò nō inter elementa, sed inter mixta numeretur. In cæremoniis quoque Iudæorum longè frequentiores erant ablutiones aquæ, quàm inunctiones olei.

Sed his omiſſis, de quibus alio loco dicendum erit, quæstio grauiſſima est de verbo, quod cum re coniunctum, Sacramentum facit? Nam Catholici omnes docent, verbum Sacramenti esse pauca quædam verba à Deo præscripta, quæ super materiam à ministro pronuntianda sint; vt in Baptismo illa verba: *Ego te baptizo in nomine Patris, & Filij, & Spiritus sancti.* In Eucharistia illa: *Hoc est enim corpus meum.* & de ceteris ad eundem modum.

At Ioannes Calvinus lib. 4. Institut. cap. 14. §. 4. contendit verbum Sacramentale nihil esse aliud, nisi concionem; sic eî loquitur: *Hoc est quod vulgò dicunt, constare Sacramentũ Verbo, & externo signo. Verbum enim intelligere debemus, non quod sine sensu & fide insusurratum, solo strepitu velut magica incantatione consecrandis elemētis vim habeat: sed quod prædicatum intelligere nos faciat, quid visibile signum sibi velit. Quod ergo sub Papa tyrannide factitatum est, nō caruit ingentis mysteriorum prophanatione: putant enim satis esse, si sacerdotes, populo sine intelligentia obstupente, consecrationis formulam demurmuraret.* Et infra: *Ergo cùm de Verbo Sacramentali fieri mentionem audimus, promissionem intelligamus, quæ clara voce à ministro prædicata plebem eo manu ducat, quo signum tendit, ac nos dirigit.* Hæc ille. Sed antequam vel probemus aliquid vel refellamus, explicanda est diligenter Caluini sententia.

PRIMO igitur annotandũ est, Caluinum, & ceteros aduersarios nostros aliter sentire, & loqui de Baptismo, aliter de Eucharistia, quæ duo sola sunt apud eos propriiſſimè Sacramenta. Nam in Baptismo duo genera verborum requirunt, in

Eucha-

Eucharistia vnum tantum: siquidem in Baptismo PRIMO loco requirunt verbum concionale, quo à ministro proponatur, & explicetur promissio diuina. DEINDE requirunt, vt dum aspergitur aqua, simul dicantur illa verba: *Ego te baptizo in nomine Patris, & Filij, & Spiritus sancti.* Id quod patet tum ex libello Caluini de formula ministrandi Sacramenta; tum ex Melanchthone in locis, cap. de Baptismo; tum ex praxi ipsorum quotidiana; tum denique, quia non rebaptizantur apud Catholicos ij, quos Lutherani, & Caluinistæ baptizarunt: quod tamen esset faciendum, nisi illi veram formam Sacramenti adhiberent dum baptizant.

Porro in Sacramento Eucharistiæ Caluinistæ (vt ex formula Caluini perspicuum est) nõ requirunt aliud verbum, quàm instructionis; iubent enim PRIMO loco recitari institutionem Sacramenti ex cap. II. prioris ad Corinthios, eo ferè modo, quo nos in Missa recitamus lectionem ex eadem epistola ad populi instructionem. DEINDE adhibet concionator explicationem; & tum demum sine vlllo signo crucis, aut alio verbo, seu ritu sacro distribuunt panem, & vinum. Exstat alia formula Anglorum, qui Geneuæ degunt, in qua post lectionem epistolæ ad Corinthios, & concionem, sequitur gratiarum actio conceptis verbis, quam alta voce pronunciat minister, & tum demum sine vllis verbis consecratorijs, distribuitur panis, & vinum.

Lutherani autem non eodem modo omnes agunt, sed alij recitant verba institutionis merè historicè, alij recitant cum intentione consecrandi, alij nihil recitant: quorum opiniones vide apud Kemnitium in 2. par. Examinis, pag. 346.

Ex quibus sequitur habere aduersarios verum Baptismum, sed non veram Eucharistiam, nisi fortè admodum paucos, eos videlicet, qui adhibent verba, & fuerunt in Ecclesia ordinati Sacerdotes.

SECUNDO notandum est, quod Calvinus dicit, verbum Sacramentale esse concionem, duobus modis intelligi posse. VNO modo, vt velit concionem esse partem Sacramenti essentialem, ita vt sine concione non sit Sacramentum. ALTERO modo, vt velit concionem non esse partem Sacramenti, sed tantum requiri, vt Sacramentum fructuosè percipiatur.

Et quidem valde probabile est, Lutheranos, qui præter concionem adhibent verba consecrationis in omnibus Sacra-

mentis, non requirere concionem ad essentiam, sed ad fructum tantum Sacramenti assequendum; proinde cum eis nulla erit hoc loco altercatio: iis tamen exceptis, qui verba ipsa Sacramentalia non proferunt ad consecrandum, sed ad instruendum, & aperte Evangelij prædicationem vocant, vt facit Ioannes Brentius in Confessione VVirtembergensi, cap. de Eucharistia.

At Calvinus videtur quidem interdum loqui de verbo concionali, vt de re distincta à Sacramento, vt cum ait lib. 4. cap. 14. §. 3. Sacramentum esse quasi appendicem verbi: tamen sæpius de eo loquitur, vt de parte essentiali Sacramenti. Nam in verbis supra citatis dicit, Sacramentum constare duabus rebus, signo, & verbo, & per verbum dicit se intelligere concionem. Item ibidem explicat de verbo concionali; illud A V G V S T I N I: *Accedis Verbum ad elementum, & sit Sacramentum.* vbi sine dubio verbum ponitur de essentia Sacramenti. Nam ibidem A V G V S T I N U S, & ex Augustino Calvinus, ait: *Sine Verbo, quid est aqua nisi aqua?* id est, aqua sine verbo non est Sacramentum, sed prophanum elementum. Præterea si concionale verbum non esset de essentia Sacramenti, in Eucharistia nullum esset verbum, de essentia, apud Calvinistas. non enim aliud verbum in eo Sacramento habent, nisi concionale. Præterea in commentario, cap. 5. ad Ephesios, explicans Calvinus illud (Mundans eam lauacro aquæ in verbo vitæ) *Apparet, inquit, nullam in Papatu legitimam esse signorum observationem. nam Verbum quidem per se habere iactant, sed quod sit incantationis vice: quia illud lingua incognita demurmurant, & ita quasi de mortuo elemento potius, quàm hominibus destinatum foret; nulla mysterij explicatio ad populum; qua sola facit vt mortuum elementum incipiat esse Sacramentum,* N O T A vltima verba.

Deniq; Theodorus Beza omnem dubitationem tollit, cum ita scribit in libro, quem inscripsit; Summa doctrinæ de Sacramento: *Qua est causa formalis Sacramentorum? ordinatio Dei in ipsius Verbo comprehensa, & ab ipsius ministro explicata secundum eius mandatum: nō autem pronuntiatio ipsa illorum Verborum, neq; vlla vis in vocabulis latens.* Hæc ille. Ex quo intelligimus verba illa Baptismi: *Baptizote, in nomine Patris, & Filij, & Spiritus sancti,* recitari quidem à Calvinistis dum aspergitur aqua, sed non esse illa verba formam Sa-

cramenti apud eos; verum concionem præcedentem esse formam, illa autem verba ad ritum pertinere, vt paulò infra idem Theodorus indicat: & illa ipsa non proferri, vt consecretur aqua, sed vt etiam inde instruatur populus.

NOTANDVM est TERTIO, tria esse, in quibus nos à Calvinistis dissentimus, quæ sunt ordine demonstranda. PRIMVM enim nos in omni Sacramento docemus, necessarium esse verba quædam à Deo instituta pronuciari in ipsa actione Sacramenti: illi solùm in Baptismo id necessarium docent. SECVNDO nos docemus, ad essentiã Sacramenti non requiri verbum concionale, illi affirmant, requiri. TERTIO nos docemus, ad essentiã Sacramentorum requiri verba certa, concepta, consecratoria, & hæc esse, quæ dicantur propriè verba Sacramentalia; illi hoc totum negant, & magicam incantationem vocant. Nam etiam verba Baptismi, vt dixi, non idè recitant dum aspergunt aquam, vt consecretur aqua, sed vt instruatur populus, vt sint etiam illa verba pars quædam concionis: in quo, vt dixi, Ioannes Brennius, & alij quidam ex Lutheranis cum Calvinistis conueniunt. Et hæc est ratio, cur illi lingua vulgari, nos Latina vtamur in Sacramentis: illi enim populum docere volunt, qui non intelligit linguam Latinam; nos Deum inuocamus ad sanctificandum elementum, Deus autem omnes linguas intelligit.

Sit igitur PRIMÆ propositio: *Non solùm in Baptismo, sed etiam in ceteris Sacramentis requiruntur verba in ipsa celebratione mysterij.* Probat. Nam in Eucharistia, Dominus dum panem benedixit, certa verba pronunciauit, nimirum: *Hoc est corpus meum, quod pro vobis datur.* ac deinde iussit, vt idem nos faceremus: *Hoc, inquit, facite in meam commemorationem,* Luc. 22. Debemus igitur & nos certis verbis vtī, si facere volumus, quod ipse fecit, vt nobis imperauit.

DICENT fortasse, Christum imperasse, vt faceremus, quod ipse fecit, non autem vt diceremus verba, quæ ipse dixit. SED nos respondemus, illud (*Hoc facite*) referri ad totam actionem Christi, ita vt comprehendat etiam verba. Id quod (vt omittam nunc alia argumenta) discimus ex traditione, & vsu Catholicæ Ecclesiæ, quæ traditio si non recipiatur, in dubium reuocabitur etiam forma Baptismi. Nam vnde, quæso, colligitur, dum aqua aspergitur, dicenda esse illa verba: *Baptizate in nomine Patris, & Filij, & Spiritus sancti?* certè

non aliunde quàm ex illis verbis Matt. vlt. *Docete omnes Gentes, baptizantes eos in nomine Patris, & Filij, & Spiritus sancti.* At ex hoc loco id non potest certè colligi, nisi recipiatur Ecclesiæ traditio. Non enim Dominus ait, Dicite, Baptizo te in nomine Patris, &c. satis igitur erit, si aspergentes aquam dicamus, In nomine Patris, & Filij, &c.

Præterea non etiam dixit Dominus, Dicite; In nomine Patris, &c. sed solùm ait: *Baptizantes eos, in nomine Patris, &c.* quæ verba non cogunt, vt dicamus; In nomine Patris, &c. sed solùm vt baptizemus auctoritate Dei, nimirum vt eius ministri, quod potest fieri, etiam si nihil dicamus. Id quod ex aliis similibus locis demonstrari potest. Nam Marc. vlt. Dominus ait: *In nomine meo demonia eiicient, super agros manus imponent, & benè habebunt.* & tamen non erat opus, vt Apostoli cùm aliquem curare volebant, dicerent voce, In nomine Domini, sed satis erat, si cogitatione: nam Actor. 9. Petrus excitauit Tabitham. & Actor. 14. Paulus sanauit claudum sine vlla mentione nominis Christi. Sic etiam Matth. 18. Dominus ait: *Vbi fuerint duo, vel tres congregati in nomine meo, illic sum in medio eorum.* & tamen non est opus, vt qui volunt congregari in nomine Christi, dicant verbis; Congregamur in nomine Christi: sed satis est si conueniant Christi auctoritate. Sic denique Ioan. 5. Dominus ait: *Ego Veni in nomine Patris mei, & non recepistis me: si alius Venerit in nomine suo, illum recipietis.* vbi non significatur aliud per nomen, nisi auctoritas.

Quod igitur in Baptismo dicere debeamus: *Baptizo te, in nomine Patris, & Filij, & Spiritus sancti,* non ex sola Scriptura certò colligi potest, sed ex Scriptura, adiuncta Ecclesiæ explicatione, & praxi. Quod si in Baptismo recipitur Ecclesiæ auctoritas, cur non etiam in Eucharistia, & ceteris Sacramentis?

De aliis Sacramentis idem probari potest, quanquam non sit valde necessarium, cùm ea ab aduersariis non recipiantur. In Confirmatione perspicuum est, adhibenda esse verba ex cap. 8. Actor. vbi Apostoli manus imponentes simul orabant. Vnde CYPRIANVS in epistola ad lubaianum: *In impositione, inquit, manuum innocatur, & infundatur Spiritus sanctus super baptizatos.* Idem habet AMBROSIVS lib. 3. de Sacramentis, cap. 2. *Post fontem, inquit, superest, & perfectio fiat, quando ad inuocationem sacerdotis Spiritus sanctus infunditur.*

tur. Idem habet Hieronymus in libro contra Luciferianos; & Augustinus lib. 3. de Baptismo, cap. 16.

In Sacramento Pœnitentiæ requiri etiam verba, patet ex illo Ioan. 20. *Quorum remisseritis peccata, remittuntur;* nec enim id fieri potest sine verbis. Vnde Ioannes Chrysostomus in commentario eius loci, dicit, Deum uti, & manu, & lingua sacerdotis ad absoluendum; & S. Leo in epist. 91. ad Theodorum dicit, post Baptismū Deum sic ordinasse remediū Pœnitentię, ut nisi supplicationibus sacerdotum venia nequeat obtineri.

In Sacramento Ordinis requiri verba, docet AMBROSIVS in cap. 4. prioris ad Timotheum: *Manus impositiones,* inquit, *verba sunt mystica, quibus confirmatur ad opus electus, accipiens auctoritatem, teste conscientia sua, ut audeat vice Domini sacrificium Deo offerre.* Item Hieronymus in cap. 58. Isaïę, dicit Ordinationem clericorum fieri ad imprecationem vocis, & impositionem manuum.

In Sacramento Vnctionis ægrotorum, planum est requiri verba ex epistola Iacobi, cap. 5. *Inducat Presbyteros Ecclesia, & orent super eum & ungentes eum oleo in nomine Domini, &c.*

Denique de Matrimonio res est perspicua, cū non possit constare mutua consensio, nisi verbis, aut signis æquivalentibus exprimatur. Itaque Calvinus etiam in libro de forma ministrandi Sacramenta, licet Matrimonium non habeat pro Sacramento, tamen vult in Ecclesia celebrari, & præscribit certam formam verborum.

SECUNDA propositio: *Non requiritur Verbum concionale ad essentiam & illius Sacramenti.* Probatur PRIMO, argumento ab auctoritate Scripturæ negatiuè, quod ab aduersariis magnifери solet, & debet, cū nihil oporteat in rebus diuinis facere sine Dei verbo, & ipsi nullum Dei verbum agnoscant, nisi scriptum. Igitur in Scripturis fit mētio Baptismi; primum Ioan. 3. *Nisi quis renatus fuerit, &c.* deinde Ioan. 4. vbi habemus, Dominum per discipulos baptizasse; item Marc. vlt. *Qui crediderit, & baptizatus fuerit, saluus erit.* Tit. cap. 3. *Saluos nos fecit per lauacrum.* 1. Pet. 3. *Vos saluos facit Baptisma.* Sed in his locis nulla fit mentio verbi, nedum concionis.

Duo tantū sunt loca, vbi fit mentio verborum. VNVS est ad Ephes. 5. *Mundans eam lauacro aqua in Verbo & vita.* ALTER Matthæi vlt. *Docete omnes gentes, baptizantes eos in nomine Patris, & Filij, & Spiritus sancti.*

Prior locus explicari debet per posteriorem; tum quia hæc sit regula generalis etiam ab aduersariis celebrata, vt cum id fieri potest, vna Scriptura per aliã explicetur; tum quia Chrysostomus, Theodoretus, Theophylactus, Anselmus, aliique interpretes ita docent; dicunt enim illud: *In Verbo Vita*, significare: *In nomine Patris, & Filij, & Spiritus sancti*. Vnus est Hieronymus, qui in commentario huius loci per, *Verbum Vita*, intelligit doctrinam. SED obseruandum est, Hieronymum omisisse literalem expositionem, & solum exposuisse mysticè, id est, vt ipse dicit, tropologicè. Non enim per lauacrum intelligit Baptismum, sed purgationem quamlibet, quæ per doctrinam fieri potest. Omnes autem interpretes, qui ad literam exponunt, per lauacrum intelligunt Baptismum, & per verbum, intelligunt inuocationem Trinitatis.

Remanet ergo solus locus ille Matthæi ult. *Docete omnes Gentes, baptizantes eos, &c.* quo loco non negamus iuberi, vt instructio præcedat Baptismum: immò hoc ipsum nos docemus, & facimus; nõ enim baptizamus vllos adultos, nisi prius diu multumque instructi fuerint. Sed negamus hoc loco præscribi concionem tanquam partem essentialem Sacramenti, immò asserimus distinguere hoc loco apertè doctrinam à Sacramento. Sic enim distinguit S. HIERONYMVS in commentario huius loci: *Ordo, inquit, præcipuus, insit Apostolis, vt prius docerent omnes Gentes: deinde fides intingerent Sacramento, & post fidem, ac Baptisma, qua essent obseruanda præciperent.*

Porro, quod diximus de Baptismo, dici potest etiam de Eucharistia. Nam nec Dominus Matthæi 26. nec Paulus 1. ad Corinthios 11. dicunt fieri debere concionem, cum celebratur cœna Dominica: nec ipse Dominus vllam habuit concionem, nec explicuit vim Eucharistiæ (quod tamen Calvinus necessarium putat) in ipsa cœnæ celebratione. Habuit quidem postea longissimum sermonem, quem Ioannes descripsit, capite 14. 15. & 16. sed is nihil ad cœnam pertinebat, tum quod post cœnam habitus sit, tum etiam, quod nihil in eode cœna Dominus disseruerit. Viderit igitur Calvinus, ex quo Euangelio didicerit, concionem esse formam Sacramenti.

SECUNDO probatur, non esse concionem de essentia Sacramenti. Nam si ita esset, non distinguerentur officia concionandi,

cionandi, & baptizandi. Quicumq; enim concionaretur, hoc ipso baptizaret, quandoquidem ministraret formam Baptismi: & contrà, qui baptizaret, concionaretur, cùm Baptismus formaliter nihil aliud sit, nisi concio. At contradicit huic sententiæ B. Paulus, cùm ait I. Corinth. I. *Non misit me Christus baptizare, sed euangelizare*. In quem locum præclare scribit commentarius, qui tribuitur Ambrosio: ostendit enim multò minus esse baptizare, quàm prædicare, ex eo, quod qui baptizat, solum pronunciat solènia quædam verba, & aquam infundit, quod facillimum est. Vnde etiam Petrus Actor. 10. postquam prædicauerat Cornelio, non ipse eum baptizauit, sed iussit à ministris inferioribus baptizari. At secundum Caluinum Petrus ipse baptizasse dicendus esset, qui formam adhibuit Baptismi.

TERTIO; Si forma Baptismi esset concio, varia essent Baptismata pro varietate concionum: non enim omnes eodem modo concionantur. At vnum Baptisma esse, sicut vnus est Deus, & vnus Dominus, testatur Apostolus ad Ephes. 4. & Symbolum Constantinopolitanum.

QUARTO; Si forma Baptismi esset concio, falsum Baptismum haberent hæretici, ac proinde rebaptizandi essent: non enim vera esse potest prædicatio hæreticorum. At Ecclesia approbat Baptisma quorumlibet hæreticorum, modò detur verbis præscriptis, id est: *In nomine Patris, & Filij, & Spiritus sancti*. etiamsi addant ipsi peruersissimam concionem, & explicationem, vt docet S. AUGUSTINVS libro 3. de Baptismo, cap. 15. *Si Evangelicis, inquit, verbis, In nomine Patris, & Filij, & Spiritus sancti Marcion Baptismum consecrabat, integrum erat Sacramentum, quamuis eius fides sub iisdem verbis aliud opinantis, quàm Catholica veritas docet, non esset integra, sed fabulosis falsitatibus inquinata. Nam sub eisdem verbis, (id est, In nomine Patris, & Filij, & Spiritus sancti) non solum Marcion, aut Valentinus, aut Arius, aut Eunomius, sed ipsi carnales paruuli Ecclesie, si possent singuli diligenter interrogari, tot diuersitates opinionum fortassis, quot homines numerarentur. Animalis enim homo non percipit ea, quæ sunt Spiritus Dei. Nunquid tamen ideo non integrum Sacramentum accipiunt?*

QUINTO; Baptismus Catholicorum datur sine vlla concione. Erst enim præcedit Catechismus, & sermones, ac prædicationes

cationes permultæ, tamen eo die, quo fit Baptismus, ordinariè concio fieri non solet. Et tamen Calvinus non iubet rebaptizari Catholicos, immò fatetur verum esse eorum Baptismum lib. 4. Instit. cap. 15. §. 16. *Tales, inquit, hodie sunt Cataprista nostri, qui ritè nos baptizatos pernegant, quod ab impiis, & Idololâtris in regno Papali baptizati sumus. Itaq, Anabaptismum furiosè urgent, etc.* Quomodo ista coherent, ut concio sit forma Baptismi, & tamen sine concione verus Baptismus dari possit? Quomodo etiam verba ista ex libris Institutionum concordât cum verbis eiusdem Caluini supra citatis ex commentario 5. cap. ad Ephes. vbi ait, nullam esse apud Papistas legitimam signorum obseruationem, quod desit apud eos explicatio ad populum, quæ sola facit ut mortuum elementum incipiat esse Sacramentum?

SEXTO; Si forma Baptismi esset concio, paruuli certè baptizandi non essent: non enim fieri debet concio, vbi non est, qui audiat, & intelligat. Monet enim Sapiens Eccles. 32. *Vbi non est auditus, non effundas sermonem.* At pueri nihil intelligunt, nec attendunt, aut attendere possunt; igitur non est illis concio facienda: quare nec baptizari debent, aut possunt.

Ad hoc argumentum dupliciter responderi solet; aliqui enim, ut Lutherani, volunt paruulos percipere concionem. Sed hos suprâ refutauimus dilemmate S. Augustini in epistola ad Dardanum. Aut vsum rationis habent, aut non; si nō habent, ergo non intelligunt; si habent, ergo sacrilegi sunt, qui Sacramentum recusant, ut patet.

Alij, ut Calvinus lib. 4. Institution. cap. 16. §. 20. dicunt, paruulos non percipere Sacramentum vtiliter pro eo tempore, tamen verum Sacramentum percipere, quod postea vtile sit futurum. Sed hæc solutio non est sufficiens. Nam si verbi prædicatio est de essentia Baptismi, non minus, quàm aqua; certè debet percipi non minus, quàm aqua, alioqui non modò inutile, sed etiam nullum erit Sacramentū. Quod si aqua aspergeretur à ministro, infantem verò non attingeret, nemo diceret illum esse baptizatum; ergo si concio fiat, & non percipiatur ab infante, nemo dicere debet ex Calvinistis, illum esse baptizatum. Concio autem non verè percipitur, nisi cum intelligitur: non enim dicitur percipere concionem, quæ propriè instructio quædam est, qui non instruitur, etiam si sonum quendam audiat. Nō ergo infantes percipiunt formam

Sacramenti, quare nec Sacramentum. Aut igitur Calvinistæ fiant Anabaptistæ, aut desinant concionem requirere ad essentiam Sacramenti.

TERTIA propositio: *Requiritur ad essentiam Sacramenti certa forma Verborum, quæ non tam instruat circumstantes, quàm consecret & sanctificet elementum.* Hæc est non modò aduersus Calvinum, sed etiam aduersus Brenrium, ac ceteros Lutheranos, qui verba ipsa consecrationis pronounciari volunt ad instruendum populum, non ad materiam consecrandam; & idcirco nefas esse putant, si ea verba Latinè pronouncientur apud populum Latinæ linguæ imperitum.

Probatur hæc propositio PRIMO; Verba à Domino præscripta in Baptismo, non habent formam instructionis, sed inuocationis, & benedictionis. Id quod probatur ex ipsa forma loquendi Christi. Non enim ait; Docete omnes Gentes nomen Patris, & Filij, & Spiritus sancti, sed: *Baptizantes eos in nomine Patris, &c.* vbi verba illa: *In nomine Patris, &c.* respiciunt actum baptizandi, non actum docendi: proinde sonant inuocationem Trinitatis super aquæ asperisionem, non declarationem mysterij ad auditores. DEINDE, si licet Scripturam exponere per Scripturam, perspicuum erit: *In nomine Patris, &c.* sonare inuocationem, nō instructionem: sic enim accipitur ista forma loquendi in aliis locis, vt Marci ult. *in nomine meo demonia eiiciunt.* Actor. 3. *In nomine IESU Christi, surge, & ambula.* Matth. 7. *Nōne in nomine tuo demonia eiicimus?* & alibi passim. DEINDE, si verba ista ad instructionem pertinerent, valde profectò imperfecta essent. non enim solum instrui debent de Trinitate qui baptizantur, sed etiam de incarnatione, & passione Domini, & præcipuè de promissione gratiæ ob Christi meritum; quarum rerum nulla in his verbis mentio fit.

SECUNDO; Verba, quæ dicuntur in mysterio Eucharistiæ ab Apostolo, dicuntur verba benedictionis, quod certè non instructionem, sed consecrationem sonat, 1. Corint. 10. *Calix benedictionis, cui benedicimus, nōne communicatio sanguinis Christi est?* Idem argumentum duci posset ab aliis Sacramentis, si ea reciperent aduersarij. Vide tamē quæ diximus in confirmatione primæ propositionis.

TERTIO probatur ex illis Apostoli verbis, 1. Cor. 1. *Nunquid Paulus pro vobis crucifixus est, aut in nomine Pauli baptizati estis?*

98 Cap. XIX. De Sacram. in genere. Lib. I.

επιστῶν ubi Apostolus demonstrare vult, Sacramentorum auctores non esse eos homines, qui illa ministrant, sed Deum: idq; inde probat, quia non dantur in nomine ministrorum, sed in nomine Dei, id est, Patris, & Filij, & Spiritus sancti. Nomen igitur in verbis Sacramentorum, inuocationem significat, ex qua colligitur auctoritas. Vnde CHRYSOSTOMVS hom. 3. in priorem ad Cor. *Noli*, inquit, *mibi dicere, quis baptizauit, sed in cuius nomine; neque qui baptizat, sed quem in Baptismate inuocamus, requiritur*. Vide de hoc loco, & de hoc argumento Optatum Mileuitanum, lib. 5. contra Parmenianum.

QUARTO idem probatur ex traditione Conciliorum. Nam Concilium Nicænum can. 19. iubet rebaptizari Paulianistas: quod idem statuit Concil. Laodiceum can. 8. de Cataphrygibus. At contrà Concilium I. Arelatense eodem tempore celebratum can. 8. & Syricius epist. 1. cap. 1. iubent, Arianos non rebaptizari, cuius differentia causa non potest reddi nisi illa, quam reddit Innocentius I. in epist. 22. c. 5. quia videlicet Paulianistæ, & Cataphryges non solum non credebant Trinitatem, sed nec baptizabant cū inuocatione Trinitatis: at Ariani licet non crederent Trinitatem vnius essentia, tamen baptizabant in nomine Patris, & Filij, & Spiritus sancti. At certè quantum ad instructionem, & explicationem, tam errabant circa Trinitatem Ariani, quàm Paulianistæ, & Cataphryges: non igitur instructio, sed inuocatio Baptismi perficit.

QUINTO probatur ex Patribus, qui cū de verbis Sacramentorum loquuntur, non instructionis, sed inuocationis, & consecrationis mentionem faciunt. Dionysius AREOPAGITA in lib. de Eccles. hier. cap. vlt. vocat verba Sacramentorum *τὰς τελεστὰς ἐπιχλῶσεις*, id est, consecratorias inuocationes. IUSTINVS in Apologia ad Antoninum Pium: *Super eo*, inquit, *qui renascendum sibi esse statuerit, parentis rerum omnium, & Domini Dei nomen nominatur, atque id ipsum solum lauacrum istum ad lauacrum ducentes inuocamus*. Et infra: *In nomine etiam IESU Christi crucifixi, atq; in nomine Spiritus sancti abluitur is, qui illuminatur*. BASILIUS lib. de Spiritu sancto, cap. 15. *Tribus*, inquit, *inersionibus, ac totidem nomenclaturis, siue inuocationibus magnum Baptismatis mysterium perficitur*. CYRILLVS catechesi 3. *Aqua simplex*, inquit, *per sancti Spiritus, Christi, & Patris inuocationem, sanctitatem consequitur*.

ATHANASIUS sermon. 3. contra Arianos, circa medium: *Cur, inquit, dum initiamur Baptismate, & nā cum Patre, Filij quoq; nomen recensetur? nam & Pater sit insufficiens, nefaria vox est, &c.* ubi docet, tres personas nominari in Baptismo, non quod vna non sufficiat sanctificare hominem, sed quia inseparabiles sunt ob naturæ unitatem: quocirca vult verba illa Baptismi non dici, ad instruendum populum, ut hæretici somniant, sed ad inuocandum Deum, qui per Baptismum nos sanctificat.

Gregorius NISSENVs in lib. de Baptismo: *Omitte, inquit, mecum confligere, & opponere se, si potes, Domini Vocibus, quæ inuocationem, & cognominationem Baptismatis hominibus instituerunt. Et quæ sunt Verba Dominici præcepti? Baptizantes eos in nomine Patris, & Filij, & Spiritus sancti. Et infrat Submittimus nos Patri, & sanctificemur, &c.*

CYPRIANVS, vel quicumq; fuit auctor, in sermone de Baptismo Christi, prope initium: *Verborum, inquit, solennitas, & sacri inuocatio nominis, & signa institutionibus Apostolicis sacerdotum ministeriis attributa, & visibile celebrant Sacramentum. rem verò ipsam Spiritus sanctus format & efficit, & consecrationibus & visibilibus inuisibiliter manum totius bonitatis auctor apponit.*

AMBROSIVS lib. 2. de Sacramentis, cap. 5. *Venit, inquit, sacerdos, precem dicit ad fontem, inuocans Patris nomen, præsentiam Filij, & Spiritus sancti, & utitur verbis celestibus. Celestia Verba, quæ Christi sunt, quod baptizemus in nomine Patris, & Filij, & Spiritus sancti. Si ergo ad hominis sermonem, ad inuocationem Sancti, aderat præsentia Trinitatis, quanto magis ibi adest, & ibi sermo operatur æternus? Similia dicit de verbis Eucharistiæ lib. 4. de Sacramentis, cap. 4.*

AVGVSTINVS lib. 3. de Baptismo contra Donatistas, cap. 10. *Non est, inquit, aqua prophana, & adultera, super quam nomen Dei inuocatur, etiamsi à prophanis, & adulteris inuocetur, quia nec ipsa creatura, nec ipsum nomen adulterum est. Baptismus verò Christi verbis Evangelicis consecratus, & per adulteros, & in adulteris sanctus est, quamuis illi sint impudici, & immundi, quia ipsa eius sanctitas pollui non potest, & Sacramento suo diuina virtus assistit. Et lib. 5. cap. 20. Si ergo ad hoc valet, quod dictum est in Evangelio, Deus peccatorem non audit: Et per peccatorem Sacramenta, non celebrentur,*

quomodo exaudis homicidam deprecantem, & vel supra aquam Baptismi, & vel super oleum, & vel super Eucharistiam, & vel super capita eorum, quibus manus imponentur qua omnia tamen, & fiunt, & valent etiam per homicidas.

CAPVT XX.

Soluuntur obiectiones.

SOLVENDAE supersunt obiectiones Caluini, qui PRIMO loco profert testimonium S. AVGVSTINI extract. 80. in Ioan. vbi S. Augustinus, posteaquam dixerat: *Vnde tanta virtus aqua, & corpus tangat, & cor abluat?* Adiungit: *Nisi faciente verbo, non quia dicitur, sed quia creditur. Nam & in ipso verbo aliud est sonus transiens, aliud virtus manens: hoc est verbum fidei, quod predicamus. Vnde in Actis Apostolorum; Fide mundans corda eorum. Et Petrus Apostolus; Sic nos Baptisma saluos facit, non depositio sordium carnis, sed conscientia bona interrogatio. Hoc est, verbum fidei, quod predicamus. Hacille.*

RESPONDEO; Locus hic mirè torquere solet nonnullos, cum tamen non vsque adeo obscurus esse possit, cum sit pars quædam concionis ad populum habite, nisi fortè credimus S. Augustinum per enigmata predicare solitum, vt Oedipo opus esset ad eum intelligendū. Referam igitur quid alij sentiant, & refellam ea, quæ non videntur rectè dicta.

PRIVM igitur Calvinus contendit, totum hunc locum de concione intelligendum. Sed fallitur apertissimè. PRIMO, quoniam AVGVSTINVS ait: *Detrahe Verbum, quid est aqua, nisi aqua?* At detracto verbo concionis, adhuc aqua Baptismi non est pura aqua, sed aqua sacra, & Sacramentalis. nam apud nos nulla fit concio in Baptismo, & tamen Baptismus nostrum verum Sacramētum Calvinus esse fatetur, li. 4. Instit. c. 15. §. 16.

SECVNDO, AVGVSTINVS ait: *Accedit Verbum ad elementum, & fit Sacramentum.* At concio non accedit ad elementum, sed præcedit, vt ipse idem Calvinus docet, lib. 4. cap. 14. §. 3. Oportuisset ergo, vt diceret, *Accedit ad verbum elementum, & fit Sacramentum.*

TERTIO, AVGVSTINVS ait: *Vnde tanta virtus aqua, & corpus tangat, & cor abluat, nisi faciente verbo?* Et infra: *Mundatio nequaquam fluxu & labili tribueretur elemento, nisi adde-*

adderetur in Verbo. Vbi fatetur Augustinus, ipsam etiam aquam vim habere mundandi, sed eam non ex se habere, sed à verbo. At concio nihil tribuit aquæ; tota enim refertur ad instruendos auditores, non ad sanctificandam aquam. Immo id nobis obiicit Calvinus in commentario, cap. 5. ad Ephesios, tanquam valde absurdum, quod in Sacramentis interdum verba referamus ad ipsum elementum consecrandum, & non ad populum instruendum.

QUARTO, AVGVSTINVS ait: *Hoc Verbo, & mundare possit, consecratur & Baptismus.* At idem Augustinus docet verbum, quo Baptismus consecratur, esse illam inuocationem: *In nomine Patris, & Filij, & Spiritus sancti.* Sic enim loquitur, lib. 3. de Baptismo, contra Donatistas, cap. 15. *Quamobrem si Evangelicis Verbis, In nomine Patris, & Filij, & Spiritus sancti Marcion Baptismum consecrabat, integrum erat Sacramentum.* Id ipsum repetit in infinitis locis.

QUINTO, AVGVSTINVS ait: *Hoc Verbum fidei tantum valet in Ecclesia Dei, & per ipsam credentem, offerentem, benedicentem, tingentem etiam tantillum mundet infantem, quamvis nondum valentem corde credere ad iustitiam, & ore confiteri ad salutem.* At verbum concionale nihil prodest, nisi actu credatur, ut notum est: non igitur Augustinus de concionali verbo loquitur.

Reiecta igitur Caluini sententia, quidam ex Catholicis docent, Augustinum loqui de verbo non concionis, nec consecrationis, sed institutionis Sacramenti: illud enim suo modo efficit Sacramentum, consecrat aquas, mundat infantem, &c.

Sed neq; hæc explicatio admitti potest. PRIMO, quoniam non tollit difficultatem, quam aduersarius nobis obiecit, ex illis verbis: *Non quia dicitur, sed quia creditur.* Et ex illis: *Hoc est Verbum fidei, quod prædicamus;* quæ verba ter repetuntur hoc loco ab Augustino.

Nihil enim horum quadrat in verba institutionis Sacramenti. Nam verba institutionis non idè vim habent, quia creduntur, sed quia dicta sunt à Domino, qui solus potuit ex elementis facere Sacramenta. Neque verba institutionis sunt propriè verbum fidei, quod prædicamus: nam ibidem explicat AVGVSTINVS, quod sit hoc verbum fidei, cum ait: *Quia si confessus fueris in ore tuo, quia Dominus est IESVS, & credideris in corde tuo, quia Deus illum suscitauit à mortuis, saluus eris.*

SECUNDO, AUGUSTINVS præter verbum, de quo hic loquitur, non agnoscit in Sacramento aliud verbum; sed nudum ac solum elementum, vt patet ex illis verbis: *Detrahe Verbum, quid est aqua nisi aqua?* Et: *Accedit Verbum ad elementum, & fit Sacramentum.* Et: *Vnde tanta Virtus aqua, & corpus tangat, & cor abluat, nisi faciente Verbo?* Non igitur hoc verbum est verbum institutionis, cum certum sit præter verbum institutionis, Sacramenta constare ex verbis, & elementis, & non esse nuda elementa.

Alia item Catholicorum sententia est, Augustinum loqui solum de verbo caeremoniali, seu consecratorio. Quæ sententia melior est ceteris duabus; tamen habet hoc vnum incommodum, quod non potest reddere causam, cur AUGUSTINVS allegauerit ex cap. 10. epistolæ ad Romanos illa verba: *Hoc est Verbum fidei, quod prædicamus. Quia si conficaris in corde tuo, &c.* Et rursus cur paulò infra allegauerit illa ex cap. 15. Actor. *Fide mundans corda eorum.* Et ex 1. Petr. 3, illa: *Non carnis depositio sordium, sed conscientia bona interrogatio.* Et deniq; illa ex cap. 15. Ioan. *Iam Vos mundi estis propter sermonem, quem loquutus sum Vobis.* Nam nihil horum trahi potest, ad verba consecrationis, nisi per summam vim, & nisi ex concione populari, vt suprâ dixi, ænigmata faciamus.

DICO igitur, Augustinum hoc loco non semper loqui de eodem verbo, sed nunc de Sacramentali, nunc de concionali, vt ex argumentis iam factis planum factum est.

DICES; ergo AUGUSTINVS in perpetua æquiocatione versatur, cum iisdem sententiis tam differenter accipiat nomen verbi: exempli causa, cum dixisset: *Vnde tanta Virtus aqua, & corpus tangat, & cor abluat, nisi faciente Verbo?* Subiungit: *Non quia dicitur, sed quia creditur;* vbi apertè loquitur de verbo concionali: proinde aut etiam antea loquebatur de concionali, aut vitiosam æquiocationem committit.

PRAETerea ad probandum, aquam habere vim ex verbo, profert testimonium B. Pauli, ex cap. 10. ad Rom. *Hoc est Verbum fidei, quod prædicamus. Quia si confitearis, &c.* Et illud Actor. 15. *Fide mundans corda eorum.* Et illud, 1. Petr. 3. *Non carnis depositio sordium, sed conscientia bona interrogatio.* Et addit: *Hoc est Verbum fidei, quod prædicamus.* Sed quid, quæso, probat Augustinus, si æquiocè de verbo loquitur?

DENIQUE in extrema concione cùm dixisset, aqua per verbum mundari infantem, subiungit continuò: *Hoc totum fit per Verbum, de quo Dominus ait; Iam vos mundi estis propter Verbum, quod loquutus sum vobis.* quæ verba de concione Domini sunt intelligenda necessariò. Quare vel etiam superiora intelligi debent de concionali verbo, & non de Sacramentali, vt nos paulò antè dicebamus; vel erit in his vèrbis intolerabilis æquiuocatio.

RESPONDEO, nullam esse in verbis Augustini æquiuationem. Siquidem ipse explicanda suscepserat illa verba Domini, Ioan. 15. *Iam vos mundi estis propter Verbum, quod loquutus sum vobis.* Dum autem illa verba explicaret, proposuit sibi ipsi quæstionem, cur non dixerit potius Christus; Iam vos mundi estis propter Baptismum, quo loti estis. Nam etiam si verbum Domini prædicatum mundat, quatenus gignit fidem, quæ est initium iustificationis, tamen etiam Baptismus mundat, cùm statim abluat sordes omnium peccatorum.

Ad hanc quæstionem respòdet, Christum dixisse: *Vos mundi estis, propter Verbum*, & non dixisse; *Mundi estis propter Baptismum*, quia in omni mundatione, siue ea fiat in Sacramento, siue extra Sacramentum, semper vis mundandi oritur ex verbo. Nam si fit mundatio extra Sacramentum, necessariò fit per actualem fidem: fides autem ex auditu: auditus autem per verbum Christi, Rom. 10. Si verò mundatio fit in Sacramento; elementum quidem est, quod mundat, sed vt mundare possit, adiungitur ei verbum consecrationis. Semper igitur mundatio oritur ex verbo. Quocirca sanctus Augustinus illa verba Domini: *Vos mundi estis propter Verbum, quod loquutus sum vobis*, non restringit ad verbum concionis, sed generatim accipit; & in toto reliquo sermone id vnum probare conatur, omnem mundationem fieri per verbum: idcirco promiscuè adfert argumenta, & testimonia, nunc de verbo Sacramentali, nunc de Concionali, quia illi perinde est, modò demonstret verbum esse, quod mundat.

Ex hoc fundamento faciliè explicabuntur tria illa loca, vbi videbatur esse vitiosa æquiuocatio. PRIMVS locus erat: *Vnde tanta virtus aquæ, vt corpus tangat, & cor abluat, nisi faciente verbo, non quia dicitur, sed quia creditur?* Hæc verba à nonnullis intelliguntur idcirco esse dicta, quia nisi ad sit fides vel

propria in adultis, vel aliena in paruulis, Sacramentum, nihil efficit. Sed hoc non rectè dicitur. Quia licet fides in adultis requiratur, vt dispositio quædam ad Sacramentum fructuosè recipiendum, tamen non est fides, quæ dat virtutem mundandi elemento: non enim idèd aqua habet vim mundandi, quia ego credo, sed quia est Sacramentum à Deo institutum.

Id autem quærit A V G V S T I N U S, vnde sit virtus aquæ, non cui profit aqua. Illud ergo: *Non quia dicitur, sed quia creditur*, significat, verbum Sacramentale non dare vim aquæ, vt est res quædam naturalis, id est, aër percussus; sic enim nihilo melius est verbum elemento: sed vt est res spiritalis, & sola fide cognoscibilis, nimirum, vt continet inuocationem Trinitatis quomodo etiam signum crucis, & nomen I E S U S, honorabile est, & vim habet operandi miracula, ac dæmones coërcendi; non vt est res naturalis, & sensu corporeo perceptibilis, sed vt repræsentat rem diuinam ita vt sensus sit: (Verbum non quia dicitur, sed quia creditur;) id est, non quatenus auri- bus sentitur, sed quatenus fide percipitur.

Esse autem hunc sensum verum huius loci, patet ex sequentibus verbis: *Nam, inquit, & in ipso verbo aliud est sonus transiens, aliud virtus manens.* vbi id vocat sonum transeuntem, quod vocauerat, Verbum quia dicitur; id vocat virtutem manentem, quod vocauerat, verbum quia creditur.

P R A E T E R E A illud: *Quia creditur*, vel significat, quia creditur actu, vel quia est obiectum fidei, & proinde res fide perceptibilis: non autem potest significare, quia creditur actu; nulla enim actualis fides est in rigore necessaria ad Baptismū. Nam non requiritur fides actualis suscipientis Baptismum, vt patet in paruulis, quos Augustinus hoc loco dicit verissimè per verbum in Sacramento mundari, etiamsi non valeant corde credere, & ore confiteri. Nec requiritur fides ministri, aut parentum, aut quorumlibet offerentium, & susceptorum, vt idem Augustinus probat in epist. 23. ad Bonifacium, vbi dicit, verè mundari paruulos etiamsi baptizentur, vel offerantur ab infidelibus. Cuius igitur fides actualis requiritur, si nec suscipientis, nec dantis, nec offerentis?

D I C E S, requiritur fides Ecclesiæ. S E D quid si nullus in Ecclesia actum fidei exerceret, dum infans ab infideli baptizatur? quid si per impossibile Ecclesia tota periret, & tamen

Turca quispiam, qui nosset res nostras, infantem baptizaret cum intentione faciendi quod Christus instituit, & Ecclesia faciebat: certè ille esset baptizatus. Verum est tamen, quod Augustinus & alij dicunt, infantes baptizari in fide parentum, vel Ecclesiæ, quia de facto, si nullus esset fidelis, certè nullus moueretur ad baptizandum infantes: sed non ideo fides actualis ita requiritur, vt sine illa Baptismus infructuosus esset.

Est autem hîc diligenter NOTANDVM, non negari ab Augustino, verbum ipsum, vt dicitur, & vt est res sensibilis, habere virtutem; nam si aqua ipsa habet virtutem mundandi, quantò magis verbum, etiam vt sensibile: sed negari virtutem illam esse à verbo, vt est res sensibilis. Itaque totum Sacramentum habet virtutem, sed habet à verbo, vt verbum est res spiritalis, & sola fide cognoscibilis.

ALTER locus difficilis erat, vbi Augustinus allegat Scripturas, Roman. 10. Actor. 15. & I. Petri 3. SED respondeo, illa loca non allegari ad probandum, vim mundandi esse in aqua à verbo; sed ad probandum in genere, verbum habere vim mundandi: ille em̃ est Augustini scopus, vt diximus. Et quia id iam probauerat ex eo, quod verbum Sacramentale dat vim mundandi elemento: idem probat testimoniis illarum Scripturarum. Nam illa loca demonstrant fide purgari corda hominum, fidem autem nasci ex verbo prædicationis; ex quibus sequitur, verbum vim habere mundandi.

TERTIVS locus difficilis erat in fine sermonis, vbi postquam dixerat, verbo Sacramentali mundari infantes, addidit: *Totum hoc fit per Verbum, de quo Dominus ait; Iam Vos mundi estis propter Verbum, quod loquutus sum Vobis.* SED iam responsum est, ista verba Domini ab Augustino restringi ad sermonem, quẽ Dominus loquutus fuerat post vltimam cœnam, sed intelligi de verbo generaliter, vt sensus sit; Vos mundi estis, propter verbum meum, siue quod me concionante audistis, & credidistis, siue quo in Baptismo sanctificari estis. Atque hæc de isto loco Augustini, ac de præcipuo argumento Caluini.

Alter obiectio est Caluini, Brentij, Kemnitij, & aliorum, quòd sit species quædam magicæ incantationis, demurmurare certa verba super aquam, vel panem, aut aliud eiusmodi mutum elementum.

SED hæc non tam obiectio, quàm horribilis blasphemia est. Nam in primis duo sunt, quæ damnantur in incantationibus magicis. **VNUM**, quòd aliqui putent in certis figuris, aut verbis esse naturalem virtutem aliquid efficiendi, atque hæc quidem superstitio est; cum certò constet, nec figuras, nec verba vim naturalem ullam habere aliquid efficiendi. **ALTERUM**, quòd alij existiment, figuras, aut verba nihil ex se habere virtutis, tamen ex pacto cum Diabolo inito adhiberi ad res certas efficiendas; & hæc propriè magica est incantatio, & peccatum maximum.

Porro verba Sacramentalia omnes fatemur nullam vim naturalem habere; idè enim dicimus requiri diuinam institutionem, vt ex Dei institutione efficiant, quod ex se facere non poterant. Est quæ mera calumnia Caluini, lib. 4. cap. 14. §. 4. quod solo strepitu verborum sine sensu, & fide vtamur ad elementum consecrandum; & Kemnitij in Examine, parte 2. pag. 101. qui dicit, nos vim ponere in syllabis, & characteribus, neglecto sensu verborum. Ista enim sunt mera mendacia: nam nos nec in characteribus, nec in sono, aut numero syllabarum, sed in sensu, & significatione vim ponimus, id quæ ex Christi institutione.

Siquidem fatentur omnes Catholici, quauis lingua vtamur, verè perfici Sacramentum, modò sensus sit idem; constat autem eadem verba, si diuersis linguis efferantur, vel scribantur, diuersos habere characteres, diuersum sonum, diuersum numerum syllabarum. Sequitur igitur, vt existimemus, vt verè existimamus, ea ex pacto, & promissione Christi vim habere, quæ si magia est, quid aliud sequitur, quàm vt Christus sit Diabolus? Nam cum omnis magia pendeat ex pacto Diaboli, vis autem Sacramentalium verborum pendeat ex pacto Christi: manifestè sequitur, aut nullam in Sacramentis nostris esse magiam, aut Christum esse Diabolum. Ad hanc igitur horribilem impietatem aduersarij nostri deuenerunt, vt ex Christo Diabolum faciant.

DICENT, se non facere Christum Diabolum, quia Christus non instituit eiusmodi verborum pronúciationem super muta elementa. **S**ED iam satis probauimus, Christum instituisse. Ceterum quæ roabeis, an credat Christum potuisse instituere eiusmodi signa, quæ vim haberent ex pacto ipsius ali-

quid

quid operandi. Non, opinor, negabunt, nisi Christum negent esse Deum.

Nam Deus, Num. 5. instituit verba quædam, quæ dicerentur super aquas, ac voluit eam esse vim illorum verborum, ut virtutem tribuerent aquis continuè interficiendi mulieres adulteras, si ab eis biberentur. Item Numer. 21. instituit, ut qui aspicerent æneum serpentem, continuè curarentur à morfu serpentium ignitorum. Et Christus ipse, nonne verbis, aut manus impositione, aut etiam luto, & sputo, pellebat morbos? Potuit igitur Christus hoc instituere, ut verba Sacramentalia vim habeant ex pacto ipsius.

Rursus autem quæro, an si id Christus instituisse, quod eum facere potuisse constitit, esset magia, nec ne? Si dicant magiam futuram fuisse, apertè fatentur, Christum esse Diabolum: si negant futuram fuisse magiam, non possunt vlla ratione nos magos appellare: id enim solùm facimus, quod Christum instituisse credimus. Si autem Christus id non instituisse, falleremur simpliciter, sed nulla ex parte magicæ crimen nos attingeret.

DE NIQVE verba, & signa magica, non habent vllam vim; neque enim Diabolus dare potest rebus virtutes, sed solus Diabolus operatur ad eorum præsentiam. At verba, & signa Sacramentalia vim habent à Deo operandi quod significant; quare longè mirabilius, & sublimius agunt, quàm vllæ incantationes possint.

TERTIA obiectio Caluini sumitur ab auctoritate Christi, Apostolorum, primitiuæ Ecclesiæ, & ipsius Dei: *Nec est, inquit lib. 4. cap. 14. §. 4. quod in hac probatione laboremus, quando minimè obscurum est, quid Christus fecerit, quid nobis facere mandauerit, quid sequuti sint Apostoli, quid purior Ecclesia obseruauerit: immo ab initio vsque mundi notum est, quories signum aliquod obtulit Deus sanctis Patribus, inseparabilem fuisse doctrina copulam, sine qua attoniti nudo aspectu sensus nostri redderentur. Ergo quum de Verbo Sacramentali fieri mentionem audimus, promissionem intelligamus, quæ clara voce à ministro predicata plebem eo manu ducat, quo signum tendit, ac nos dirigit.]*

SED nihil est etiam quod nos in responsione laboremus. Nam minimè obscurum est, Christum nullam præmississe contionem, cum Eucharistiam primus consecrauit, & ut

deinceps idem faceremus, mandauit. Vide Matth. 26. Luc. 22. & 1. Corinth. II. Notum est etiam quid Apostoli, & veteres Patres sequuti sint, ex his testimoniis, quæ nos paulò antè citauimus. Calvinus enim nullum attulit testimonium, præter vnum Augustini, quod iam à nobis est explicatum. Denique non negamus, & Deum cùm signa dedit Patribus, eorum vim explicuisse, & nobis idem esse faciendum, dum Catechumenos instituimus: sed non rectè inde colligit Calvinus, verbum Sacramentale nihil esse, nisi concionem. Aliud enim est concionari, aliud Sacramenta celebrare: vtrumque fieri debet, sed non idcirco distinguenda non sunt, & tempora, & officia.

CAPVT XXI.

Res, & verba Sacramentorum ita determinata esse, vt nihil addere, minuere, aut mutare liceat.

SEQVITVR TERTIA quæstio de causis intrinsicis, vtrum res, & verba Sacramentorū ita sint certa, & determinata, vt nihil in eis mutari possit. Et quidem apud Catholicos nulla ferè dissensio est, magisque explicatione, quàm altercatione res indiget.

Apud hæreticos veteres non deerant, qui res, & verba Sacramentorum inuerterent, ac præcipuè apud Gnosticos, de quibus vide Irenæum, lib. I. cap. 9. & 18. & Epiphanium hæresi 26. Interim tamen omnes, qui Sacramentis utebantur, res, & verba determinata habere volebant, & vt plurimùm non recedebant à verbis in Euangelio præscriptis. Sic enim ait AUGUSTINVS, lib. 7. de Baptismo contra Donatistas, cap. 25. *Facilius inueniuntur hæretici, qui omninò non baptizent, quàm qui non illis verbis baptizent.*

At nostro tempore Martinus Lutherus hæreticorum omnium audacissimus, nouam hæresim excogitauit, videlicet nõ requiri certa verba in Sacramentis. Sic enim loquitur in lib. de captiuit. Babylonica, cap. de Baptismo: *Quocunque modo tradatur Baptismus, modo non in nomine hominis, sed in nomine Domini tradatur, & erè saluum facit: immò non dubitem, si quis in nomine Domini suscipiat, etiamsi impius minister non det in nomine Domini, & erè baptizatum esse in nomine*

Domini.

Domini. Hæc ille. Itaque secundum Lutherum, si quis dicat; Ego te baptizo, in nomine Lutheri, & Catharinæ vxoris eius, vel etiam in nomine Diaboli, erit verus Baptismus, modò qui suscipit, accipiat in nomine Domini.

Retractauit postea Lutherus hunc errorem; Nam in prima homilia de Baptismo, habita anno M. D. XXXV. ita loquitur: *Clarè exprimit Christus, quas caremonias velit, & formã ipse præscribit: Et illa ipsa signa, neq; alia, illa ipsa verba, neque alia hic adhibeantur.* Et infrà: *Si infantem intingeres aqua, neq; adderes verba Baptismi, sed pronunciares orationem Dominicam, aut alia quædam verba ex sacris literis, non esset verus Baptismus.* Et infrà: *Si quis pane, & vino proposito pronunciares nõ ipsa verba Sacramenti, sed aut Decalogum, aut Symbolum Apostolorum, aut sententiam aliquam sacram, vel Psalmum, non esset verum corpus, & sanguis Christi.* Similia habet in 3. homil. de Baptismo, habita anno M. D. XL.

Licet autem retractauerit Lutherus errorem suum, tamen Ioannes Brentius magis probasse videtur priorem Lutheri sententiam. Siquidem in Catechismo suo, cap. de Baptismo, non multum curat præscriptam formam Baptismi à Christo; vt etiam Zvvinglius in libro de vera, & falsa religione, cap. de Baptismo. de qua re dicemus etiam lib. 2. de Sacramentis, cap. 3. Et sanè prior Lutheri sententia, vt manifestè repugnat veritati, ita magis conuenit principiis Lutheranæ Theologiæ, quàm posterior. Si enim Sacramenta idèd potissimùm instituta sunt, vt fidem excitent, & sustentent; nihil interest, quibus verbis, aut rebus vtamur, modò illis fides excitari, ac sustentari possit. Igitur tum ad hunc errorem destruendum, tum ad rem ipsam declarandam statuam aliquot propositiones.

PRIMA propositio: *Res certa, & determinata ab ipso Deo in Sacramentis esse debent.* Hæc propositio quantum ad Sacramenta nouæ legis, nec ab hæreticis negatur, & apud Catholicos certissima est. Sed aliter ab illis, aliter à nobis probatur. Illi probant ex generali suo principio, quod nullus cultus Deo placeat, nisi quem ipse instituit: cetera ad εθελοθρησκείαν, & traditiones hominum pertineant. Quod argumentum infirmum est, vt nos alibi sæpe ostēdimus. Catholici probant ex alio principio. Quia Sacramenta nouæ legis sunt causa gratiæ, & iustificationis. 1. Corinth. 6. *Ablusi estis, sancti-*

110 *Cap. XXI. De Sacram. in genere. Lib. I.*

sanctificati estis. Ephes. 5. Mundans eam lanacro aqua in Verbo Vita. At nemo potest gratiam dare nisi Deus; solus igitur potuit Deus ea determinare, quæ ad essentiam Sacramentorum pertinent.

De Sacramentis legis Mosaicæ, & legis naturæ nonnulli dubitare videntur: tamen si verè Sacramenta erant, ut reuera erant, omninò sentiendum est, fuisse à Deo determinatas res eorum Sacramentorum. Nam IN PRIMIS de facto constat, omnia ferè Sacramenta, quæ ad notitiam nostram venerunt, à Deo fuisse determinata. Nam Circumcisio Sacramentum fuit legis naturæ, & constat ab ipso Deo determinatum, quid, quomodo, & quo tempore faciendum esset, Genes. 17. Agnus Paschalis Sacramentum erat legis scriptæ, & à Deo determinatum eum ritum nouimus, ex cap. 12. Exod. Idem de multis aliis probare possemus. DEINDE; Sacramenta vetera erant figuræ, ac typi Sacramentorum nostrorum. At determinare certas res, quæ infallibiliter significant aliquid futurum, non potest conuenire nisi Deo; qui certò nouit illas res futuras. DENIQUE; Etiam si Sacramenta vetera non efficiebant gratiam iustificantem, tamen efficiebant legalem munditiam, & introducebant in populum Dei: at nemo potest determinare aliquid ad legalem munditiam efficiendam, aut ad introducendum in certam Rem publicam, nisi qui auctor est illius legis, & Reipublicæ.

Est autem hic NOTANDUM cum sancto Thoma, 3. parte quæst. 60. art. 5. ad 3. in omni lege fuisse materiam Sacramenti determinatam à Deo, sed non semper eodem modo. Nam in lege naturæ, quia lex non scribebatur in tabulis, nec promulgabatur per homines, aut Angelos, sed dictabatur interiùs, atque inspirabatur cordibus hominum: ita quoque; & Sacramenta inspirabantur præcipuis Patriarchis, ut Adæ, Noë, Abraham, qui alios deinde docebant. Quia verò lex Mosaica promulgata est per Moysen, & publicè scripta in tabulis: ita etiam Sacramenta illius temporis, à Deo per Moysen tradita, & literis mandata etiam fuerunt. Denique, quia legis nouæ auctor est Verbum incarnatum, idè etiam ab ipso Sacramenta nostra determinata fuerunt.

SECUNDA propositio: *Non solum res, sed etiam Verba in Sacramentis nouæ legis à Deo determinata sunt, & non liceat quidquam immutare.* Hæc propositio explicanda est, ut rectè intel-

intelligatur. Notandum est igitur PRIMO, sex modis contingere posse formæ variationem; nimirum per additionem alicuius vocis; deductionem alicuius vocis; mutationē, ut si una ponatur loco alterius; corruptionem alicuius vocis, detrahendo, vel mutando aliquam syllabam; transpositionem, id est, ordinis dictionum variationem; denique per interruptionem, ut pronunciando unam partem formæ, ac deinde quiescendo per aliquod spatium, vel loquendo aliquid impertinens, & tum demum perficiendo formæ pronunciationem.

SECUNDO notandum est, duplicem esse Sacramentalis formæ integritatem; unam substantialem; alteram accidentalem. Substantialis consistit in solo sensu, seu significatione verborum, non autem in sono vel numero syllabarum. Quare utcumque varientur verba, addendo, detrahendo, mutando; transponendo, corrumendo, interrumpendo, semper manet integritas substantialis, dum manet idem sensus: & contra minima etiam variatio destruit integritatem substantialem, si pereat sensus; ut si quis una sola litera mutata dicat; Ego te baptizo in nomine Matris, & Filij, & Spiritus sancti, non habet substantialem formam. Accidentalis integritas consistit in ceteris omnibus, id est, in integro sono, ordine, & numero syllabarum.

TERTIO nota, iudicium de his mutationibus, sintne substantiales, an accidentales, non debere esse mathematicum, sed morale, ita ut tunc iudicandum sit, sensum verborum conservari, quando audientes intelligunt, & iudicant illud significari, quod per integra verba significari solet, etiam si alioqui verba pronuntientur valde corrupte. Exemplo esse potest, id quod refert Zacharias Pontifex in epistola ad Bonifacium, & habetur etiam apud Gratianum, can. Retulerunt, de consecrat. distinct. 4. Quidam enim ex nimia imperitia lingue Latine baptizabant his verbis; Ego te baptizo in nomine Patria, & Filia, & Spiritua sancta. Quæ verba si proprie accipiantur, non significant Patrem, & Filium, & Spiritum sanctum, & præsertim si seorsim pronunciarentur: iudicavit tamen summus Pontifex prudentissime, substantiam formæ non esse mutatam, quia facile poterat intelligi, quid ille vellet dicere, tum ex ipsa actione baptizandi, tum etiam ex conjunctione cum verbo in nomine; Non enim ait: In nomine Patriæ, & Filiæ, quod ratio Grammaticæ exigebat, si is de industria formam

formam mutare voluisset; sed, in nomine Patria, & Filia: quæ cum ex se nihil significant, signum est illum voluisse dicere, quod alij dicunt, cum aiunt; In nomine Patris, & Filij, &c.

Pari ratione iudicandum est de interruptione: Si enim quis diceret in consecranda Eucharistia: *Hoc est cor*, ac deinde recitaret vnum Psalmum, vel quiesceret ad spatium notabile, & tum demum adderet, *pus meum*, sine dubio iudicio prudentium non censeretur dixisse: *Hoc est corpus meum*. Si verò ubi dixit: *Hoc est cor*, pateretur breuem aliquam euagationem mentis, & non nihil etiam interquiesceret, antequam adderet, *pus meum*, non censeretur sensus formæ perire.

Notandum est QVARTO, non esse licitum, vt in Conclusionem dicimus, vlllo modo verborum formam immutare, siue per eam immutationem tollatur substantialis formæ integritas, siue solùm accidentalis. Sed hoc interest, quod cum forma mutatur substantialiter, Sacramentum non perficitur; & idè ea integritas dicitur necessaria, necessitate Sacramenti; cum autem mutatur solùm accidentaliter, Sacramentum perficitur; sed peccat qui ita mutat: & idè dicitur hæc integritas necessaria solùm necessitate præcepti.

Nota QUINTO, ex parte formæ verborum nunquam Sacramentum irritum reddi, nisi reuera desit integritas substantialis. tamen aliunde posse contingere, vt cum sola corruptione accidentali non perficiatur Sacramentum, nimirum si is qui accidentaliter mutat formam, velit introducere nouum ritum, vt docet Zacharias, can. Retulerunt, de consecrat. dist. 4. & post eum S. Thomas, 3. par. q. 60. art. 7. ad 3. & artic. 8. in corpore articuli. Quorum auctorum verba non rectè ab omnibus explicantur.

Idè ANIMADVERTENDVM est, vtum is, qui intendit introducere nouum ritum, intendat introducere nouum essentialè ritum respectu totius Ecclesiæ Christi, in vniuersum, id est, qui non fuerit antea in ipsa vera, & vniuersali Ecclesia; an intendat nouum ritum introducere respectu alicuius Ecclesiæ, quam ipse putat falsam.

Si intendit introducere nouum absolutè, tunc non perficitur Sacramentum, non quia desit forma, sed quia deest intentio. Conuincitur enim ille non velle facere, quod facit vera Ecclesia, quando quidem vult introducere ritum, qui nunquam fuit in Ecclesia vniuersali, & vera. Et hoc est, quod docet

S. Thomas

S. Thomas locis citatis : semper enim reddit rationem cur non perficiat Sacramentum, qui intēdit introducere nouum ritum, quia non habet intentionem Ecclesiæ.

Si verò intendit introducere nouum ritum, non absolutè, sed solùm respectu alicuius Ecclesiæ, quam ipse putat falsam, & interim intendat facere quod facit vera Ecclesia; tunc perficitur Sacramentum, etiam si ipse fallatur in vera Ecclesia internoscenda. Vt exempli causa, si Græcus aliquis dum baptizat illis verbis; Baptizetur seruus Christi in nomine Patris, & Filij, & Spiritus sancti, intendat introducere ritum substantialem, & necessarium contra ritum Romanæ Ecclesiæ, ita vt velit persuadere, non perfici Sacramentum, si quis dicat; Ego te baptizo in nomine Patris, & Filij, & Spiritus sancti, & tamen intendat facere, quod facit Ecclesia vera, quæcunque illa sit; is verè baptizabit, non obstante ipsius errore. Nam in eo Baptismo inuenitur forma substantialis, & intentio veræ Ecclesiæ in genere, quæ omnium consensu sufficit: error enim illius circa Sacramentum, aut Ecclesiam, non irritat Sacramentum, vt omnes Catholici docent, qui docent Sacramenta ab hæreticis tradita esse valida. Non enim tenetur minister Sacramenti intendere id facere, quod facit Ecclesia Romana: alioqui nullus hæreticus verè baptizaret; sed solùm id quod facit Ecclesia Christi vera, in qua tamen intētionē virtualiter includitur, vt intendat id, quod Romana Ecclesia intendit, quia illa sola est vera Ecclesia.

Itaque quod Paludanus ait in 4. dist. 3. q. 1. art. 3. non semper irritari Sacramentum, cùm quis intendit introducere nouum ritum, est verum, sed non contra S. Thomam, vt ille fortasse putauit. Immo S. Thomas idèd non dixit; Cùm quis vult inducere nouum ritum, non perficitur Sacramentum, sed, nō videtur perfici Sacramentum, quia nimirum posset fieri, vt perficeretur Sacramentum, sed præsumitur non perfici, quia præsumitur non adesse intentionem debitam.

Quod verò Dominicus à Soto ait, q. 1. art. 8. Græcos verè baptizare illis verbis; Baptizetur seruus Christi, &c. quia Ecclesia Romana tolerat eum ritū; sed si Ecclesia Romana eum ritum detestaretur, tunc fore vt ipsi non verè baptizarent; non est verum absolutè. Nam si Ecclesia Romana eum ritum detestaretur, vt corruptionem formæ accidentalem, illi peccarent quidem, sed tamen verè baptizarent: si verò Ecclesia Ro-

mana eum ritum detestaretur, vt corruptionem substantialem, tunc illi non verè baptizarent, sed caussa non esset, vt Sotus dicit, quia deesset intentio, sed quia deesset forma substantialis.

His ita explicatis, probatur nostra propositio aduersus Lutheri & Brentij temeritatem. PRIMO. Sacramenta à Deo sunt instituta, vt aduersarij concedunt; ergo pars Sacramenti præcipua, nimirum forma verborum à Deo instituta est; ergo quicam mutat, peccat contra Deum, & sæpe non perficit Sacramentum, nimirum cùm substantialiter mutat. Si em̃ Sacramentum à Dei institutione pender, certè non erit Sacramentum, cùm non facimus, quod ipse instituit.

SECUNDO. Mutare Sacramentorum materiam, graue sacrilegium esset, nec perficeretur Sacramentum, vt aduersarij concedunt; cur igitur non sit eadem ratio de forma, quæ in verbis consistit?

TERTIO. Addere ad verba Scripturæ, vel ea mutare nullo pacto licet: igitur nec verba Sacramentorum mutari vllò modo debent, aut possunt; præsertim cùm verba Scripturæ solùm ad significandum, verba Sacramentorum ad significandum, & sanctificandum instituta sint.

QUARTO. Idem probatur testimoniis Patrum. IRENAEVS lib. I. cap. 18. reprehendit hæreticos quosdam, quòd mutarent formam verborum à Christo præscriptam in Sacramento Baptismi. TERTULLIANVS in libro de Baptismo: *Lex, inquit, tingendi imposita est, & forma præscripta; Ite, inquit, ad omnes gentes tingentes eos in nomine Patris, & Filij, & Spiritus sancti.* CYPRIANVS in epist. ad Iubaianum idem habet. Item ATHANASIUS serm. 3. contra Arianos. BASILIUS homil. in sanctum Baptisma, & ceteri, qui scribunt aduersus Arianos, hoc argumento probant trium personarum diuinitatem, quòd iussi simus in Baptismo tres personas exprimere. Item Basiliius libro de Spiritu sancto, cap. 12. dicit, cum à gratia excidere, qui detrahit, aut addit ad verba præscripta in Sacramento Baptismi. DIDYMVVS in lib. 2. de Spiritu sancto: *Qui vnum, inquit, de præceptis nominibus pratermittit, neque perfectionem Sacramenti attingit, nec à peccatis hominem liberat.* AVGVSTINVS lib. 6. contra Donatistas, cap. 25. *Certa sunt, inquit, Verba Evangelica, sine quibus non potest consecrari Baptismus.* DAMASCENVS lib. 4. de fide, cap. 16. *Qua*
forma

forma Verborum in Baptismo adhibenda sit, Dominus exposuit, dicens; Baptizantes eos, &c. Accedat Concilium ARLATENSE I. can. 8. quod examinari iubet, qua forma verborum Ariani baptizent.

CAPVT XXII.

De fine, & necessitate Sacramentorum.

RIA explicanda erunt circa finalem causam Sacramentorum. PRIMVM, de ipso fine dicendum erit. SECUNDO, de necessitate, quæ ex fine cognoscitur. TERTIO, defendenda est sententia Ecclesiæ contra mendacia, & calumnias hæreticorum. Quod ad primum attinet, duo queri possunt, cum queritur quis finis sit Sacramentorum. PRIMVM, ad quem finem assequendū Deus instituerit Sacramenta. SECUNDO, cur ad eum finem assequendum talia media instituerit, cum potuerit per alia media, & etiam sine vllis mediis ad eum finem peruenire.

Prior quæstio iam explicata est in disputatione de definitione Sacramenti: iam enim ostendimus, Sacramenta instituta esse ad iustificandos homines, atque ut sint signa, & causæ instrumentales gratiæ Dei.

Posterior quæstio facilis est, nec de ea vlla est controuersia. Et quidem auctores multas rationes colligunt, tum ex parte Dei, tum ex parte hominis, tum ex parte Sacramentorum ipsorum, cur vtile fuerit Sacramenta, id est, sensibilia signa instituire ad iustificandos homines. Sed hæ sunt præcipuæ causæ.

PRIMA, quia id congruit naturæ humanæ, quæ ex corpore, & spiritu constat. Sic enim ait S. CHRYSOSTOMVS homil. 60. ad populum, & 83. in Matthæum: *Si incorporeus esses, nuda, & incorporea tibi dedisset dona, sed quoniam anima corpori inserta est in sensibilibus intelligibilia tibi præbet.* Similia docent Gregorius Nazianzenus, & Gregorius Nyssenus in sermone de Baptismo.

SECUNDA, ut clariùs appareret, gratiam, quæ datur per Sacramenta, à solo Deo esse. Si enim daretur per actiones aliquas spirituales, suspicari potuissent homines, vi propria illius actionis homines iustificari: nunc autem cum per res corporales, & abiectas detur tam excellens donum, nullus relinquitur

116 *Cap. XXII. De Sacram. in genere. Lib. I.*

locus eiusmodi suspicionis. Qua etiam de causa Dominus Ioan. 9. cæcum illuminauit sputo, & luto, non aliquo precio-
so vnguento : & mundum sibi subiicere voluit per homines
pauperes, & obscuros.

TERTIA, vt simule essent instrumenta iustificationis, & si-
gna, quibus discernentur fideles ab infidelibus, & quibus
colligeretur populus Dei, & quibus etiam, vt sacris cæremoniis
coleretur Deus. Nec enim poterant esse signa ad discernendos
alios ab aliis, neque etiam cæremoniæ religionis, nisi essent
externa, & sensibilia. Vide multas eiusmodi rationes apud
Hugonem, lib. 1. de Sacramentis, part. 9. cap. 3. & Magistrum,
ac Doctores, lib. 4. sentent. dist. 1. & S. Thomam, lib. 4. contra
Gentes, cap. 56. & ex recentioribus Gulielmum Alanum, lib. de
Sacramentis in genere, cap. 24.

Quantum ad **SECUNDVM**, de necessitate, duplex est
necessitas. **VNA** dicitur necessitas præcepti. **ALTERA** necessi-
tas medij. Et quanquam interdum hæ duæ necessitates con-
iunctæ sint; nam hoc ipso quod aliquid est medium ad salutem
necessarium, simul etiam est præceptum naturale: tamen hoc
interest, quod cum quis ex ignorãtia inuincibili, aut alia iusta
de causa non implet præceptum, is nihil detrimenti accipit:
at si quis non accipiat medium necessarium, is magnum de-
trimentum capit, quia non assequitur finem, licet ex ignoran-
tia inuincibili id ei accadat. Verbi gratia, Sacramentum Con-
firmationis est præceptum, sed non medium ad salutem sim-
pliciter necessarium, idè qui negligit accipere eiusmodi Sa-
cramentum, peccat, sed si ex legitima causa non accipiat, nec
peccat, nec impeditur à salute. Quia verò Baptismus in re, vel
in voto est præceptum, & medium, idè qui non baptizatur;
aut certè non desiderat Baptismum, nõ saluatur, licet ex igno-
rantia, vel impotentia id accadat.

Rursus necessitas medij; **AVT** est necessitas simpliciter, quo-
modo alæ necessariae sunt ad volandum; **AVT** ad bene esse,
quomodo equus necessarius est ad iter faciendum. Denique
utraque necessitas; **AVT** est absoluta, & naturalis, vt in exem-
plis positis; **AVT** ex institutione, & arbitrato alterius: quo-
modo in ludis attingere metam, est medium necessarium ad
brauium; **AVT** est partim ex institutione, partim ex naturali
congruentia, vt cum Imperator cõcedit militibus urbem ali-
quam

quam diripiendam, si eam vi ceperint. Ex his facillè poterit intelligi, quæ sit necessitas Sacramentorum.

Sit igitur PRIMA propositio: *Nulla Sacramenta habet absolutam necessitatem, sed omnis eorum necessitas pendet ex præcepto, & institutione diuina, adiuncta naturali congruentia.* Certum est enim potuisse Deum sine vllis Sacramentis homines iustificare. neque de hoc vlla controuersia est.

SECUNDA propositio: *Omnia Sacramenta necessaria sunt necessitate præcepti, licet non singulis.* De hac propositione non est controuersia cum hæreticis.

TERTIA propositio: *Baptismus, & Pœnitentia necessaria sunt, posita institutione diuina, necessitate medij simpliciter; Baptismus quidem omnibus, Pœnitentia iis, qui post Baptismum lathaliter delinquant.* In hac non conuenimus. Nam aduersarij fatentur quidem Sacramenta esse necessaria, quia præcepta, & etiam necessaria vt media vtilia: non tamè agnoscunt vllum Sacramentum necessarium simpliciter vt medium. Et ratio est, quia cùm sola fides iustificet, Sacramenta solùm adhibentur, vt fidem excitent, aut nutriant. Atqui sine Sacramentis per solum verbum potest fides gigni, nutriri, augeri: non igitur sunt vlla Sacramenta simpliciter necessaria. Sed hæc controuersia tractanda est in disputatione de Baptismo, & Pœnitentia: nunc sufficient duo loca Scripturæ apertissima. Ioan. 3. *Nisi quis renatus fuerit ex aqua & Spiritu sancto, non potest intrare in regnum Dei.* Luc. 13. *Nisi Pœnitentiam habueritis, omnes similiter peribitis.*

QUARTA propositio: *Eucharistia, Confirmatio, & Extrema Vnctio necessaria sunt necessitate medij ad benè esse, posita diuina institutione.* In hac non conuenimus, quatenus numeramus Confirmationem, & Vnctionem inter Sacramenta: sed de hoc alibi. Quantum ad Eucharistiam, conuenimus, quod sit in præcepto; sed quod sit necessaria ad benè esse, vt medium, videmur conuenire, sed re ipsa non conuenimus. Nam dicunt quidem Calvinus in Antidoto, & Kemnitius in Examine, Sacramenta esse necessaria, vt media à Christo instituta; sed inter explicandum ita extenuant hanc necessitatem, vt eam ferè tollant. Volunt enim Sacramenta solùm esse vtilia ad alendam fidem, quia repræsentant oculis id, quod verbum offert auribus. Vnde Apologia Confessionis, art. 13. comparat Sacramenta picturæ: sicut ergo picturæ non possunt

118 *Cap. XXII. De Sacram. in genere. Lib. I.*

sunt dici necessariæ ad salutem, nisi fortè hominibus valde rudibus; ita nec Sacramenta secundum ipsorum sententiam. Conatur Kemnitius loco citato refellere hanc similitudinem de pictura, & ostendere nescio quam maiorem necessitatem. Sed non potest negare similitudinem illam esse in Apologia, quam se in omnibus sequi profitetur. Et præterea alijs verbis idem dicit: nihil enim vult Sacramenta esse aliud, nisi ritus, in quibus visibiliter repræsentetur promissio, sicut audibiliter, vt sic loquar, repræsentatur in verbo. Itaque reuera non agnoscunt necessitatem, licet mentiantur se agnoscere, sed solum tenuem quandam vtilitatem Sacramentorum.

QVINTA propositio: Ordo necessarius est, non singulis hominibus, sed ipsi Ecclesia in vniuersum, necessitate medijs simpliciter, posita diuina institutione.

SEXTA propositio: Matrimonium necessarium est ad benè esse, non singulis hominibus, sed Ecclesia in vniuersum. De his non est controuersia. Vide sanctum Thomam, 3. parte quæst. 65. att. 4.

Quantum ad *TERTIVM*, refellenda sunt mendacia & calumniæ Caluini, & Kemnitij contra canonem IV. sess. 7. Concilij Tridentini, vbi de necessitate Sacramentorum agitur. Verba Concilij ita habent: *Si quis dixerit, Sacramenta noua legis non esse ad salutem necessaria, sed superflua, & sine eis, aut eorum voto per solam fidem homines a Deo gratiam iustificationis adipisci, licet omnia singulis necessaria non sint, anathema sit.* Quo canone Concilium tria definit. *PRIMO*, Sacramenta non esse superflua ad salutem, sed necessaria: id quod definitum est contra Anabaptistas, & Zvinglianos, qui (vt supra in disputatione de definitione vidimus) Sacramenta vtilia esse volebant ad discernendos fideles ab infidelibus, non autem ad salutem consequendam. Atque hanc partem definitionis libenter admittunt, & probat Caluinus, & Kemnitius. *SECUNDO*, Sacramenta quædam adedò esse necessaria, vt sine ipsis, vel eorum voto non possit salus contingere. Hoc autem est contra Lutheranos, & Calvinistas, qui soli fidei tribuunt eiusmodi necessitatem. *TERTIO*, non omnia Sacramenta esse singulis necessaria: id quod asseritur propter Ordinem, & Matrimonium. In qua parte definitionis illud solum reprehendunt, quod hæc inter Sacramenta numerus:

remus: sed de hoc alibi dicendum erit. Veniamus nunc ad mendacia,

Hunc canonem ita Caluinus calumniatur in Antidoto: *Hic boni Patres pro sua crassitie non animaduertunt, quidquid nobis gratia per Sacramenta confertur, nihilominus fidei imputandum. Qui enim à Sacramentis fidem separat, perinde facit, ac si animam à corpore tolleret. Ergo quemadmodum Evangelij doctrinam non excludimus, cum dicimus, nos sola fide Christi gratiam adipisci, ita nec Sacramenta; quorum eadem est ratio, cum Evangelij sint sigilla.* Hæc ille.

Quibus verbis reprehendit illam partem canonis, vbi Concilium damnat eos, qui dicunt, homines iustificari sola fide sine Sacramentis. Ideò autem reprehendit, quia putat à Concilio damnari sententiam Lutheranorum non intellectam. Nam etsi fatentur Lutherani solam fidem iustificare, & proinde Sacramenta non iustificare, eo modo, quo fides iustificat, tamen admittunt etiam Sacramenta alio modo iustificare: quomodo non negant, Deum iustificare, & Christi passionem iustificare, & concionem etiam suo quodam modo iustificare. Nam Deus iustificare dicitur, ex auctoritate peccata remittens, & in gratiam nos recipiens: Christus iustificare dicitur meritoriè, quia meruit nobis gratiam, & remissionem peccatorum; verbum, & Sacramentum iustificant instrumentaliter, quatenus excitant, vel nutriunt fidem, quæ iustificationem apprehendit: fides autem iustificat, quia immediatè veluti quædam spiritualis manus, iustificationem apprehendit; quo modo iustificandi fides comitem nullum habet. Itaque ineptè Concilium ex Caluini sententia colligit Lutheranos excludere Sacramenta à iustificatione, quia doceant solam fidem iustificare.

Similem calumniam habet Kemnirius, pag. 80. *Quod, inquit, præcipuè obseruandum est, necessitatem Sacramentorum opponunt iustificationi per solam fidem, atque ea, quæ ad salutem necessaria sunt, distinguenda sunt, Et Christus promittens, Pater donans, organa, seu instrumenta Verbi, & Sacramentorum, per quæ Spiritus sanctus beneficia illa noui Testamenti offert, applicat, obsignat, auget, & confirmat, in credentibus, & demum fides, quæ beneficia illa apprehendit, & accipit. Singula hæc suo modo, & in suo gradu ad salutem nostram ordinata sunt. Et sicut non sequitur, Sacramenta ad salutem sunt*

necessaria, ergo non solus Christus suo merito nobis eam acquisiuit: ita etiam non sequitur, Sacramenta ad salutem sunt necessaria, ergo non per solam fidem gratiam iustificationis accipimus. Hæc ille.

Atqui hæc est calumnia, & mendacium manifestum. Concilium enim rectè intellexit eorū sententiam, & id ipsum propriè damnavit, quod illi docent. Nam non damnavit eos Concilium, quòd excludant Sacramenta à iustificatione quouis modo, sed quòd excludant ab immediata acceptione, & applicatione iustificationis, quam ipsi soli fidei tribuunt. Fides enim Catholica non admittit sola fide immediatè apprehendi, & applicari hominibus gratiam iustificationis, sed vult ad id necessariò requiri etiam Sacramenta, aded vñ si fides in aliquo existat, quamvis maxima, non tamen iustificet, nisi adsit etiam Sacramētum in re, vel in voto; Immodò magis requiritur Sacramentum, quàm fides. Nam sine Sacramento in re, vel in voto nemo iustificatur, neque paruulus, neque adultus; sine fide autem aliqui iustificātur, vt paruuli, qui fidem propriam nullam habent, qua recipiant iustificationem, & tamen per Sacramentum fidei iustificantur.

Vnde etiam refellitur, quod ait Calvinus; quidquid nobis gratiæ per Sacramenta confertur, id fidei imputandum. Id enim falsum est. Gratia enim quæ per Sacramenta confertur, imputanda est virtuti ipsorum Sacramentorum, & Christi institutioni, non fidei: fides enim non tribuit vim Sacramentis, sed solùm disponit subiectum, vt suprà diximus.

Iam verò Martinus Kemnitius in 2. parte Examinis, pag. 79. & sequentibus, dicit in singulis dictionibus huius canonis latere insidias: detegit autem ipse quinque insidias: quæ tamen reuera non sunt latentes insidiæ Concilij, sed patentes calumniæ Kemnitij. PRIMÒ, sic ait: *Principio artificium cōpositionis in hoc canone considerādum est. In singulis enim ferme dictionibus peculiares latent insidia.* Et infrà: *Reliquos, inquit, ritus, vt Confirmationis, Extrema ōctionis, auricularis Confessionis, Satisfactionis, &c. volunt simpliciter esse Sacramenta ad salutem necessaria.]*

Hoc esse mendacium perspicuum est, tum ex eo, quod Cōcilium non addidit vocem illam (simpliciter) tum etiam quia communis sententia Theologorum, à qua Concilium nunquam recedit, solùm tria Sacramēta docet esse necessaria simpliciter;

pliciter; Baptismum omnibus; & Pœnitentiam omnibus, qui peccant post Baptismum; & Ordinem ipsi Ecclesiæ in vniuersum. Sine reliquis posse homines saluari, modò absit negligentia, & contemptus. Vide S. Thomam 3. par. quæst. 65. art. 4.

SECUNDO sic ait idem Kemnitius: *Neque enim quisquam sanus iustificationem per solam fidem ita vniquam intellexit, quasi à iustificatione excludatur gratia Dei, meritum Christi, & ministerium Verbi, & Sacramentorum.*

Hoc est alterum mendacium. Nam etiamsi Kemnitius, & Calvinus doceant, solam fidem non debere opponi Sacramentis in negotio iustificationis, sicut non opponitur gratiæ Dei, & merito Christi; tamen Lutherus, quem sanum fuisse Kemnitius nunquam negaret, multis in locis opposuit solam fidem Sacramentis, ac disertis verbis docuit, ita sola fide homines iustificari, vt nulla pars iustificationis ad Sacramenta pertineat. In lib. de captiuitate Babylonica, cap. de Baptismo: *Baptismus*, inquit, *neminem iustificat, nec vllis prodest, sed fides in Verbum promissionis.* Et in assert. 1. artic. *Nos dicimus*, inquit, *nec noui, nec Veteris Testamenti Sacramenta, sed solam fidem iustificasse.* Et in lib. contra Ioannem Cochlaeum: *Non potest*, inquit, *vlla pars iustificationis tribui Baptismo.* Hæc ille. Qui certè non dixisset, Gratia Dei, aut meritum Christi non iustificant, nec vllis profunt; & nulla pars iustificationis tribui potest gratiæ Dei, aut merito Christi. Lutherus igitur opposuit iustificationem per solam fidem Sacramentis, quam tamen non opposuisset gratiæ Dei, aut merito Christi. Sic etiam Philippus Melanchthon, quem insanum fuisse Kemnitius nunquam diceret, in locis editis, anno M. D. XXII. *Non iustificant*, inquit, *signa, & Apostolus ait, Circumcisio nihil est: ita Baptismus nihil est, participatio mensæ Domini nihil est.* Hæc ille. Sed, quæso, an dixisset Melanchthon, Gratia Dei nos iustificat, & gratia Dei nihil est? Igitur opponebant veteres Lutherani solam fidem Sacramentis, quam non opposuissent gratiæ, & merito Christi. Porro Concilium simul damnavit & has prophanas voces veterum Lutheranorum, & sententiam, quam sequuntur Calvinus, & Kemnitius, licet à verbis abstineant.

TERTIO, sic ait ibidem Kemnitius: *Neque necessitatem Sacramentorum eò tantum referunt, quòd sint causæ instrumentales, per quas à Deo nobis offeratur, & exhibeatur gratia*

iustificati onis, sed loquuntur de adipiscenda, seu accipienda gratia iustificationis. Et hoc nolunt soli fidei tribui, sed adiungunt necessitatem Sacramentorum: hoc est, intelligunt nostrum opus, quod in susceptione Sacramentorum facimus, ita ut fides non sola, sed & nà cum dignitate, seu merito illius nostri operis accipiat gratiam iustificationis.

Hic verò impudenter mentitur Kemnitius. Nullus enim Catholicorum iustificationem, quam in Sacramentis accipimus, tribuit dignitati, aut meritis operis nostri, sed institutioni diuinæ, & operi Christi. Nec enim Baptismus, aut alia Sacramenta sunt opera nostra, aut pendent ex nostra dignitate, aut merito: alioqui Sacramenta ab impiis collata non essent vtilia, cuius contrarium tum Catholici, tum etiam Lutherani defendunt contra Donatistas.

QUARTO addit Kemnitius: *Et propterea nominant Sacramenta noua legis, ut sit mutua relatio legis, & nostrorum operum in ipso etiam Sacramentorum & su.*

Hic etiam leuiter calumniatur. Non enim per legem intelligit Concilium præceptum, quo opus imperatur, sed Testamentum nouum; idem enim significant Sacramentum nouæ legis, & Sacramentum à Christo institutum, qui est auctor noui Testamenti, seu legis.

QUINTO adiungit ineptissimè: *Ideo etiam eorum nominant, hoc est, pollicitationem certi operis ad accipiendam iustificationis gratiam.*

Quis non miretur imperitiâ, vel impudentiam huius censoris? Nam vel ignorauit, votum in verbis Concilij non pollicitationem, sed desiderium significare; vel de industria cauillari voluit. Certè Concilium, cum ait, Sacramenta esse necessaria, vel eorum votum, per votum voluntatem accepit. Nam vt S. Augustinus lib. 4. contra Donatistas, cap. 23. docet, sine Baptismo, latro saluatus est, quia non eius accipiendi voluntas defuit, sed non accipiendi necessitas adfuit. Atque hæc de nugis Kemnitianis, & de caussa finali Sacramentorum.

CAPVT XXIII.

Auctorem Sacramentorum solum esse Christum.



DE CAUSSA efficiente Sacramentorum, quatuor sunt controuersia; quot sunt etiam canones de hac re in Concilio Tridentino, sess. 7. Vt autem hæc fa-

lius

cilius intelligantur, obseruandum est triplicem causam efficientem in Sacramentis à Theologis considerari. VNAM principalem, & omninò independentem, in qua dicunt esse potestatem auctoritatis. ALTERAM instrumentalem, sed instrumenti coniuncti, in qua dicunt esse potestatem excellentiæ. TERTIAM instrumentalem, sed instrumenti separati, in qua dicunt esse potestatem ministerialem.

PRIMA causa omnium consensu est Deus; ipse enim solus ex auctoritate gratiam dare potest, & proinde Sacramenta instituere, quæ gratiam efficiunt, aut etiam infallibiliter significant. SECUNDA causa est Christus ut homo; Christi enim humanitas est instrumentum coniunctum diuinitati hypostaticè, & idèd Christo ut homini tribuitur quædam potestas ministerialis quidem, quia deriuata est à diuinitate, tamen excellentiæ potestas dicitur, quia soli Christo conuenit. TERTIA causa est quilibet alius minister Sacramentorum. De 1. causa nulla est quæstio, de 2. vna controuersia est, de 3. tres.

PRIMA igitur quæstio est; An auctor Sacramentorum nouæ legis sit solus Christus. Aduersarij duo quædam docent. Primò, Sacramenta quæ sola ipsi vera Sacramenta putant, à solo Christo esse instituta, nimirum Baptismum, & Eucharistiam; cetera non à Christo instituta. Ita docent Caluinus in Antidoto Concilij, sels. 7. can. 1. & Kemnitius in 2. par. Examinis, pag. 13. Citat autem Kemnitius Cyprianum, in sermone de ablutione pedum; item Hugonem, lib. 2. de Sacramentis, par. 15. cap. 2. & Petrum Lombardum, lib. 4. dist. 23. qui negant omnia Sacramenta à Christo instituta fuisse. Poterat addere Alexandrum Alensem, qui 4. part. quæst. 24. membro 1. dicit, Sacramentum Confirmationis post mortem Apostolorum institutum esse ab Ecclesia in Concilio Meldensi. Idem sentire videtur S. Bonauentura, in 4. distinct. 7. art. 1. quæst. 1. Præterea idem Alexander, quæst. 59. membro 3. & Bonauentura, dist. 17. art. 1. quæst. 3. & Marsilius in 4. quæst. 14. dicunt, Sacramentum Pœnitentiæ non fuisse à Christo institutum, sed ab Apostolis.

Aduersus errorem hunc posuit Concilium Tridentinum, sels. 7. can. 1. qui talis est: *Si quis dixerit, Sacramenta nouæ legis, non esse omnia à IESU Christo Domino nostro instituta, anathema sit.* Qui canon non debet ita intelligi, quasi Concilium velit Sacramenta instituta esse à Christo immediatè, vel mediatè,

mediatè; sed solùm immediatè: nam alioqui Concilium frustra canonem istum posuisset, cùm nemo vnquam dubitauerit, quin saltem mediatè Sacramenta à Deo sint instituta. Præterea idem Concilium, sess. 14. can. 1. agens de Sacramento Vnctionis extremæ, seipsum explicat, cùm ait; Sacramentum illud ab ipso Christo institutum fuisse, sed à B. Iacobo Apostolo promulgatum. Denique, si tantùm mediatè Christus Sacramenta instituisset, idem dici posset de Sacramentis, & de aliis omnibus cæremoniis Ecclesiasticis: omnes enim sunt à Christo mediatè institutæ, quia nimirum dedit Ecclesiæ potestatem instituendi, & inspirauit, vt institueret, & astirit, ne erraret in instituendo; & tamen idem Concilium non eodem modo loquitur de Sacramentis, & de aliis cæremoniis. Nam sess. 21. cap. 2. dicit, Ecclesiam habere potestatem mutandi, & instituendi circa Sacramenta, salua tamen eorum substantia.

Hæc igitur verissima Concilij sententia confirmari potest his rationibus. PRIMO, in Scripturis Apostoli non vocantur nisi dispensatores, & ministri mysteriorum Dei, vt 1. Cor. 4. *Sic nos existimet homo, & ministros Christi, & dispensatores mysteriorum Dei.* Nō igitur instituerunt ipsi, sed solùm promulgarunt, & ministrarunt Sacramenta à Christo instituta.

SECUNDO, Sacramēta legis veteris à Deo immediatè sunt instituta, à Moyse autem solùm promulgata, vt patet ex libris Exodi, & Leuitici, vbi semper cùm aliquid noui instituitur, legimus; Loquutus est Dominus ad Moysen; multò igitur magis par erat, vt Sacramenta nouæ legis præstantiora ab ipso Deo instituerentur.

TERTIO, id Patres affirmant. CYPRIANVS, siue quicunque est auctor, in sermone de ablutione pedum: *Ipse, inquit, summus Sacerdos sui est Sacramenti institutor, & auctor: in ceteris homines Spiritum sanctum habuere doctorem.* Vbi vides non Sacramenta (vt Kemnitius falsò citabat) sed quosdam alios ritus ab hominibus institutos, auctore Cypriano. AMBROSIVS lib. 4. de Sacramentis, cap. 4. *Auctor, inquit, Sacramentorum quis est, nisi Dominus IESVS?* AVGVSTINVS lib. 3. doct. Christ. cap. 9. dicit primò ipsum Dominum, deinde Apostolicam disciplinam tradidisse Ecclesiis Sacramenta. Idem in epist. 118. cap. 1. Sacramentorum auctorem Deum facit.

Ad testimonia verò, quæ allegat Kemnitius, RESPONDEMVS, Cyprianum contrarium habere, vt supra ostendimus.

Hugo-

Hugonem autem, & Lombardum per institutionem intelligere voluisse promulgationem; quomodo etiam lex vetus dicitur lex Moysis, cum tamen eam Moyses non instituerit propriè, sed tantum promulgauerit. Idem responderi potest ad eorum testimonia, qui dicunt, Sacramentum Pœnitentiæ ab Apostolis institutum. Nam iidem dicunt, Christum instituisse Absolutionem, & insinuasle Confessionem: quocirca non tam relinquunt Apostolis institutionem, quàm declarationem, licet ipsi eam vocent institutionem. Porro quod aiunt Alexander & Bonauenturà de Sacramento Confirmationis, defendi non potest. Constat enim testimonio Fabiani Papæ, Dionysij Arcopagitæ, Cypriani, Tertulliani, & aliorum veterum, Sacramentum Confirmationis fuisse diu ante Concilij Meldensis tempora. Vide Dionysium de Eccles. hierar. cap. de Baptismo, Tertullianum lib. de resurrectione carnis, Fabianum in epistola ad Orientales, Cyprianum lib. 2. epist. 1. & in sermone de Chrismate. Sed neque Concilium illud aliud statuit, nisi vt qui ad Sacramentum Confirmationis accedunt, ieiuni sint, vt patet ex Gratiano, canone, Vt Episcopi, de consecrat. dist. 5. nec enim aliud exstat ex hoc Concilio. De hac tota quæstione plura dicentur, cum de singulis Sacramentis agetur.

CAPVT XXIV.

Ministrum Sacramentorum ordinarium non esse quemlibet hominem etiam baptizatum.

ALTERA quæstio est de causa ministeriali in Sacramentis conficiendis, & ministrandis, quis propriè in Ecclesia sit minister Sacramentorum. Aduersarij multum inter se, & nobiscum in hac quæstione dissentiunt.

Martinus Lutherus duo dicit falsa, & inter se pugnantia. PRIMVM, omnes omninò esse ministros, non solum homines, sed etiam dæmones. Sicut enim ait in lib. de Missa priuata, & vnctione Sacerdotum, edito anno M. D. XXXIV. *Ego non dicam, quòd Papistæ dicunt, nullum Angelorum, ne Mariam quidem ipsam consecrare posse. Sed è contra dico, si diabolus ipse Veniret, & ego postea resciscerem diabolum sic irrepisse in officium pastoris Ecclesie, in specie hominis vocatum ad prædicandum.*

candum, & publicè in Ecclesia docuisse, baptizasse, celebrasse Missam, & absoluisse à peccatis, & tali munere functum esse iuxta institutionem Christi, tunc cogeremur fateri, Sacramenta idè non esse inefficacia, sed Verum Baptismum, Verum Evangelium, Veram Absolutionem, Verum Sacramentum corporis & sanguinis Christi nos accepisse. Hæc ille.

Probat autem, tum quia fides nostra, dignitas, & efficacia Sacramentorum, non nititur qualitate personæ; sed Christi verbo, & ordinatione. Siue igitur bona sit, siue mala, siue vncta, siue non vncta, siue vocata legitimè, siue non sic vocata, siue Satan, siue Angelus, idem efficit, modò seruet Christi ordinationem; tum etiam quia Iudas, qui erat membrum diaboli, non minus prædicabar, & baptizabar, quàm ceteri Apostoli. Cur igitur non possit diabolus, quod possunt membra eius?

ALTERVM quod Lutherus dicit, est, omnes & solos homines baptizatos habere potestatem omnia Sacramenta ministrandi: tametsi ad tollendam confusionem, non oporteat omnes uti hac potestate, sed tantum eos, qui legitimè sunt vocati, exceptis tribus casibus. PRIMÒ, quando quis est in loco priuato, ut domi suæ. SECUNDO, quando nemo alius adest, & necessitas urget. TERTIO, quando alius adest, sed non tam benè ministrat, ut ego facerem, iuxta illud, 1. Cor. 14. *Si alteri reuelatum fuerit, prior taceat.*

Hanc esse eius sententiam patet ex sequentibus. In libro de captiuit. Babylon. cap. de Ordine: *Esto, inquit, certus, & sese agnoscat quicumque se Christianum esse cognouerit, omnes nos aequaliter esse Sacerdotes, hoc est, eandem in verbo, & Sacramento quocumq; habere potestatem; Verum non licere quenquã hac ipsa & ti, nisi consensu communitatis, & el vocatione maioris. Et paulò antè: Quòd si cogerentur admittere, non omnes esse aequaliter Sacerdotes, quotquot baptizati sumus, sicut reuera sumus, &c.* Item in articulis à Leone X. damnatis, art. 13. *Vbi, inquit, non est Sacerdos, a què potest quilibet Christianus, etiam si mulier, aut puer esset.* Et in assertionione eiusdem articuli ratione reddens, ait: *Qui enim baptizatus est, Spiritum Christi habet; Vbi autem Spiritus Christi, ibi omnium potestas, & libertas.* Hæc ibi. Item in libro, quem edidit contra eandem bullam Leonis, anno XX. *Afferro, inquit, & amplector fiducia tota spiritus mei articulos per eam damnatos, asserendosque pronuncio omnibus Christianis, sub pena aeterna damnationis.*

nis. Et infrà in finelibri: His, inquit, scriptis testor, me omnia damnata per bullam istam execrabilem confiteri pro Catholicis dogmatibus. Et infrà: Vltimum quod habeo exponam, nempe hanc animam, & hunc sanguinem. Melius enim est me milles occidi, quàm vnam syllabam damnatorum articulorum renocare. Hæc ibi.

Vbi est obiter NOTANDUM, reuocasse postea Lutherum aliquos ex iisdem articulis, ac nominatim 36. de libero arbitrio, quem in assertionem primarium, & fundamentum totius doctrinæ suæ ipse appellat. Nam in art. isto 36. dicit, liberum arbitrium esse rem de solo titulo: & in assertionem explicat, id ita intelligendum esse, vt iuxta doctrinam VViclefi omnia de necessitate absoluta eueniant. Quod quidem apertissimè reuocauit in visitatione Saxonica, vbi docet, hominē esse liberi arbitrij in operibus civilibus, nec omnia necessariò euenire.

Ad hæc in lib. de abroganda Missa, edito anno XXI. ex proposito docet, & probat omnes Christianos habere eandem potestatem in verbo, & Sacramentis ministrandis: *Inuictis, inquit, Scripturis firmabimus legitimum illud, & vnicum Verbi ministerium esse commune omnibus Christianis, sicut & sacerdotium, & sacrificium.* Et infrà probat aliquot exemplis Scripturæ, licere etiam fœminis concionari. Item in libro ad Pragenfes, de instituendis ministris Ecclesiæ, quem edidit anno M. D. XXIII. *Sacerdos, inquit, in nouo præsertim Testamento non fit, sed nascitur, non ordinatur, sed creatur: nascitur autem in Baptismo, suntq; prorsus omnes Christiani Sacerdotes.* Et ibidem prolixè probat, omnes Christianos ex Baptismo habere, vt possint concionari, baptizare, consecrare, & absoluerè, ac ligare. Et de clauibus habet hæc verba: *Cessent, inquit, hominum mendacia. Claves sunt totius Ecclesiæ, & cuiuslibet membri eius, tam iure, quàm vsu, & omnibus modis.* Hæc ille. Infrà tamen monet, non licere vnicuiq; vti hoc iure, nisi in necessitate, sed expectandam esse vocationem, & electionem multitudinis.

Ex quibus duo corollaria deducit. VNVM, quòd publici ministri non differat à ceteris potestate, vel dignitate aliqua, sed solo vsu potestatis. ALTERVM, quod ex proximo sequitur, posse ministrum fieri laicum, vt ex laicis fiunt ministri. Porro argumenta eius infrà ponentur, cùm soluenda erunt. Hæc igitur est Lutheri sententia.

Ioannes Calvinus in altero extremo versatur. Nam non solum non concedit diabolum, aut fœminas, aut quoslibet Christianos posse concionari, & Sacramenta ministrare, sed ita seuerè defendit, solum quosdam legitimè vocatos habere hanc potestatem, vt ne in necessitate quidem concedat laicis, ac præsertim fœminis, vt baptizent. Sic enim scribit in Antidoto ad can. 10. sels. 7. *Nemo sanus Christianos omnes in Verbi, Sacramentorumque administratione pares facit: non solum quia decenter, & ordine geri omnia in Ecclesia decet, sed etiam quod singulari Christi mandato ad eam rem ordinantur ministri.* Et infra: *Porro munus baptizandi, & bi mulierculis iniunctum reperient, quemadmodum illis permittunt?* Idem fusè docet in Institut. lib. 4. cap. 3. §. 10. & cap. 15. in fine. Itaque cum Caluino nulla nobis hoc loco controuersia est. Nam quod negat laicos, & fœminas non posse in necessitatis articulo baptizare, in disputatione de Baptismo refutandum erit.

Martinus Kemnitius more suo rem totam inuoluens, non satis aperit quid sentiat. Nam discutiens 10. can. sels. 7. Concilij Tridentini, qui sic habet: *Si quis dixerit, Christianos omnes, in Verbo, & omnibus Sacramentis administrandis habere potestatem, anathema sit.* Tria dicit. Quæritur PRIMVM, canonem esse positum ad damnandam Lutheri sententiam, sed mutilatam, & deprauatam: *Non enim Lutherus vnquam sentit,* inquit Kemnitius, pag. 138. *quemuis Christianum promiscuè sine legitima vocatione, vel posse vel debere sibi arrogare, vel & surpare ministerium Verbi, & administrationem Sacramentorum in Ecclesia.*

At debuisse distinguere Kemnitius potestatem ab executione. Nam si loquitur de sola executione, verum est, Lutherum non sensisse, posse vel debere quemuis sibi arrogare hoc ministerium sine legitima vocatione. Sed neq; Concilium id in Luthero damnauit; id enim omnes fatemur esse verum. Si verò loquitur de potestate, falsum est Lutherum non ita sensisse: vt loca à nobis prolata demonstrant. Atque id est, quod damnauit Concilium. Neque potest dici Lutheri sententia à Concilio mutilata, vel deprauata. Non enim Conciliū debuit totum librum Lutheri describere, aut referre ea, quæ ab illo benè scripta sunt: sed satis fuit ea referre, quæ dānanda erant.

DEINDE addit Kemnitius, Concilium fraudulenter loqui: *Obliquè,* inquit, pag. 140. *& quasi aliud agentes hoc axioma pe-*

ma petunt; Neminem, etiam si legitime iuxta præscriptum Verbi Dei ab Ecclesia electus, & vocatus sit, nisi ab Episcopo aliquo vñctus, & rāsus sit, habere vllam potestatem in Verbi, & Sacramentorum administratione: & Sacramenta ab illis ministrata non esse vera, & efficacia. Has insidias Lector intelligat occultatas in hoc canone.]

Sed canon apertissimus est, & Kemnitius potiùs simplici eius intelligentiæ insidias tendit. Nam Concilium non dicit, non habere vllam potestatem in Sacramentis ministrandis eos, qui non sunt ab Episcopo vñcti & rasi. Nam Concilium non ignorabat, ad Sacramenta Baptismi, & Matrimonij non requiri necessariò ordinationem, sed dicit non habere potestatem in omnibus Sacramentis, vt reprober Lutheri sententiam, quæ in omnibus Sacramentis, etiam Eucharistiæ, & Pœnitentiæ tribuit laicis potestatem. Deinde Concilium non nominat vñctos, & rāsos; vñctio enim, & rasura cæremoniæ sunt accidentales, sine quibus essentia Ordinationis consistere potest. Itaq; Kemnitius insidias in suis verbis occultat.

TERTIO, dicit sententiam canonis, vt verba sonant, esse veram, sed tamen eam non rectè exponit: *Quod Verò, inquit, ad ipsam sententiam decimi huius canonis, sicut Verba posita sunt, attinet, planè & clarè respondeo. Si qui existimant, cuius Christiano promiscuè sine peculiari, & legitima vocatione permissam esse potestatem vsurpandi, & exercendi ministerium Verbi, & Sacramentorum in Ecclesia, eos iure, & merito damnari.*

At non rectè exponit Concilium Kemnitius. Non enim Concilium damnat eos, qui dicunt, licere vnicuique sine vocatione vsurpare ministerium; id enim nemo dicit, proinde non fuisset opus canone: sed damnat eos, qui dicunt, omnes Christianos habere potestatem, verbum, & Sacramenta omnia ministrandi, quod Lutherus dixit, & Kemnitius sentire videtur, licet apertè confiteri non audeat. Proponenda est igitur, & probanda Ecclesiæ doctrina, quæ duabus propositionibus comprehendi potest.

PRIMA propositio: *Minister Sacramentorum homo esse debet, non autem Angelus, siue bonus, siue malus.* Hæc est aduersus Lutherum, & communis apud Theologos.

Est tamen OBSERVANDUM, quod si fortè Angelus bonus Sacramentum aliquod ministraret, illud habendum esset ra-

tum, quia certum esset id factum esse diuina dispensatione extraordinaria. Quocirca refert Nicephorus lib. II. cap. 20. S. Amphilochem ab Angelis ordinatum Episcopum; idque ratum habitum ab Episcopis eius prouinciæ. At si Diabolus idem faceret, iterandum esset Sacramentum; quia Diabolus nec habet ex se potestatem, nec peculiari Dei dispensatione acciperet, sed sibi vsurparet, vt falleret.

Probatur hæc propositio. PRIMO; Ad essentiam Sacramentorum, vt requiritur verum, & naturale elementum, ita verum, & naturale verbum. Sed solus homo verè, & naturaliter loquitur: loqui enim est actio corporis viuientis per instrumentum linguæ, & palati; non igitur Angelus bonus, vel malus Sacramenta conficere potest. Nam vt rectè docet S. Thomas I. parte quæst. 51. art. 3. ad quartum, Angeli etiam per corpus assumptum, non possunt propriè loqui.

SECUNDO; Etiam si vera elementa, veraque verba Angeli adhibere possent, tamè non propterea illa verum Sacramentum efficerent. Nam Sacramentum est signum, & causa infallibilis gratiæ: non autem id habent elementa, & verba naturaliter, sed solum vt à Deo assumuntur vt instrumenta iustificationis. Ergo non sunt vera Sacramenta cum à quocunque adhibentur, sed cum adhibentur ab eo, cui Deus id committit: quomodo etiam verba, quibus miracula faciebant Christus, & Apostoli, non à quocunque prolata fuissent, eandem vim habuissent. Si enim quis dicat claudio: *Surge, & ambula*, nihil efficiet, nisi à Deo assumatur vt instrumentum ad miraculum faciendum: non igitur vera Sacramenta conficere potest, nisi qui à Deo habet auctoritatem. Sed Deus hanc auctoritatem solis hominibus dedit, non Angelis bonis, vel malis. Nam Matth. 28. hominibus dixit: *Euntes docere omnes Gentes, baptizantes eos in nomine Patris, &c.* Item Lucæ 22. solis hominibus dixit: *Hoc facite in meam commemorationem.* Ioan. 20. solis hominibus dixit: *Quorum remisseritis peccata, &c.* Ad hæc Ephes. 4. *Christus ascendens in altum captiuam duxit captiuitatem, dedit dona hominibus*; vbi per dona intelligit varia ministeria, quæ sunt in Ecclesia; nam antea dixerat: *Vnicuique nostrum data est gratia secundum mensuram donationis Christi, sicut scriptum est; Ascendens in altum, &c.* Et infra: *Et ipse dedit quosdam quidem Apostolos, alios Prophetas, alios Euangelistas, alios Pastores, & Doctores, &c.* Deniq;

Hebr. 5.

Hebr. 5. *Omnis Pontifex ex hominibus assumptus pro hominibus constituitur, &c.* Quare Chrysostomus lib. 3. de sacerdotio, apertè testatur, Angelis non esse concessum, quod est concessum hominibus, ut Sacramenta ministrent: & idem habet homil. 85. in Ioannem, prope finem.

TERTIO, confirmatur ex doctrina Lutheri. Nam ipse vult fundamentum potestatis in verbum, & Sacramenta, esse Baptismum, ut patet ex locis citatis: at hoc fundamento carent Angeli tum boni, tum mali. Item in homilia de Baptismo, & alibi docet, non sufficere verba, & elementa, sed requiri Dei mandatum; at Deus nusquam mandauit Angelis, ut Sacramenta conficerent; igitur, &c.

Neq; argumenta Lutheri pro Diabolo facta concludunt. Ad PRIMVM concedimus, Sacramentorum efficaciam non pendere à qualitate ministri quacunque. Non enim pendet à qualitate accidentali, ut est bonitas: tamen pendet à qualitate essentiali, sine qua non esset verus minister; talis autem in primis est, ut sit homo.

Ad SECVNDVM, fatemur Iudam, & membrum Diaboli fuisse, & vera Sacramenta ministrasse: negamus autem idem conuenire Diabolo. Nam Iudas non ut membrum Diaboli, sed ut minister Christi Sacramentum administrauit: fuit autem Iudas Christi minister, quia verus homo erat, & à Christo acceperat potestatem baptizandi, quorum neutrum Diabolo conuenit.

SECUNDA propositio: *Verus minister Sacramentorum (Baptismo & Matrimonio exceptis) non est quislibet homo etiam baptizatus, sed is solum, qui ritè in Ecclesia ordinatus est.*

NOTA, excipi Baptismum, quia propter summam eius Sacramenti necessitatè, semper Ecclesia intellexit, posse à quolibet homine conferri: de qua re dicemus in materia de Baptismo. Item excipi Matrimonium, quoniam cum Matrimonio consistat in contractu mutuo duorum, non poterat aliter fieri, quàm ut ipsi contrahentes essent ministri.

Probatur hæc propositio aduersus Lutheranos. PRIMO, ex Scripturis, quæ docent, in Ecclesia esse diuersa officia, nec omnia omnibus conuenire; ut Rom. 12. 1. Corinth. 12. & Ephel. 4. *Alios posuit Apostolos, alios Prophetas, &c.* Et nunquid omnes Apostoli, nunquid omnes Prophetæ? &c. Idem ergo dici potest de pastoribus, & doctoribus, qui ibidem nominantur.

Nec responderi potest hîc agi de usu, vt Lutherani dicunt, non de potestate. Nam certè Apostoli non habebant potestatem Apostolicam, antequam illam à Christo acciperent; non igitur acceperunt usum tantum, sed ipsam potestatem.

SECUNDO ex illo Hebr. 5. *Nemo assumit sibi honorem, nisi qui vocatur à Deo tanquam Aaron.* Non igitur omnes, qui sunt de populo Dei, sunt hoc ipso sacerdotes. Neq; potest hic locus intelligi de exercitio tantum: nam Aaron antequam vocaretur à Deo ad sacerdotium, non habebat, neque usum, neque potestatem. Præterea assumere honorem, non est exequi potestatem, sed accipere eam; quod etiam confirmatur ex sequentibus: *Sic & Christus nō semetipsum clarificauit, & Pontifex fieret.* Igitur assumere honorem est fieri Pontificem, non autem exercere Pontificatum.

TERTIO; Apostoli baptizati sunt & baptizabant ante Christi passionem. Nam quòd baptizarent, habetur Ioan. 4. quod baptizati fuerint, docet Augustinus in epist. 108. ad Seleucianum: nec est credibile eos à Christo iussos baptizare, antequam ipsi baptizarentur. At potestatem consecrandi Eucharistiam acceperunt postea Luc. 22. cùm audierunt: *Hoc facite in meam commemorationem.* Similiter & absoluendi potestatem acceperunt postea Ioan. 20. *Quorum remiseritis.* Non igitur acceperunt in Baptismo.

QUARTO; Si omnes Christiani acciperent in Baptismo hanc potestatem, idèd acciperent, quia tunc, vt ait Lutherus, vnguntur gratia Spiritus sancti, & proinde fiunt spirituales sacerdotes. At id falsum est: nam sequeretur eos, qui dum baptizantur, non recipiunt gratiam, & eos, qui postea eam perdunt, non verè conferre Sacramenta, quod tamen Lutherus rectè negat contra Anabaptistas. Nec potest responderi, sufficere characterem, nam Lutherani non agnoscunt vllum characterem.

QUINTO; Si omnes Christiani haberent hanc potestatem, nemo posset priuari usu eius, nisi in pœnam magni criminis: atqui apud Lutheranos multi priuantur usu huius potestatis sine vlla sua culpa. Neq; obstat quod illi obiiciunt de confusione, quæ nasceretur in Ecclesia, si omnes vterentur hac potestate. Nam possent per vices fungi hoc ministerio: aut certè non deberet posse repellì, qui vellet ministrare, quando pauci sunt ministri, etiamsi non esset vocatus à Magistratu. At ipsi repel-

repellunt non vocatos; ergo vel iniuriam eis faciunt, vel fateri debent, eos non habere potestatem.

S E X T O; In lege veteri, ubi erant Sacramenta imperfectiora, non tamen omnes poterant ea ministrare, sed soli sacerdotes. Nec valet solutio, si dicas, Christianos esse factos in Baptismo spirituales sacerdotes: nam etiam illi fiebant in Circumcisione spirituales sacerdotes, & poterant omnes offerre spirituales hostias. Immo quod dixit B. Petrus de omnibus Christianis: *Vos autem genus electum, regale sacerdotium*, 1. Petr. 2. idem antea dixerat Moyses de omnibus Israëlitis, Exod. 19. & tamen Ozias Rex, lepra punitus fuit, quia fungi voluit munere sacerdotali, 2. Paralip. 26.

C A P V T XXV.

Soluuntur argumenta Lutheri.

His ad argumenta Lutheri facile erit respondere. **A C P R I M V M** in libro de abroganda Missa proponit sex Scripturas, quibus probet omnes Christianos æquè esse sacerdotes. **P R I M A** est 1. Petr. 2. *Tanquam vivi lapides superadificamini in sacerdotium sanctum.* **S E C V N D A** ibidem: *Vos autem genus electum, regale sacerdotium.* **T E R T I A** ibidem: *Vt virtutes annuntietis eius qui vos vocavit de tenebris in admirabile lumen suum.* Vbi Christiani dicuntur ad hoc vocati, ut annuntient, id est, prædicent virtutem Christi: igitur omnes Christiani possunt ac debent prædicare, quod est præcipuum munus sacerdotis. **Q V A R T A** Apoc. 5. *Fecisti nos Deo nostro regnum, & sacerdotium.* **Q V I N T A** Apocal. 20. *Erunt sacerdotes Dei, & Christi eius.* **S E X T A** 2. Cor. 3. *Qui idoneos nos fecit ministros novi Testamenti.*

Addit **P R A E T E R E A** quædam loca, ut probet mulieres posse concionari, Ioël. 2. *Prophetabunt filij vestri, & filia.* Act. 21. *Erant Philippo quatuor filia virgines prophetantes.* Exod. 15. Maria prophetavit. Iudicum 4. Debora docuit Barach. 4. Reg. 22. Oda consilium dedit Regi Iosif. Luc. 1. Virgo Maria prophetavit. 1. Cor. 11. *Mulier velato capite oret, & prophetet.* Ex quo loco explicari putat alium eiusdem Apostoli 1. Cor. 14. *Mulieres in Ecclesia taceant.* Nam in priori loco loquitur absolute, in posteriori prohibet, ne loquantur mulieres viris presentibus, & loqui volentibus, & valentibus.

Rurſus in lib. de inſtituendis miniſtris ad Pragenſes, probat hoc ipſum dupliciter. PRIMO, hac ratione; Chriſtus eſt ſacerdos, Pſalm. 109. *Tu es ſacerdos in æternum.* Omnes Chriſtiani ſunt fratres Chriſti, Pſal. 21. Narrabo nomen tuum fratribus meis. Et Pſal. 44. Vnxit te Deus oleo lætitiæ præ confortibus tuis. Igitur omnes Chriſtiani ſunt ſacerdotes.

SECUNDO probat ex officiis ſacerdotum, quæ ſunt concionari, baptizare, cõſecrare, abſoluere, ſacrificare, orare pro aliis, & iudicare de doctrinis. Quod enim omnes poſſint concionari, probat tribus Scripturis. PRIMO ex illo 1. Petr. 2. *Vt videntes annuncietis.* SECUNDO ex illo 1. Cor. 11. *Quotiescunque manducabitis panem hunc, mortem Domini annuntiabitis.* Annunciare enim mortem Domini, prædicare eſt. TERTIO ex illo 1. Cor. 14. *Vnuſquiſq; veſtrum pſalmum habet, doctrinam habet, Apocalypſim habet, poteſtis omnes per ſingulos prophetare.* Propter quæ loca ita Lutherus triumphat: *Quare ſatis his locis robuſtiſſimè, & clariſſimè firmatum ſit, miniſterium Verbi potiſſimum in Eccleſia eſſe prorsus vnicum, & commune omnibus Chriſtianiſ, non modo iure, ſed etiam præcepto. Quare & ſacerdotium non niſi vnicum, & commune erit: Et nihil valeant aduerſus hac diuina fulmina, infiniti Patres, innumera Concilia, æterna conſuetudo, & vniuerſa mundi multitudo, quibus ſtipulis raſa larua nituntur ſacerdotium ſup̃ ſtabilire.* Hæc ille.

Quod omnes poſſint baptizare, probat ex uſu noſtrę Eccleſiæ, quæ concedit etiã mulierculis vt baptizent: & proinde vt miniſtrent verbum: nec enim Baptiſmus ſine verbo conſtat.

Quod omnes poſſint cõſecrare Euchariftiam, probat PRIMO, quia Luc. 22. Chriſtus in cœna omnibus dixit: *Hoc facite in meam commemorationem.* Item SECUNDO, quia Paulus 1. Cor. 11. totam Eccleſiam alloquitur, cùm ait: *Ego enim accepi à Domino, quod & tradidi vobis.* Denique TERTIO probat, quia maius eſt baptizare, & concionari, quàm cõſecrare. Nam ex concione, & Baptiſmo datur remiſſio peccatorum; ex cõſecratione nihil ſequitur, niſi ſtupor ſacerdotis ſuper ſua poteſtate, & dignitate.

Quod omnes poſſint abſoluere, probat ex illo Matth. 18. *Quæcunque alligaueritis ſuper terram, &c.*

Quod omnes poſſint ſacrificare, probat, quia nullum eſt ſacrificium in Eccleſia, niſi illud, quo iuxta Paulum Rom. 12.

Sacriſi-

Sacrificamus corpora nostra per mortificationem vitiorum. Id autem commune est omnibus.

Quòd omnes possint orare pro aliis, probat, quia oratio Dominica est communis; & in ea pro aliis etiam oratur.

Quòd omnes possint iudicare, & discernere dogmata, pbat dupliciter. PRIMO ex illis Scripturis, quæ iubent, vt fugiamus falsos Prophetas. Ioan. 10. *Oves mea Vocē meam audiunt, Vocē alienorum non audiunt.* Matr. 7. *Attendite à falsis Prophetis.*

SECUNDO ex illis verbis Pauli 1. Cor. 14. *Si sedenti revelatū fuerit, prior taceat.* Hic verò triūphat Lutherus, ac vult licere vni cuiq; iudicare Ecclesiam Romanā, licet ipsa sedeat, vt mater, & magistra Ecclesiarum. Hæc sunt argumenta ex lib. de instituendis ministris. Accedat VLTIMO argumentū, quod facit in assert. 13. art. *Qui, inquit, baptizatus est, spiritū Christi habet, Vbi autem spiritus Christi est, ibi omnium potestas, & libertas.*

RESPONSIO. Ad PRIMVM, SECVNDVM, QVARTVM, & QVINTVM locum respondeo, loca illa intelligi de sacerdotio spirituali, quo offerimus hostias spirituales, id est, opera bona, ac præcipuè laudes, & preces: quod quidem sacerdotium commune est omnibus piis hominibus. Sed præter hoc sacerdotium est aliud propriè dictum, quo offertur sacrificium propriè dictum, & ad cuius officium pertinet ministrare verbum, & Sacramenta populis.

Id ita esse patet, PRIMO ex ipsis locis. Nam 1. Petr. 2. habetur: *Offerentes spirituales hostias.* Addidit enim spirituales ad distinctionem hostiarum, quæ non spiritualiter, & mysticè, sed propriè sacrificantur. Sic etiam in cap. 5. & 20. Apocal. agitur de sacerdotio beatorum in cælo, quod certum est non esse nisi ad offerendas laudes.

SECUNDO idem probatur: quia verba B. Petri sumptā sunt ex cap. 19. Exodi, vbi illud idem dicitur de Hebræis, quod B. Petrus tribuit Christianis. At in Testamento veteri non erant omnes propriè dicti sacerdotes, sed solum filij, & posterij Aaron, & tamen erant omnes sacerdotes spirituales.

TERTIO: quia tam Petrus in epist. quam Ioannes in Apocalypsi coniungunt regnum cum sacerdotio. Sic igitur sunt omnes Christiani sacerdotes, quomodo sunt omnes Reges.

QVARTO: hæc loca solum intelliguntur de sanctis & piis Christianis, non de peccatoribus, qui non sunt gens sancta, vt eos Petrus vocat: at sacerdotiū, seu ministeriū externum con-

uenit etiam peccatoribus, ex sententia tum Catholicorum, tum Lutheranorum.

Ad TERTIVM locum: *Ut Virtutes annuncietis, &c.* Responsio. Non imperat S. Petrus, ut omnes Christiani publice prædicent verbum Dei, sed ut gratias agant Deo, eumq; laudent ob eius beneficia. Nam ut rectè exponit Beda, alludit Petrus ad Canticum Hebræorū (*Cantemus Domino gloriōse, etc.* Exod. 15.) quod cantauerunt liberati ex Ægypto post transitum maris rubri. Vult enim eodem modo Christianos liberatos de diabolica seruitute per aquas Baptismi cantare canticum actionis gratiarum, & assiduè laudare potentiam Redemptoris. Nec malè addit Oecumenius, velle etiā B. Petrum, ut omnes Christiani non tam verbis, quàm bonis operibus annuncient Dei virtutem, ita ut eorum vita sit quasi quædam concio gentilibus, iuxta illud Matth. 5. *Ut Videant opera Vestra bona, & glorificent Patrem, &c.* Quomodo etiam intelliguntur multa alia loca, ut Psalm. 18. *Cæli enarrant gloriam Dei, & opera manuum eius annunciat firmamentum.* 1. Tim. 2. *Sicut decet mulieres promittentes,* Græcè ἐπαγγελλομένης, annunciantes, pietatem per opera bona. Et infra: *Mulieri docere non permitto.* Vbi vides mulieribus imperari, ut annuncient pietatem; ac ne fortè Lutherana interpretatione deceptæ putarent sibi licere etiam concionari, addit: *Per opera bona, & Mulieri docere non permitto.*

Ad SEXTVM; *Idoneos nos fecit ministros, &c.* Responsio. Non loquitur de omnibus Christianis, sed de se tantum, & ceteris collegis suis Apostolis. Nam confert se cum Mose, qui minister fuit Testamenti veteris, ac dicit, illum ministrasse literas in lapidibus insculptas, se autem, & collegas suos ministrare spiritum, &c. At constat in Testamento veteri non fuisse omnes ministros, & promulgatores legis, sed solum Mosem. Præterea toto capite præcedenti loquitur de seipso, & similiter initio capituli 3. cum ait: *Incipimus iterum nosmetipsos commendare? aut egemus, sicut quidam commendati iis literis ad vos, aut ex vobis?*

Ad loca illa pro fœminis, RESPONDEO. Aliud est prophetare, id est, futura prædicere, aliud prophetare, id est, concionari, siue Scripturas interpretari. Primum non est propriè munus sacerdotis, seu præsulis Ecclesiastici, sed est gratia gratis data, quæ etiam laicis viris, & fœminis conuenire potest,

Certè

Certè Dauid, Helias, Helifæus, Ifaias, & alij permulti, sacerdotes non erant, & tamen prophetabant, & de hoc genere prophetandi intelliguntur ferè omnia loca allegata. Alterum genus est proprium sacerdotis, neque conuenit fœminis, quia fœminarum est subesse, non præesse. Et hanc rationem adfert B. Paulus, I. Corinth. 14. *Mulieres, taceant in Ecclesia, non enim permittitur eis loqui, sed subditas esse.* Nec tamen propterea prohibetur Deus, quin possit extraordinariè fœminis concedere, vt doceant viros, vt quondam contigit Deboræ, & ante annos ducentos S. Catharinæ Senensi. Sed hæc priuilegia non faciunt legem.

AD argumentum, ex eo quòd Christus est sacerdos, & omnes Christiani sunt fratres eius, RESPONDEO. Nihil concludit hoc argumentum. PRIMO, quia Christus non est sacerdos Aaronicus, sed secundum ordinem Melchisedech. In sacerdotio Aaronico id habebat locum, vt omnes fratres essent sacerdotes: at in sacerdotio secundum ordinem Melchisedech solus primogenitus erat sacerdos.

PRAETEREA etiam in sacerdotio Aaronico soli fratres naturales erant sacerdotes, non autem adoptiui: porrò Christiani sunt fratres Christi adoptiui non naturales.

DENIQUE, si omnia, quæ Christo cōueniunt, nobis etiam omnibus conuenirent, cur non omnes faceremus miracula, prædiceremus futura? &c.

AD argumentum ex PRIMO officio sacerdotis, RESPONDEO. Tria illa loca nihil probant. Nam illud I. Petr. 2. *Vt virtutes annuncietis*, intelligitur de laude priuata, non de concione, vt diximus. Illud I. Corinth. 11. *Mortem Domini annuntiabitis*, intelligitur de commemoratione passionis Dominicæ, quam facimus non concionando, sed sumendo Eucharistiam; alioqui deberent omnes, qui sumunt Eucharistiam, cōcionari, quod est impossibile. Illud I. Corinth. 14. *Potestis omnes prophetare, & omnes discant & omnes exhortentur*; nō intelligitur de omnibus Christianis, sed de omnibus, qui habebant ea dona, ait enim: *Vnusquisque vestrum psalmum habet, linguam habet, &c.* At certè non habebant omnes donū linguarum, cū idem Paulus dicat, I. Corint. 12. *Diuisiones gratiarum sunt, &c.* & *Nunquid omnes linguis loquuntur?* & hoc tempore nulli sunt, qui habeant eiusmodi donum. Vult ergo Paulus dicere; Vnusquisque vestrum, qui gloriamini ob

eiusmodi dona, utimini illis ordinatè, & ad ædificationem. Adde SECUNDO, quod non loquitur de concione publica, quæ est propria sacerdotum, sed de piis collationibus, & exhortationibus quibus utebantur, cum simul cõueniebant, ut paulò post dicam. Itaq; immeritò Lutherus ob hæc tria loca malè intellecta, cõtemnit infinitos Patres, innumera Concilia, æternâ consuetudinem, & vniuersam mundi multitudinẽ.

AD alterum ex SECUNDO officio, RESPONDEO. Mulieres apud nos baptizare in casu necessitatis, & ex permissione, non ex officio: quo modo etiam permittitur Iudæis, & Turcis ob summam eius Sacramenti necessitatem. Sicut ergo non sequitur, Turca potest baptizare, ergo potest omnia Sacramenta ministrare, vel, ergo est verus sacerdos; ita non sequitur, Fœmina potest baptizare, ergo potest omnia Sacramenta ministrare, vel, ergo est sacerdos. Neque est verum, neminem baptizare, quin concionetur. Verbum enim quod in Baptismo profertur, non est concionale, ut suprà demonstrauimus, sed consecratiuum.

AD argumentum ex TERTIO officio, RESPONDEO. Illud, *Hoc facite*, non est dictum omnibus; alioqui tenerentur fœminæ, & pueri consecrare Eucharistiam. Pari ratione illud: *Ego enim accepi à Domino, quod & tradidi vobis*; non significat omnibus traditam potestatem consecrandi, sed omnibus traditum, id est, dictum, explicatum, & declaratum, quod Dominus instituerat. Denique potentia consecrandi maior est, quàm baptizandi, sicut per Baptismum datur remissio peccatorum, ita & per Eucharistiam; Ioan. 6. *Qui manducat hunc panem, viuet in æternum*. Et præterea per consecrationem fit conuersio panis, etiamsi Lutherus nolit, quæ non fit per Baptismum.

AD argumentum ex QUARTO officio. Illa verba: *Quacunque alligaueritis super terram, &c.* intelliguntur dicta Ecclesiæ, de qua ibidem: *Dic Ecclesiæ, &c; Si Ecclesiam non audierit, &c.* Ut enim ostenderet Dominus non esse contemnendum Ecclesiæ iudicium, addidit illam promissionem: *Quacunque alligaueritis*. Porro Ecclesia ligat, & soluit, sed per suos præsules, non per quoscunque, sicut corpus loquitur, sed per linguam, non per manum; & vniuersitas determinat propositiones, sed per Doctores, nõ per Scholasticos. Id autem ostendit apertissimè praxis Ecclesiæ omnium ætatum.

AD argu-

AD argumentum ex QUINTO officio. Negamus non esse in Ecclesia aliud sacrificium, quàm mortificationis vitiorum. Nam ad hoc sacrificium non requiritur altare: est autem in Ecclesia altare, vt patet ad Hebræ. 13. *Habemus altare, de quo edere non habent potestatem, qui tabernaculo deseruiunt.* Sed de hoc alibi.

AD argumentum ex SEXTO officio, RESPONDEO. Non est sacerdotis orare quomodocunque, sed orare publicè, & tanquam publicam personam intercedere pro vniuerso populo, vt Chrysostomus docet, lib. 6. de sacerdotio.

AD argumentum ex SEPTIMO officio, RESPONDEO. Illa loca: *Oues mea Vocem meam audiunt; non audiunt Vocem alienorum, & Attendite à falsis Prophetis;* docent, debere omnes homines iudicare de dogmatibus, non quidem examinando illa ad regulam Scripturæ, vt hæretici; si enim id omnes facere possent, non esset opus pastoribus, & doctoribus in Ecclesia; sed examinando illa ad doctrinam antea traditam, & ad doctrinam aliorum pastorum. Facile enim possunt omnes iudicare, an doctrina sit noua, & tunc eam suspectam habere debent. Præterea Dominus alienos, & falsos Prophetas non vocat ordinarios pastores, sed extraordinarios, qui per se veniunt, vt venerunt omnes hæretici.

Illud autem: *Si sedenti reuelatum fuerit, prior taceat,* in quo Lutherus triumphat: non intelligitur nisi in collationibus quibusdam, de quibus eo loco Paulus agit, non de publicæ cõctione Pastoris, & multò minus de publico iudicio Concilij, aut summi Põtificis. Id quod patet PRIMO, vsu Ecclesiæ. Nunquam enim est auditum, vt dum sit publica concio, permissum sit alicui alteri loqui, & multò minus permissum est vnquã priuatis hominibus reluctari iudicio totius Ecclesiæ.

SECUNDO, quia non tenemur credere vnicuique dicenti sibi esse reuelatum aliquid, præsertim in re graui, & maxime si illa reuelatio sit contraria doctrinæ ordinariorum Pastorum: alioqui pateret aditus omnibus hæresibus. Nullus est enim hæresiarcha, qui non iactet sua dogmata, vt verissimam Dei reuelationem.

TERTIO patet ex illis verbis Prophetæ: *Duo aut tres dicant, & ceteri diiudicent.* Non enim conueniret vt duo aut tres cõcionarentur, sed benè conueniebat, vt in collatione spiritali duo aut tres dicerent. Adde quòd Iustinus in 2. Apologia propè
extrema,

extrema, explicans morem primæ Ecclesiæ, distinguit concionem, quam soli Præposito tribuit, à collatione spirituali, quam ibidem post concionem, & Sacramenta inter se habere solitierant.

Ad illud argumentum postremum; Qui baptizatus est, habet spiritum Christi: vbi autē spiritus Christi est, ibi omnium potestas, & libertas. **RESPONDEO PRIMO;** Maior propositio non est vera vniuersaliter. Multi enim baptizantur, qui nō recipiunt spiritum Christi, quia sine fide aut pœnitentia baptizantur: multi recipiunt, qui postea amittūt, & tamen non amittunt Baptismum. **SECUNDO;** Minor etiam propositio falsa est. Nam plurimi habent spiritum Christi, qui tamen non habent omnium rerum potestatem, cū nec possint loqui variis linguis, neque futura prædicere, neque curare morbos, neq; excitare mortuos.

CAPVT XXVI.

*Non requiri fidem, aut probitatem ministri, vt
Sacramenta efficacia esse possint.*

SEQVITVR TERTIA quæstio de qualitatibus ministri Sacramentorum, vtrum requiratur necessariò fides, aut caritas, ita vt hæretici, infideles, schismatici, improbi Catholici non possint Sacramenta conferre. Non quærimus autem, an peccent Sacramenta conferendo: ista enim est quæstio propriè Scholastica; sed tantum an sit irritum, quidquid faciunt infideles, aut improbi homines, etiamsi alioqui legitimè ordinati sint Presbyteri, aut Episcopi, & nihil omittant eorum, quæ ad substantiam Sacramentorum pertinent.

Porro, cōtrouersia de hac re nulla, aut penè nulla hoc tempore esse videtur. Nam etsi Lutherus aliquoties dicat, spiritum Christi, qui recipitur in Baptismo esse fundamētum potestatis conferendorum Sacramentorum, ex quo sequitur, solos bonos, qui spiritum Christi habent, efficaciter Sacramenta conferre: tamen ipse idem postea docuit, ad eò non requiri fidem, aut probitatem ministri, vt etiam Diabolus efficaciter Sacramēta ministrare possit, vt suprà diximus. Confessio quoque Augustana, artic. 8. facietur Sacramenta esse efficacia, licet
ab hy-

ab hypocritis, & malis hominibus ministrantur. Quodidem habet Caluinus lib. 4. Instit. cap. 15. §. 16. Vnde in Antidoto Concilij Tridentini ad can. 12. sess. 7. vbi dicitur anathema iis, qui negant Sacramenta esse efficacia, si à malis ministrantur, nihil aliud scribit, nisi hanc vocem, *Amen*. Denique Kemnitius in 2. part. Examinis, pag. 155. affirmat canonem Concilij 12. si bi non displicere.

Tribui solet & Anabaptistis ea sententia, quòd Sacramenta non sint efficacia, nisi à probis, & fidelibus ministrètur. Sed mirum est, si Hussitæ ita sentiant, cùm ordinationes sacerdotum suorum à Romano Pontifice petere consueuerint, cùm tamen Romanum Pontificem, & omnes Episcopos Catholicos pro hæreticis haberent, & habeant. Et certè si Hussitæ ratas habent ordinationes eorum, quos hæreticos putant, multò facilius ratum haberent Baptismum ab eis collatum: Id patet ex libro Lutheri ad senatum Pragensè, vbi dehortatur Bohemos Hussitas, ne petant ordinationes à Romanis, cùm & ipsi Romanis, & Romani ipsis sint hæretici. Quod ergo Ioannes Hufs in articulis, qui damnantur in Concilio Constantiensi, sess. 14. dicit, Prælatum malum, aut præscitum esse æquiucòcè pastorem; & nullum esse Episcopum, dum est in peccato mortali: aut intelligitur solùm, quoad iurisdictionem; aut certè non sequuntur in hac parte Hussitæ Magistrum suum.

Anabaptistis tribuit hunc errorem Kemnitius locò citato, sed quia doctrina eorum est in multis occulta, & non publicè euulgata, non scimus quibus fundamentis nitantur. Quare satis erit hoc loco PRIMVM indicare qui fuerint olim errores de hac re. DEINDE à quibus Patribus, & quibus rationibus confutati. POSTREMO quomodo eorum obiectiones dissoluantur.

Quoad PRIMVM; Ante annos M. CCC. in Asia, & Africa cœpit error exoriri, non esse rata Sacramenta, quæ ab hæreticis, & schismaticis dabantur post separationem eorum ab unitate Catholica. De Asiaticis id refert Eusebius lib. 7. histor. cap. 6. ex epistola Dionysij Alexandrini. De Africanis constat tum ex eodem Eusebio lib. 7. cap. 2. tum ex Augustino lib. 2. de Baptismo, cap. 7. vbi etiam indicat primum auctorem huius erroris fuisse Agrippinum Episcopum Carthaginensem sancti Cypriani prædecessorem: Quod clarius testatur Vincen-
tius

tius Lyrinensis in commonitorio, vbi dicit Agrippinum primum omnium mortalium rebaptizandum censuisse.

Sequitur est prædecessorem suum S. Cyprianus cum multis Africæ Episcopis, sic tamen, vt non propterea se ab Ecclesiæ vnitatem separaret, vt patet ex epistolis ad Quintum, ad Pompeium, & ad Iubaianum. quocirca nunquam hæreticus habitus est. Nec desunt, qui asserunt, eum postea reuocasse sententiam, vt S. Augustinus testatur in epist. 48. ad Vincentium: quemadmodum etiam Episcopos ceteros, qui cum Cypriano eum errorem definierant, reuocasse sententiam suam, per motos auctoritate Stephani Romani Pontificis scribit S. Hieronymus in Dialogo contra Luciferianos.

Sequuti sunt paulò post hæretici Donatistæ, qui pertinaciter eundem errorem tenuerunt, & auxerunt. Nam IN PRIMIS, Agrippinus, & Cyprianus non habebant pro hæreticis, qui contrarium sentiebant: vnde nec rebaptizabant baptizatos à Catholicis etiam sibi in ea opinione contrariis. Donatistæ autem rebaptizabant etiam Catholicos, quos hæreticos putabant. Sic enim ait AUGUSTINVS in libro de vnico Baptismo, cap. 13. conferens Donatistas cum Agrippino, & Cypriano: *Rebaptizare hæreticos, quod illi fecisse dicuntur, tunc fuit humani erroris; rebaptizare autem Catholicos, quod adhuc isti faciunt, semper est diabolica presumptionis.*

SECUNDO, Donatistæ errorem defendebant post Ecclesiæ definitionem in Concilio generali, quod est hæreticorum proprium. Agrippinus, & Cyprianus non viderunt vllam absolutam Ecclesiæ definitionem, vt Augustinus testatur, lib. 2. de Baptismo, cap. 7. & 9.

TERTIO, Cyprianus tantum improbabat Sacramenta tradita ab hæreticis, & schismaticis, id est, ab iis, qui essent extra Ecclesiam; at non improbabat Sacramenta tradita à malis ministris intra ipsam Ecclesiam: vt Augustinus demonstrat, lib. 4. de Baptismo, cap. 2. & lib. 3. contra epistolam Parmeniani, cap. 2. At Donatistarum alij, omnes peccatores manifestos excludebant à Sacramentorum administratione, vt Augustinus testatur, lib. 2. contra epistolam Parmeniani, cap. 10. alij, omnes omninò homines malos, etiam occultos, vt idem Augustinus refert lib. 2. contra Cresconium, cap. 28.

Post Donatistas eundem errorem saltem ex parte docuerunt Luciferiani. Nam teste S. Hieronymo in Dialogo con-

tra Luciferianos, admittebant illi Baptisma collatum ab hæreticis, sed non Ordinationem: quanquam Hilarius quidam Diaconus, vt ibidem ait Hieronymus, ne Baptisma quidem admitteret.

Fuerunt deinde alij tempore S. Bernardi, qui dicebatur Apostolici, qui negabant homines malos posse efficaciter Sacramēta ministrare, vt ipse testatur serm. 66. in Cantica. Quod idem postea etiam docuerunt Albigeneses, vt refert S. Antoninus in summa Theologica, part. 4. tit. II. cap. 7. § 5.

Inter vtrosque autem exstiterunt VValdenses, qui bonis laicis concedebant ministeria Sacramentorum, atque illa eadem malis sacerdotibus detrahebant, teste S. Antonino, part. 4. tit. II. cap. 7. §. 2. Atque huc respexit, S. Thomas, lib. 4. contra Gētes, cap. 77. cū ait esse quendam errorem, quod omnes boni, & nulli mali possint esse idonei Sacramentorum ministri: quod idem omninò est cum eo, quod Lutherus initio dicebat, eos omnes, & solos esse sacerdotes, qui habēt Spiritum Christi.

Denique post hos omnes exstitit Ioannes VViclef, qui hanc hæresim non parū locupletauit. Nam non solum peccatores, siue occultos, siue manifestos, sed etiam bonos in præsentī, sed malos aliquando futuros, id est, præscitos, negant Sacramenta posse conficere. Vide de hoc errore Concilium Constantiense, sess. 8. & Thomam VValdensē, tomo 2. cap. 14.

Quantum ad SECVNDVM; Refutârunt hâc hæresim multi sancti ac veteres summi Pontifices: Ac primum in ipso eius exortu S. Stephanus Papa, & Martyr, vt refert Eusebius, lib. 7. hist. cap. 2. & sequentibus. Deinde Syricius in epist. 1. ad Himerium, Innocētiū I. in epist. 22. ad Macedoniæ Episcopos, Leo epist. 77. ad Nicetam, Anastasius II. in epistola ad Anastasium Imperatorem, & alij.

SECUNDO damnârunt eandem hæresim Concilia. PRIMO Concilium NICÆNVM generale. Id enim frequentissimè testatur S. Augustinus lib. 2. de Baptismo, cap. 3. 4. 5. 7. 9. & alibi, sed quia nunquā Augustinus vocat illud Concilium Nicænum, multi dubitant de quo Cōcilio loquatur. At nulla est causâ dubitandi; nam vocat Concilium plenariū orbis terræ. Nullum autem nouit Augustinus orbis terræ Concilium, nisi Nicænum. Nam quatuor tantum facta sunt Augustini tēpore Conci-

144 *Cap. XXVI. De Sacram. in genere. Lib. I.*

Concilia generalia, Nicænum, Sardicenfè, Constantinopolitanum I. & Ephesinum I. Sed ex his Ephesinum I. indictum fuit paulò ante mortem Augustini, & post mortem eius celebratum; ex epistola Africanorum ad Imperatorem Theodosium iuniorem. Concilium Constantinopolitanum de hac quæstione non tractavit.

Addè, quod Augustinus lib. 2. de Baptismo, cap. 9. testatur Concilium plenarium, in quo hæc veritas definita est, antè celebratum fuisse, quàm ipse nasceretur. Constat autem solum Nicænum celebratum esse ante Augustini natiuitatem. Nam Concilium Nicænum actum est anno CCC. XXVII. Augustinus natus est anno CCC. LVII. Concilium Constantinopolitanum actum est anno CCC. LXXXIII. Vide Chronicum Eusebij cum additione Prosperi. Concilium Sardicenfè nec de ista quæstione tractavit, nec notum fuit Augustino, vt ostendimus in disputatione de iure appellationis, & sexto Concilio Carthaginensi.

Præterea in Concilio Nicæno can. 19. iubentur Paulianistæ rebaptizari, ex quo apertè deducitur ceterorum hæreticorum Baptisma approbatum à Concilio fuisse.

Denique (quod vnum sufficere deberet) S. HIERONYMVS in Dialogo contra Luciferianos extremo, sic ait: *Synodus quoque Nicæna omnes hæreticos suscipit, exceptis Pauli Samosatæni discipulis.* Hæc ille. Vbi apertissimè dicit, à Synodo Nicæna approbatum Baptisma hæreticorum omnium (de hac enim re loquebatur) exceptis quibusdam, qui nimirum non utebantur forma legitima.

Non diu post damnauit eundem errorem Concilium Carthaginense I. can. 1. præsidente Grato Episcopo, temporibus Constantini Imperatoris, cuius Concilij meminit etiam sanctus Augustinus, libro 2. cap. 2. de Baptismo contra Donatistas. Item Arelatenfè I. can. 8. eodem tempore: ac diu postea Concilium Constantiense, sess. 8. & Tridentinum, sessione 7. can. 12.

TERTIO, refutârunt Doctores permulti, ac præcipuè Augustinus in omnibus libris contra Donatistas. Optatus in libris contra Parmenianum, Hieronymus in Dialogo contra Luciferianos, Nazianzenus in oratione de Baptismo. S. Thomas lib. 4. contra Gentes, cap. 77. & Thomas VValdensis to-

mo 2. ab initio per multa capita, vbi etiam multorum multa profert testimonia.

Porro argumenta præcipua quibus vtuntur tria sunt. PRIMO adferunt traditionem, & consuetudinem antiquissimam ab Apostolorum tempore. Hoc enim argumento præcipue vsum S. Stephanum Papam testatur S. Cyprianus in epistola ad Pompeium. Eodem argumento vtitur passim S. AUGUSTINVS lib. 2. de Baptismo, cap. 9. *Consuetudinis, inquit, robore tenebatur orbis terrarum, & hac sola opponebatur inducere volentibus nouitatem.* Vincentius autem Lyrinensis in commonitorio, dicit tantum valuisse apud Ecclesiam Catholicam hoc argumentum ductum à traditione, & consuetudine Ecclesiæ, vt hoc vno superata fuerit causa S. Cypriani, qui summa eloquentia, & frequentissimo sanctorum Episcoporum Concilio, & multis diuinæ Scripturæ testimoniis contra veritatem pugnabat.

Ex quo intelligimus Lutherum cum suis, contrarium spiritum habere ei, quem habuit vetus, & vera Christi Ecclesia. Lutherus enim propter vnum Scripturæ testimonium perperam intellectum, contemnit æternam cōsuetudinem, vt ipsemet loquitur in libro de abroganda Missa, & in libro de instituendis ministris ad Pragenses. At vetus Ecclesia ex consuetudine ducentorum, vel trecentorum annorum explicabat omnia testimonia, quæ Cyprianus cum suis adferebat, & merito: Nam cum certum sit, consuetudinē vniuersæ Ecclesiæ perpetuam non posse cum verbo Dei pugnare, & clarior sit consuetudo, quàm ipsum verbum; rectè iudicabant illi, ex consuetudine verbum Dei esse interpretandum, non ob verbum Dei obscurum & ambiguum, consuetudinem abolendam, vt Lutherani hoc tempore faciendum esse contendunt.

SECUNDO adferobant rationem in verbo Dei fundatam, quæ potest hoc syllogismo concludi. Minister Sacramentorum operatur virtute, & auctoritate diuina, Deus autem non aufert à ministro datam ei potestatem ob eius peccatum, aut infidelitatem, ergo, &c.

PROBATVR Maior; nam Scripturæ passim hoc docent. Ioan. 1. *Hic est qui baptizat in Spiritu sancto.* Præcipuus ergo auctor in Baptismo Christus est, non minister, vt fusè hinc deducit Augustinus, tract. 5. in Ioannem. 1. Corinth. 3. *Neque qui plantat est aliquid, neq, qui rigat, sed qui incrementum dat*

Deus. PRAETEREA si ministri sua virtute baptizarent, essent diuersa Baptismata, alia aliis meliora pro diuersitate meritum, & excellentiæ baptizantium. At vnum est Baptisma, ad Ephes. 4. ITEM Apostoli nunquam appellârunt Baptisma, suum, quem aliis conferebant, cùm tamen aliquando appellarent Euangelium suum, quod prædicabant, Roman. 16. & 2. Timoth. 2. *Iuxta Euangelium meum.* Ergo in Baptismo nihil suum agnoscebant, nisi nudum ministerium. DENIQUE æquum fuit, vt Sacramenta non penderent ab humana virtute, ne homines in hominibus confidere assuescerent, cùm scriptum sit: *Maledictus homo, qui confidit in homine.*

PROBATVR iam minor propositio. Nam auctoritas conferendi Sacramenta, non est gratia gratum faciens, sed grâti data: nõ ergo ita pugnat cum improbitate vitæ, vt simul cum ea esse non possit. Constat enim cuiusmodi gratias in peccatoribus esse posse, vt patet de Caipha, qui prophetauit, cùm tamen esset pessimus. Ioan. 11. item de illis, qui Matth. 7. dicunt: *Nõne in nomine tuo demonia eiecimus?* &c.

SECUNDO; Auctoritas conferendi Sacramenta, non datur in vtilitatem habentis, sed aliorum: igitur non erat conueniens, vt auferretur propter peccatum habentis; sic enim vnus puniretur ob culpam alterius.

TERTIO; Deus non aufert ob peccata potestatem iurisdictionis, vt patet 1. Petri 2. vbi iubet Apostolus, vt Christiani obediant dominis suis, non tantùm bonis, & modestis, sed etiã discolis: & ibidem iubet obedire Regibus, aliisq; Magistratibus Gentilium, qui infideles erant; igitur multò minus aufert potestatem ordinis. Nam si potestas auferretur ad puniendum eum, qui illã habet, magis deberet auferri potestas iurisdictionis, quàm ordinis; quia illa magis amatur, & proinde magis punitur, cui illa tollitur, & præterea magis dependet potestas iurisdictionis à probitate vitæ eius, in quo est, quàm potestas ordinis. Nam magis dominantur passionibus in imperando, quàm in Sacramentis ministrandis, vt patet experientia.

QUARTO; Non aufert Deus hominibus ob peccata naturales potentias ad opera naturalia, vt notum est: igitur nec auferre debet supernaturalem potestatem ad opera supernaturalia, in quibus non consistit meritum operantis. Nam non minus Deus prouidit bono totius Ecclesiæ, quàm bono mûdi huius.

QVINTO; Iudas peccator erat, & reprobus, & tamen baptizabat, ut colligit Augustinus tractat. 5. in Ioannem, ex illo Ioan. 4. *Ipse non baptizabat, sed discipuli eius.* Et quod efficaciter Iudas baptizauerit, docet idem Augustinus ex eo, quod non legimus rebaptizatos, quos ille baptizauerat.

TERTIUM argumentum sumitur à similibus rebus. Nam IN PRIMIS apud Iudæos circumcisi à Samaritanis, qui hæretici erant Hebræis, non circumcidebantur iterum, sed admittebantur, ut ritè circumcisi, ut Augustinus docet, lib. 1. contra Cresconium, cap. 31. DEINDE, verbū Dei efficaciter prædicatur ab improbis, ut colligit Augustinus, lib. 4. de Baptismo, cap. 11. ex Matth. 23. Quæ dicunt, facite, quæ faciunt, nolite facere. & Philip. 1. *Quidam ex contentione Christum annunciant non sincere, existimantes pressuram se suscitare singulis meis. Quid enim dum omni modo, siue per occasionem, siue per Veritatem Christus annuncietur, & in hoc gaudeo, sed & gaudebo.* PRAETEREA nihil refert ad efficaciam seminis, & plantationis, ut idem Augustinus ratiocinatur, lib. 3. in Cresconium, cap. 8. an lotis manibus, an sordidis id fiat, modo bonum sit semen, & terra fertilis, nec desit calor solis, & pluuia de cælo. Item ut Nazianzenus docet in oratione de Baptismo, non minus rectè imprimit imaginem Regis sigillum ferreum, quàm sigillum aureum. Item ut idem Augustinus docet, lib. 3. de Baptismo, cap. 10. lumen solis, vel etiam lampadum non inquinatur, etiamsi per lutum transeat, & loca cænosa. DENIQUE, ut idem habet Augustinus tract. 5. in Ioannem, parùm refert, utrum aqua ad areolas irrigandas per canalem lapideum, an per argenteum transeat.

Quoad TERTIUM; Argumenta hæreticorum refelluntur ab Augustino diligentissimè in libris septem contra Donatistas. Præcipua erant hæc. PRIMVM: Nemo dat, quod non habet. Hæretici, & impij non habent remissionem peccatorum; igitur non dant: quare non efficaciter Sacramenta ministrant.

RESPONDEO ad Minorem, hæreticos non habere remissionem peccatorum formaliter, tamè habere ministerialiter, quomodo famulus, qui sæpe nō habet unum obulum, tamen defert multos aureos à Domino suo ad alium aliquem. Et in rebus naturalibus, & artificialibus, effectus non debet esse similis instrumento, sed causæ principali. Non habet calor

formam substantialem ignis, nec habet dolabra formam cathedræ: & tamen eas efficiunt instrumentaliter.

Adde PRAETEREA distinguendum esse ipsum Sacramentum ab effectu ipsius; & inter effectus distinguendum esse characterem à gratia: hæc enim omnia separari possunt ab inuicem. Poterit igitur fieri, vt hæreticus baptizet, & characterē, ac gratiam conferat, vt si baptizet infantem. Item vt gratiam non conferat, quia is qui baptizatur ponit obicem infidelitatis credens hæretico: sed non idē inanis est Baptismus; nam efficit characterem. Item vt nec characterem, nec gratiam conferat, vt si det extremam unctionem ægroto hæretico: tamen adhuc etiam tunc verum Sacramentum, & Sacramentum efficax ministrat, licet in suscipiente nihil operetur ob eius indispositionem. Vbi NOTANDUM cum Augustino lib. 6. de Baptismo, cap. 1. hanc fuisse præcipuam causam erroris Cypriani, & aliorum, quia nō distinguebant inter Sacramenta, & eorum vsum, & effectum.

SECUNDUM argumentum contra solutionem præcedentis: Qui non habet Spiritum sanctum, non potest remittere peccata: dictum est enim Ioan. 20. *Accipite Spiritum sanctum, quorum remiseritis peccata, remittuntur eis.* At hæretici, & impij non habent Spiritum sanctum; ergo, &c.

RESPONDEO, negādo minorem. Siquidem per Spiritum sanctum eo loco intelligimus potestatem remittendi peccata, vt intelligunt Chrysostomus & Cyrillus in eum locum. Potest autem & potestas esse sine gratia gratum faciente. Quod autem nomine Spiritus sancti intelligi possint quælibet eius dona, licet non faciant hominem sanctum, patet ex 1. Cor. 12. *Vnicuiq; datur manifestatio spiritus ad utilitatem, alij datur per spiritum sermo sapientiæ, &c.* & 1. Corinth. 14. *Spiritus Prophetarum Prophetis subiecti sunt.* vbi spiritum vocat donum prophetandi à Spiritu sancto datum.

Possset etiam dici, voluisse Dominum significare illis verbis: *Accipite Spiritum sanctum, &c.* effectū Sacramentorum præcipuè pendere à virtute Spiritus sancti: proinde necessarium esse, vt saltem assistat Spiritus, & sic accipiatur saltem vt assistens, & operās in Sacramentis, licet non operetur in ipso ministro. Assistit autem Spiritus sanctus Sacramentis suis semper (vt Augustinus rectè docet, libro 3. de Baptismo, cap. 10.)

etiamsi

etiam si minister sit adulter, vel homicida; quia Sacramentum nunquam est adulterum.

Denique, quia non desunt qui hoc loco per Spiritum sanctum intelligat Spiritum, ut gratiam, & charitatem largitur, ac diffundit in cordibus nostris, ut Ambrosius serm. 10. in Psal. 118. & Augustinus in commentario, cap. 20. Ioannis: idè possumus addere, gratiam quidem Spiritus sancti dari per sacram Ordinationem cum potestate remittendi peccata; sed non inde colligi posse, cum, qui gratiam non habet, non posse peccata remittere. Non enim gratia illa idem est cum potestate remittendi peccata, neq; cum illa ita cõiuncta, ut separari nequeat: nam non datur, ut qui eam habet, possit peccata remittere, sed ut nò offendat Deum in tam sancto ministerio, si ipse inimicus Dei permanens alios Deo reconciliare præsumat.

TERTIUM argumentum: Sacramenta sunt solius Ecclesiæ Catholicæ, quam Christus condidit; at hæretici sunt extra Ecclesiam in synagoga Satanæ.

RESPONDEO; Sacramenta semper esse Ecclesiæ, etiam si interdum extra Ecclesiam reperiantur. Quocirca cum veniunt ad Ecclesiam baptizari ab hæreticis, agnoscendum est quod est Ecclesiæ, id est, Baptisma, & retinendum, corrigendus verò error. Alioqui etiam Euangelium, & alia multa bona, & vera repudianda essent, quæ interdum apud hæreticos inveniuntur.

Possent ULTIMO adferri quædam loca Patrum, ut ATHANASI serm. 3. contra Arianos, ubi dicit, omnes hæreticos habere inutilem aquam. Itè AMBROSII libro de iis, qui mysteriis inicianur, cap. 4. ubi dicit: *Non sanat Baptismus perfidorum.* Et LEONIS epist. 77. ad Nicetam, cap. ult. ubi dicit, nullum hæreticum posse dare per Sacramenta sanctificationem.

RESPONDEO; ATHANASIVS duo dicit. PRIMVM sic ait: *Ariani autem Veniunt in periculum, ne amittant integritatem mysterij, loquor autem de Baptismate.* SECUNDO absolute negat Baptismum Arianorum, aut aliorum hæreticorum mūdare: *Non enim, inquit, qui simpliciter ait, Domine, is est, qui donat legitimum Baptisma, sed qui nomen exprimit, & fidem rectam habet.* Priori loco agit de ipsa substantia Sacramenti, & idè non dicit, absolute Baptismum Arianorum non esse integrum, sed ait periculum esse, ne aliquando non sit integer, quia nimirum facile erat, ut corrumperent for-

mam, & nomine Patris, & Filij dicerent factorem, & facturam, vt ipse ibidem ait. Posteriori loco non agit de substantia, sed de vtilitate Sacramenti: & ideo absolute hæreticos, quia carent recta fide, non sanctificare eos, quos baptizant, quod intelligitur de illis, qui eis in hæresi consentiunt. Et eodem modo loquuntur Ambrosius, & Leo, & alij. Vnde nunquam dicunt isti Patres, Baptismum hæreticorum esse iterandum, quod certè dicerent, si de substantia loquerentur.

CAPVT XXVII.

Requiri intentionem faciendi quod Ecclesia facit.

RESTAT POSTREMA quæstio de causa ministeriali; Sitne intentio ministri necessaria ad Sacramenti perfectionem. Quatuor erunt partes huius quæstionis. PRIMO, explicanda erit sententia hæreticorum. SECUNDO, sententia Catholicorum simul explicanda, & vindicanda à mendacijs aduersariorum. TERTIO, confirmanda veritas. QUARTO, soluendæ obiectiones.

Quantum ad PRIMVM, noua hæresis nostro tempore exorta est, non requiri intentionem in ministro Sacramenti; sed Sacramentum omninò perfici, si res, & verba adsint, etiamsi minister ioco, aut irrisoriè, aut fictè, & mendaciter actionem illam peragat. Primus auctor videtur fuisse Lutherus. Sic enim scribit in libro de captiuitate Babylon. cap. de Baptismo: *Non dubitem, inquit, si quis in nomine Domini suscipiat, etià si impius minister non det in nomine Domini, Verè baptizatum esse in nomine Domini. Non enim in cõferentis tantum, quantum in suscipientis fide, vel cõsuta est virtus Baptismi, sicut legitur exemplum de quodam mmo per iocum baptizato.* Et in artic. 12. eorum, quos Leo Papa damnauit: *Si sacerdos, inquit, non seriò, sed ioco absolueret: si tamen credat se esse absolutum, Verissimè est absolutus.* Et in assertionem id ipsum confirmat: necnon in libro de Missa priuata, anno XXXIV. edito, idem probat tribus argumentis, quæ postea soluentur.

Ioannes Calvinus Lutherum sequutus in Antidoto Concilij Trident. sess. 7. can. 11. *Quod, inquit, de intentione cõse-*
crandi garriunt, à sophistis nulla probabili ratione fuit proditum.

rum. Et infra: Ego Serò sacrosancta Christi institutioni tantum defero, si si Epicureus quispiam, intus totam actionem subsannans, mihi cenam ex Christi mandato, & secundum regulam ab eo datam, rituq; legitimo administret, non dubitem panem, & calicem illius manū porrecta vera mihi esse corporis et sanguinis Christi pignora. Idem docet Tilmannus Heshusius in libro de sexcentis erroribus Pontificiorum, loco 15.

Idem etiam Martinus Kemnitius in 2. parte Examin. pag. 141. & sequentibus, vbi fusè de hac re tractat. Et quanquam pag. 146. docet, actionem Sacramentalem non debere esse mimicam subsannationem, aut ridiculum lusum, in quo videtur nobiscum conuenire: tamen intelligit hoc de exteriori actione tantum, non de intentione interna. Nam postea pag. 154. docet, Sacramentum esse verum, licet minister animo irrisorio Sacramentum administret: & tota disputatione id contendit, non pendere Sacramenti efficaciam vllò modo ab intentione ministri. Et infra pag. 1045. vbi agit de Absolutione: *Nec sollicita, inquit, esse debes conscientia de intentione ministri, sed si vox Euangelij annuncietur: fides eam apprehendens, statuat se coram Deo absolutum: quidquid sit de sacerdotis animo.*

Ad hanc hæreticorum sententiā proximè accessisse videtur Ambrosius Catharinus, qui in opusculo de intèntione ministri Sacramentorum, distinguit duplicem intèntionem; vnam, faciendi simpliciter actū externum, quem facit Ecclesia; alterā, faciendi actum externū non simpliciter, sed vt Sacramentalē, siue animo celebrandi mysterium, quod Christus instituit, & Ecclesia celebrat. Et quidē priorem intentionem ait requiri, posteriorem negat. Itaq; si quis dum puerum baptizat, intendat fundere aquā super puerum, & dicere; Ego te baptizo, secundum Catharinum erit verū Sacramentum, etiamsi ille intendat aquā fundere, & illa verba dicere solū ad lauandū corpus pueri à sordibus, vel ad ludendum eo modo. Quæ opinio non video quid differat à sententia Kemnitij, & aliorum hæreticorum, nisi quod Catharinus in fine opusculi subiicit se Apostolicæ sedi, & Concilio; illi autem rident vtrumque.

Quantum ad SECUNDVM, sententia Catholicorum est, requiri intentionem faciendi, quod facit Ecclesia. Ita em̃ expressè habent Concilium Tridentinum, sess. 7. can. 11. & Concilium Florentinum in instructione Armenorum.

Sunt autem hoc loco quædam notanda. PRIMÓ, non ita requiri, vt minister habeat intentionem generalem faciendi, quod facit Ecclesia, vt non possit habere particularem: immò melius est habere particularem, id est, conferendi Sacramentum Baptismi, Absolutionis, Confirmationis, cõsecrandi Eucharistiam, &c. Sed qui non nosset nostra mysteria, satis esset, si in generali intenderet facere, quod facit Ecclesia: & hoc docent Concilia.

SECUNDO, non est opus intendere, quod facit Ecclesia Romana, sed quod facit vera Ecclesia, quæcunq; illa sit, vel quod Christus instituit, vel quod faciunt Christiani: ista enim in idem recidunt.

PETES, quid si quis intendat facere, quod facit Ecclesia aliqua particularis, & falsa, vt Geneuensis, & intendat non facere, quod facit Ecclesia Romana? RESPONDEO, etiam id sufficere. Nam qui intendit facere, quod facit Ecclesia Geneuensis, intendit facere, quod facit Ecclesia vniuersalis. Idè enim ille intendit facere, quod facit talis Ecclesia, quia putat illam esse membrum Ecclesiæ veræ vniuersalis: licet fallatur in cognitione veræ Ecclesiæ. Non autem tollit efficaciam Sacramenti error ministri circa Ecclesiam, sed defectus intètionis.

TERTIO, non requiritur necessariò actualis intentio, nec sufficit habitualis, sed virtualis requiritur, & sufficit, quamuis danda sit opera, vt actualis habeatur. Actualis dicitur, quando minister actu habet talem intentionem: quæ quidè actualis intentio non requirit, vt quidam scrupulosi faciunt, vt dicamus ore aut corde illa formalia verba; Intendo hoc facere, aut volo hoc facere, sed tantùm requirit, vt homo sit præsens animo, & attentè faciat, quod facit. Ista enim dicitur intentio in actu exercito, vt loquitur Caictanus, & vt diximus, non necessariò exigitur; quia non est in nostra potestate, quin distrahatur aliquando nostra cogitatio, etiam dum res sanctissimas agimus. Habitualis dicitur inclinatio quædã, seu promptitudo ex habitu infuso, vel acquisito, qualis etiã in dormiente inesse potest: & hæc sine dubio non sufficit. Nam actus inde procedens, nõ est humanus, & deliberatus; alioqui baptizatus diceretur, si quis à dormiente, vel ebrio baptizatus esset. Virtualis dicitur cùm actualis intentio in præsentì non adest ob aliquam euagationem mētis, tamen paulò antè adfuit, & in virtute illius fit operatio: & hæc omnium consensu requiritur, si actualis

actualis non adfit, & fufficit. Neque repugnat huic doctrinæ S. Thomas, licet 3. par. quæst. 64. art. 8. dicat, fufficere habitua- lem intentionem. Nam (vt ipfe fe explicat) per habitua- lem intentionem; ipfe enim folùm meminit intentionis actualis, & habitualis. Scotus autem, & Gabriel, & alij pofteriores, maioris claritatis gratia fecerunt trimembrem diftinctionem, & virtualem appellarunt, quam S. Thomas vocat habitua- lem, & addiderunt aliam habitua- lem, quam S. Thomas omiffit.

ULTIMO notandum eft, in hac tota doctrina mirificè conuenire Catholicos doctores, vno Catharino excepto: Id quod patebit ex refutatione mendaciorum Tilmanni & Kemnitij.

PRIMO; Vterq; auctor locis notatis dicit, Concilium Tridentinum definiviffe, non effe ratum Sacramentum, nifi mi- nifter intendat non folùm actû, fed etiam finem Sacramenti, id eft, intendat illud, propter quod Sacramentum eft institu- tum: quod certè multum diftat à noftra fententia.

Sed hoc merum mendacium eft. Concilium enim in toto can. II. non nominat finem Sacramenti, neque dicit Conci- lium, vt illi videntur accepiffe, oportere miniftrum intendere id facere, quod Ecclefia intendit, fed quod Ecclefia facit. Por- rò, quod Ecclefia facit, non finem, fed actionem fignificat. Denique ex praxi id conftat. Nam neque vetus Ecclefia rebap- tizabat baptizatos paruulos à Pelagianis, neq; nos rebapti- zamus baptizatos à Zvvinglianis, & Caluiniftis, & tamen sci- mus omnes iftos baptizare fine intentione veri finis, qui eft tollere peccatum originale. Neque tamen volumus à Conci- lio definitum id quod vult Catharinus, & quod Kemnitius vellet, nimirum, vt folùm intendat minifter facere actum ex- ternum, quem Ecclefia facit: id enim non erat opus definire, cum à nemine vnquam negatum fuiffet, nec poffet negari. Deinde qui intendit facere externum actum, fed non ferid, is non intendit facere, quod facit Ecclefia, fed intendit fimala- re, quod facit Ecclefia. Quomodo milites illi, qui genu flexo, dicebant Chrifto: *Aue Rex Iudaorum*, verè intendebant fle- ctere genua, & dicere illa verba, tamen quia non ferid, fed io- co id faciebant, nemo diceret eos intendiffe facere, quod fa- ciunt qui adorant fuos Reges, fed intendiffe fimalare adora- tionem.

SECUNDO Kemnitius dicit, Scholafticos inter fe diffenti-

re, quod Magister Sententiarum, & Innocentius Papa IV. velint sufficere intentionem faciendi, quod Christus instituit. Alexander autem Alensis, & Gabriel velint requiri etiam intentionem finis Sacramenti.

Sed non verè dissentiunt Scholastici, si rectè intelligantur: omnes enim in 4. sent. dist. 6. docent id ipsum, quod Magister docet. Neq; excipiendi sunt Alexander & Gabriel. Nam Alexander in 4. p. summæ, q. 13. mem. 1. art. 2. dicit quidem requiri in ministro intentionem finis Sacramenti, sed per intentionē finis intelligit intentionem actionis integræ, & completæ, & sic idem dicit, quod alij dicunt, sed aliis verbis. Id ita esse, patet ex eodem loco, ubi duplicem finem distinguit; unum intrinsecum operi, qui nihil est aliud, nisi terminus, & complementū actionis; alterum extrinsecum, qui est fructus, & utilitas rei. Verbi gratia, in Sacramento, finis intrinsecus est completa cæremonia per res, & verba ritè coniuncta; finis extrinsecus est remissio peccatorum. Affirmat autem Alexander intentionem prioris finis necessariò requiri, non autem posterioris.

Porro Gabriel in 4. distinct. 6. quæst. 1. conclusione 3. dicit, requiri intentionem ministri, non solum respectu actus baptizandi, ut obiecti, sed etiam respectu effectus, ut finis. Accepit autem Gabriel hæc omnia à Scoto in 4. dist. 6. quæst. 5. Uterque autem, ut ipsi se explicant, intelligunt per actum, ut obiectum, ipsum actum externum, qualem etiam intendere posset, qui ioco baptizare vellet: quam intentionem etiam nos diximus non sufficere. Per effectum autem, ut finem, intelligunt finem quendam generalem, & remotum, non particularem, & proximum. Non enim volunt requiri, ut minister intendat effectum gratiæ, vel salutis, sed solum ut intendat id facere in baptizato, quod faciunt Christiani in iis, quos baptizant; sic enim Scotus explicat. Hoc autē nihil est aliud, quam dicere requiri intentionem respectu operis, non ut est opus quoddam naturale, & quod ioco fieri potest, sed ut est opus sacrum, seu ut est cæremonia, quam Christus instituit, siue qua Christiani utuntur. Atque ita recidit hæc sententia in id, quod omnes Catholici dicunt.

Quantum ad TERTIUM, probanda est sententia Ecclesię. PRIMA ratio; Sicut certa forma verborum requiritur necessariò, ut determinetur indifferentia materiæ; ita requiritur aliquid, quo determinetur indifferentia formæ. Nam illa

verba;

verba; Ego te baptizo, & similia, possunt habere varias significationes. Nam baptizare est tingere aquis; tingit autē aquis, qui lauat sordes corporis, qui refrigerat, qui lauando medetur, &c. At nihil fingi potest, quo determinetur hæc indifferentia formæ; nisi intentio ministri, qui illa verba profert, & cuius est tota actio; ergo, &c. Dicent fortasse determinari ab intentione suscipientis; at falsum est. Nam hîc agimus de actione ministri, non de actione suscipientis; non potest autem actio vnius determinari ab intentione alterius. Præterea quid fieret, cū baptizantur, qui nihil intendere possunt, vt infantes? Nam dicent determinari ab institutione Christi. Sed contrā; nam si Christi institutio id faceret vt illa verba id significarent, modò proferantur exterius, sine vllō ordine ad intentionem dicentis, quare non esset verum Sacramentum, si ea verba à p̄sbitaco proferrentur?

SECUNDA ratio sumitur ex genere ministerij. Nam ministri Sacramentorum sunt instrumenta Dei, sed instrumenta animata, & ratione vtentia. Vbi NOTANDVM est, multis modis posse vnum hominem esse instrumentum alicuius agentis.

PRIMO, secundum sola membra corporalia, vt si quis vtatur manu alterius ad aliquid capiendum, vel si cogat eum ferre onera, id quod potest fieri sine vlla eius voluntate.

SECUNDO, per membra corporalia, & potentias sentientes, vt si quis iubeat seruum legere aliquid, aut alicui aliquid significare, aut excubare, & respicere aliquid, & renuntiare quid videat: & ad hoc non requiritur voluntas serui, nisi qua velit actum exteriorem facere. Nam etiamsi non intendat legere significanter, tamen si velit ea verba proferre, satisfacit muneri suo: quia non vtitur Dominus pro instrumento, nisi eius lingua, & oculis, &c.

TERTIO, per membra corporalia, potentias sentientes, & etiam rationem; vt cū Rex constituit præfides, & iudices in vrbibus, qui nomine suo ius dicant, & gubernent populos: in huiusmodi enim non solū corpus, & sensus, sed etiam prudentia, & voluntas sunt instrumenta. Non enim Rex determinat actiones particulares, sed relinquit in arbitrio instrumenti. Quare in talibus requiritur necessariò non solū potestas, sed etiam voluntas, & proinde intentio exercendi actiones. Nec verè est absolutus, quem iudex absoluit sine intentione, licet exterius videatur absolutus. Ministros autem

Sacra-

Sacramentorum esse huius tertij generis, patet ex Scripturis. Nam Matthæi 24. dicitur: *Quis est fidelis seruus, & prudens, quem constituit Dominus super familiam suam?* vbi fidelitas, & prudentia indicant talem esse hunc seruum, vt in eius arbitrio sit facere, & non facere: ad hoc enim requiritur fidelitas, & prudentia. Præterea idèd vocantur præpositi; ad Rom. 12. *Qui præest in sollicitudine.* Et Hebr. 13. *Obedite præpositis.* Denique non determinauit Christus particulares actiones, sed ait: *Cui remiseritis peccata, remittuntur eis,* Ioan. 20. vbi manifestè relinquit in eorum arbitrio, vt soluant, vel ligent. Et hæc ratio planè conuincit. Nam cùm eiusmodi instrumenta potissimùm sint instrumèta per voluntatem, & intentionem; si hæc tollatur, desinunt esse instrumenta.

TERTIA ratio sumitur ex discrimine inter verba speculatiua, & practica. Nam verba speculatiua, quia totam efficaciam suam habent in significando, à quocunque dicantur; eandem vim habent: idem enim significant verba, siue dicantur ab homine sobrio, siue ab ebrio, siue etiam à psitaco, vel ab asina Balaam, modò non sit ambigua significatio, quia tunc, vt diximus, deberet determinari ex intentione dicentis. At verba practica, quæ præter significationem habent efficientiam, non sunt efficacia, nisi dicantur ab eo, qui habet potestatem, & voluntatem faciendi quod verba significant. Id patet inductione. Nam imperia Regum, & Iudicum sunt efficacia, non imperia priuatorum. Similiter qui habent donum miraculorum, efficaciter imperant morbis, & dæmonibus; non autem alij, etiam si iisdem verbis vtantur. Et ratio est, quia cùm verba per se, & naturaliter non sint operatiua, necesse est vt tunc solùm sint efficacia, cùm ab eo dicuntur, qui habet potestatem. Idem de voluntate probari potest, nam potestas nunquam exit in actum, nisi velit, qui eam habet. Quare de potestate prophetandi dicit Apostolus, 1. Cor. 14. *Spiritus Prophetarum Prophetis subiecti sunt.* Et idem patet experientia; nam si Rex sine intentione, vt somniando, iubeat aliquem occidi, imperium non solet mandari executioni, quia non constat, an velit, licet possit Rex illud iubere. Sed constat verba Sacramentorum esse verba practica, cùm sint instrumenta iustificationis; ergo requirunt potestatem, & voluntatem, ac proinde intentionem.

Si quis OBIICIAT, verba Sacramentorum habere in se virtutem

virtutem operatiuam ex Christi institutione; proinde non pendere eorum efficaciam ab intentione, vel potestate ministri.

RESPONDERI debet, duas esse Theologorum sententias. ALIQUI enim, vt Caietanus 3. par. quæst. 64. art. 1. & Sotus 4. dist. 1. quæst. 5. art. 1. & Ledesmius ibidem, volunt in ipso etiam ministro esse virtutem operatiuam efficienter, & instrumentaliter, vt est in Sacramento, & secundum hanc sententiam facilis est solutio. Nam in verbis Sacramentalibus est virtus operatiua, sed dependenter à ministro. Tunc enim solùm illa verba habent virtutem, dum coniunguntur cum virtute, quæ est in ministro.

ALII tamen sentiunt ministrum non habere in se vim ullam efficientem respectu iustificationis, sed eam solùm esse in Sacramento: ministrum autem solùm concurrere applicando Sacramenta; quomodo qui plantat, & qui rigat (quibus comparat Apostolus ministros Ecclesiæ, 1. Corint. 3.) non produciunt efficienter, & physicè fructus arborum, sed applicant agentia. Ita videtur quibusdam sentire S. Thomas 3. par. quæst. 64. art. 1. ad primum. Neq; inferri debet; Ergo ministri secundum hanc sententiam non verè, & propriè consecrant, absoluunt, lauant, reconciliant, &c. Nam hoc interest inter agentia voluntaria, & res ceteras, quòd res ceteræ non dicuntur, propriè agere, quando solùm applicant agentia: nō enim dicitur propriè felis incendisse domum, si ignem applicuit, sed dicitur domus illa casu combusta. At agentia voluntaria, quando de industria applicant agentia, dicuntur propriissimè agere. Nam & medicus propriè curat ægrotum, cum adhibet medicinam salutarem; & propriè illum occidit, cum de industria pro medicina porrigit venenum. Et secundum hanc sententiam respondendum est ad obiectionem positam, verba Sacramentalia non habere virtutem, & proinde non esse Sacramentalia, nisi quando mouentur à Deo vt instrumēta; non autem mouentur à Deo, vt instrumēta, nisi quando pronunciantur ab eo, cui ipse commisit. Quare semper aliquo modo pendent verba Sacramentalia à ministri potestate, & voluntate. Quamuis igitur prior sententiā probabilior videatur: tamen secundum vtramq; rectè soluitur argumentum.

QUARTA ratio ex absurdis, quæ alioqui sequerentur, vt bene notat Hugo de S. Victore, lib. 2. de Sacramentis, p. 6. c. 13.

Nam

158 Cap. XXVIII. De Sacram. in genere. Lib. I.

Nam PRIMO, si parens aliquis duceret filium ad balnea, & dum puerum immergit, more Christiano signaret eum cruce, & diceret; Lauo te in nomine Patris, & Filij, & Spiritus sancti, nimirum inuocans Deum, vt benecadat illa lotio, & nihil de Baptismo cogitans; tunc ille puer deberet dici baptizatus, si non requiritur intentio baptizandi, sed sufficiant materia, & forma quomodocunq; prolata. Hoc tamen planè ridiculum est.

SECUNDO, si Sacerdos in mensa legeret Euangelium, vt fieri solet in mensa Prælatorum, & religiosorum; & inter legendum pronunciaret illa verba: *Hoc est corpus meum*; Et: *Hic est sanguis meus*, iam totus panis, & totum vinum illius mensæ esset consecratum, si non requiritur intentio.

TERTIO, si cùm aliquis ancillam conducit, diceret; Accipio te in meam (intelligens, sed non exprimens ancillam) & illa diceret; Accipio te in meum (intelligens herum, sed non exprimens) iam illi essent coniugati.

CAPVT XXVIII.

Soluuntur argumenta.



VPEREST argumenta soluere. PRIMO Lutheri. SECUNDO Caluini. TERTIO Kemnitij. QUARTO Catharini.

PRIMUM argumentum Lutheri ex assertione art. 12. Verbum Dei, quacunque intentione dicatur, excitat fidem inaudiente. Sed fides est quæ iustificat; ergo verbum Sacramentale, quacunque intentione proferatur, efficax est, & confirmat. Quia Philipp. 1. Apostolus gaudet prædicari verbum quacunq; intentione, etiam si aliqui prædicarent, vt inuidiam Paulo conflarent, quia nimirum etiam eo modo poterat verbum esse fructuosum: igitur eodem modo verbum in Sacramentis, licet ioco prolatum, vtile erit.

SECUNDO confirmat idem Lutherus in lib. de Missa priuata, ex eo quod Alexander Episcopus Alexandrinus ratum habuisse legitur Baptismum, quem Athanasius puer aliis pueris per iocum contulerat. Item ex eo, quod legitur in aliis historiis de quibusdam Gentilibus parasitis, qui vnum ex suis baptizarunt, vt riderent Christianos, & ille tamen continuò conuersus est, vbi aqua eum attigit, ex quo intelligimus fuisse illum verum Baptismum.

RESPON-

RESPONDEO, PRIMVM argumentũ rectè probare apud eos, qui sentiunt cum Luthero Sacramenta tantũ esse instituta ad excitandam fidem, & solam fidem iustificare: at apud nos nihil concludit. Nam etiam si concedamus verbum quacunq; intentione prolatum, posse excitare fidem, non tamen concedimus verbum quacunq; intentione prolatum habere posse effectum Sacramentalem. Ratio discriminis est, quia ad excitandam fidem non requiritur vlla efficientia, sed sufficit significatio, vt notum est.

AD confirmationem dico, aliud esse intendere non concionari, aliud intendere concionari, sed ob malum finem. Paulus de hoc posteriore loquitur; & hoc modo concedimus Baptismum esse verum, & efficacem cùm minister intendit verè baptizare, licet ob malum finem. DICES etiam, qui intendit non concionari serid, si tamen verba concionis proferat, fructum facere poterit: Ergo, &c. RESPONDEO, non esse eandem rationem verbi concionalis, & Sacramentalis. Nam verba concionum sunt verba, vt sic dicam, speculatiua, quæ non pendent ab intentione; verba Sacramentalia sunt practica, quæ, vt probauimus, pendent ab intentione.

Quamuis autem argumenta hæc concludant in via Lutheri, tamen non esse rectam eam viam, patet ex istis iisdem argumentis. Nam concluditur sola verba sufficere sine aqua, vel alio elemento; item concludunt Sacramenta posse conferri ab ebrio, immò etiam à pica.

AD SECUNDAM confirmationem respondeo, duobus modis posse per iocum Sacramenta conferri (vt explicat Hugo lib. 2. de Sacramentis, par. 6. cap. 13.) VNO modo, vt qui ludunt, intendant verè Sacramenta conferre, sed ob finem recreandi animum eo modo: quomodo possent alij verè intendere Sacramenta conferre, sed ob finem lucrandæ pecuniæ. Et hic ludus non impedit veritatem Sacramenti, quia hic iocus est extrinsecus ipsi Sacramentali actioni. ALIO modo, vt qui ludunt, intendant non verè Sacramenta conferre, sed illudere, & decipere, quomodo, qui Christum purpura inducunt, eiq; dicebant: *Aue Rex Iudeorum*, non intendebant eum Regem facere, sed ei illudere. Et hic ludus impedit veritatem Sacramenti, quia hic iocus est intrinsecus actioni.

DICO igitur ludum Athanasij fuisse prioris generis: nã verè voluit baptizare, sed accepit eam actionē pro materia ludi, & oble-

160 *Cap. XXVIII. De Sacram. in genere. Lib. I.*

oblectationis. Id ita esse colligitur tum ex ipsa historia, quam scribunt Ruffinus, lib. 10. hist. cap. 14. Sozomenus lib. 2. cap. 16. & Nicephorus libro 8. cap. 40. Scribunt enim hi auctores ab Athanasio solos Catechumenos baptizatos, idque omnibus Ecclesiæ cæremoniis adhibitis; tum etiam ex eo, quod solent pueri seriò facere res ludicras. Nam, verbi gratia, cùm fingunt vnum esse Regem, alios famulos, vel fingunt oppugnationem alicuius loci, verè intendit Rex eorum iubere, & illi intendunt obedire; & seriò oppugnant locum aliquem, & alij seriò defendunt: dicuntur tamen hæc ludicra, quia sunt puerilia, & quia gratia oblectationis suscipiuntur. Similem historiam suo tempore accidisse scribit idem Nicephorus, lib. 3. cap. vlt.

AD illud de mimo **R E S P O N D E O**, nihil in historia illa esse contra nos. Nam primus, qui historiam scripsit, fuit (quod sciam) Ado Treuirensis in martyrologio 8. Kalend. Septembris. Ab eo acceperunt posteriores Vincentius, speculo historiali, lib. 12. cap. 102. & S. Antoninus, 1. par. tit. 8. cap. 1. §. 9. summę historialis. Porro Ado scribit, mimum illum nomine Genesum, coram Imperatore Diocletiano gratia irridendi mysteria Christiana, se ægrotum finxisse, ac Baptismum postulasse; tum iussu Imperatoris accersitum presbyterum & exorcistam, qui eum baptizarent. Verùm cùm à presbytero interrogaretur, quid peteret, illum repentè conuersum, non fictè, sed seriò respondisse, gratiam Christi se petere, atque ita baptizatum verè, & seriò, cùm & presbyter baptizare intenderet, & ille intenderet suscipere Baptismum; licet Imperator adhuc crederet eum fingere. Vide Surium, tomo 4. in vita S. Genesij.

S E C V N D V M argumentum est Caluini in Antidoto, & Kemnitij in 2. par. Examinis, loco citato, qui inde argumentum sumunt, quod si ab intentione ministri penderet efficacia Sacramenti, periret certitudo, quam homo debet habere de effectu Sacramenti, & consolatio spiritualis, quia nemo potest certus esse de intentione alterius.

R E S P O N D E O, non debere hominem in hoc mundo quærere certitudinem de sua salute, vel iustificatione infallibilem, qualis est certitudo fidei diuinæ. Hæc enim non conuenit huic statui, de quo dicit Apostolus, 1. Cor. 10. *Qui stat, videat, ne cadat.* Et Philipp. 2. *Cum timore, & tremore salutem vestram*

Seſtram operamini. De qua re vide Auguſtinum, lib. 2. de bono perfeuer. cap. 13. & de corrept. & gratia, cap. 13. Certitudinem autem humanam, & moralem, quæ ſufficiat, vt homo quieſcat, ex Sacramentis habemus, etiamſi pendeant ab intentione alterius. Nam cùm habere intentionem ſit facillimum, nulla eſt cauſa dubitandi, an miniſter habuerit intentionem, niſi aliquo ſigno exteriori id prodat: & hoc ſufficit, vt homo non quærat iterum baptizari, ſed acquieſcat in accepto Baptiſmo.

Et *NOTA*, Lutheranos cogi idipſum conſiteri etiamſi nolint. Nam ipſi baptizantur adhuc infantes more Catholico- rum; quocirca cùm adoleuerint non poſſunt recordari, nec ſcire an habuerint Baptiſmum, niſi credere velint parentibus. Itaque parentibus credunt, qui tamen decipere poſſunt, & in eo acquieſcunt. *Quantò* magis poterit acquieſcere in Baptiſmo is, qui videt ſe baptizari, & intelligit verba, nec habet vllam coniecturam contrariæ intentionis miniſtri; ſi is acquieſcit, qui tantùm credit parentibus, vel amicis dicentibus, eum eſſe baptizatum?

TERTIVM argumentum eſt Kemnitij ex auctoritate S. Auguſtini, lib. 7. de Baptiſmo, cap. 53. vbi non audet definire an Baptiſmus collatus per iocum teneat, ſed dicit exſpectandam Dei reuelationem. Addunt quidam alij alium locum Auguſtini ex tractat. 5. in Ioan. vbi videtur dicere, Baptiſmum ab ebrio collatum, eſſe ratum, cùm tamen conſtet, ebrios nō habere intentionem.

ADDIT etiam Kemnitius Innocentium Papam IV. qui teſte Angelo in ſua ſumma, ſenſit ad veritatem Sacramenti non requiri, vt miniſter gerat in mente facere, quod facit Eccleſia, immò, ſi contrarium gerat in mente, id eſt, non facere, quod facit Eccleſia, ſi tamen appareat, quod velit illud facere, ſatis eſſe.

RESPONDEO, locum Auguſtini eſſe contra aduerſarios. Nam in primis ibidem *AVGVSTINVS* dicit, ſe de ea re dubitaſſe, quia in nullo Concilio res definita fuerat: *Sed nobis*, inquit, *tutum eſt in ea nō progredi aliqua temeritate ſententia, qua nullo in Catholico regionali Concilio capta, nullo plenario Concilio terminata ſunt.* Id autem ſit cura ſecura & ocis aſſerere, quod in gubernatione Domini Dei noſtri, et Saluatoris *IESV Chriſti* vniuerſalis Eccleſia conſenſione roboratum eſt. Nunc

autem res definita est in duobus generalibus Conciliis, Florentino, & Tridentino. Neq; refert, quod non recipiuntur à Lutheranis: nam neq; Nicænum recipiebatur à Donatistis in causa Anabaptismi; & tamen Augustinus ubiq; affirmat, rem esse certam, & definitam ob illius Concilij auctoritatem. Deinde ibidem Augustinus cum dicit, petendam esse Dei reuelationem, an Baptismus ioco traditus, sine vera intentione conferendi sit ratus, aperte testatur non esse certum ex Scripturis, ut aduersarij iactant, Sacramenta non requirere intentionem ministri. Præterea sine dubio nos longè melius facimus secundum Augustini sententiam baptizando eos, qui sunt baptizati sine intentione, quàm Lutherani non baptizando. Nam in re dubia præstat repetere Baptismum, saltem sub conditione, quàm exponere se periculo amittendi Baptismum. Ad alium locum Augustini facilis est responsio: nam non dicit ebrijs, sed ebriosi Baptismum esse ratum.

Ad auctoritatem Innocentij RESPONDEO, Kemnitium more suo non fideliter recitasse eius sententiã. INNOCENTIUS enim in cap. Si quis puerum, extra de Baptismo, &c. postquam dixerat, Sacramentum esse ratum, etiamsi minister gerat in mente non facere, quod facit Ecclesia, addidit: *Dummodo intendat baptizare*, quæ verba omisit Kemnitius. Nec verò semel, sed ter repetit Innocentius, Baptismum non esse ratum, si minister intendat non baptizare, sed tantum lauare corpus.

Vnde illa verba Innocentij: *Etiam si gerat in mente non facere, quod facit Ecclesia*, duobus modis possunt intelligi; vno modo, de eo, quod facit Ecclesia, quantum ad substantiam actionis; altero modo, quantum ad effectum illius actionis. Posteriori modo intellexit Innocentius, & est sensus: Etiam si minister non gerat in mente facere, quod facit Ecclesia, id est, iustificare hominem à peccatis, quia nimirum putat non habere talem virtutem illam cæremoniam; tamen si intendit verè facere cæremoniam, quam facit Ecclesia, satis est. Priori modo accepit Kemnitius, sed perperam, quia contradictorium ter ibidem habet Innocentius. Quare illud etiam Kemnitius falsò imponit Innocentio, quod dixerit, Sacramentum esse ratum, si tantum appareat, ministrum voluisse baptizare, etiamsi reuera id non intenderit. Id enim Innocentius non dicit, neque ex verbis colligi potest.

QUARTUM argumentum est Catharini ex auctoritate S. Thomæ,

Thomæ, Chrysostomi, & Nicolai Papæ. S. THOMAS, 3. p. q. 64. art. 8. ad 2. dicit, ad perfectionem Sacramenti satis esse intentionem Ecclesiæ, quæ exprimitur in ipsa forma verborum, nec aliud requiri ex parte ministri. Quod clarius habet in 4. d. 6. q. 1. art. 2. q. 1. ubi dicit, non requiri mentalem intentionem ministri, sed sufficere expressionem verborum, in qua continetur intentio Ecclesiæ. CHRYSOSTOMVS homil. 85. in Ioan. Sacerdos, inquit, *linguam, & manus præbet; neq; enim iustum est propter alterius malitiam ad salutem nostram accedentes offendi.* NICOLAUS Papa ad Consulta Bulgarorum interrogatus, an baptizati à Iudæo, essent rebaptizandi; respondit, non esse, si in nomine Patris, & Filij, & Spiritus sancti baptizati essent: ubi nulla fit mentio intentionis.

Deniq; addit rationem Catharinus, quia nimis durum videtur, ut Deus in arbitrio impij ministri posuerit salutem hominum; & quia redditur incerta nostra iustificatio. Quod tamen argumentum iam est solutum. Sed potest addi aliud eius loco; quia inter homines, cum dominus per servum contrahit cum alio, vel mittit munus alteri, non requiritur, qua intentione servus id faciat.

RESPONDEO ad S. Thomam, cum docere, requiri intentionem internam ministri. Nam 3. parte quæst. 64. artic. 8. in corpore articuli, dicit, determinari debere ea, quæ in Sacramentis fiunt, quia ad multos usus fieri possunt per intentionem ministri. Item in respons. ad 1. dicit, ministrum, quia est instrumentum animatum, debere seipsum applicare ad opus per intentionem, qua intendat facere, quod facit Christus, & Ecclesia. Item in respons. ad 3. dicit, non esse necessarium actualem intentionem, sed sufficere habitualem; & explicat, tunc esse habitualem; quando initio operis, actu intendebat facere, quod facit Ecclesia. Item in artic. 9. ad primum dicit, verum esse Sacramentum, etiamsi minister non credat Sacramentum aliquid valere, modò intendat facere, quod facit Ecclesia. Deniq; in art. 10. clarissimè dicit, requiri in ministro intentionem Sacramentum conferendi, non autem ludendi, vel iocandi, & sine ea intentione non perfici Sacramentum. Neque obstat, quod addit S. THOMAS: *Præcipue quando suam intentionem exterius manifestat.* nō vult dicere; Quando minister habet intentionem, nō conferendi Sacramentum, sed iocandi, sed eam non manifestat, tum Sacramentum esse

nullum, sed magis esse nullum, si intentionem manifestet, quia primo modo est nullum coram Deo, secundo modo est nullum coram Deo, & coram hominibus.

Ad locum obiectum à Catharino ex respons. ad 2. art. 8. RESPONDEO cum Caietano, & Soto, S. Thomam, cum dicit, non requiri mentalem intentionem ad perfectionem Sacramenti, sed sufficere externam prolationem verborum; non loqui de perfectione Sacramenti simpliciter, sed de perfectione coram hominibus, quæ sufficit ad humanam certitudinem, & mentem pacandam, ut non requirat aliud. Id quod probatur dupliciter. PRIMO, quia in argumento secundo S. Thomas hoc obiecerat, si requiratur intentio mentalis, nullum posse esse certum se accepisse Sacramentum. Responsio igitur debet intelligi de Sacramenti perfectione, quoad certitudinem, non absolutè. SECUNDO, quia in hac solutione addit S. Thomas, sufficere externam prolationem formæ, nisi exprimatür contraria intentio ministri, vel suscipientis, quæ additio optimè se habet, si agatur de certitudine, ut pater: falsa autem est, si agatur de perfectione Sacramenti absolutè, ut vult Catharinus. Nam si non requireretur interna ministri intentio, nisi pronunciandi illa verba, tum certè verum esset Sacramentum, si minister exprimeret contrariam intentionem, hoc modo; Ego non intendo baptizare, sed irridere Sacramentum, & ideo volo dicere hæc verba; Ego te baptizo in nomine Patris, & Filij, & Spiritus sancti: immò etiam si externo gestu irrisum exprimeret, & ironicè illa verba diceret, adhuc esset Sacramentum. At S. Thomas contrarium docet, ut patuit.

Ad locum Chrysostomi RESPONDEO, CHRYSOSTOMVM loqui de probitate ministrorum, ac velle dicere, non pendere efficaciam Sacramentorum à bonitate ministrorum, sed à bonitate Dei solius. Vnde cum ait: *Sacerdos manus, & linguam præbet*, excludit virtutes, non intentionem ministri. Nam vult dicere; Minister est instrumentum Dei, non principale agens; ex hoc autem, quod minister est instrumentum, sequitur, ut non agat in virtute propria; & proinde, ut non requiratur fides, spes, charitas, aut alia eius virtus: tamen non sequitur, ut non requiratur intentio, immò potius contrà sequitur, ut requiratur, cum homo sit instrumentum animatum, & rationale; & proinde debeat moueri à Deo secundum natu-

Cap. XXVIII. De Sacram. in genere. Lib. I. 16,

naturam suam, id est, mediante propria electione, & intentione.

DICES; At ratio, quam adfert Chrysostomus, nimirum; Quia non est iustum, ut alterius malitia, alteri noceat, concluditur etiam non debere pendere Sacramenta ab intentione ministri; quia tunc nocere posset ministri malitia suscipientibus Sacramenta, si nimirum ille occultè subtraheret intentionem.

RESPONDEO; Rationem illam concludere de probitate, non autem de intentione, ob duas causas. PRIMO, quia si Sacramenta penderent à probitate, sæpissimè noceret vnius malitia alteri, quia plurimi sunt mali, & non possent Sacramenta esse rata, quæ ab infidelibus, vel hæreticis, vel publicis peccatoribus aliquando urgente necessitate traduntur. At si pendeant ab intentione, rarissimè nocebit malitia ministri suscipientibus: nam intentionem omnes habere possunt, nec est ratio cur nolint. SECUNDO, quia iustum est, ut non pendeant Sacramenta ab ea qualitate ministri, quæ non est omninò necessaria ipsi ministerio, qualis est probitas; at non erat æquè iustum, ut non pendeant ab ea qualitate, sine qua minister non esset minister, qualis est intentio. ADDE, quod si hæc ratio probaret, Sacramenta non pendere ab intentione serió tradendi Sacramenta, probaret etiam ea non pendere ab intentione faciendi actum illum externum, quam solam admittunt Catharini, & hæretici. Nam etiam hoc modo potest fieri, ut malitia ministri noceat suscipienti, ut si quis nolit dicere verba, aut infundere aquam eo tempore, quo non inueniatur alius, qui possit, aut velit hoc facere.

Et per hoc SOLVITUR etiam illa ratio Catharini, quòd sit nimis durum, salutem hominum esse in arbitrio impij ministri; nam cogitur ipse quoque in aliquo casu id fateri. Neque debet videri durum, quod Deus permittit, ne destruat naturam hominis, alioqui etiam videretur durum, quod Deus reliquerit in arbitrio tyranni vitas multorum innocentium.

Ad auctoritatem Nicolai Papæ, DICO, eum non fuisse sollicitum de intentione, tum quia ea ordinariè adest, tum quia Ecclesia non iudicat de internis.

Ad vltimum argumentum ex more humano, patet solutio ex nostra tertia ratione.



DE EFFECTV,
NUMERO, ET CÆRE-
MONIIS SACRAMEN-
TORVM.

LIBER SECVNDVS.

Quarta controuersia de effectu
Sacramentorum.

Partitio huius controuersia.



RES SVNT HVIVS CON-
trouersia partes. PRIMA: An Sacra-
menta noua legis sint vera causa iusti-
ficationis ex opere operato. SECVN-
DA: An id sit proprium Sacramentis
noua legis, an verò commune cum Sa-
cramentis legis veteris. TERTIA: An Sacramenta noua
legis imprimant animæ characterem.

PRIMA quaestio in quatuor capita diuidetur. PRI-
MVM explicabitur status quaestionis. SECVNDO adse-
rentur sententiae hereticorum. TERTIO confirma-
bitur veritas. QVARTO soluentur
obiectiones.

CAPVT PRIMVM.

Quis sit status quæstionis de efficacia Sacramentorum.



QVOD AD PRIMVM ATTINET, EXPLICANDUM EST, quid sit, quod quæritur, cum disputatur de efficacia Sacramentorum ex opere operato. Nam id aduersarij, vt odiosam reddant Catholicorum sententiam, perperam exponunt.

Sunt igitur hic NOTANDA quatuor. PRIMO, statum quæstionis non esse eum, quem ponit Calvinus, lib. 4. Instit. cap. 14. §. 17. his verbis: *Tantum hic quæritur, propriane, & intrinseca, & loquuntur, virtute operetur Deus, an externis symbolis resignet vices suas.* Hæc ille. At nemo vnquam istam quæstionem disputauit: id enim esset petere, an Sacramenta sint causæ primariæ, quod nulli vnquam venire in mentem potuit, nisi furioso. Id igitur solum quærimus, an sint instrumenta Dei, id est, an Deus per Sacramenta nos iustificet, non autem an Sacramenta sine Deo. Et sicut nemo vnquam quæsiuit, an faber operetur, an ferræ vices suas resignet, cum constet, ferram sine fabro nihil agere.

Ex quo sequitur esse mendacium, & calumniâ vanissimam hæreticorum, qui dicunt, nos abstrahere homines à Christo, & ab eius passione, & alligare signis, quia docemus Sacramenta esse causas iustificationis. Nam contrà potius hoc ipso trahimus homines ad Christum, & eius passionem, quod dicimus Sacramenta esse Christi instrumenta, quibus ille nobis applicat meritum passionis suæ; nisi fortè retrahere dicatur homines ab igne, qui dicit calorem esse instrumentum, quo ignis calefacit. Et tamen sic loquitur Calvinus ibidem, lib. 4. cap. 14. §. 14. *Quia iustitia causam à Sacramentis ducit, miseras hominum mentes in terram, suapte sponte plus satis inclinatos hac superstitione alligat, & in spectaculo rei corporeæ potius, quam in Deo ipso acquiescat.* Et similia Lutherus habet, & alij.

SECUNDO notandum, non esse controuersiam de modo quo Sacramenta sint causæ, id est, an physicè attingendo effectum, an moraliter tantum; & rursum si physicè, an per aliquam

qualitatem inhærentem, an per solam Dei motionem: ista enim ad quæstionem fidei non pertinent; sed solum generatim, an Sacramenta sint veræ, & propriæ causæ instrumentales iustificationis, vt verè ex eo, quod quis baptizatur, sequatur, vt iustificetur. Nam in hoc conueniunt omnes Catholici, vt Lutherus ipse fatetur, in lib. de captiuit. Babylon. cap. de Baptismo: *Arbitrati, inquit, sunt quàm plurimi esse aliquam Virtutem occultam spiritualem in Verbo, & aqua, qua operetur in anima recipientis gratiam Dei. His alij contradicentes statuunt, nihil esse Virtutis in Sacramentis, sed gratiam à solo Deo dari, qui assistit ex pacto Sacramētis à se institutis: omnes tamen in hoc concedunt, Sacramenta esse efficacia signa gratiæ.* Hæc ille.

Et hoc sufficit ad fidem, & ad legitimum vsum Sacramentorum; quomodo in miraculis Christi non requirebatur, vt homines, qui curandi essent, scirent in quo genere causæ fimbria Christi sanaret, satis erat, vt scirent, & crederent, tactum illius fimbriæ adferre sanitatem: neque opus erat, vt ipsi Apostoli, qui manus imponendo curabant, scirent, quomodo id fieret. Ita quoque non est necesse, vt vel ministri, vel qui suscipiunt Sacramenta, sciant, quomodo Sacramenta sint causæ iustificationis.

ADDE quod hoc est, commune multis mysteriis fidei, vt tantum habeamus ex Scripturis, esse aliquid, & tamen ignoremus modum, vt Deum esse trinum, & vnum, Christum esse Deum, & hominem, resurgere corpora eadem numero, Christum totum esse in Eucharistia, &c. ita quoque in hac re satis est, probari posse ex fide Scripturarum, vt ostendamus, Sacramenta esse causas gratiæ: quomodo id fiat, difficillimum est intelligere, nedum explicare. Neque id mirum est. Nam si de rebus naturalibus, quas Deus fecit, quanquam sub sensum cadunt, non potest homo reddere rationem, vt ait Salomon, Eccles. 8. quantò magis exacta ratio reddi non poterit de rebus supernaturalibus? Disputant tamen Scholastici de his rebus non inutiliter, vt ostendant variis modis posse defendi id, quod fides docet, & probabiliter multa dicunt; ceterum ea ad fidem non pertinent.

Quare non rectè aduersarij, ac potissimum Kemnitius in 2 parte Examinis, cap. de efficacia Sacramenti, & cap. de opere operato; & Heshusius in libro de 600. erroribus Pontificiorum,

rum, tit. 15. qui est de Sacramentis, Scholasticorum opiniones de modo efficiendi Sacramentorum ita reprehendunt, atque oppugnant, quasi ex ad fidem Catholicæ Ecclesiæ pertinere, credamus.

TERTIO notandum est, quid sit conferre gratiam ex opere operato. Nam aduersarij reprehendunt nomen, ut nouum, & ipsam sententiam perperam exponunt. Calvinus in Antidoto Concilij Tridentini, sess. 7. can. 8. vocat monstra verborum, conferre gratiam ex opere operato. Kemnitius in 2. parte Examinis, pag. 115. dicit non seruasse Concilium cum hoc verbum protulit, formam sanorum verborum, quam teneri iubet Paulus, 2. Timoth. 1.

SED non est cur de nomine magna contentio fiat. Nulla enim hic est nouitas, nisi quod contra regulam Grammaticæ, operatum, passiuè accipitur. Sed neque hoc est nouum. Nam etiam in epistola ad Hebræos, cap. 13. contra regulam Grammaticæ passiuè accipitur (promeretur) cum legimus: *Talibus enim hostiis promeretur Deus.* Et S. AVGVSTINVS in Psalmum 138. maluit dicere ossum ossi, quàm os ossis, ut faciliùs intelligeretur: *Melius est, inquit, ut nos reprehendant Grammatici, quàm ut non intelligant populi.*

Quod ad rem attinet, duo dicunt nos intelligere, per opus operatum, quæ tamen, & falsa sunt, & inter se pugnantia. PRIMO affirmant opus operatum significare opus meritorium, seu dignitatem operis ex parte ministri, vel recipientis. Primus Lutherus ita perperam exposuit in captiuitate Babylonica, cap. de Baptismo, ubi dicit, Papistas ex Sacramento fecisse præceptum, & ex fide opus. Quasi dicat, Papistæ putant, Sacramenta dare gratiam, quia qui suscipit Sacramentum, facit opus bonum a Deo præceptum. Deinde Calvinus, lib. 4. Instit. cap. 14. §. 26. *Quidquid, inquit, de opere operato negati sunt Sophistæ, non modo falsum est, sed pugnat cum Sacramentorum natura, qua instituit Deus, ut fideles vacui bonorum omnium, & inopes, nihil præter mendicitatem eò adferant. Unde sequitur ea recipiendo nihil istos agere, unde laudem mereantur, vel in hac actione, qua eorum respectu merè passiuæ est, nullum illis posse opus adscribi.* Idem habet in Antidoto, sess. 7. can. 8. ubi non aliter refellit, Sacramenta conferre gratiam ex opere operato, nisi quia absurdum est ex meritis hominum pendere efficaciam Sacramenti. Tandem Kemnitius in 2.

parte Examinis, pag. 95. *Fuerunt, inquit, qui virtutem Sacramentorum in ipso opere, quo Sacramenta, vel celebrantur, vel suscipiuntur, constituerunt; ita ut Sacramenta dicerentur conferre gratiam ex dignitate, & merito operis, quod exercet, vel is, qui celebrat, vel qui suscipit.*

Hanc esse falsam expositionem, & testem ignorantia, vel malicia ipsorum, patet ex eo, quod omnes Catholici opponunt opus operatum operi operantis, & per opus operantis intelligunt opus bonum, seu meritorium ipsius operantis. Deinde cum tam Catholici, quam Lutherani doceant contra Donatistas, Sacramentorum efficaciam non pendere à bonitate ministri, quomodo potuit cadere in mentem alicuius, ut Catholici crederent, Sacramenta conferre gratiam ex dignitate, & merito ministri? Neque enim dubitari potest, quin bonum opus, & meritum pendeat à bonitate operantis, nam: *Non potest arbor mala bonos fructus facere*, Matth. 7. Pari ratione cum omnes Catholici doceant Sacramenta conferre gratiam, & sæpe primam gratiam, ita ut hominem ex impio iustum faciant, quomodo potest fieri, ut credant Sacramenta conferre gratiam ex dignitate, & merito susipientis? Nam si is, qui suscipit Sacramentum, posset bona opera, & meritoria facere ante susceptionem Sacramenti, non esset impius, sed iustus.

SECUNDA expositio falsa, est, quod conferre gratiam ex opere operato sit conferre gratiam peccatori sine fide, & bono motu cordis eiusdem peccatoris, ita ut vis operis operati sit excogitata ad excludendam fidem, & poenitentiam internam in negotio iustificationis. Lutherus in Babylone, cap. de Baptismo: *Hinc, inquit, impulsus sunt tantum tribuere Sacramentis noua legis, ut ea statuerent prodesse etiam iis, qui in peccatis mortalibus sunt, nec requirunt fidem, aut gratiam.* Calvinus in Antidoto, sess. 7. can. 5. *Fingunt, inquit, subesse vim magicam Sacramentis, qua sit extra fidem efficax.* Et can. 8. *Si, inquit, conceditur illis, quod postulant, opere operato comparari gratiam in Sacramentis, separatur à fide pars meriti, ut per se valeat Sacramenti usus ad salutem.* Kemnitius in 2. parte Exam. pag. 125. *Pontificij, inquit, defendunt opinionem operis operati, quod scilicet per Sacramenta ita conferatur utentibus gratia, ut non requiratur bonus motus interior in suscipiente.* Similia habent Philippus in Confess. Augustana; artic. 13. & Apologia eiusdem,

eiufdem, & Heshufius in libro de sexcentis erroribus Pontificiorum, tit. 15.

At hæc expositio pugnat cum superiore. Nam si opus operatum est opus meritorium fufcipientis, quomodo potest fieri, vt opus operatum excludat fidem, cum fine fide nullū bonum meritum poffit intelligi? nam: *Sine fide impoffibile est placere Deo*, Hebr. II. Est PRÆTEREA hæc expositio falſa, & mera calumnia, ac mendacium. Nam ipſum Concil. Trident. ſeſſ. 6. cap. 6. diſertè docet, initium iuſtificationis fieri à fide, & pœnitentia, & idem omnes Theologi docent, vt ſuprà cap. 2. oſtendimus in refutatione mendaciorum.

Igitur vt intelligamus, quid ſit opus operatum, NOTANDUM est, in iuſtificatione, quam recipit aliquis, dum percipit Sacramenta, multa concurrere; nimirum ex parte Dei, voluntatem vtendi illa re ſenſibili; ex parte Chriſti, paſſionem eius; ex parte miniſtri, poteſtatem, voluntatem, probitatem; ex parte fufcipientis, voluntatem, fidem & pœnitentiam; denique ex parte Sacramenti, ipſam actionem externam, quæ conſurgit ex debita applicatione formæ & materiæ. Ceterum ex his omnibus id, quod actiue, & proximè, atque instrumentaliter efficit gratiam iuſtificationis, eſt ſola actio illa externa, quæ Sacramentum dicitur, & hæc vocatur opus operatum, accipiendo paſſiue (operatum) ita vt idem ſit Sacramentum conferre gratiam ex opere operato, quod conferre gratiam ex vi ipſius actionis Sacramentalis à Deo ad hoc inſtitutæ, non ex merito agentis, vel fufcipientis: quod S. AUGUSTINVS lib. 4. de Baptiſmo, cap. 24. expreſſit illis verbis: *Ipfum per ſe ipſum Sacramentum multum valet*. Nam voluntas Dei, quæ Sacramento vtitur, concurrat quidem actiue, ſed eſt cauſa principalis. Paſſio CHRIS TI concurrat, ſed eſt cauſa meritoria, non autem effectiua, cum non ſit actus, ſed præterierit, licet maneat obiectiue in mente DEI. Poteſtas, & voluntas miniſtri concurrunt neceſſariò, ſed ſunt cauſæ remotæ; requiruntur enim ad efficiendam ipſam actionem Sacramentalem, quæ poſtea immediatè operatur. Probitas miniſtri requiritur, vt ipſe miniſter non peccet Sacramenta miniſtrando, non tamen ipſa eſt cauſa gratiæ in fufcipientem, nec iuuat fufcipientem per modum Sacramenti, ſed ſolum per modum impetrationis & exempli. Voluntas, fides, & pœnitentia in fufcipientem adulto neceſſariò requiruntur, vt diſpo-

vt dispositiones ex parte subiecti, non vt causæ actiue: non enim fides & pœnitentia efficiunt gratiam Sacramentalem, neque dant efficaciam Sacramenti, sed solum tollunt obstacula, quæ impedirent, ne Sacramenta suam efficaciam exercere possent: vnde in pueris, vbi non requiritur dispositio, sine his rebus fit iustificatio.

Exemplum esse potest in re naturali. Si ad ligna comburenda, primùm exsiccarentur ligna, deinde excuteretur ignis ex filice, tum applicaretur ignis ligno, & sic tandem fieret cōbustio; nemo diceret, causam immediatam combustionis esse siccitatem, aut excussionem ignis ex filice, aut applicationem ignis ad ligna, sed solum ignem, vt causam primariam, & solum calorem, seu calefactionem, vt causam instrumentalem.

QUARTO, notanda est fraus & imperitia Kemnitij; nam in 2. parte Examinis, cap. de opere operato, fatetur quosdam ex Catholicis, vt Gropperum & Alfonsum rectè exponere, quid sit opus operatum; sed addit, nō ita sensisse reliquos Catholicos, neque ipsum Concilium Tridentinum, & idē adhuc remanere integram controuersiam. At miser Kemnitius neque hos, neque illos intelligere potuit, aut certè intelligere noluit: *Fingunt*, inquit, *nimirum Gropperus & Alfonsus, iniuriam fieri Doctoribus Scholasticis, quasi opinione operis operati docuerint, Sacramenta alicui conferre gratiam sine fide gratiam accipiente, sed dicunt, nihil aliud ipsos disputatione de opere operato voluisse, quàm Sacramentorum Veritatem non esse ex ministri operantis dignitate, seu merito astimandam, sed ex Dei auctoris institutione, potentia, & operatione.* Et infra: *Si hoc Vellent Pontificij, quando de opere operato disputāt, quia sententia Vera est, nulla esset controuersia. Sed nec olim Scholastici omnes hoc senserunt, & ne nunc quidem Pontificij hoc volūt, quando pro opinione operis operati dimicant, sed longè aliud monstrum sub exoticis illis verbis alitur, & Ecclesia obrunditur.* Hæc ille; In cuius verbis tria sunt falsa.

PRIMUM, quod ait, Gropperum & Alfonsum fingere, fieri Scholasticis iniuriam, &c. non enim id fingunt, sed verissimè dicunt, vt sæpe probauimus, & probabimus iterum paulò pōst.

SECUNDUM, quod ait, nullam fore controuersiam, si omnes Catholici idem dicerent, quod Gropperus & Alfonsus. Nam

Nam reuera idem dicimus omnes, & tamen cōtrouerſia manet. Nam illi duo auctores non ſolū dicunt, Sacramenta non ſumere efficaciam à dignitate miniſtri, & non excludere fidem, quod placet Kemnitio & nobis; ſed etiam dicunt, Sacramenta habere veram efficaciam, ſeu efficientiam ad producendam gratiam ex institutione diuina, quod Kemnitio placere non poteſt, cū ipſe (vt mox videbimus) nullam tribuat Sacramētis efficientiam, niſi ad alendam fidem per modum obiecti repræſentantis diuinam promiſſionem.

TERTIVM, quod ait, neque olim Scholaſticos, neq; nunc Pontificios intelligere opus operatum, quomodo exponunt Gropperus & Alſonſus, nimirum vt non excludat fidem. Hoc autem eſſe mendacium, planum fiet ex refutatione argumentorum eius.

PRIMVM ergo id probat, quia Scholaſtici omnes dicunt, Sacramenta nouæ legis dare gratiam ex opere operato; legis autem veteris dediſſe ex opere operantis: At ſi opus operatum excluderet dignitatem miniſtri, etiam Circumciſio dediſſet gratiam ex opere operato: nihil enim nocebat circumcidentis malitia miniſtri. Non igitur ex ſententia Scholaſticorum opus operatum excludit tantū dignitatem miniſtri, ſed etiā fidem, & motum interdū ſuſcipientis, quæ pertinent ad opus operantis, & erant neceſſaria in lege veteri.

RESPONDEO PRIMVM; Aliquos Scholaſticos, vt Gabrielem (quem paulò pòſt citat Kemnitius) cū dicunt, Sacramenta vetera non contuliſſe gratiam ex opere operato, excipere Circumciſionem: proinde apud eos nihil valeret Kemnitij argumentum.

SECUNDO dico, opus operatum non ſolū excludere dignitatem miniſtri, ſed etiam fidem, & motum internum ab efficientia gratiæ Sacramētalis. Nam, vt diximus, etiam ſi iſta requiruntur in adultis, tamen nō ſunt iſta, quæ efficiunt gratiam, ſed ipſum Sacramentum, vt instrumentū Dei. In Sacramentis autem legis veteris, non ipſum Sacramentum propriè operabatur gratiam, ſed vel fides, & deuotio ſuſcipientis, vel totius Synagogæ, vel quid aliud, vt poſtea dicemus. Itaque argumentum Kemnitij probat, opus operatum ex ſententia Scholaſticorum excludere fidem & motum internum ab efficientia gratiæ Sacramentalis, non tamen probat, quod erat probandum, excludere ſimpliciter fidem & motum internum,

num, ita ut Sacramenta (ut ipsi calumniantur) conferant gratiam accipientibus ea sine fide, & sine interna conversione cordis.

SECUNDO probat ex Gabriele, qui in 4. distinct. i. quæst. 3. dicit, tunc esse opus operatum, cum non requiritur motus internus.

RESPONDEO; Corruptè citat Gabrielem: nam mox subiungit Gabriel, quo motu de congruo, vel de condigno mereatur gratiam. Non igitur Gabriel excludit motum internum disponentem ad gratiam, sed meritorium gratiæ. Nam etiam si illa dispositio potest esse meritoria gratiæ de congruo, vel etiam augmenti gratiæ de condigno, si sit actus ex charitate procedens: tamen alia est gratia, quæ datur ob dispositionem; alia, quæ datur ex vi Sacramenti, ut idem auctor explicat in 4. dist. 4. q. 2. conclus. 4. ad primum.

TERTIO probat ex Paludano, qui in 4. dist. i. q. i. conclus. 2. probat. 4. dicit, non requiri in Sacramentis ut homo se disponat, sed dispositionem effici ab ipso Sacramento, & hoc esse causare gratiam ex opere operato.

RESPONDEO; Non intellexit Kemnitius Paludanum. Non enim loquitur Paludanus de dispositione, quæ est motus internus suscipientis, ut fides & poenitentia, quos motus expressè dicit requiri in Sacramentis idem Paludanus dist. 4. q. 5. sed loquitur de quadam dispositione ultima, ad quam putat ipse continuè sequi gratiam, & eam dispositionem esse dicit characterem in tribus Sacramentis, in aliis ornatum quendam animæ. Cum enim non posset Paludanus intelligere, quomodo Sacramentum efficeret gratiam, excogitavit illam sententiam, quodd efficeret quandam dispositionem, ad quam continuè sequeretur gratia. De qua re ad Scholasticos pertinet disputare.

QUARTO probat ex Marsilio in 4. sentent. q. 2. artic. 2. & Mensingero in 6. cap. Ioannis, qui distinguunt opus operatum contra deuotionem internam operantis.

RESPONDEO; Distinguunt, non ut excludant omnino, sed ut excludant ab efficientia, ut diximus.

QUINTO probat ex S. Thoma, Paludano, & Gabriele, qui dicunt, Missam prodesse etiam illis ex opere operato, qui non habent in corde poenitentiam.

RESPONDEO; Loquuntur de sacrificio, non de Sacramento.

mento. Porro sacrificium prodest impœnitentibus per modum impetrationis, quia impetrat illis conuersionem & pœnitentiam. quomodo etiam orationes nostræ, licet non tam efficaciter, id faciunt.

Sexto probatur ex eo, quod multi Catholicorum probant, Sacramenta efficere gratiam ex opere operato, quia Baptismus prodest paruulis nō habentibus fidem, aut vllum internum motum. Ergo eodem modo in adultis excludunt fidē & motum interiorem: nam etiam in adultis volunt, Sacramenta vim habere ex opere operato.

RESPONDEO; Catholici efficacissimè probant exemplo paruulorum, Sacramentorum efficaciam nō pendere ab vlla qualitate suscipientis. Nec tamen idē sequitur, eos excludere in adultis fidem & pœnitentiam: nam hæc exquiruntur in adultis, vt dispositiones, quibus dispositionibus nō egent paruuli, vt suo loco demonstrabitur.

Probat deinde Kemnitius, Concilium Tridentin. per opus operatum excludere voluisse fidem & motum internum. PRIMO; Quia cū Scholastici variè exponant opus operatum, & alij excludi velint motum internum, alij nolint: Concilium, can. 8. simpliciter admittens opus operatum, & non restringens ad hanc potius, quàm ad illam expositionem, censetur omnes approbasse. RESPONDEO; Falsum est ab Scholasticis vllis per opus operatum excludi motum internum. Deinde si ita esset, Concilium nullam approbasset, sed solū in genere definiuisset, Sacramenta conferre gratiam ex opere operato.

SECUNDO; Quia Concilium can. 12. definit, Sacramenta non pendere ex dignitate ministri. Igitur in hoc can. 8. per opus operatum non intelligit, Sacramentum non pendere à dignitate ministri, quomodo opus operatum exponit Gropperus; sed aliquid aliud, nimirum non requiri fidem suscipiētis. RESPONDEO; Sacramenta conferre gratiam ex opere operato, propriè non significare negationem, id est, non pendere à dignitate ministri, sed significare affirmationem, id est, Sacramenta vi sua efficere gratiam, ex qua sequitur negatio, id est, non pendere à dignitate ministrantis, vel suscipientis. Itaque Concilium can. 8. definiuit illam affirmationem contra Lutheranos: deinde can. 12. definiuit negationem contra Donatistas & Anabaptistas.

TERTIO probat; Quia Concilium in isto can. 8. opponit opus operatum fidei; ergo intelligit excludi fidem per opus operatum. RESPONDEO; Si esset verum Antecedens, negari posse Consequentiam; nam si Concilium opponeret opus operatum fidei, intelligeret excludi fidem ab efficientia gratiæ Sacramentalis, non autem excludi simpliciter. Sed tamen falsum est Antecedens, quia Concilium non opponit opus operatum fidei, sed soli fidei. Quod paulò infra annotauit etiam Kemnitius.

Præter hæc argumenta addit Kemnitius duo expressa mendacia, quibus claudit suam disputationem de opere operato. Nam non solum imposuit Theologis absurdam expositionem operis operati, sed etiam fingit, iam Theologos ab ipsis conuictos, non audere amplius eam opinionem defendere: *Ipsi, inquit, Pontificij scriptores iam tergiuersantur, nec manifestè audent suscipere defensionem huius axiomatis, quòd & sus Sacramentorum sine fide saluet suscipientes.* Atqui hoc, ut ostendimus, non fuit vnquam axioma Pontificiorum, sed mendacium Lutheranorum. Deinde ut homo solers, inuestigat etiã causas, cur in tam absurdum errorem Scholastici inciderint: & ponit duas causas. VNAM, quod cum legerint apud Augustinum lib. 3. de Baptismo, cap. 14. non interesse ad integritatem Sacramenti, qua fide sit imbutus, qui recipit Sacramentum, & non aduerterint, Augustinum loqui de substantia Sacramenti, non de utilitate & fructu; inde putauerint, non requiri fidem ut Sacramenta profint. ALTERAM, quod cum legerint apud eundem Augustinum in epist. 23. paruulos sine fide actuali salubriter percipere Sacramentum, quia non ponunt obicem contrariæ cogitationis: putauerint, eandem esse rationem paruulorum & adultorum.

Sed friuolæ, immò etiam falsæ sunt istæ causæ. Nam omnes Theologi in 4. distinct. 4. distinguunt Sacramentum à re Sacramenti; & docent, Sacramentum etiam sine fide & pœnitentia posse recipi, non autem rem Sacramenti, id est, gratiam. Præterea Concilium Tridentinum, sess. 7. canon. 13. de Baptismo, docet, Baptismum paruulis prodesse sine actuali ipsorum fide; & tamen sess. 6. cap. 6. & 8. & sess. 14. cap. 4. & alibi, docet, in adultis necessariò requiri fidem & pœnitentiam, ut iustificari possint; & semper Ecclesiam Catholicam ita sensisse.

CAPVT SECVNDVM.

Sententia hæreticorum de efficacia Sacramentorum.

QVANTVM ad SECVNDVM, antiqua fuit hæresis Messalianorum, ante annos M. C. qui docebant, Sacramentis Baptismi, Eucharistiæ, & aliis non iustificari homines, sed solis precibus. Ita refert Ioannes DAMASCENVS in lib. de hæresibus: *Baptismum, inquit, hominem non perficere, nec diuina Sacramenta accepta animi sordes expiare, sed solas preces, quæ ab illis rectè fundantur.* Armeni quoque & noui quidam Cathari, si Guidoni credimus, negabant, Sacramenta gratiam conferre.

Sed his omiſſis, Lutherani de hac re interdum ita scribunt, vt videantur à Catholicis non dissentire, interdum autem apertissimè scribunt contraria. Semper tamen in eadem sententia manent, quæ est, Sacramenta non habere immediatè vllam efficientiam respectu gratiæ, sed esse nuda signa; tamen mediatè aliquid efficere, quatenus videlicet excitat, vel alunt fidem, quæ homines iustificat, quod tamen ipsum, id est, excitare fidem, non faciunt nisi repræsentando. Volunt enim eodem modo cõcurrere ad iustificationem Sacramenta, quo prædicatio verbi, nisi quod prædicatio adhibetur auribus, & per auditum excitat fidem; Sacramenta adhibentur oculis, & per visum excitant etiam fidem.

Hanc sententiam initio Lutherus & Philippus nudè proponebant, atque apertè dicebant quod sentiebant, nimirum Sacramenta nihil efficere. Sunt autem loca NOTANDA contra Kemnitium, qui impudentissimè in 2. parte Exam. pag. III. dicit, Lutherum seriò & semper improbalſe in Sacramentariis prophanam illam sententiam: *Quòd Sacramenta non sint organa, & causa instrumentales gratiæ, sed solum instar picturæ commonefaciant, & excitent fidem.* Hæc ille.

Audiamus nunc Lutherum. Anno M. D. XX. in lib. de captiuit. Babylon. cap. de Baptismo: *Baptismus, inquit, neminem iustificat, nec ulli prodest; sed fides in Verbum promissionis, cui additur Baptismus: hæc enim iustificat.* Et ibidem: *Idem Deus, qui nos nunc per Baptismum, & panem saluat, saluauit Abel per sacrificium, Noë per arcam, Abraham per Circumcisionem,*

178 Cap. II. De effectū Sacramentor. Lib. II.

Et alios omnes per sua signa. Et paulò infra numerat inter Sacramenta veteris legis, quæ non vult esse inferiora Sacramentis nouæ legis, quoad efficaciam, signum datum Gedeoni in rore & vellere; & signum datum Manue in sacrificio; & signū oblatum Achaz ab Isaia capite septimo, & concludit: *Nostra Et Patrum signa, seu Sacramenta habent annexum Verbum promissionis, quod fidem exigit, Et nullo opere alio impleri potest; ideo sunt signa, seu Sacramēta iustificationis, quia sunt Sacramenta iustificantis fidei, Et non operis: Unde Et tota eorum efficacia est ipsa fides, non operatio. Qui enim is credit, is implet ea, etiam si nihil operetur.* Et infra: *Nec Verum esse potest, Sacramentis inesse vim efficacem iustificationis, seu esse ea signa efficacia gratia: hac enim omnia dicuntur in iacturam fidei.* Item anno M. D. XXI. in assert. i. articuli ita scripsit: *Nos dicimus, nec noui, nec Veteris Testamenti Sacramenta, sed solam fidem iustificasse.* Item anno M. D. XXIII. in lib. contra Cochlæum: *Non potest Vlla pars iustificationis tribui Baptismo; alioqui si Vlla parte iustificaret, non liceret negare, Baptismum sine fide iustificare: cum autem ei denegetur, soli fidei recte relinquitur.*

Philippus Melanchthon in locis editis anno M. D. XXII. cap. de signis, horrendum esse dicit errorem Scholasticorum, quod Sacramenta iustificent; & addit: *Non iustificant signa, Et Apostolus ait, Circumcisio nihil est: ita Baptismus nihil est, participatio mēsa Domini nihil est; sed testes sunt.* καὶ ὁ φρασι δ' ἐς diuinā voluntatis ergate. Idem etiam in Apologia anno M. D. XXX. edita, ad artic. 13. dicit, Sacramentum esse signum promissionis, ac veluti picturam verbi; & in libro contra Anabaptistas: *Sicut Voluntas Dei ostenditur in Verbo, seu promissione, ita etiam ostenditur in signo, tanquam in pictura.* Et infra: *Prodest Et hoc moneri, Sacramenta non iustificare.* Vbi vides illam ipsam similitudinem picturæ, quam tanto opere execratur Kemnitius, & tamē proficitur se Apologiæ huius sectatorem in ipso principio, 2. part. Examinis.

Lutherum & Philippum sequuti sunt Sacramentarij, ex quibus Calvinus lib. 4. Institutionum, cap. 14. §. 6. vtitur eadem similitudine picturæ, & §. 17. *Fixum, inquit, maneat, non esse alias Sacramentorum, quàm Verbi Dei partes: quæ sunt offerre nobis, ac proponere Christum, Et in eo celestis gratiæ thesauros.*

thesauris. Et infra: Cauendum praterea, inquit, ne in errorem nos abducant, qua ad amplificandam Sacramentorum dignitatem paulò magnificentius à Veteribus scripta sunt: Et scilicet arbitremur, latentem aliquam Virtutem Sacramentis annexam, affixamque esse, quo ipsa per se Spiritus sancti gratiam nobis conferant, cum hoc tantum illis diuinitus iniunctum sit munus, testificari nobis ac sancire Dei in nos beneuolentiam. Et infra: Sacramenta id sunt nobis à Deo, quòd ab hominibus rerum latarum nunciij, Vel arrha in pactis sanciendo; Et porè qua non à se quidem largiantur aliquid gratia, sed renūciant; Et ostendant, atque (Et sunt arrha Et tessera) rata apud nos faciant, qua diuina largitate nobis donata sunt. Et §. 18. vti. tur exemplo iridis & velleris Gedeonis, atque aliis, quibus utebatur Lutherus.

Porro idem Lutherus in libris posterioribus conuictus (vt verisimile est) argumentis Catholicorum, longè aliter scripsit. Nam in homil. 1. de Baptismo, quam anno M. D. XXXV. edidit, circa principium 2. part. ita habet: Ad hoc institutus est Baptismus, Et nobis seruiat, nobis prodest, nobis donet, non aliquid carnale, Vel corporale, sed æternam gratiam; æternam munditiam, Et sanctitatem, æternam vitam. Et in homil. 2. de Baptismo, quam habuit anno M. D. XL. Non potest, inquit, non id operari Baptismus, ad quod institutus est; Videlicet regenerationem Et renouationem Spiritus sancti. Et infra: Tantam Virtutem Et energiam habet Baptismus, Et homo, qui in peccatis conceptus Et natus est, regeneretur coram Deo, Et qui ante ad mortem erat damnatus, iam sit Filius Dei. Quis hanc gloriam Et Virtutem sacrosancti Baptismi sensibus, cogitatione, intellectu humano assequi, Et percipere potest? Et infra: Voluit Ioannes his Verbis significare, Baptismi tam efficacem, ac tanta Virtutis esse, Et peccata ablucere, mortem submergere Et suffocare, Et omnia vitia Et sordes sanare Et mundare posset.

Hunc modum loquendi imitantur recetiores Lutherani, atque inprimis Kemnitius. Nam in 2. parte Examinis, pag. 98. vbi citasset aliquot Scripturas pro efficacia Sacramentorum contra Anabaptistas & Sacramentarios, ita subiungit: Hac manifestissima testimonia, qua Sacramentis efficaciam tribuunt, et qualis ea sit, explicant, non sunt per tropos peruerrenda à simplici, et genuina significatione, quam propria voca-

bulorum significatio prabet: Et ita Veteres hac testimonia simpliciter, sicut sonant, intellexerunt. Et pag. 101. Sacramenta sunt causae instrumentales, ita quod per illa media, seu organa Pater vult gratiam suam exhibere, donare, applicare: Filius meritum suum communicare credentibus; Spiritus sanctus efficaciam suam exercere ad salutem omnis credenti. Hæc ille: qui certè Catholicissimè loqui videtur. Calvinus quoq; nō raro ita loquitur, vt loquuntur Catholici. Nam in Antid. Concil. sess. 7. can. 5. sic ait: *Semper memoria repetendum est, Sacramenta nihil, quam instrumentales esse cōferenda nobis gratia causas.* Et can. 6. *Si qui sint, qui negent, Sacramentis contineri gratiam, quam figurant, illos improbamur.*

Veruntamen nec Lutherus, nec Calvinus, nec Kemnitius recedit à prima illa sententia, quæ nihil reuera tribuit Sacramentis efficientiæ. Nam cū dicunt, Sacramenta esse causas instrumentales, & conferre gratiam, & esse efficacia, semper intelligunt, mediante fide, ita vt ipsa nihil aliud agāt, nisi excitare, vel nutrire fidem, quæ sola iustificat.

Nam idem Calvinus ibidem can. 5. explicat, quomodo Sacramenta sint causæ instrumentales gratiæ, ac dicit, tunc demum Sacramenta suum effectum habere, si fidei seruiant. Et can. 8. dicit, eodem modo efficere in nobis gratiam Sacramenta, quo efficit verbum Dei prædicatum. At certum est, verbum non efficere, nisi excitando, vel nutriendo fidē. Deniq; Theodorus Beza (vt suprā notauimus) in lib. de summa rei Sacramentariæ, q. 2. ita explicat Caluini præceptoris sui sententiā: *Vnde efficacia, inquit, illa Sacramentorum? à Spiritu sancti operatione in solidum, non autem à signis, nisi quatenus externis illis obiectis interiores sensus mouentur.*

Kemnitius quoq; pag. 101. & sequent. explicans accuratè, quemadmodum sint efficacia Sacramenta, tandem cōcludit esse efficacia, eo modo, quo ipsa promissio, seu promissionis verbum. Et pag. 102. *Verbum, inquit, Et Sacramenta monstrat nobis, vbi fides debeat quarere, et vbi possit inuenire Christum Mediatorem, Patrem Et Spiritum sanctum.* Et pag. 105. explicans, quomodo fides in Sacramentis iustificet: *Non est sensus, inquit, quod fides gratiā accipiat sine medio aut organo Verbi Et Sacramentorum: obiectum enim fidei est Verbum Et Sacramenta, immò in Verbo Et Sacramentis Verum fidei obiectum est Christi meritum, gratia Dei, Et efficacia Spiritus: Et fide*

ideò iustificat, quia illa in Verbo & Sacramentis apprehendit & accipit. & hoc sensu sicut fides Verbi, ita etiam fides Sacramenti, dicitur iustificare. Hæc ille.

Denique quibuscunque verbis Catholicorum vtantur Lutherani, non possunt tamen vlllo modo sentire, quod nos sentimus, Sacramenta esse veras & immediatas causas iustificationis, nisi recedant à primo illo suo principio; Sola fides iustificat: quod hætenus non fecerunt.

CAPVT TERTIVM.

Quòd Sacramenta ex opere operato cõferant gratiam, ex Scripturis probatur.

ROBANDVM iam superest, Sacramenta esse veras causas instrumentales gratiæ; ac ne frustrà laboremus, demonstrandum est simul, aliter esse causam Sacramenta, quàm concionem. Nam ad omnia testimonia nostra respondere solent, Sacramenta esse veras causas gratiæ, sed excitado fidem, quomodo etiam verbum Euangelij dicitur à Paulo Rom. i. *Virtus Dei in salutem omni credenti.*

Adferemus sex argumetorum classes. PRIMÆ erit ex Scripturis Testamenti noui, vbi expressè id habetur. SECUNDA ex vaticiniis Prophetarum, & ex figuris Testamenti veteris. TERTIA ex Cõciliis. QUARTA ex Patribus Græcis. QUINTA ex Latinis. SEXTA ex ratione.

Prima classis testimoniorum ex nouo Testamento.

PRIMVM testimonium est Matth. 3. Marc. 1. Luc. 3. Ioan. 1. vbi Ioannes Baptista loquitur: *Ego baptizo vos aqua, ille vos baptizabit Spiritu sancto.* Quibus verbis non est dubium, tantum discrimen poni inter efficaciam Baptismi Ioannis, & Baptismi Christi, quantum est inter aquam & Spiritum. At Baptismus Ioannis efficax erat ad alendam fidem, non minus quàm Baptismus Christi; nam in Baptismo Ioannis erat externa ablutio & verbum promissionis. Nam prædicabat Baptismum pœnitentiæ in remissionem peccatorum, Luc. 3. &

prædicabat simul fidem Mediatoris, dicens, vt crederent in eum, qui venturus erat, Actor. 19.

Ad hoc argumentum Calvinus in caput tertium Matth. RESPONDET, eandem fuisse efficaciam Baptismi Ioannis & Christi: discrimen autem, quod ponit Ioannes in aqua & Spiritu, dicit in eo consistere, quod Ioannes erat minister exterioris, Christus autem erat auctor internæ sanctificationis. AT si ita est, non debuit Ioannes dicere; Ego baptizo, ille baptizabit, sed; Ego baptizo, ille baptizat. Præterea si erat eadem vis vtriusque Baptismi, cur Actor. 19. Paulus iussit baptizari Christi Baptismo eos, quos audiuit iam fuisse baptizatos Baptismo Ioannis.

RESPONDET Calvinus in commentat. Actor. 19. non fuisse illos iterum baptizatos, sed tantum accepisse visibiliter donum Spiritus sancti, & hoc significari illis verbis: *His auditis, baptizati sunt in nomine Domini IESU*. AT præterquàm quòd ista esset vitiosa æquiuocatio, cum in tota eà narratione accipiat nomen Baptismi pro Baptismo aquæ, & quòd licebit, omnes Scripturas peruertere, si licet verba tam aperta aliò torquere: ibidem mox adiungit Lucas: *Et cum imposuisset illis manus Paulus, venit Spiritus sanctus super eos, & loquebantur linguis, & prophetabāt*. Non igitur illud; *Baptizati sunt*, significat, Acceperunt donum Spiritus sancti visibiliter.

RESPONDET Calvinus, ista posteriora verba esse explicationem priorum. AT non diceret Lucas: *Baptizati sunt: Et cum imposuisset manus, &c.* sed, Baptizati sunt: nam cum imposuisset manus, &c. vel certè, Baptizati sunt, & imposuit illis manus, &c. sic enim fieri solent explicationes. Illa autè phrasìs: *His auditis, baptizati sunt in nomine Domini IESU, et cum imposuisset illis manus Paulus, venit Spiritus sanctus*; euidenter ostendit, duas fuisse actiones, & diuerso tempore factas, Baptismum, & manus impositionem. Denique conferatur hic locus cum aliq̃ eiusdem auctoris, nimirum Actor. 8. vbi similiter habetur Baptismus in nomine Domini IESU, & impositio manuum; & erit luce clarius, per Baptismum in vtroq; loco intelligi verum Baptismum.

SECUNDVM testimonium Marci ultimo: *Qui crediderit, & baptizatus fuerit, saluus erit*. Hic tribuitur Baptismo vis saluandi; at non saluat, nisi iustificando, & ablundo sordes peccatorum.

Neque potest responderi, quòd saluet excitando fidem. Nam **IN PRIMIS** hoc loco fides præcedit. Ineptum autem est dicere, primò poni effectum, deinde causam. Sicut enim absurdum esset dicere; Qui curatus fuerit, & acceperit medicinam; ita absurdum esset dicere: *Qui crediderit, & baptizatus fuerit*; si Baptismus est causa fidei. Vnde quia audire verbum Dei est verè causa fidei, semper in Scriptura præcedit, vt Ioan. 5. *Qui audit verbum, & credit, habet vitam æternam.* Et Ioan. 6. *Omnis qui audiuit, & didicit, venit ad me.* Non ergo fides est effectus Baptismi, cum eum præcedat, sed potius dispositio ad illum.

PRAETEREA ad hominem; Christus hoc loco non coniungit Sacramentum cum concione, vt aduersarij faciunt; nò enim dicit: Qui audierit verbum, & baptizatus fuerit; sed coniungit cum fide, quæ est effectus verbi. Sicut ergo fides apud aduersarios immediatè iustificat applicando merita Christi, non autem excitando aliquam aliam causam; cur non eodem modo fateantur, Baptismum immediatè iustificare applicando Christi merita, cum Christus eodem modo loquatur de fide & de Baptismo?

TERTIUM testimonium Ioannis 3. *Nisi quis renatus fuerit ex aqua & Spiritu sancto, non potest introire in regnũ Dei.* Hic locus apertè facit Baptismum aquæ causam nouæ natiuitatis; id enim significat præpositio, *Ex*, vt patet in omnibus similibus loquutionibus.

Neque potest dici, quòd renasci ex aqua sit renasci ex fide, quam excitat aqua. Nam **PRIMO**, debuisset potius Christus dicere; Nisi quis renatus fuerit ex verbo & Spiritu sancto, quàm, *Ex aqua & Spiritu sancto*; cum principalior causa excitandæ fidei, sit verbum, quàm aqua. **SECUNDO**, quia fuisset Christi sermo omninò intelligibilis. Nam cum nihil dixerit antea de fide, quis diuinare posset, eum modò tradere rationem excitandæ fidei? **TERTIO**, esset falsa propositio: *Nisi quis renatus fuerit, &c.* Nam si fides sola iustificat, impertinens est ad salutem, vnde fides excitetur, siue ex aqua, siue ex vino, siue ex alia re. Et constat multis modis, fidem excitari posse sine Baptismo aquæ: concio enim abundè sufficit ad excitandam fidem.

AD HUNC locum non poruit aliter Calvinus respondere, nisi negando, hîc agi de Baptismo, quod etiam ante illum

negarunt Zvvinglius & Bucerus. Itaque Calvinus in commentar. & lib. 4. Institut. cap. 16. §. 25. negat, intelligi debere de Sacramento Baptismi, sed de sola interna renouatione. Quocirca per aquam vult intelligi Spiritum sanctum, & hunc esse sensum; Nisi quis renatus fuerit ex aqua, id est, ex Spiritu sancto, qui instar aquæ mundat, &c.

AT PRIMVM; Omnes scriptores hactenus hunc locum intellexerunt de Baptismo; vt Iustinus Apolog. 2. Tertullianus in libro de Baptismo, Cyprianus libro 3. ad Quirinum, cap. 25. Ambrosius libro 3. de Spiritu sancto, cap. 11. Hieronymus in caput 16. Ezechielis, item Basilius, Gregorius Nazianzenus, Gregorius Nyssenus in sermone de Baptismo; denique omnes interpretes huius loci, Origenes, Chrysostomus, Augustinus, Cyrillus, Beda, Theophylactus, Euthymius, & alij.

SECUNDO; Si ita liceret ludere in Scripturis, possemus negare Baptismum aquæ. Nam vbique intelligemus nomine aquæ Spiritum sanctum, & eodem modo licebit peruertere omnia alia mysteria.

TERTIO; Negari non potest, quin sit coacta, & absurda, & Scripturis inusitata loquutio. Nec valet exemplum, quod Calvinus profert ex Matthæi 3. *Ille vos baptizabit in Spiritu sancto & igni.* Vbi vult per ignem intelligi eundem Spiritum sanctum, vt habet similitudinem cum igne. NAM per ignem rectissime potest intelligi externus ignis, qui descendit visibiliter super Apostolos in die Pentecostes, vel ignis tribulationis, vel ignis Purgatorij: quas expositiones attingit Beda in commentario Luc. 3. Præterea in hoc loco, ignis postponitur Spiritui sancto, & non est ita absurdum, post vnum vocabulum poni alterum, quo illud declaretur. At aquam Ioan. 3. Dominus præposuit Spiritui sancto; absurdissimum autem est, prius poni declarationem, deinde id, quod declarandum est. Neque negari potest, quin aqua si accipitur pro Spiritu sancto, ponatur ad declarandum effectum Spiritus sancti, qui est mundare.

QUARTO; Si aqua hoc loco non poneretur, nisi ad explicandum effectum Spiritus sancti, malè coniungeretur cum verbo renascendi; aqua enim, si tantum inspicatur eius significatio, non gignit, sed lauat, & refrigerat. Itaq; vel dicere debuisset Dominus; Nisi quis mundatus fuerit aqua & Spiritu sancto,

sancto, vel; Nisi quis renatus fuerit ex semine & Spiritu sancto. Non igitur aqua solum hoc loco declarat effectum Spiritus sancti, sed propriè significat aquam, vt concurrit Sacramentaliter ad spiritualem regenerationem.

QUARTVM testimonium Actor. 2. *Pœnitentiam agite, & baptizetur unusquisq; vestrum in remissionem peccatorum.* Cui simile est illud Actor. 22. *Et nunc quid moraris; baptizare, & ablue peccata tua, inuocato nomine ipsius.* In his locis tribuitur Baptismo remissio peccatorum: nec potest dici, id fieri, quod Baptismus excitet fidem. Nam quos Petrus alloquitur Actor. 2. iam crediderant, vt Lucas ibidem indicat. Audita enim Petri concione, compuncti sunt corde, & dixerunt: *Quid faciemus viri fratres?* Petrus autem non ait; Oportet credere, vel magis credere, sed; *Pœnitentiam agite, &c.* Pari ratione Paulus, cui dixit Ananias, Actor. 22. *Baptizare, & ablue peccata tua,* iam crediderat, & pœnitentiam egerat triduo ieiunans.

RESPONDET Calvinus, tum in commentario Actorum, tum lib. 4. Instit. cap. 15. §. 18. baptizari in remissionem peccatorum, seu abluere peccata Baptismo, nihil esse aliud, nisi accipere testimonium, seu sigillum acceptæ iustificationis, idq; ad fidem roborandam, & confirmandam.

SED (vt omittam quod antea demonstrauius, Sacramenta non posse esse sigilla, vel certè esse falsa sigilla, cum nō sciat minister, an ille, cui applicat sigillum diuinum; sit verè iustificatus) quis non miretur nouum istum tropum, quo abluere peccata, significat, accipere sigillum iustificationis acceptæ? Inauditum est enim, vt actio significata, ponatur ad significandum signum; & quòd actio futura ponatur ad significandam præteritam. Exemplum esse possunt, si quis diceret; Bibe vinum, absurdè id diceret, si significare vellet; Inspice hederam, quæ in hospitio pender. Pari ratione, si Imperatori reuerenti cum victoria, diceretur; Vince hostes, idq; diceretur ad significandum; Accipe triumphum in signum præteritæ victoriæ, absurdissima esset loquutio. Non enim rectè dicitur; Vince hostes, ei, qui iam pugnavit, & vicit.

QUINTVM testimonium Actor. 8. *Cum vidisset Simon, quia per impositionem manuum Apostolorum daretur Spiritus sanctus;* cui loco similis est ille 2. Tim. 2. *Admonco te, & resuscites gratiam, quæ est in te per impositionem manuum mearum.*

rum. Et si enim hæc loca intelliguntur de Sacramentis Confirmationis & Ordinationis, quæ apud multos aduersariorum non sunt propriè Sacramenta: tamen si Sacramenta, vt ipsi volunt, impropriè dicta sunt veræ causæ gratiæ, quandò magis Sacramenta propriè dicta? Porro in his locis apertissimè impositio manuum asseritur causæ gratiæ, vt patet ex illa particula, *Per.* Nec potest dici, manuum impositionem esse causam gratiæ, excitando fidem; nam omnes isti, qui per impositionem manuum acceperunt gratiam Spiritus sancti, iam crediderant & baptizati erant.

Sextum testimonium 1. Corinth. 10. *Vnum corpus multi sumus, omnes, qui de vno pane participamus.* Vbi participare de vno pane ponitur p causam vnius corporis. Quod in Græco est clarius: *οἱ γὰρ πάντες ἐν τῷ ἐνὸς ἄρτους μετέχομεν.* Omnes enim ex vno pane participamus. Quomodo autem sumus vnū corpus, quia de vno pane participamus, nisi quia panis ille alit, & auget vitam huius corporis? Nam in rebus corporalibus, quia idem cibus alit omnia membra eiusdem corporis, ideo rectissimè pbamus, aliqua membra esse membra eiusdem corporis, si ab eodem cibo alantur. Quare si tollas à Sacramento altaris veram causalitatem gratiæ, non poterit probari, quodd simus vnum corpus, quia eandem Eucharistiam participamus. Similis est huic loco ille 1. Corinth. 12. *Etenim omnes nos in vno Spiritu in vnum corpus baptizati sumus.* Vbi Paulus probat, nos esse vnum corpus, quia per Baptismum accepimus vnum Spiritum. Quod argumentum nihil efficit, si Baptismus non confert Spiritum.

Septimum testimonium Ephes. 5. *Christus dilexit Ecclesiam, & tradidit semetipsum pro ea, mundans eam lauacro aquæ in verbo Veræ.* Cui similis est locus ille Tit. 3. *Saluos nos fecit per lauacrum regenerationis.* Vbi apertissimè dicimur inundari, & saluari lauacro aquæ, & per lauacrum: vtrumque autem causam instrumentalem significat.

Respondet Calvinus in commentario horum locorum, Baptismum propriè dici lauacrum animæ, & esse symbolum efficax: quia Deus, dum hoc signum ostendit, simul etiam operatur, quod per illud significat. At per accidens hoc modo coniungitur iustificatio, quam solus Deus facit cum Baptismo: proinde non magis propriè dicimur mundari, & saluari per Baptismum, quàm per quamlibet aliam actionem, quæ

quæ tunc simul fiat. Nec potest verè dici Baptismus lauacrum regenerationis, si per illum Deus non lauat nos, licet eodem tempore lauet nos. Si dicat, Deum nos mundare per Baptismum, quia ostendens illud symbolum, prouocat fidem quæ mundat: etiam dicere posset, homines inebriari per hedera, quæ pendet in hospitiiis; quia illa hedera prouocat ad emendum vinum, quod vinum postea inebriat.

OCTAVVM testimonium est 1. Pet. 3. *Quòd nos similis forma saluos facit Baptisma, non carnis depositio sordium, sed conscientia bona interrogatio in Deum.* Hic habemus PRIMVM, Baptismo nos saluos fieri. DEINDE, saluos fieri simili quodam modo, quo olim tempore Noë pauci quidam salui facti sunt per aquam. Atqui aqua illa verè & efficienter saluauit eos, qui erant in arca, videlicet arcam in sublime attollens. DENIQUE, habemus discrimen inter Baptismata Iudæorum, & nostrum: quòd illa tollerent sordes carnis, nostrum purificet conscientiam. Sicut igitur Baptismata Iudæorum verè tollebant sordes carnis, non tantum significando, sed etiam efficiendo; ita & nostrum Baptisma verè lauat conscientiam, non tantum significando, sed etiam efficiendo.

CAPVT. QVARTVM.

Secunda classis testimoniorum, vaticinia Prophetarum.

PRIMO ISAIAS cap. I. vbi dixerat: *Quòd mihi multitudinem victimarum & strarum, dicit Dominus? plenus sum; holocausta arietum, & adipem pinguium, & sanguinem vitulorum, & agnorum, & hircorum nolui.* Subiungit: *Lauamini, mundi estote.* Quæ verba S. Hieronymus, & S. Cyrillus in commentario, & Cyrillus Hierosolymitanus in 1. catechesi, & Theodoretus in Psal. 50. & Basilios orat. 13. quæ est de Baptismo, exponunt ad literam de Baptismo, qui succedit expiationibus illis veteribus. Quòd autem Baptismus vim habeat mundandi, patet ex illis verbis: *Lauamini, mudi estote.* Est enim ac si diceret; Baptizamini, & eo modo mundi eritis. Vnde S. Hieronymus hunc locum ita enarrat: *Pro superioribus victimis & holocaustis Euangelij mihi placet religio, & baptizemini in sanguine meo per lauacrum regenerationis, quod solum potest peccata dimittere.* Hæc ille.

vbi illud, *solum*, non excludit Deum, Christi meritum, fidem, & alia id genus, sed sacrificia & cæremonias Iudaicas.

SECUNDO; EZECHIELIS cap. 36. *Effundam*, inquit, *super vos aquam mundam, & mundabimini ab omnibus iniquamentis vestris, & dabo vobis cor nouum, etc.* Hunc locum de Baptismo intelligunt Hieronymus & Theodoretus in commentario, & Cyprianus lib. i. epist. vlt. & lib. 4. epist. 7. vbi notat S. Hieronymus, per aquæ Baptismi asperisionem non solum mundari peccata, sed etiam dari cor nouum, & spiritum nouum.

TERTIO; MICHEAS cap. 7. *De Baptismi gratia*, inquit Hieronymus in epist. 83. ad Oceanum, *Vaticinatur; Proiciet in profundum maris omnia peccata nostra.* Quomodo etiam hunc locum exponit Rupertus in commentario, & Augustinus in commentario Psal. 113. At quod in mare mergitur, non solum significatur extingui, sed re ipsa vi aquarum extinguitur.

QUARTO; ZACHARIAS cap. 13. *In die illa erit fons patens domui David, & habitantibus Hierusalem in ablutionem peccatoris, & menstruata.* Hunc etiam locum Hieronymus & Rupertus in commentario exponunt de Baptismo, qui vim habet purgandi peccata.

QUINTO; DAVID Psalm. 50. *Asperges me Domine hyssopo, &c.* Sed de hoc paulò infrà dicemus, in explicatione textæ figuræ.

Figura Sacramentorum.

PRIMA est Gen. i. *Spiritus Domini ferebatur super aquas.* In Hebræo exprimitur, quorsum ferretur super aquas, nimirum ut eas fecundas redderet; nam inde procreandi erant pisces, & aues, ut infrà habetur, *בְּרִיחַת* incubabat, more gallinæ nidum suum fouentis, & oua calore animantis, inquit Hieronymus in qq. in Genesim. Fuisse autem hanc figuram Baptismi, qui constat ex aqua & Spiritu sancto, docent TERTULLIANVS in libro de Baptismo. Hieronymus in epist. 83. ad Oceanum. Ut igitur aqua initio mundi à Spiritu sancto vitalem quandam vim accepit, ut animalia procrearet; sic & Baptismus à Spiritu sancto vim accepit procreandi nouos homines: *Ne mirum sit*, inquit Tertullianus, *in Baptismo, si aqua animare possunt.* Et ibidē Christianos vocat pisciculos, quòd nascan-

nascentur ex aquis. Qua etiam de causa literæ capitales ver-
suum Sybillinorum faciunt *ΙΧΘΥΣ*, id est, piscis, & significant
IESVS Christus Dei Filius Saluator. Quod annotauit AVGV-
STINVS lib. 18. de ciuit. Dei, cap. 23. & PROSPER li. 2. de præ-
dictionibus, cap. 29. & ante vtrumq; OPTATVS Mileuitanus
lib. 3. contra Parmenianum: *Hinc, inquit, est piscis, qui in Ba-*
baptismate per inuocationem fontalibus undis inseritur, & qua
aqua fuerat, à pisce etiam piscina vocitetur, cuius piscis nomen
secundum appellationem Græcam in vno nomine per singulas
literas turbam sanctorum nominum continet, ΙΧΘΥΣ, quod est
Latine: IESVS Christus Dei Filius Saluator. Et huc alludens
S. HIERONYMVS in epist. 43. *Bonosus, inquit, tanquam ΙΧΘΥΣ*
Filius aquosæ perit.

SECUNDA figura est Genes. 7. de diluuiio saluante Noë, &
reliquos, qui erant in arca, quam explicat S. Petrus epist. 1. cap.
3. vt paulò antè diximus.

TERTIA figura est Genes. 17. de Circumcisione, de qua B.
Paulus Colos. 2. sic ait: *Circumcisi estis Circumcisione non ma-*
nu facta, in expoliatione corporis carnis, sed Circumcisione
Christi conscripti ei in Baptismo. At Circumcisio verè & effi-
cienter carnem abscindebat, non autem erat solum testimo-
nium abscisionis, &c.

QUARTA figura est Exod. 14. submersio Ægyptiorum in
mari rubro, & transitus filiorum Israël; de qua sic loquitur B.
Paulus 1. Cor. 10. *Omnes, inquit, in Mose baptizati sunt in nu-*
be & in mari. Et infra dicit: *Hæc omnia contingebant illis in fi-*
guram. Itaque mare rubrum figura fuit Baptismi; nubes au-
tem obumbrans, figura Spiritus sancti; & sicut mare rubrum
verè demersit Ægyptios, & liberauit Israëlitas; ita Baptismus
verè delet peccata, & saluat animas. Vide Cyprianum libro 4.
epist. 7. Augustinum tract. 11. & 13. in Ioan. & Hieronymum in
epist. 83. ad Oceanum.

QUINTA figura est Exod. 16. & 17. de Manna plente è cœ-
lo, & aqua scaturiente ex petra: quæ figuræ erant Eucharistiæ
corporis & sanguinis Domini, eodem Paulo ibidem 1. Cor.
10. explicante. At Manna & aqua illa verè reficiebat, & recrea-
bat corpora Israëlitarum, & non erant testimonia vel sigilla.
Igitur Eucharistia verè reficit animas; alioqui erit melior fi-
gura, quàm res figurata.

S E X T A est Num. 19. de aqua lustrationis, quæ admistum habebat cinerem vaccæ rufæ, quam fuisse Baptismi figuram, scribit Augustinus in quæstionibus super Numeros, cap. 33. Vbi **N O T A N D U M** ex eodem Augustino, tria fuisse necessaria in hac expiatione; cinerem vaccæ rufæ, aquam & hyssopum, quo aqua aspergebatur: & quidem cinis vaccæ Christi mortem & merita significat: aqua verò Baptismum, qui Christi merita applicat: hyssopus herba humilis, radices habens in petra, fidem significat, sine qua Baptismus adultis non datur, & si fortè datur, non eis prodest. Sicut ergo in illa expiatione hyssopus non mundabat, sed aqua vim habens ex cinere vaccæ & hyssopo aspersa: sic in Baptismo non est fides, quæ propriè in Baptismo purgat peccata, sed aqua vim habens ex Christi passione, & fide suscepta. Ad has expiationes tum figurantem, tum figuratam respexit **D A V I D**, cum diceret Psal. 50. *Asperges me Domine hyssopo, & mundabor, lauabis me, & super niuem dealbabor.* Petit enim eam purgationem, quam nouerat figuram, per expiationem aquæ, quæ hyssopo aspergebatur, ut exponit Theodoretus in commentario huius loci.

S E P T I M A figura est Iosue 4. de transitu filiorum Israël per Iordanem ad terram promissionis, duce Iosue, quam fuisse figuram Baptismi, docent Ambrosius in illud Lucæ 1. *Ipse præbit in spiritu & virtute Elia.* Et Augustinus in illud Psal. 113. *Et tu Iordanis conuersus es retrorsum.* Neq; vllus dixerit, per aquas Iordanis non transiuisse filios Israël ad terram promissionis; sed obsignatam promissionem transeundi.

O C T A V A est 4. Reg. 5. de Naaman Syro curato à lepra, lauacro Iordanis: de qua vide Ambrosium in 4. cap. Lucæ, & lib. 2. de Sacramentis, cap. 4. Et certè aqua Iordanis verè curauit Syrum illum; non fuit sigillum promissionis.

N O N A est Ioan. 3. de probatica piscina, quæ figura manifestissima est, & à Patribus multis celebrata, ut Tertulliano in libro de Baptismo, Ambrosio lib. 1. de Spiritu sancto, cap. 7. Chrysostomo, Cyrillo, & Theophylacto in hunc locum Ioannis. Et quidem **C H R Y S O S T O M V S** pulcherrimè hanc figuram explicat, & addit, Deum voluisse variis figuris efficaciam Baptismi demonstrare, ne incredibilis videretur: *Futurum, inquit, erat Baptisma plenum maxima potestatis & gratia, purgaturum peccata, pro mortuo viuum effecturum, &c.*

Et

Et sanè nisi ita esset, vt dicit Chrysostomus, præstantior fuisset figura re ipsa figurata.

DECIMA est Ioan. 9. de cæco nato, quem Dominus illuminauit per aquam Siloe, de qua vide Ambrosium epistol. 75. ad Bellicium, & Augustinum tract. 44. in Ioan.

Sunt autem duo NOTANDA ad hæc loca Scripturæ. PRIMVM, quòd cum tam sæpe Scriptura, & vaticiniis, & figuris, & expressis verbis loquatur de Sacramentis, tamen ne semel quidem dicat, vim Sacramentorum consistere in excitanda, vel alenda fide; sed semper explicet consistere in purgandis peccatis, & mundanda anima. Ex quo reuera, si res seriò perpendatur, euidenter colligitur, falsissimam esse hæreticorum sententiam. Nam quomodo credibile est, finem immediatum, & præcipuum Sacramentorum nunquam in Scriptura haberi, cum finis mediatus tam sæpe inculcetur?

SECUNDO nota, quod si licet negare, Sacramenta verè & immediatè sanctificare, cum tam apertè Scripturæ hoc doceant; eadem ratione negari poterit, fidem iustificare, quod tamen aduersarij passim affirmant. Nam nihil Scripturæ tribuunt fidei, quod non tribuant etiam Sacramentis. Verbi gratia, Lucæ 7. dicitur: *Fides tua te saluam fecit.* Et in i. epist. Petri, capite 3. dicitur: *Vos saluos facit Baptisma.* Item de fide, Ioan. 5. *Qui credit ei, qui me misit, habet vitam æternam.* De Sacramentis, Ioannis 6. *Qui manducat hunc panem, & uet in æternum.* De fide, Actor. 15. *Fide purificans corda eorum.* De Sacramentis, Ephes. 5. *Mundans eam lauacro aqua in verbo & ueræ.* De fide, ad Rom. 3. *Arbitramur hominem iustificari per fidem.* De Sacramentis, ad Titum 3. *Saluos nos fecit per lauacrum regenerationis.* De fide, ad Rom. 5. *Iustificati ergo ex fide.* De Sacramentis, Ioan. 3. *Nisi quis renatus fuerit ex aqua & Spiritu sancto, &c.*

CAPVT QVINTVM.

Tertia classis argumentorum ex Conciliis.



CONCILIVM NICAENVM, quod nuper è Græco uersum, editum est ab Alfonso Pisano, in caput, quod inscribitur *ΔΙΔΑΚΤΙΚΗ*, doctrina de Baptismo, ante 8. canon. *Baptisma nostrum,* inquit, *non oculis corporis considerandum est, sed mentis oculis; aquam uides, considera uirtutē Dei in aquis absconditam.*

Et

Et infra: Descendit quidem is, qui baptizatur, peccatis obnoxius, & seruitutis corruptione detentus, ascendit autem ab ea seruitute & peccatis liber, filius Dei, & haeres, & cohæres Christi.

Concilium CONSTANTINOPOLITANVM I. in Symbolo: Credimus unum Baptisma in remissionem peccatorum.

Concilium MILEVITANVM, capite 2. Paruuli, qui nihil peccatorum in semetipsis adhuc committere potuerunt, ideo in remissionem peccatorum veraciter baptizantur, & in eis regeneratione mundaetur, quod generatione traxerunt. At certè in paruulis Baptismus non potest esse causa remissionis peccatorum excitando fidem.

Concilium ARAUSICANVM II. can. 25. Hoc etiam secundum fidem Catholicam credimus, quod accepta per Baptismum gratia, omnes baptizati, Christo adiuvante & cooperante, qua ad salutem pertinent, possint & debent, si fideliter laborare voluerint, adimplere. NOTA, non posse id exponi de excitatione fidei. Nam paulò infra idem Concilium dicit, à Deo prius fidem inspirari, ut Baptismi Sacramenta fideliter requiramus. Præterea etiam si fides, secundum aduersarios, iustificet à peccatis, tamen non dat gratiam bene operandi: At Baptismus ex hoc Concilio dat gratiam bene operandi.

His adde Concilia recentiora, Florentinum & Tridentinum.

CAPVT SEXTVM.

Quarta classis, ex Patribus Græcis.



AM ex Patribus Græcis; IUSTINVS in Apologia ad Antoninum: Remissionem antè commissorum peccatorum consequimur in aqua, &c. Et antea dixerat, neminem adduci ad Baptismum, nisi antea crediderit. Similia habet in Dialogo cum Triphone.

CLEMENS ALEXANDRINVS lib. I. Pædag. cap. 6. Multis, inquit, modis vocatur hoc opus, gratia, illuminatio, perfectum, & lauacrum: lauacrum quidem, per quod peccata abstergimus; gratia autem, qua remittuntur pœna, qua peccatis debentur; illuminatio autem, per quam sanctam illam, & salutarem lucem intuemur; perfectum autem dicimus, cui nihil deest. Quid enim ei desit, qui Deum nouit? &c.

ORIGENES homil. 14. in cap. 2. Lucæ: *Paruuli*, inquit, *baptizantur in remissionem peccatorum*. Et infra: *Et quia per Baptismi Sacramentum natiuitatis sordes deponuntur, propterea & baptizantur & paruuli*.

CYRILLVS catechesi 3. *Mortuus*, inquit, *in peccatis descendi*, & *ascendis diuificatus in iustitia*, &c. Vide totam catechesim. Et in præfatione catecheson: *Magnum est sanè propositum hoc Baptisma; captiuitatis liberatio, peccatorum remissio, anima regeneratio, currus ad cælum*, &c.

BASILIVS libro de Spiritu sancto, cap. 15. ponit Obiectionem hæreticorum; Si ideo Spiritus sanctus æqualis est Patri & Filio, quia in ipso baptizamur, etiam aqua erit æqualis Patri & Filio, quia in ipsa baptizamur. Respondet: *Si quæ est in aqua gratia, non ex aqua natura est, sed ex presentia Spiritus*, &c. Secundum aduersarios dicere debuisset, aquam nihil facere, & sic statim obiectionem soluisset. At Basilius fatetur, in aqua esse virtutem, sed ait, eam non inesse aquæ ex aquæ natura, sed ex vi Spiritus sancti. Vide etiam homil. 13. quæ est hortatio ad Baptismū, vbi clarissimè idem habet. Vide etiam Gregorium NAZIANZENVM oratione in sancta lumina, & orat. in sanctum lauacrum.

Gregorius NYSSENVS in libro de Baptismo: *Baptisma*, inquit, *peccatorum expiatio est, remissio delictorum, renouationis, & regenerationis causa*. Et infra explicans, quomodo id fiat, multa exempla adducit earum rerum, per quas Deus miracula fecit, vt virgam Aaron, & alia; & subdit: *Atque hæc omnia cum materia sint inanimata, atque sensus expertes, posteaquam vim Dei accepissent magnis miraculis, media intercesserunt. Ac simili consequentia rationum etiam aqua cum nihil aliud sit, nisi aqua, superna gratia benedicente ei, in eam, qua mente percipitur, hominem renouat regeneratione. Quod si quis mihi rursus dubitando, & ambigendo negotium exhibeat interrogans, qua ratione aqua regeneret; dicam optimo iure ad eum: Ostende mihi modum natiuitatis, qua sit secundum carnem; dices fortasse: Semen causa hominis effectrix est. Audi igitur contra à nobis, quod aqua, qua benedicatur, purgat & illuminat hominem.*

Vbi NOTANDVM est, non posse Gregorij sententiam trahi ad id, quod hæretici dicunt, Sacramenta operari, quia obiectiuè mouent ad fidem. Nam PRIMO, comparat aquam

N

Baptis-

Baptismi virgæ Aaronis, quæ miracula faciebat efficienter. SECUNDO, comparat semini, quod est causa hominis efficiens, ut ipse dicit. TERTIO, negat, aquam aliquid efficere, nisi recipiat vim quandam supernaturalem: at ut moueat obiectiue per modum signi, non requiritur vlla virtus supernaturalis. DENIQUE quæstio, quam proponit; Quomodo possit aqua regenerare, nulla esset, si tantum obiectiue operaretur.

CHRYSOSTOMVS homil. 39. in Genesim extrema: *Nam id, inquit, quod illic operatur, Circumcisio in depositione carnis: id agit hic Baptismus in depositione peccatorum.* Item homilia 24. in Ioannem, prolixè docet, esse credendum verbis Christi asserentis, aquam vim habere regenerandi, licet modus superet rationem. Et homil. 25. *Quod, inquit, est matrix embrioni, hoc est, fidei aqua. Siquidem in aqua fingitur, & formatur. Nam primum dictum est; Producant aqua reptile anima viuens: ex quo autem Iordanis alueum ingressus est Christus, non amplius reptilia animarum viuentium, sed animas rationales & spirituales aqua producit.* Vide eundem homilia 35. in Ioannem homilia 1. in Acta. homilia ad Neophytos, ubi enumerat decem effectus Baptismi, quos etiam in paruulis operatur, & inter tot effectus non venit illi in mentem, ut poneret, Excitare fidem; quem solum agnoscunt aduersarij.


CYRILLVS ALEXANDRINVS li. 2. in Ioannem, cap. 42. *Quemadmodum, inquit, viribus ignis intensius aqua calefacta, non aliterurit, quàm ipse ignis: sic Spiritus sancti operatione aqua, qua baptizati corpus aspergitur, reformatur ad diuinam virtutem & potentiam.* Hæc ille. Vbi vides, sic esse instrumentum Dei aquam in Baptismo, ut est calor in aqua calefacta instrumentum ignis ad calefaciendum.

THEODORETVS in cap. 10. ad Hebr. in illud: *Aspersi corda à conscientia mala: In lege, inquit, crebantur aspersioni-bus, & corpus frequenter lauabant; qui autem ex nouo Testamento vitam instituunt, per sanctissimum Baptismum animam expurgant, & à prioribus maculis liberam reddunt conscientiam.* Vide eundem Theodoretum in Epitome diuinorum decret. cap. de Baptismo; Damascenum lib. 4. de fide, c. 10.

Theophylactum in 3. & 5. cap. Ioannis, & Oecumenium in cap. 10. ad Hebr.

CAPVT SEPTIMVM:

Idem probatur ex Latinis.



AM ex Latinis TERTVLLIANVS in lib. de Baptismo: *Primus*, inquit, *liquor, quo vinceret, dedit, id est, aqua produxit animantia, & in Baptismo mirum non sit, si aqua animare nouerunt.* Item lib. de resurrectione carnis probat, corpus resurrecturum, quia Sacramenta corpori adhibentur, vt ad animam transeat eorum effectus: *Caro*, inquit, *abluitur, & anima emaculetur; caro & nigitur, & anima consecratur; caro signatur, & anima munia-*
tur; caro manus impositione adumbratur, & anima Spiritu illuminetur; caro corpore Christi & sanguine & scitur, & anima de Deo saginetur. vbi enumerat varios effectus Sacramentorum; proinde non putat solum excitare fidem Sacramenta.

CYPRIANVS lib. 2. epist. 2. ad Donatum, scribit, se, antequam baptizaretur, vix potuisse adduci vt crederet, quod a Christianis de Baptismi virtute predicabatur, quod videlicet repente hominem mutet, peccata abstergat, virtutes infundat: sed postea id verum esse experientia sua didicisse: *Difficile*, inquit, *ac durum pro illis tunc moribus opinabar, quod in salutem mihi diuina indulgentia pollicebatur, & quis renasci denuo posset, & que in nouam vitam lauacro aqua salutaris animatus, quod prius fuerat exponeret, corporis licet manente compage, hominem animo ac mente mutaret. Qui possibilis, aiebam, est tanta conuersio?* Et infra: *Sed postquam vnde genitalis auxilio superioris aui labe deteresa in expiatum pectus, ac purum desuper se lumen infudit; postquam calidus Spiritus hausto in nouum me hominem natiuitas secunda reparauit, mirum in modum, etc.* In quibus verbis duo NOTANDA sunt: PRIMO; Si Sacramenta tantum obiectiue mouerent mentem ad credendum, vt aduersarij dicunt, non fuisset vlla causa, cur Cyprianus difficulter crederet effectum Baptismi: non enim est hic effectus magis difficilis, quam sit, quod verbum Dei predicatum valeat ad excitandam fidem. Nota SECUNDO; Cyprianum dicere, Baptismum repente & perneciter operari, & renouare hominem. At hoc non diceret, si crederet, Baptismum mouere mentem solum obiectiue: nam tunc non repente, nec ordinarie haberet suum effectum. Aliqui enim

ex eodem signo, vt etiam ex iisdem verbis, celerius mouentur, aliqui tardius, aliqui nunquam.

Item in lib. 3. epist. 8. ad Fidum, docet, infantes baptizandos, etiam ante octauum diem (nimirum si vitæ periculum immincat) vt peccati remissionē accipiant. Quod idem iubet Syricius Papa in epist. 1. cap. 2. At si Baptisma solum excitat fidem, & prodest infantibus tantum ea ratione, quia cum adoleuerint, recordabuntur, &c. quorsum infantes morituros baptizari vult Cyprianus? Item in epist. 7. lib. 4. ad Magnum, dicit, quomodo venenum scorpionis & serpentis in aqua extinguitur; ita Diabolum obluere, & resistere Exorcistis ante Baptismum; at in Baptismo amittere omnem virtutem. Quæ certè omnia ridicula essent, si tantum obiectiuè Sacramenta operarentur. Vide etiam sermones de Baptismo Christi, de cœna Domini, & de vñctione Chrismatis. Similia habet Gaudentius in 1. tract. de Exodo.

LACTANTIUS lib. 7. de diuino præmio, cap. 5. *Cum homo celesti lauacro purificatus exponit infantiam cum omni labe vitæ prioris, & incremento diuini vigoris accepto, fit homo perfectus ac plenus.*

SYLVESTER Papa (vt refert Nicephorus lib. 7. cap. 33. cum Constantinum baptizaret, ita locutus est: *Hac aqua diuina virtute per inuocationem Trinitatis concepta, sicut extra corpus hominis abluit, ita animum intrà à sorde & iniquatione mundans, splendidiorem radiis solaribus efficit.*

AMBROSIVS lib. 2. de pœnit. cap. 2. *Impossibile, inquit, & idebatur, vt peccatum ablueret aqua. Et Naaman Syrus lepram suam mundari per aquam posse non credidit: sed quod impossibile erat, Deus fecit possibile esse, qui tantà nobis donauit gratiam.* Vide etiam lib. 1. de Sacramentis, cap. 4. & 5. lib. 2. cap. 1. & 5. lib. 3. cap. 1. & librum de iis, qui initiantur mysteriis, cap. 3. & 9. & librum 9. super Lucam, cap. 3. & librum 3. de Spiritu sancto, cap. 11.

HIERONYMVS in epist. 83. ad Oceanum: *Quantam vim, inquit, habeat Baptisma, & aqua in Christo sanctificata gratiam, paulò post docebo.* Et infra, vbi plurima attulit testimonia & figuras: *Dies, inquit, me deficiet, si cuncta, quæ ad potentiam Baptismi pertinent, de Scripturis sanctis voluero digere.* Vide eundem in Dialogo contra Luciferianos, & lib. 3. contra Pelagianos extremo.

OPTATVS lib. 5. contra Parmenianum, initio: *Baptisma, inquit, Christianorum Trinitate confectum, confert gratiam; si repetatur, facit vita iacturam.* Hæc ille. Vbi PRIMVM vides, apertè asseri, Sacramentum conferre gratiam. DEINDE, quòd hic auctor ait, Baptismum repetitum detrimentum adferre, clarè demonstrat, non operari tantùm obiectiue excitando fidem; nam eo modo vtiliter repeteretur. Vide ibidem multa de virtute Sacramentorum.

AUGUSTINVS lib. 4. de Baptismo, cap. 2. Inuenio, inquit, *non tantum passionem pro nomine Christi id, quod ex Baptismo de erat, posse supplere, sed etiam fidem, conuersionemq; cordis, si fortè ad celebrandum mysterium Baptismi in angustiis temporum succurri non potest.* Hæc ille. Si ergo aliquando martyrium, aliquando fides cum cordis conuersione supplet vicem Baptismi, manifestè sequitur, non iustificare excitando fidem, sed immediatè applicando Christi merita, atque immediatè iustificando. Et ibidem capite 24. probat, Sacramentum Baptismi multum paruulis prodesse, etiam si illi careant fide; ex Circumcisione, quæ dabatur octauo die: *Cur ergo, inquit, ei præceptum est, et omnem deinceps infantem masculum octauo die circumcideret, qui nondum poterant corde credere, et ei deputaretur ad iustitiam, nisi quia, & ipsum per se ipsum Sacramentum multum valebat?* Vbi Augustinus docet, Sacramentum non operari excitando fidem, sed vi sua efficiendo. Idem Augustinus lib. 19. contra Faustum, cap. 11. *Sacramentorum, inquit, vis inenarrabiliter valet plurimum, et ideo contempta, sacrilegos facit. Impiè quippe contemnitur, sine qua non potest perfici pietas.* Hæc ille. At si tantùm excitarent fidem obiectiue, non modò non inenarrabiliter valerent plurimum, sed vix aliquid valerent. Nam de concione nemo diceret, eam inenarrabiliter plurimum valere, cum sæpius multas conciones vix aliqui moueantur: & tamen fatetur Lutherus in libro contra Ioannem Cochlaeum, multò efficaciorẽ esse concionem Baptismo. Quod verissimum est, si agatur de efficacia prouocandi fidem. Idem Augustinus tract. 80. in Ioan. *Vnde tanta virtus aqua, et corpus tangat, & cor abluiat?* Et infra: *Mundatio nequaquam fluxu & labili tribueretur elemento, nisi adderetur in verbo.*

LEO Papa in serm. 4. de Natali Domini: *Omni homini renascenti aqua Baptismatis, instar est veteri Virginalis, eodem*

198 *Cap. VII. De effectu Sacram. Lib. II.*

Spiritu replente fontem, qui repleuit & Virginem; Et peccatum, quod ibi vacauit sacra conceptio, hic mystica tollat ablutio. Et serm. 5. Originem quam sumpsit in Vero Virginis, posuit in fonte Baptismatis: dedit aqua, quod dedit Matri. Virtus enim Altissimi, & obumbratio Spiritus sancti, qua fecit, & MARIA pareret Saluatorem, eadem fecit, & regeneret Vnda credentem. Hæc ille.

Auctor homilię de Sacramento corporis Domini, quę habetur inter Eusebij Emisleni homilias, & in 9. tomo S. Hieronymi: *Ergo, inquit, & ad nutum praeipientis Domini, repente ex nihilo subsisterunt excelsa cælorum, profunda fluctuum, & astra terrarum: ita parem potentiam in spiritualibus Sacramentis Verbis prabet Virtus, & rei seruit effectus, &c.* Et ibidem ex vi Sacramenti Baptismatis, quo repente hominem mutat, ac renouat quoad animam; probat, non debere videri incredibile, si verba Sacramentalia mutant substantiam panis in carnem Christi. Vbi sine dubio nullum habet locum operatio illa obiectiua ad prouocandam fidem: neq; enim in consecratione Eucharistię verba illa mutant panem excitando in eo fidem. Similem autem vim ponit hic auctor in consecratione respectu panis, & in Baptismo respectu animæ.

GREGORIUS lib. 9. epistol. 39. ad Theodistam Patritiam, docet, in Baptismo omnia peccata ita verè dimitti, vt in mari rubro verè Aegyptij mortui sunt: *Qui ergo, inquit, dicit, peccata in Baptismo funditus non dimitti, dicat in mari rubro, Aegyptios non veraciter mortuos.*

Deniq; S. BERNARDVS (vt recentiores omittam) in serm. de cœna Domini: *Duo, inquit, operatur in nobis Sacramentum Dominici corporis, & videlicet & sensum minuat in minimis, & in grauioribus peccatis tollat omnino consensum. Si quis Verbum non tam saepe modò, non tam acerbos sentit iracundia motus, inuidia, luxuria, aut ceterorum huiusmodi, gratias agat corpori & sanguini Domini; quoniam Virtus Sacramenti operatur in eo.* Hęc ille: cuius verba non possunt trahi ad effectum nutriendæ fidei. Non enim S. Bernardus solùm dicit, per Sacramenta remitti peccata; quod Lutherani fieri volunt, per fidem apprehendentem Christi iustitiam & Dei beneuolentiam; sed etiam dicit, vim Sacramenti operari in nobis, vt non consentiamus peccatis, quod per solam fidem nec potest fieri, neque aduersarij fieri dicunt.

Ad

Ad hoc argumentum ex Patribus variè respondent hæretici; Philippus in Apologia art. 13. audaçter sanè ita loquitur: *Necq; illa litera ex Veteribus scriptoribus proferri potest, qua patrocinetur in hac re Scholasticis.*

Lutherus in lib. contra Cochlaeum, agnoscit loca Augustini, quæ citauerat Cochlaeus, & aliorum Patrum, sed more suo contēnit: *Quòd si qui sunt, inquit, ex Patribus, qui senserunt, Sacramenta sua virtute iustificare, esto etiam Augustinus, & Cochlaeus contendit, nihil moror, hominum sunt dicta, sibi ipsis sapius pugnantium, & pleraq; humano sensu extra Scripturas docentium* Hæc ille. At certè credibilius est, tot sanctos Patres Scripturam intellexisse, quàm vnum Lutherum: quod ipse quoq; concederet, nisi eū planè superbix spiritus excæcasset.

Calvinus respondet lib. 4. Instit. cap. 14. §. vlt. Patres hyperbolicè loqui: *Fortè, inquit, miseros istos Sophistas deceperunt immodica illa Sacramentorum encomia, qua de signis nostris apud Veteres leguntur: quale est illud Augustini, quòd Veteris legis Sacramenta Salvatorem tantum promittebant, nostra Verò dent salutem. Has & similes dicendi figuras, cum non aduerterent hyperbolicas esse, & ipsi hyperbolica sua dogmata promulgarunt.* Hæc ille. At hoc nimis ruinosum est effugium. Nam citati Patres, vt plurimum referunt ad omnipotentiam Dei hos mirabiles effectus: nulla autem est opus omnipotentia, vbi non veri ac proprii, sed hyperbolici sermones sunt. Præterea Patres ipsi aliquando monent, se non loqui hyperbolicè, vt Chrysostomus homil. 4. ad baptizandos, vbi cum dixisset, Baptismo perfectè lauari & mundari animas, monet se non ea dicere ambitionis gratia, id est, amplificandi & eloquentiæ ostendendæ studio. Et Augustinus in epist. 23. circa finem dicit, eos qui non credunt, posse fieri, vt paruuli etiam sine fide actuali per ipsum Sacramentum saluentur, infideles esse. Ex quo intelligimus, cum non hyperbolica encomia, sed dogmata fidei tradere. Deniq; si diceret Calvinus, vnum aut alterum ex Patribus Hyperbole vsum in oratione laudatoria, posset tolerari. At quòd omnes Græci & Latini, non modò in concionibus, sed etiam in libris dogmaticis, vel epistolis, vel commentariis Scripturarum hyperbolicè loquantur, nullo modo credibile est.

Kemnitius in 2. parte Examinis, pag. 98. dicit Scripturam aptè tribuere vim iustificandi Sacramentis: nec esse ea loca

per tropos detorquenda in alium sensum, & sic à Patribus esse intellecta, tamen postea exponit omnia de efficientia per excitationem fidei, quod iam refutauimus.

CAPVT OCTAVVM.

Sexta Classis ex ratione.

EST autem OBSERVANDVM, vt facilius intelligatur efficacia rationum, duplicia esse verba, & signa cetera. QVÆDAM enim sunt non ad alium finem instituta, quàm ad significandum, quæ quidem theórica signa dici possunt. ALIA sunt instituta ad significandum, & efficiendum aliquid, quæ ob id practica dici possunt. Differunt autem quòd priora nihil immediatè, & vi sua operentur, sed solùm repræsentant obiectum, & si fortè sequitur effectus aliquis, non sequitur ex vi illius signi, sed aliunde; posteriora immediatè operantur, & sua quadam virtute; Verbi gratia, cùm quis monet alium, adesse hostem, ille continuò fugit; ceterùm illius fugæ non est causa immediata illa admonitio, sed apprehensio rei noxiæ; proinde admonitio signum fuit prioris generis. Pari ratione, qui viso signo hospitij currit ad hospitium, non mouetur ab eo signo immediatè, sed ab apprehensione rerum, quibus indiget, & quas illud signum repræsentat: proinde illud etiam non est propriè signum practicum, vt hîc accipimus. Nam aliquando solemus vocare signa practica omnia illa, quæ referuntur ad opus, siue mediatè, siue immediatè; quomodo accipiebatur in disputatione de intentione ministri: Tunc enim vocabamus practica omnia verba imperatiua: at hîc ista vocamus theórica; practica autem dicimus, quæ præter significationem habent efficientiam, quomodo sigillum est verè signum practicum, quia non tantum repræsentat imaginem, sed etiam eam imprimit in cera.

Cognoscuntur autem hæc varia signa ex alio discrimine. Nam verba & signa theórica non adhibentur nisi intelligentibus: cùm enim non operentur, nisi repræsentando aliquid menti, stultum esset ea signa adhibere, vbi non est vsus mentis. At verba, & signa practica possunt adhiberi etiam rebus inanimis, & non modò non intelligentibus, sed ne sentientibus quidem; quomodo in Scripturis Iosue imperauit soli,

& lunæ, Ios. 10. *Sol contra Gabaon ne mouearis, & luna contra Vallem Haialot*, Matth. 8. Dominus imperabat mari, & ventis, Matth. 9. Luc. 7. & Ioan. 11. imperauit mortuis. & Petrus Actor. 9. *Tabita*, inquit, *surge*. Matth. 17. *Si habueritis fidem, sicut granum sinapis, discetis monti huic, Transi hinc, &c.* Sic etiam quod attinet ad alia signa; Moyses percussit petram, ut daret aquas: Exod. 17. & Dominus misit digitos in auriculam surdi, & muti, & tetigit etiam linguam eius, ut eum curaret.

Controuersia igitur est inter nos, & hæreticos, quòd illi faciunt Sacramenta, signa prioris generis, dum affirmant ea nō iustificare, nisi excitando fidem: nos facimus generis posterioris. Quare si ostendere poterimus, Sacramenta esse signa posterioris generis, obtinuimus causam.

Sit ergo PRIMA ratio. Sacramenta rectè adhibentur non intelligentibus; ergo sunt signa posterioris generis, & verè iustificanti non excitando fidem more concionis, sed immediate efficiendo sanctitatem. Consequentia manifesta est ex dictis. Antecedens probatur, quia baptizantur ritè infantes, surdi, amentes, dormientes. Exemplum insigne est apud Augustinum, lib. 4. Confess. cap. 4. de quodam baptizato, dum vi morbi extra se positus esset, & omninò ignoraret, quid erga se fieret: cui tamen Sacramentum utilissimum fuit. ADDE quod Concilium Carthaginense IV. can. 76. Arausicanum I. can. 12. Augustinus, lib. 1. de adulterinis coniugiis, cap. 26. & 28. & Leo epist. 91. ad Theodorum, docent Sacramenta Baptismi, & Absolutionis, posse conferri etiam iis, qui in periculo vitæ sunt, licet ipsi vi morbi oppressi nō habeant vsum rationis, vel sensum: modò constet eos antea desiderasse eiusmodi Sacramenta. At certè istis non nisi ineptissimè fieret concio, aut signa adhiberentur ad excitandam fidem.

SECUNDA ratio. Verba & signa Sacramentalia pendent ex diuina institutione, neque ab hominibus propria auctoritate institui potuerunt: ergo non sunt mera signa, ut verba concionis, sed signa practica, & vim habentia aliquid supernaturale efficiendi. Antecedens conceditur ab aduersariis, ut suprà est demonstratum. Probatur consequentia; quia si verba, & signa Sacramentalia essent nuda signa ad excitandam mentem instituta, potuissent ab hominibus facillimè institui, & eandem vim habuissent. Non enim refert ad nudam

significationem, quis illa instituerit, modò repræsentet idem obiectum. Quid enim refert, quis posuerit signa in hospitiiis? & nunquid non eodem modo significant verba Hebraica à Deo scripta in tabulis, & verba Græca, vel Latina scripta ab hominibus? nōne etiam modo eodem incitabant ad bellum tubæ, quas Deus fieri iusserat, Numer. 10. & tubæ prophanæ Ethnicorum? Eodem igitur modo, si Petrus aut Paulus, aut quivis alius instituisset Baptismum, & Eucharistiam, eandem vim haberent illa signa, quam modò habent. Quod certè nō potest dici secundum Catholicorum sententiam, qui volunt hæc Sacramenta non solùm significare, sed etiam, efficere id, quod ex se non potuissent.

TERTIA ratio. Sacramenta non solùm pendent à Deo in institutione, sed etiam in ipso usu: ipse enim est, qui per ministros suos baptizat, consecrat, absoluit, &c. ergo nō sunt nuda signa ad excitandam fidem instituta, vt conciones; sed aliquid præterea efficiunt. Antecedens conceditur ab aduersariis, & probatum est suprà in quæstione de causâ efficiente Sacramentorum, ex illo Ioan. 1. *Hic est, qui baptizat*, ex Chrysostomo, homil. 83. in Matthæum, & Augustino, tract. 5. in Ioannem, & ex aliis. Probatur consequentia. Nam vt verba, & signa cetera solùm significant, & animum excitent repræsentando, nihil refert à quo procedant. Siue enim dominus, siue seruus loquatur, idem semper verba eadem significant; nec magis excitat signum tubæ ad bellum, si tuba insuetur ab Imperatore, quàm à tubicine. Ergo si signa Sacramentalia necessariò pendent à Deo, vt causâ principali, quæ per ministros operetur: fateri cogimur, ea non solùm significare, sed etiam aliquid efficere.

QUARTA ratio. Sacramenta non solùm pendent à Deo, vt institutore, & principali agente, sed etiam à Christi passione, & morte, vt suprà probauimus in principio quæstionis de causâ efficiente Sacramentorum: propter quod Patres communi consensu, docent Sacramenta fluxisse à Christi latere perfollo. Vnde etiam multi veterum docent, Christum baptizari voluisse, vt tactu suæ mundissimæ carnis daret aquis vim mundandi, vt Ambrosius lib. 2. in Lucam, cap. 12. Nazianzenus oratione in sancta lumina, Chrysostomus homil. 25. in Ioannem, Beda in cap. 3. Lucæ, & alij, & ipse etiam Lutherus in homiliis de Baptismo idem fateretur. Ergo non operantur
Sacramenta

Sacramenta solum repræsentando obiectum, more concionis, sed verè efficiendo: nam alioqui nõ eguissent Christi meritis, nec vllam eis virtutem Christus dedisset. Et sicut concio nõ rectè diceretur manasse ex Christi latere, nec dicitur Christus dedisse vllam virtutem concioni ad significandum, quia id ex se habent verba, ita non rectè diceremus, Sacramenta prodidisse ex Christi latere, vel Christum eis vim vllam dedisse.

QUINTA ratio. Sacramenta instituta sunt, vt nos certos reddant remissionis peccatorum, & gratiæ Dei, ergo non solum operantur obiectiuè repræsentando more concionis, sed efficiendo teipsa quod significant. Antecedens admittitur ab omnibus, sed maximè ab aduersariis. Catholici enim docent, ex Sacramentis gigni in nobis moralem quandam certitudinem remissionis peccatorum, non tamen infallibilem. Tamen etsi enim Sacramenta ex se infallibiliter efficacia sint, tamen potest fieri, vt nobis non sint efficacia ob nostram indispositionem, At aduersarij volunt absolutam certitudinem gigni ex Sacramentis: & nos reprehendunt, quasi iubeamus homines dubitare de efficacia Sacramenti; vt patet ex Luthero, in lib. de captiuitate Babylonica; cap. de Baptismo, ex Kemnitio in 2. parte Examinis, cap. de intentione ministri; & ex aliis. Probatur consequentia; nam si Sacramenta solum operarentur significando, & excitando fidem, nullam adferrent certitudinem. Penderet enim tunc Sacramentum à nostra fide, non à Christi institutione; quod est tollere veram certitudinem efficaciæ Sacramenti, vt Lutherus fatetur in lib. contra Anabaptistas, edito anno M. D. XXVIII. vbi fusè persequitur, Sacramentum non debere pendere à fide dantis, vel accipientis, sed à sola Dei institutione, ne incerta reddatur eius efficacia.

Nec potest responderi, Sacramenta adferre certitudinem infallibilem, quia infallibiliter excitent fidem; quæ infallibiliter iustificat: siquidem experimento contrarium didicimus. Quot enim sunt, qui baptizantur, & tamen non credunt? & si concio, quæ est efficacior Sacramentis, ipso etiam teste Luthero in libro contra Cochlaeum, non excitat fidem infallibiliter, vt experimur; quantò minus Sacramenta infallibiliter fidem excitabunt? Ergo si vllam certitudinem Sacramenta adferunt, id est, quia ex opere operato efficiunt quod significant.

S E X T A ratio, Sacramenta contrario modo se habent ad fidem, ac verbum: non igitur eodem modo operantur. Probat^{ur} antecedens. Nam verbum Dei præcedit fidem, Sacramenta autem sequuntur, siquidem: *Fides ex auditu*, Roman. 10. vnde verbum prædicatur infidelibus, & hæreticis quibuscunque, vt incipiant credere. At Sacramenta requirunt fidem saltem in adultis, nec possunt rectè conferri, nisi iis, qui prius credunt. Vnde Actor. 8. cùm Eunuchus diceret: *Ecce aqua quis prohibet me baptizari?* respondit Philippus: *Si credis ex toto corde, licet.* Et semper in Ecclesia consuetudo fuit, vt qui Christiani esse vellent, primùm fierent Catechumeni, & satis diu instruerentur, & non nisi instructi, & firmi, ac stabiles in fide baptizarentur. **I V S T I N V S** in Apologia ad Antoninum explicans mores Ecclesiæ: *Quicumque*, inquit, *persuasi fuerint, & crediderint vera esse, quæ à nobis traduntur, & dicuntur, ac vivere se ita posse receperint; orare ieiunantes, & petere à Deo priorum peccatorum remissionem iubentur, nobiscum eis vna, & orantibus, & ieiunantibus: deinde adducuntur à nobis, ubi aqua est, atque eo regenerationis modo, quo ipsi regenerati sumus, regenerantur.* Hæc ille. Ex quo sequitur, non modò falsam, sed etiam ineptissimam esse hæreticorum sententiam.

S E P T I M A ratio, Sacramenta non minus sunt efficacia, si dentur lingua Græca, aut Latina, quam nō intelligat, qui Sacramentum suscipit, quàm si dentur lingua vulgari, quam omnes intelligant; Ergo non operantur more concionis, sed habent effectum suum præter fidei excitationem. Consequētia patet, quia si operarentur more concionis, nihil efficere^{nt}, nisi darentur lingua vulgari. Antecedens probatur, quia Lutherani, & Calvinistæ admittunt nostrum Baptisma, quod semper datur lingua Latina; non enim rebaptizant à nobis baptizatos.

O C T A V A ratio, si Sacramenta operarentur excitando fidem, non esset vlla causa cur adhiberentur hominibus doctis, qui legere possunt Scripturas, vel etiam imperitis, qui audiunt conciones: multò enim melius excitat fidem Scriptura, & concio, quàm Baptismus, vel Eucharistia. Itaque præstaret loco Baptismi legere vnum caput ex Bibliis. **A D D E**, quod etiam imago Baptismi in tabula depicta posset idem facere, quod facit Baptismus; nam facit visibilem promissionem, & excitat

excitat fidem: & hoc præstat Baptismo, quod manet semper, cum Baptismus semel fiat, & transeat.

NON A ratio, Sacramēta non prosunt nisi suscipientibus, etiam si multi alij præsentēs sint, & audiant, & videant quę geruntur: alioqui non esset opus, ut singuli baptizarentur, & communicarent corpori Domini, sed satis esset, ut vnus baptizaretur, & communicaret coram tota multitudine; ergo non operantur more concionis, excitando fidem. Consequentia patet. Nam si operarentur more concionis, prodesse om-
nibus audientibus: omnes enim excitari possunt ad fidem, qui adsunt, dum pronuntiatur promissio Dei, & signo visibili ante oculos ponitur. Neque refert, quod Sacramentum solum dirigi videtur ad vnum. Nam etiam concio potest dirigi ad vnum, & tamen omnes audientes excitaret.


PRÆTEREA dum minister baptizat, ac dicit; Ego te baptizo, non vult dicere, Ego te abluo à peccatis (secundum Lutheranos) sed, Ego testificor tibi remitti peccata, ut Melancthon exponit in locis, cap. de Baptismo, & Calvinus lib. 4. Instit. cap. 15. §. 15. & omnes alij exponere coguntur. Porro hæc testificatio non prodest ei, qui baptizatur, nisi quia interim cogitat, & credit, Deum sibi esse propitium per Christum, ut ipsimet fatentur. Possunt autem omnes, qui adsunt, idem cogitare, & credere: siquidem promissio est communis, & quod vni dicitur, omnibus conuenit. Non enim ided illi, qui baptizatur, Deus est propitius, quia baptizatur (ex Lutheranorum sententia) sed ided vera est testificatio Baptismi, quia Deus illi est propitius, modò per fidem apprehendat hanc Dei beneuolentiam.

DECIMA ratio, si Sacramenta solum operarentur significando, nihil interesset inter nostra Sacramenta, & Sacramenta veteris legis: nam etiam illa significabant Christi gratiam, & remissionem peccatorum, & excitare poterant fidem.

Id autem esse falsum in sequenti quæstione demonstrabimus.



CAPVT NONVM.

Soluuntur obiectiones ex Scripturis depromptæ.

SOLVENDA sunt argumēta Lutheri, Philippi, Caluini, Kemnitij, & aliorum: quæ quidem partim sumuntur à Scripturis, partim à Patribus, partim à ratione.

Vt igitur à PRIMA classe argumētorum incipiamus. PRIMVM argumentum sumitur ex Habacuch 2. & Roman. 1. & Hebræ. 10. *Iustus ex fide viuit*, inquit Scriptura, non autem dicit, Iustus ex Sacramentis viuit; igitur Sacramenta non iustificanti, nisi excitando fidem. Confirmatur ex similibus locis, vt Roman. 4. *Credidit Abraham Deo, & reputatum est illi ad iustitiam*. Et Roman. 10. *Corde creditur ad iustitiam*, & non addidit Paulus; Et corpore suscipitur Sacramentum ad iustitiam. Ita Lutherus in Babylone, cap. de Baptismo, & in assert. I. articuli.

RESPONDEO PRIMO, non dicit Scriptura, Iustus ex sola fide viuit, proinde relinquitur suus locus Sacramentis. Alioqui non solum Sacramenta, sed etiam Deus, & Christi meritum, & alia excluderentur, quæ neque ipsi Lutherani excludi volunt: non enim ait Scriptura, Iustus ex Deo viuit, aut ex Christi merito viuit.

SECUNDO, etsi his verbis Scriptura non dicit, iustum ex Sacramentis viuere; tamen idem dicit aliis verbis. Nam cum ait, hominem per Baptismum regenerari, Ioan. 3. & Tit. 3. quid aliud dicit, nisi Baptismum dare vitam?

TERTIO, verba illa Prophetica: *Iustus ex fide viuit*. non significant ad litteram, Iustum hominem fieri, aut reputari ex fide, vt Lutherani volunt; sed significant, Iustum ex fide quam habet, constanter expectare, quæ Deus promisit, & non frangi, aut deficere, etiam si promissiones tardari videantur. Hunc esse verum sensum non dubitabit, qui expendet locum Habacuch, & Pauli ad Hebræos. vterque enim tractat de patientia, & longanimitate: *Si moram fecerit*, inquit Propheta, & ex eo Apostolus, *expecta eum, quia veniens veniet, & non tardabit*. Ecce qui incredulus est, non erit recta anima eius in semetipso: *Iustus autem ex fide viuet*. Ad Confirmationem respondeo eodem modo: Nam Paulus tribuit iustificationem fidei,

fidei, sed non soli. Et præterea idem tribuit Scriptura in aliis locis Sacramento, vt Actor. 2. *Baptizetur unusquisque vestrum in remissionem peccatorum.* Et Actor. 22. *Baptizare, & ablue peccata tua inuocato nomine ipsius.*

SECUNDVM argumentum ex Marci ultimo: *Qui crediderit, & baptizatus fuerit, saluus erit; qui vero non crediderit, condemnabitur.* Lutherus locis citatis in primo argumento dupliciter ex hoc testimonio argumentatur. PRIMO sic: *Qui credit, & baptizatur, saluus est, qui non credit, damnatur, etiam si baptizaretur.* Igitur non Baptismus, sed fides saluat. SECUNDO sic; Dominus ait: *Qui non crediderit, condemnabitur,* & non ait; *Qui non fuerit baptizatus, condemnabitur:* Igitur fides sola saluat, non Baptismus.

Ad PRIMVM respondeo, malam esse consequentiam. Solum enim ex illo antecedente colligi potest, Ergo non solus Baptismus saluat; non autem, Ergo Baptismus non saluat. Alioqui ex eo, quod Paulus dicit, 1. Corinth. 13. Fidem nihil prodesse sine charitate, possemus colligere, Ergo fides nihil prodest. Ad SECUNDVM dico, Dominum non dixisse; *Qui non fuerit baptizatus, condemnabitur;* non quia hoc non sit verissimum, cum idem Dominus dixerit, Ioan. 3. *Nisi quis renatus fuerit ex aqua, & Spiritu sancto, non potest intrare in regnum Dei;* sed quia non erat opus hoc dicere, cum per se intelligeretur ex eo, quod dictum erat: *Qui non crediderit, condemnabitur.* Qui enim non credit, consequenter non vult baptizari, & etiam si vellet, nihil ei prodesset. At in affirmatione oportuit addere Baptismum fidei, quia non omnis, qui credit, baptizatur. Similia sunt argumenta à genere ad speciem. Negatiue enim valet, Non est animal, igitur nec homo; affirmatiue non valet, Est animal, igitur est homo.

TERTIVM argumentum sumitur ex Paulo, Rom. 4. sic enim ait Philippus in Apologia, artic. 13. *Paulus reclamat* (nimirum contra Scholasticos, docentes Sacramenta ex opere operato iustificare) & negat Abrahamum iustificatum ex Circumcisione, sed Circumcisionem dicit esse signum propositum ad exercendam fidem nostram. Igitur eodem modo Sacramenta Christiana non iustificant, nisi excitando fidem.

RESPONDEO PRIMO, non dicit Paulus, Circumcisionem fuisse signum propositum, ad exercendam fidem: sed fuisse datam Abrahamo vt signaculum iustitiæ fidei; id est, factum hoc

208 Cap. IX. De effectu Sacramentor. Lib. II.

hoc priuilegium Abrahamo, vt ipse primus haberet Sacramentum Circumcisionis; quia id meruerat eius obedientia, & fides. Fuit enim hoc testimonium iustitiæ fidei ipsius, vt supra monuimus, cap. 17. Itaque hic locus nihil facit ad rem. Nam Circumcisio soli Abrahamæ fuit signaculum iustitiæ fidei; & illi non fuit signaculum excitans fidem, sed testimonium fidei iam antè habitæ.

SECUNDO, non est eadem ratio Circumcisionis, & Baptismi. Nam de Circumcisione Paulus dicit: *Circumcisio nihil est*, 1. Cor. 7. de Baptismo autem ad Tit. 3. *Saluos nos fecit per lauacrum regenerationis*. Sed de hoc postea.

QUARTVM argumentum est Zvvinglij, in lib. de vera, & falsa religione, qui adfert illud Luc. 5. *Quis potest dimittere peccata, nisi solus Deus?* Pharisei, inquit Zvvinglius, intellexerunt, solum Deum, non autem Sacramenta posse iustificare; iuxta illud Isaia 43. *Ego sum, qui deleo iniquitates*.

RESPONDEO, miram esse hæreticorum cæcitatem, qui malunt Phariseis credere, quàm Christo. Nam si Pharisei dixerunt: *Quis potest dimittere peccata, nisi solus Deus?* Christus ibidem paralyticum sanauit, vt ostenderet, se etiam vt hominem posse peccata dimittere: *Vt autem sciatis*, inquit, *quia Filius hominis habet potestatem in terra dimittendi peccata; tunc ait paralytico; Tolle lectum tuum, &c.* Et præterea nonne Christus hominibus dixit, Ioan. 20. *Quorum remisistis peccata, remittuntur eis?* Nec tamen ob id falsa erunt verba Isaia. Ipse enim loquitur de eo, qui propria auctoritate peccata dimittit, qui sine dubio solus Deus est.

QUINTVM argumentum est Kemnitij, ex cap. 5. ad Ephes. vbi Apostolus ait: *Mundans eam lauacro aqua in verbo &c.* vbi totam vim Baptismi tribuit Paulus verbo. Verbum autè operatur excitando fidem; nam: *Fides ex auditu, auditus autem per Verbum Christi*, Roman. 10. ADDET etiam Kemnitius illud, 1. Petri 3. *Vos saluos facit Baptisma non carnis depositio sordium, sed conscientia bona interrogatio in Deum per resurrectionem Iesu Christi*. vbi Baptisma dicitur saluare per resurrectionem, id est, per fidem resurrectionis.

RESPONDEO ad Ephes. 5. per verbum vitæ, non intelligi concionem, cuius effectus est fides, sed formam Sacramenti, id est, verbum consecratorium, & practicum, non concionale; Ita enim exponunt omnes interpretes, vt supra ostendi-

mus in quæst. de forma Sacramenti. Porro, S. Petrus non dicit, Baptisma saluare per fidem resurrectionis, sed per resurrectionem, id est, vt Beda in hunc locum exponit, quia cùm baptizamus, repræsentamus Christi resurrectionem, emergendo ex aquis; & quia Baptismus facit iustificando nos, vt in nouitate vitæ ambulemus, quomodo Christus per resurrectionem nouam vitam viuere cœpit, sicut etiam Paulus dicit, Roman. 6. Similis phrasis est Rom. 4. vbi Paulus dicit: *Christus traditus est propter delicta nostra, & resurrexit propter iustificationem nostram.* quod idem est, ac si diceret, per Christi passionem morimur peccato, per Christi resurrectionem iustitiæ vita viuere incipimus: vbi sine dubio præpositio, *Per*, nō significat causam meritoriam, sed causam exemplarem. Non enim Christus meruit resurgēdo, cùm fuerit extra viam & statum merendi.

CAPVT DECIMVM.

Soluuntur obiectiones ex Patribus.

RIM o obiiciunt Augustinum, qui ait, non Sacramentum, sed fidem Sacramenti iustificare. Hanc sententiā sine nomine Augustini, vt prouerbum vulgare, citat Martinus Lutherus in lib. de captiuitate Babylon. cap. de Baptismo, & in assert. artic. 1. sed in lib. contra Cochlæum citat nomine Augustini. Quod etiam facit Philippus in Apologia, artic. 13. vbi postquam dixerat, non posse produci vllam literam ex veteribus pro sententia Scholasticorum, addit: *Immo in contrarium ait Augustinus, quod fides Sacramenti, non Sacramentum iustificet.*

RESPONDEO, Augustinum nihil eiusmodi dicere expressis verbis, sed contrarium potiùs. Nam in epist. 23. ad Bonifacium dicit Augustinus, paruulos esse fideles, & saluari, si moriuntur post Baptismum, quia etiamsi non habent fidem, habent tamen fidei Sacramentum: quod est idem, ac si diceret; Paruulos non saluat fides, sed Sacramētum fidei. Fortasse Lutherus collegit eam sententiam ex tract. 80. in Ioannem, vbi Augustinus ait, aqua Baptismi mundari cor, id faciente verbo, non quia dicitur, sed quia creditur. Sed iam suprā ostēdimus in quæstione de forma Sacramenti, illud (quia creditur) non significare actum fidei, sed obiectum. Quod si alicubi
O inueni-

inueniretur disertis verbis ea sententia, sine dubio exponenda esset pro eo solo tempore, quo quis non potest habere Sacramentum: in eiusmodi enim necessitate sufficit fides Sacramenti cum voto eiusdem, ut Augustinus dicit, lib. 4. de Baptismo, cap. 22. sicut etiam est contrario in paruulis, qui non possunt habere fidem actualem, sufficit fidei Sacramentum, ut ex epist. 23. Augustini iam probauimus.

SECUNDO proferunt illa verba Augustini ex lib. quaestionum veteris & noui Testamenti, q. 59. *Qui Baptismum putat carnaliratione consistere, hic non est spiritualis: nec donum caeleste poterit consequi, qui se per aquam non per fidem commutari credit.*

RESPONDEO PRIMO, librum citatum non esse Augustini, sed alicuius haeretici, qui multa docet, & contra fidem. & contra Augustinum, ut quod mulier non sit creata ad imaginem Dei, quaest. 21. quod Melchisedech fuerit Spiritus sanctus, quaest. 109. & quod Adam non habuerit Spiritum sanctum, quaest. 123.

SECUNDO dico, testimonium allatum non esse contra nos, sed pro nobis. Nam auctor hic loquitur de causa formali, non de efficiente iustificationis, ac dicit hominem immutari, & renouari non per externam lotionem, quasi nihil sit Baptismus noster, nisi mundatio carnis, ut olim Baptismata Iudaeorum; sed per fidem, quae cum est perfecta, & uiua, formaliter mundat & iustificat, iuxta illud Petri, Actor. 15. *Fide purificans corda eorum.* Hanc autem fidem, id est, formalem iustificationem hic auctor dicit dari in Baptismo: *Aqua*, inquit, *ternitur, sed qui non uidetur, Spiritus operatur, & fides in ipso sit.* ubi non potest loqui de fide imperfecta, & inchoata, quae secundum nos, disponit ad iustificationem, & quae secundum Lutheranos, apprehendit iustificationem; ista enim praecedere debet Baptismum. Loquitur igitur de fide perfecta, quae infunditur in Baptismo, & quae iustificat formaliter. Quod idem definiuit Concilium Tridentinum, sessione sexta, capite septimo.

TERTIO profert Calvinus, lib. 4. Instit. cap. 14. alium locum Augustini, ex lib. 3. quaest. in Leuiticum, q. 84. ubi Augustinus duo dicit. PRIMO, ministrum hominem solum praebere Sacramentum visibile, Deum autem praebere inuisibilem gratiam. SECUNDO, ita separari haec duo, ut in quibusdam sit Sacramen-

Cap. X. De effectibus Sacramentorum. Lib. II. 211

cramentum sensibile sine gratia inuisibili, ut in Simone Maggo à Philippo baptizato; in quibusdam inuisibilis gratia sine Sacramento visibili, ut in bono latrone.

Ad PRIMVM respondeo, duobus modis hominem ministrare Sacramenta. VNO modo faciendo, quod potest ex naturali sua virtute. ALIO modo applicando Sacramenta ut instrumenta à Deo mota, & eleuata ad actionem supernaturalem faciendam. Primo modo verè dicimus, hominem non iustificare, sed solum lauare corpus, aut aliquid huiusmodi; & sic loquitur Augustinus. Alio modo verè dicimus, hominem iustificare, sed non alia actione, quàm illa, qua Deus ipse virtutur ad iustificandum. Atq; ad hunc modum exponendum est, quod ait S. HIERONYMVS, in cap. 4. Isaia, vbi dicit: *Homo aquam prabet, Deus autem Spiritum sanctum.* Ad SECUNDVM dico, illa posse separari; non quod Sacramentum sensibile nõ sit causa inuisibilis gratiæ, sed quòd possit impedi ei effectus per obicem, vel indispositionem subiecti, & quod possit Deus sine Sacramento etiam dare gratiam suam.

QUARTO solet adferri ex Augustino alius locus ex lib. 15. Trinit. cap. 26. vbi dicit, solum Deum posse dare Spiritum sanctum, & idè Apostolos non dedisse Spiritum sanctum, quibus manus imponebant, sed orasse, ut descenderet.

RESPONDEO, aliud esse dona Spiritus sancti, aliud ipsum Spiritum sanctum. Dona Spiritus sancti dant Sacramenta; ipsum Spiritum sanctum nõ potest propriè dare, nisi is, à quo ille procedit. Posset etiam dici, Spiritum sanctum ex auctoritate non dari, nisi à Deo, à quo procedit, tamen instrumentaliter dari etiã ab hominibus. Nam Actor. 8. legimus, per manus Apostolorum datum fuisse Spiritum sanctum, quod etiã ibidem fatetur Augustinus.

QUINTO proferunt ex AVGVSTINO, lib. 19. contra Faustum, cap. 16. illa verba: *Quid sunt, quæq; corporalia Sacramenta, nisi quadam verba visibilia?* Hinc enim colligi putant, Sacramenta non iustificare, nisi more concionis, aut picturæ. quæ solum representando agit.

RESPONDEO, Augustinum eo loco assignare vnum Sacramenti effectum, id est, significationem, sed non propterea negare ceteros, quos alibi sæpe posuit. Cur autem eo loco solum de significatione agat; causa fuit, quia disputabat de Sacramentis in genere, id est, de Sacramentis vtriusq; Testamenti:

proinde ponere debuit effectum communem omnibus Sacramentis. Cur autem appellauerit Sacramenta visibilia verba, illa fuit causa, quia disputabat contra Manichæos, qui reprehendebant mutationem Sacramentorum veterum in noua: ac dixerat necessariò mutanda fuisse verba post Christi aduentum; nam cum veteres dicerent, Christus veniet, morietur, resurget: nos dicere debemus; Venit, mortuus est, resurrexit. Inde collegit etiam Sacramenta mutanda fuisse, ne iam falsò significarent. Vt autem similitudo aptissima demonstraretur, dixit: *Quid sunt Sacramenta* (nimirum quoad significationem) *nisi visibilia Verba?*

SEXTO profert Kemnitius alium locum Augustini, ex lib. 21. de ciuitate Dei, cap. 25. vbi B. Augustinus reprehendit eos, qui sentiebant non posse damnari eos, qui Sacramenta percipiunt Baptismi, & cœnæ Domini, licet nec fidem, nec bonam vitam teneant. Isti enim videntur omninò sensisse Sacramenta iustificare ex opere operato, ita vt vi sua iustificarēt, non per fidem.

RESPONDEO, Augustinus meritò illos reprehendit, quia illi non solùm credebant, Sacramenta iustificare ex opere operato, sed credebant non posse amitti gratiam, & salutem semel acceptam in Sacramento per quæcunque peccata postea accedentia; quæ sententia non est nostra, sed potius Martini Lutheri, qui in libro de captiuit. Babylon. cap. de Baptismo, ait: *Vides quàm diues sit homo Christianus, seu baptizatus, qui etiam volens, non potest perdere salutem suam quantiscunque peccatis, nisi nolit credere?*

SEPTIMO solet obiici BERNARDVS, qui in sermone de cœna Domini sic ait: *Sicut inuestitur Canonicus per librum, Abbas per baculum, Episcopus per annulum, sic diuisiones gratiarum diuersis sunt tradita Sacramentis.*

RESPONDEO, non comparat Bernardus Sacramēta cum libro, baculo, & annulo ratione efficientiæ, sed solùm ratione diuersitatis Sacramentorum. Nam alioqui ibidem docet, Sacramenta conferre gratiam, vt suprà citauimus.

VLTIMO proferunt Tertullianum, qui in libro de Pœnitentia vocat Baptismum fidei ob signationem: quomodo etiam loquitur Basilius, lib. 3. in Eunomium, & libro de Spiritu sancto, cap. 12.

SED ad hæc respondimus suprà cap. 17. vbi ostendimus, Baptismum

ptissimum vocari sigillum fidei, nō quia excitet fidem, sed quia per Baptismum testatur is, qui baptizatur, se credere, & etiam Ecclesia baptizans dat illi publicum testimonium ipsius fidei. Sed quanquam Patres id verè tribuant Baptismo, non tamen negant habere etiam alios effectus præstantiores. immò etiam eos asserunt, vt suprà ostendi.

CAPVT XI.

Soluuntur obiectiones ex ratione depromptæ.

PRIMA ratio est Lutheri in Babyl. cap. de Baptismo, & Philippi in Apologia, artic. 13. & aliorum. In omni Sacramento requiritur verbum promissionis: vbi est promissio, ibi necessariò exigitur fides, quæ promissionem accipiat: ergo fides est, quæ immediatè operatur, & iustificat. Confirmat Lutherus, quia multi per fidem saluantur sine Sacramento, vt qui non habent à quo baptizentur, & contrà qui Sacramentum habent sine fide, damnantur. Igitur in Sacramento fides est, quæ iustificat, non Sacramentum.

RESPONDEO, tribus modis peccare hoc argumentum, quod tamen est cōmunissimum apud aduersarios. PRIMVM enim, verbum promissionis requiritur quidem in institutione Sacramenti, at non requiritur in ipso vsu Sacramenti: id quod patet. Nam qui baptizant, non dicunt: *Qui crediderit, & baptizatus fuerit, saluus erit*, quæ est promissio, sed dicunt; Ego te baptizo in nomine Patris, &c. Et qui consecrant Eucharistiam, non dicunt: *Qui manducat hunc panem, &c. viuet in aeternum*. Sed: *Hoc est corpus meum*. Et qui absoluunt, non dicunt: *Quorum remisistis peccata*, sed; Ego absoluo te. Porro hīc agimus de vsu Sacramenti, non de institutione: agimus enim de effectu Sacramenti; operatur autē Sacramentum, dum eo vtimur. Quare argumentum nō est ad propositum, & falsum assumit. SECVNDO, etiamsi in vsu requireretur semper promissio, & consequenter fides, nō inde posset cōcludi, fidem esse, quæ immediatè iustificat: diceremus enim, fidem requiri vt conditionem, & vt quæ applicaret homini Sacramentum. Sicut autem medico offerente pharmacum, & promittente sanitatem, requiritur in ægrotō fides, quæ accipiat seriò illam promissionem, & medico assentia-

tur; non tamen est ea fides, quæ sanat ægrotum, sed pharmacum, licet sine fide pharmacum acceptum nō fuisset: ita quoque, &c. TERTIO, etiamsi & promissio requireretur, & fides in Sacramento iustificaret: non tamen inde concludi posset, quod illi concludunt, solam fidem agere, Sacramentum autem nihil efficere: sed concluderetur, utrumque esse necessarium, & vnum sine altero non sufficere.

AD confirmationem RESPONDEO, fidem, & Sacramentum paria in hac re videri posse. Nam sicut in necessitatis articulo potest saluari aliquis sine Sacramento in re, modò habeat votum eius, & fidem, ac pœnitentiam: ita è cōtrario salvantur paruuli sine fide actuali per solum Sacramentum. Et sicut in adultis, qui habet Sacramentum, & non vult credere, damnatur; ita qui habet fidem, & nō vult Sacramentum percipere, damnatur. Ex quo intelligimus utrumq; requiri, cū haberi potest, & utrumque iustificare, sed diuerso modo. Nam Sacramentum actiue iustificat, ut instrumentum Dei, fides, & pœnitentia iustificat, ut dispositiones, & secundum aliquos, ut causæ meritoria de congruo. Neque est eadem gratia (ut suprà diximus) quæ datur vi Sacramenti, & quæ datur sine Sacramento ob dispositionem, vel meritum de congruo fidei, & pœnitentiæ.

SECUNDA ratio est Zvinglij in libro de vera & falsa religione, cap. de Sacramentis. Solus Deus nouit corda hominum, igitur solus ipse potest ea mundare: non ergo Sacramenta iustificat. Confirmatur PRIMO, quia si Sacramenta ex opere operato iustificarent, Deus esset obligatus Sacramentis, quippe qui non posset non iustificare eum, qui Sacramentum percipit.

RESPONDEO, argumentum probat, Sacramenta non esse causas principales; non autem non esse instrumentales. Non enim est necesse ut Sacramentum nouerit cor, vel conscientiam; sed satis est, si Deus nouerit, qui per Sacramentum operatur.

Ad confirmationem dico, Deum non esse alligatum Sacramentis, sed contra Sacramenta esse alligata Deo; nam Deus potest sine Sacramentis iustificare, Sacramenta sine Deo non possunt. Quod autem Deus non possit non iustificare eum, qui accipit fideliter Sacramenta, nō idcō fit, quia sit
alligatus

alligatus Sacramentis, sed quia est alligatus (si sic loqui licet) veritati suæ. non enim potest non esse fidelis in promissis suis.

ADDE, quòd hæc omnia argumenta, si quid concluderent, concluderent etiam, Christi sanguine, vel fide in Christum, non posse homines iustificari. Nam Christi sanguis non scrutatur corda, nec penetrat ad animam magis, quàm Sacramenta: & sicut absurdum videtur aduersariis Deum alligari aliquo modo Sacramentis, ita absurdum videri debet alligari Christi sanguini, aut nostræ fidei. Et tamen aduersarij nihil sapius docent, quàm nos Christi sanguine, & fide in ipsum iustificari.

TERTIA ratio Caluini, lib. 4. Instit. cap. 14. §. 14. Qui dicunt, Sacramenta iustificare, abstrahunt homines a Deo, & faciunt vt in spectaculo rei corporeæ acquiescant, non in ipso Deo.

RESPONDEO PRIMO, si argumentum aliquid valeret, probaret non debuisse Deum in Testamento veteri proponere serpentem æneum, quem qui aspicerent sanarentur; imò nec debuisse Deum incarnari, ne in spectaculo rei corporeæ homines acquiescerent.

SECUNDO respondeo, contrarium sequi ex nostra doctrina. Nam cum dicamus, Sacramenta ex se non habere virtutem, sed Deum esse, qui per illa operatur, hoc ipso trahimus homines ad Deum; quomodo qui à Christo curabantur, vel per tactum fimbriæ, vel etiam per sputum, & lutum non acquiescebant in fimbria, & sputo, ac luto, sed agnoscebant, & laudabant Christi virtutem.

QUARTA ratio est Kemnitij loco citato in 2. parte Examinis, cap. de efficacia Sacramenti; Eodem modo iustificant verbum Dei, & Sacramenta; sed verbum iustificat solum excitando fidem, igitur & Sacramenta solum iustificant excitando fidem. Maiorem propositionem probat PRIMO, quia Scriptura sicut dicit Sacramenta iustificare, sic etiam dicit verbum iustificare, Rom. 1. *Euangelium Virtus Dei est in salutem omni credenti.* SECUNDO probat, quia in iustificatione per Sacramenta concurrunt duæ quasi manus, vna est Dei offerentis gratiam, altera est hominis illam accipientis; manus Dei est verbum, & Sacramentum; manus hominis est fides. Ergo nec verbum, nec Sacramentum quidquam prodest, nisi fide accipiatur, & si quid prodest, ideo prodest, quia

fide accipitur. Hebræ. 4. *Non proficit illis sermo auditus, non admistus fidei.*

RESPONDEO, falsum esse, verbum, & Sacramentum eodem modo iustificare; immò, vt suprà diximus, ita diuerso modo iustificant, vt vnum, id est, verbum præcedat fidem, alterum, id est, Sacramentum, sequatur fidem.

Ad PRIMAM probationem respondeo PRIMO, per Euangelium eo loco intelligi posse non concionē, sed mysteria ipsa Euangelij, vt incarnationem, passionem, Sacramēta, &c. SECUNDO, si accipiatur Euangelium pro cōcione, dico ibidem explicari, quomodo Euangelium saluet. Nam subiungit Apostolus: *Iustitia enim Dei reuelatur in eo ex fide in fidem.* At nusquam Scriptura ita exposuit modum saluandi Sacramentorum. TERTIO dico, Scripturam, & verbo, & Sacramento tribuere vim iustificandi, sed nusquam dicere eodē modo iustificare; neq; licet ex eo quod legimus, verbum, & Sacramentum iustificare, continuò colligere, ergo eodem modo iustificare: Alioqui liceret etiam concludere eodem modo iustificare verbum, quo iustificat Deus, vel fides, vel Christi passio, hæc enim omnia dicuntur in Scripturis iustificare: & tamen non admitteret Kemnitius, ista eodem modo iustificare.

Ad SECUNDAM respondeo, verbum, & Sacramenta dici posse manum Dei, per quam ad nos venit gratia, & iustitia: sed non eodem modo. Manus enim multa officia habere potest; nam & porrigit aliquid, & etiam operatur. Porro verbum dici potest manus, quia offert salutem, non autem quia re ipsa operetur, vel applicet: contra verò Sacramentum dicitur manus, quia applicat re ipsa Christi meritum, & operatur gratiam. Cuius differentia signum euidentius est, quod verbum non prædicatur, nisi intelligentibus, nec prodest, nisi intelligatur, & credatur: at Sacramentum exhibetur, & prodest etiam non intelligentibus, vt infantibus, & amentibus. Pari ratione fides dici potest manus nostra, non, vt vult Kemnitius, quia apprehendat promissionem, & ipsa sola hoc modo iustificet; sed quia remouet obstacula, & disponit animam, vbi est necessaria talis dispositio. Alioqui non solum non prodesset Baptismus infantibus, & amentibus, sed nec adultis, & sanis, si in ipso momento Baptismi paululum distraherentur animo; tunc enim fides non apprehendit promissiones.

Argumentum **POSTREMUM** Zvvinglij est: Fieri non potest, ut Sacramenta, quæ sunt res crassæ & materiales, ad animam penetrent; igitur non purgant sordes peccati, quæ in anima resident.

Confirmari potest hoc argumentum. **PRIMO**; Quia si villo modo Sacramenta possent operari in animam, id fieri deberet per actionem, quam habent in corpora, ut Augustinus dicit de aqua, quæ corpus tangit, & cor abluit: at sæpe Sacramenta ne ipsum quidem corpus attingunt. Nam cum quis absoluitur, non est necesse, ut sonus verborum, aut manus sacerdotis pertingat ad pœnitentem. Pari ratione Matrimonium potest fieri solis nutibus, vel inter absentes. Denique non est necesse, ut verba consecrationis realiter panem consecrandum attingant: possunt enim ea verba dici tam submissè, & in tanta distantia, ut aër motus non perueniat ad panem. Denique de ipso Baptismo idem probari potest; nam virtus debet esse in verbis.

SECUNDO; Iustificatio est opus nobilius, & difficilius, quàm sit creatio mundi, ut Augustinus docet tract. 72. in Ioan. Et patet, quia in iustificatione reperitur creatio gratiæ, quæ est res quædam diuina, & supernaturalis: at nulla creatura potest esse instrumentum creationis, ut S. Thomas docet, 1. par. quæst. 45. art. 5.

TERTIO; Iustificatio fit in momento: Sacramenta in momento operari non possunt; ergo non possunt iustificare. Probat *Minor*. Nam non potest operari aliqua causa, nisi quando est: actio autem Sacramentalis, cum sit successiua, in instanti esse non potest. Explico: res successiua non habent esse, nisi dum fiunt, consistunt enim in quodam fluxu. Quare non est assignare vllum instans, in quo sit res successiua, vel etiam vlla pars eius: sed tantum est assignare instans in quo est quiddam indiuisibile continuatiuum rei successiua, quod quidem continuatiuum non est res successiua, nec pars eius: res enim successiua essentialiter requirunt extensionem quandam. Igitur intelligi nequit rem successiuam agere, nisi successiue, & proinde in tempore, cum ipsa in nullo instanti sit, & non possit id quod non est, vel quando non est, agere.

QUARTO; Velest in Sacramentis aliqua virtus superaddita diuinitus, vel non. Si non est, ergo non possunt attingere effectum supernaturalem: est enim inintelligibile, quod ali-

qua res maneat prorsus, sicut antea erat, & nihil accipiat, & tamen possit facere, quod antea non poterat. Si est, vel est virtus corporalis, vel spiritualis. Si corporalis, non poterit efficere rem spiritualem, neque agere in rem spiritualem, proinde nihil proderit; nam ideo virtus superaddita requiritur, quia Sacramentum non potest agere in animam, quæ est spiritus, nec potest producere gratiam, quæ est spiritualis. Si autem virtus spiritualis est; non igitur poterit esse in Sacramento corporali. Non enim accidens spirituale, & indiuisibile in subiecto corporali, & extenso recipi potest; omne enim quod recipitur, per modum recipientis recipitur.

Præterea QUINTO; Ista virtus vel esset tota in qualibet parte Sacramenti, vel pars eius in vna parte Sacramenti, & pars in altera. Non primum, quia tunc sequeretur illam non pendere à subiecto in esse, nec propriè inhaerere; quare esset substantia, non accidens. Item etiam prolato quouis verbo, statim produceretur effectus, quod nemo concedit. Non etiam secundum, quia tunc esset corporea, & præterea prolato primo verbo periret pars virtutis, prolato secundo periret altera pars: & sic virtus illa, vel tota, vel maxima ex parte periret, antequam effectus inciperet produci. Quare superuacanea erat illa virtus in partibus Sacramenti præcedentibus effectum.

SEXTO; Vel ista virtus est in verbis tantum, aut in elemento tantum, aut in utroque. Si in verbis tantum, quomodo Eucharistia sumpta iustificat? Si in elemento tantum, quomodo verba consecrationis Eucharistiæ operantur? Si in utroque, vel erit eadem virtus, & hoc non potest esse, cum non possit vnum accidens esse in duobus subiectis: vel erunt duæ virtutes, & tunc erunt in vno Sacramento duæ virtutes, quod videtur absurdum. Si dicas, Erunt duæ partiales. Contrà, quia tunc deberent concurrere simul ad opus; at aliquando accidit, ut vna pars Sacramenti longo tempore adhibeatur post aliam, ut cum vnus hodie confitetur, & cras absoluitur.

DENIQUE, inintelligibile est (ut Kemnitius dicit) quid sit ista virtus, quando adueniat, quando desinat esse, &c.

Ad hæc argumenta posset tripliciter responderi. PRIMÓ posset, si quis vellet, confiteri ignorantiam circa huiusmodi nodos; & tamen satisfacere hæreticis, immò etiam ora illorum obstruere. Nam tenemur quidem rationem reddere eius,

eius, quæ in nobis est spei, 1. Petri 3. sed id facere tenemur ex principiis fidei, non ex Metaphysica. Nam S. A V G V S T I N U S lib. 3. de peccatorum meritis, & remis. cap. 4. *Ego, inquit, loquens de argumentis contra modum translationis peccati originalis, etiamsi istorum argumenta soluere non valeam, Video tamen in harendum esse divinis literis, &c.* Et in epist. 29. ad Hieronymum, dicit se, cum interrogatur quomodo peccatum Adæ propagetur in posteros, respondere solitum: *Hoc, & alia multa, me ignorare confiteor.* Et tamen non propterea deerat defensionis fidei, immò acerrimè eam propugnabat, ostendens credendum esse peccatum originale propagari in posteros, licet modum ignoremus, quia id Scriptura docet, & traditio, atque usus Ecclesiæ.

SECUNDO posset quis respondere, Sacramenta esse veras causas iustificationis, sed Morales, non Physicas: quomodo vera causa est homicidij, qui illud fieri iubet, licet ipse hominem, qui occiditur, non attingat. SED quanquam hæc responsio salua fide defendi potest, quam tuentur ex recentioribus Ledesinius in 4. distinct. 1. quæst. 3. artic. 1. & Canus in relectione de Sacramentis; & idem sensisse videntur antiqui Scholastici multi, ut Bonaventura, Scotus, Durandus, Richardus, Okam, Marsilius, Gabriel, in 4. distinct. 1. vel 2. qui docent, Sacramenta verè iustificare, & tamen volunt solum Deum producere gratiam ad præsentiam Sacramentorum, ita ut non sint Sacramenta causæ Physicæ, nisi, sine quibus non fieret effectus: tamen puto longè probabiliorem, & tutiorem sententiam, quæ dat Sacramentis veram efficientiam; quia Patres passim docent, Sacramenta non agere, nisi prius à Deo virtutem, seu benedictionem, seu sanctificationem accipiant; & referunt effectum Sacramenti ad omnipotentiam Dei; & conferunt cum veris causis efficientibus, ut supra vidimus. SECUNDO, quia non esset differentia inter modum agendi Sacramentorum, & signorum magicorum. TERTIO, quia tunc non esset homo Dei minister in ipsa actione Sacramentali, sed homo præberet signum actione sua, & Deus alia actione, viso eo signo infunderet gratiam, ut cum vnus ostendit syngrapham mercatori, & ille dat pecunias. At Scripturæ docent, Deum esse, qui baptizat per hominem, ut supra ostendimus.

TERTIO igitur responderi potest cum S. Thoma 3. parte quæst. 62. art. 4. quod Sacramēta sint causæ efficientes, etiam Physicæ, sed instrumentales, virtus autem diuinitus indita non sit aliqua noua qualitas inhærens spiritualis, vel corporalis, sed sit solum motus, siue vsus Dei. Per hoc enim quod Deus vtitur hac actione Sacramentali ad gratiam producendam, eleuat eam, & facit eam attingere effectum supernaturalem, quem non posset attingere, si à quocunque alio moueretur.

Ad cuius rei intelligentiam notanda sunt quatuor. **PRIMUM** est, multum interesse inter instrumenta quibus vtitur Deus, & quibus vtuntur homines. Sunt autem quinque differentiæ. **PRIMA** est, quod homo eget duplici applicatione, vna, qua se applicet instrumento, vt accipiendo securim in manu; altera, qua applicet instrumentum operi; prior motio est in ipso homine; posterior est in instrumento. Deus autem non eget priori applicatione; est enim immutabilis, & præsentissimus omnibus rebus, proinde etiam applicatus. **Quare** motio illa, qua Deus mouet Sacramenta, est sola applicatio Sacramenti ad opus, & est in ipso Sacramento, non in Deo.

SECUNDA est, quod homo eget instrumento naturaliter apto ad illud opus; non enim posset homo secare lignum ferra, nisi illa ferrea, & acuta esset. Deus autem non indiget ista aptitudine instrumenti: non enim ipse iuuatur instrumento, cum possit se solo omnia facere, sed vtitur instrumento, quia placet illi, vel honorare creaturam, vel certè in eo potentiam suam ostendere; vt si quis de industria scribere vellet calamo parum idoneo. Ex quo sequitur non esse necessarium, ponere in Sacramentis aliquam inhærentem qualitatem, quæ illud formaliter perficiat, sed satis est, si Deus Sacramento vti velit: non enim ipse indiget instrumento apto.

TERTIA est, quod quando homo vtitur instrumento, necesse est, vt præter motionem ipsius hominis, qua instrumentum mouetur, ipsum etiam instrumentum per naturalē suam virtutem concurret, & operetur id, quod sibi proprium est. Verbi gratia, cum vtitur faber securi ad faciendā cathedram, non satis est moueri securim artificiosè, sed necesse etiam est, vt securis scindat: & cum vtitur natura calore ad nutritionem, requiritur vt calor calefaciat, quod est sibi propriū; mediante enim illa actione, natura vtitur calore ad conuerrendum cibum

cibum in carnem. At cum Deus utitur aliquo instrumento, non est necesse, ut instrumentum per naturalem suam virtutem aliquid operetur in subiecto; & si fortè operatur, illa operatio non est causa effectus diuini, ut talis operatio, sed solum, ut res, quam Deus ad hoc faciendum adhibere voluit. Hinc videmus in usu multorum Sacramentorum non reperiri ullam actionem propriam, & naturalem eorum, ut patet de Absolutione, de Matrimonio, de consecratione Eucharistiæ. In aliis reperitur actio propria, ut lotio, aut unctio; sed, ut dixi, illa quatenus naturalis actio, non est causa, sed ut res quædam. Ex quo sequitur, ut motio, seu usus Dei in Sacramentis non solum sit virtus agentis instrumento impressa, sed sit tota virtus, & ratio, per quam agunt. Id enim, quod est in securi acies, & vis agentis illi impressa, id totum est in Sacramentis sola motio Dei.

QUARTA differentia sequitur ex his duabus, quod homo non potest uti qualibet re pro instrumento sui operis: Deus autem potest; & reuera utitur rebus diuersissimis ad rem eandem producendam.

QUINTA differentia sequitur etiam ex præcedentibus, quod homo non potest uti instrumeto, nisi quod tangat rem, in qua est producendus effectus. Quia instrumentum debet operari circa subiectum suam propriam & corporalem actionem: actio autem corporalis non fit sine contactu. Deus autem potest etiam per id, quod est in vno loco, agere in aliam rem ab eo loco remotissimam, quandoquidem non eget operatione propria illius rei.

SECUNDO notandum est, omnes concedere posse Deum uti quibuscumque instrumentis, quantumvis ineptis, modò tamen illa instrumenta prius ipse faciat apta. At certè id non est necesse, sed potest Deus instrumento inepto, manente inepto, efficere quidquid voluerit, quomodo potest optimus scriba calamo inepto ita dextrè uti, ut per eum rectissimè formetur literæ. Exemplum habemus Ioan. 5. ubi Angelo descendente, & mouente aquam, per eam aquam ita motam curabantur omnes languores. Fuisse autem hanc figuram Baptismi, supra docuimus. Quare Patres imitati hunc modum loquendi, sæpe dicunt, Sacramenta non operari, nisi prius in ea descendat Spiritus sanctus. Vide Tertullianum in lib. de Baptismo, Ambrosium lib. 1. de Spiritu sancto, cap. 7. & Chrysostomum in cap. 5.

cap. 5. Ioan. & ibidem Theophylactum, & Theophilum Alexandrinum lib. 1. Paschali: Pari ratione cum Deus voluit mundum conuertere per Euangelij prædicationem, poterat eligere homines eloquentes, aut certè homines rudes continuo eloquentissimos reddere: sed noluit hoc modo uti, sed elegit homines rudes, & qui simpliciter, impolitè, & inornatè loquerentur, & per eos mundum conuertit.

TERTIO notandum est, virtutem Sacramentalem aliquando esse in elemento, aliquando in verbo, aliquando in utroque. Nam actio Sacramentalis propriè est actio ministri dantis Sacramentum, non actio suscipientis; susceptio enim est opus nostrum, Sacramentum autem non est opus nostrum, sed Dei. Itaq; actio ministri est illa, qua Deus utitur tanquam instrumento ad iustificandum. Quando ergo minister utitur rebus, & verbis, ut in Baptismo, Confirmatione, & Vnctione extrema; tunc etiam Deus utitur rebus, & verbis, & proinde virtus Dei est in utrisque: & oportet illa duo simul concurrere, alioqui nihil fieret. At cum minister non utitur, nisi verbis, materia autem Sacramenti se tenet ex parte suscipientis, aut certè non adhibetur à ministro ad agendum; tunc virtus non est nisi in verbis. Ita fit in Sacramento Absolutionis, & Matrimonij, & in consecratione Eucharistiæ; non enim adhibet minister peccata pœnitentis ad eum absoluendum, nec panem ad aliquid consecrandum, sed verba ad consecrandum panem. Et hinc est quod non repugnat Sacramento Pœnitentiæ, ut vno die dicantur peccata, & alio die absoluator pœnitens; virtus enim operatiua non est in peccatis, sed in sola absolutione. In consecratione tamè Eucharistiæ requiritur præsentia panis, non quòd in pane sit virtus operatiua, sed quia nisi esset panis præsens, non esset materia, in qua ageret Sacramentum: in Absolutione enim etiam si non sit Confessio, quia iam præterit, est tamen homo, in quem cadit Absolutio. Deniq; aliquando minister utitur solo elemento, ut cum porrigit Eucharistiam, & tunc virtus est in solo elemento.

QUARTO notandum est, gratiam iustificantem non propriè creari, nec tamen educi de potentia naturali animæ, sed educi de potentia obedientiali, seu capacitate naturali: proinde S. Thomam non pugnare secum, cum dicit, non posse creaturam instrumentaliter concurrere ad creationem, & tamen Sacramenta concurrere ad productionem gratiæ in anima.

anima. Explico; illud dicitur propriè creari, quod fit independenter à subiecto; illud contra dicitur educi, quod dependet à subiecto, in fieri, in esse, & operari. Itaque anima rationalis verè creatur, licet fiat in corpore, quia non pendet à corpore necessariò, vt patet, quia separata esse, & operari potest, & prius natura est in seipsa subsistens, quàm corpori infundatur. At gratia est qualitas quædam spiritualis, quæ pendet omnibus modis à subiecto, vt patet, quare educitur. Sed non educitur de potentia naturali, quia non est in homine talis potètia; alioqui gratia esset res naturalis: vbi enim est potentia naturalis, ibi est actus naturalis. Neque obstat, quod gratia non possit fieri nisi à Deo; nam etiam anima non potest creari nisi à Deo, & tamen est res naturalis, quia materia est in potentia naturali ad animam. Itaque gratia non dat esse naturale, sed supernaturale homini. Est tamen in homine capacitas naturalis ad gratiam: naturaliter enim conuenit homini posse recipere gratiam, vt Augustinus docet de prædestinatione Sanctorum, cap. 5. & potest ea capacitas dici etiam potentia obediencialis, quia licet non sit talis, vt naturaliter possit concurrere etiam passiuè ad productionem gratiæ, (tunc enim esset potentia naturalis) tamen est talis, vt ex ea possit fieri quidquid Deus voluerit, & hæc dicitur potentia obediencialis.

Neque repugnat hæceductio gratiæ de potentia obedienciali ei, quod dicunt Theologi, & ipsum Concilium Tridentinum, sess. 6. cap. 7. gratiam infundi: infusio enim opponitur acquisitioni, non educationi. Sic enim distinguitur scientia infusa, & acquisita, non quod non vtraque educatur de potentia intellectus, sed quod vna acquiratur proprio labore, altera à solo Deo sine labore donetur. Et si rectè dicitur infusa scientia rerum naturalium, quam Deus donauit Adamo, & Salomoni sine labore ipsorum, liceteducta fuerit de potentia naturali: quantò rectius dicetur gratia infundi, quæ à solo Deo datur, & non responder ei potentia naturalis?

Ex his ad argumentum Zvvinglij RESPONDEO, negando consequentiam. Nam res corporea, & crassa potest agere in animam non ex natura sua, sed ex virtute Dei. AVGVSTINVS tract. 80. in Ioannem, non timuit dicere: *Aqua corpus tangit, & cor abluit.* Et ignis verus, & corporeus, animas, & dæmo-

nes tenere, & cruciari potest: immò etiam experimur corporis affectionibus, miro modo affici animos nostros, qui tamè spiritus sunt. Et quomodo hæc ipsa nostra corpora animas retinent tanquam in carcere? nec enim potest anima cum voluerit à corpore recedere, & tamen corpus, corpus est, & anima spiritus est.

Ad PRIMAM confirmationem iam responsum est, non egere contactu id quod nō agit per actionem suam propriam & naturalem.

Ad SECUNDAM dico PRIMO, locum Augustini non esse ad rem. Nam Augustinus cum dicit, minus esse iustificare impium, quàm creare cœlum & terram, non vult dicere, esse difficilius infundere gratiæ habitum in anima, quàm creare cœlum; sed vult dicere (vt ipse ibidem se explicat) esse opus maioris misericordiæ iustificare impium, quàm creare cœlum; & etiam esse opus nobilius, quia cœlum, & terra transibunt, salus electorum non transibit. Idcirco ibidem dicit, fideles cooperari Deo in iustificatione sua, proinde fideles concurrere ad opus maius, quàm sit creare cœlum, & terram. SECUNDO, non est improbable posse creaturam concurrere, vt merum instrumentum Dei ad veram creationē. Sanctus autem Thomas loco notato id negat de creatura, quæ concurrat disponendo subiectum per propriam actionem. TERTIO, iam ostendi gratiam propriè non creari.

Ad TERTIAM confirmationem posset dici, non dari vltimum vllō modo intrinsecum in successiuis: & idè iustificationem fieri in vltima parte sensibili, non in vltima simpliciter, quæ nulla est. VEL dicendum, iustificationem fieri in instanti illo, in quo finitur actio Sacramentalis. Tamen si enim actio desinat negatiuè, quoad suas partes, id est, per primum non esse, tamen desinit affirmatiuè, id est, per vltimum sui esse, quantum ad terminum suum. Vt enim in linea non potest assignari vltima pars, potest tamen assignari vltimum punctum, quo terminatur linea: ita in tempore & motu. AT (inquiunt) tunc non est actio Sacramentalis. Respondeo tunc maximè esse, eo modo, quo res successiua esse potest. Res enim successiua nunquam est per suas partes in re existētes, sed semper habet quiddam indiuisibile, quod vel est initium, vel finis, vel continuatiuum rei successiuæ: & per illud dicitur esse, & tunc perfectè dicitur esse, quando illud indiuisibile termi-

nat actionem. Id patet in tempore: non enim dicitur esse vna hora, nisi quando finitur. Idem patet in oratione, quæ perfectè significat, cum profertur eius terminus.

Ad **QVARTAM** iam dixi, virtutem illam esse corporalem, quia est motus rei corporalis, licet dici possit spiritualis, ratione causæ, & effectus.

Ad **QVINTAM** dico, virtutem illam esse partim in vna parte Sacramenti, partim in alia: proinde paulatim perire, prout pereunt partes Sacramenti. Nec tamen superuacaneæ fuerunt. Nam vltima particula operatur in virtute omnium præcedentium. Sicut etiam oratio perfectè significat, cum profertur vltima vox, quæ tamen nihil efficeret, nisi aliæ præcessissent: & terminus motus acquiritur per vltimum mutatum esse, quod tamen nihil posset, nisi cetera præcurrisent.

Ad **SEXTAM** iam respondi, virtutem nunc esse in verbis, nunc in elemento, nunc in vtroque, &c.

Ad **VLTIMAM** dico, rem illis difficilem videri, quia imaginantur spiritualementem qualitatem in re corporali debere consistui: sed qui sentiunt, non esse necessariam eiusmodi qualitatem, nullas in hac re patiuntur angustias.

CAPVT XII.

Explicatur controuersia de differentia Sacramentorum legis nouæ, & veteris.

SEQVITVR ALTERA quæstio de effectu Sacramenti, vtrum videlicet iustificare ex opere operato sit proprium Sacramentis nouæ legis, an commune cum Sacramentis legis veteris. Quatuor erunt partes huius quæstionis. Exponemus enim **PRIMO** sententiam hæreticorum. **SECUNDO** sententiam Catholicorum. **TERTIO** probabimus veritatem. **QVARTO** soluemus obiectiones.

Quantum ad **PRIMUM**, conuenit inter omnes Catholicos, & hæreticos, sex vt minimùm esse differentias inter Sacramenta legis nouæ, & veteris. **PRIMA**, quòd nunc sint alij ritus externi, quàm tunc erant, vt notū est. **SECUNDA**, quòd nunc sint pauciora Sacramenta, quàm tunc erant. **TERTIA**, quòd sint nostra faciliora, vt patet de Circumcisione, & Baptismo, & aliis. **QVARTA**, quòd nostra sint nobiliora saltem

ratione auctoris, quia nostra ab ipso Christo immediatè instituta, & promulgata, Mosaica verò à Mose, si non instituta, certè promulgata sunt. QVINTA, quòd illa fuerint figuræ nostrorum. SEXTA, quòd illa sint data ad tempus, id est, vsq; ad aduentum Messia; nostra duratura sint, quamdiu mundus durabit. Colliguntur hæc omnia ex Augustino in epist. 118. ad Ianuarium, lib. 3. de doctrina Christiana, cap. 9. & lib. 19. contra Faustum, cap. 13. in Psal. 73.

Quæstio autem est, vtrum præter has differentias, discrimen sit in effectu principali, qui est iustificare à peccato. Hæretici huius temporis nullum ferè ponunt discrimen, quamquam inter se non satis conueniunt.

AC PRIMVM Anabaptistæ, Carolstadiani, & Zvvingliani, qui (vt suprà ostendimus) nihil tribuunt Sacramentis nostris, nisi vt discernant fideles ab infidelibus, vel sint quasi professio fidelitatis, vel admoneant bonorum operum: coguntur plus tribuere Sacramentis veteribus, quàm nostris. Melius enim discernit Iudæum à non Iudæo Circumcisio, quæ semper manet, & cerni potest, quàm Baptismus, qui semel exhibetur, & transit. Et eadem ratione melius admonet fidelitatis, & bonorum operum Circumcisio, quàm Baptismus, cùm illa sit permanens, crassior, & sensibilibior, &c.

Lutherus autem, qui vult Sacramenta nostra excitare fidem, idem tribuit Sacramentis veteribus. Vnde sic ait in libro de Babylonica captiuitate, cap. de Baptismo: *Error est Sacramenta noua legis differre à Sacramentis Veteris legis, penes efficaciam significationis, id est, quod nostra efficaciter significant faciendo, quod figurant, non illa.* Et idem repetit in assert. 1. articuli.

Est autem NOTANDVM, Lutherum distinguere duo genera signorum veterum in libro de Babylonica captiuitate, cap. de Baptismo. QVÆDAM enim fuisse dicit, quæ haberent annexum verbum promissionis, ac proinde exigent fidem, vt signum iridis datum Noë, signum roris in vellere Gedeonis, signum in reuerfione solis datum ab Isaia Regi Achaz, & alia. Atque hæc dicit fuisse vera Sacramenta, & æqualia nostris, quoad efficaciam. ALIA verò fuisse dicit, quæ non haberent annexam promissionem, vt omnes illas cæremonias legales, quibus expiabantur homines, vestes, ædes, &c. atq; has dicit non fuisse propriè Sacramenta, & esse longè inferiora nostris

nostris Sacramentis. Vnde in homil. i. de Baptismo non procul ab initio secundæ partis grauitèr inuehitur in Anabaptistas, qui non plus tribuerent nostro Baptismo, quàm lotionibus Iudaicis; quasi ipse multum tribuat Baptismo, qui iridem illi æquare non veretur. Porro ex hac distinctione Lutheri colligitur alius error, vel potius paradoxum ipsius, qui non vult esse Sacramenta ea, quæ ab omnibus veteribus dicuntur Sacramenta, vt lotiones Iudaicas, agnum Paschalem, sacrificia, & similia; & contrà, ea vult esse Sacramenta, quæ à nullo, ne per somnium quidem, vocata sunt Sacramenta, vt iridem, vellus Gedeonis, vmbram horologii Achaz, & similia.

Iam Calvinus conuenit cum Luthero, quod Sacramenta veteris legis eodem modo iustificarent, quo nostra, nimirum alendo fidem. Nam lib. 4. Institut. cap. 14. §. 23. *Hoc dogma, inquit, Scholasticum, quo tam longum discrimen inter Veteris, ac nouæ legis Sacramenta notatur, perinde ac si illa non aliud, quàm Dei gratiam adumbrauerint, hac verò præsentem conferant, penitus explodendum est.* & similia habet in Antidoto Concilij Tridentini, sess. 7. can. 2. Dissentit tamen à Luthero Calvinus in duobus. PRIMO, quod existimat Sacramenta nouæ legis vberiores gratiam dare, quàm vetera, quia nimirum clarius excitant fidem, & proinde maior fides magis iustificat. *Neque tamen negamus, inquit in Antidoto, loco citato, quin vberior sub Christi regno percipiatur gratia.* Lutherus autem omninò æquat Sacramenta illa nostris. SECUNDO, Lutherus (vt ostendimus) non omnes cæremonias Iudaicas, sed tantum eas, quæ habent annexas promissiones, vult esse Sacramenta, & nostris æqualia. At Calvinus omnes illas cæremonias habet pro Sacramentis, quæ darent gratiam, licet non ita copiosam, vt nostra. Nam lib. 4. Instit. cap. 14. & 21. purificationes Iudæorum numerat inter Sacramenta: & §. 26. idem prolixius docet. Et licet vterque erret, minus absurdè Calvinus docet, quàm Lutherus.

Kemnitius in Examine Concilij partim Lutherum, partim Calvinum sequitur. Nam pag. 60. & 70. admittit Lutheri distinctionem de duplici genere signorum veterum: pag. autem 74. admittit cum Caluino vberiores gratiam dari in Sacramentis nouis, quàm in veteribus: cùm vtroq; autem conuenit in damnanda Ecclesiæ doctrina. Atque hæc de sententia hæreticorum.

CAPVT XIII.

Explicantur sententia Catholicorum.

QVANTVM ad SECVDVM, Catholici omnes conueniunt, Sacramenta veteris legis, quæ propriè Mosaica dicuntur, non contulisse gratiam ex opere operato. Id enim docent omnes Theologi in 4. dist. 1. & idem definiuit Concilium Florentinum in instruct. Armenorum; & Concilium Tridentinum, quamuis breuius, & obscurius, quia non erat necesse, cum iam res esset definita, sess. 7. can. 2.

Est autem hic NOTANDVM, ista Concilia non definiuisse (vt calumniatur & mentitur Kemnitius in 2. parte Examinis, pag. 58. & 59.) veteres Patres non habuisse gratiam Dei ex merito Christi, aut eam habuisse sine vlllo organo, seu medio applicante Christi merita. Concilia enim nihil horum dicunt, sed tantum asserunt, hoc esse discrimen inter Sacramenta legis veteris, & nouæ, quod nostra conferunt gratiam, illa solum eam significabant. Non est autem consequens, veteres Patres non habuisse gratiam, aut habuisse sine organo applicante Christi merita. Nam etiam si nō habuerunt eam per Sacramenta, tamen habuerunt per fidem, vt etiam nunc adulti per fidem, & contritionem veram iustificantur, antequam re ipsa ad Sacramentum accedant.

Eti autem Catholici in hoc principio conueniant inter se, & discrepent ab hæreticis huius temporis: tamē sunt etiam apud eos duæ quæstiones, de quibus breuiter dicam, quæ sint opiniones, cum id sit necessarium, partim ad controuersiam propositam explicandam, partim ad refellendas hæreticorum calumnias.

VNA igitur quæstio est de Sacramentis veteribus, Circumcisione excepta, an saltē iustificarent ex opere operantis. Duæ sunt autem opiniones. PRIMA Magistri in 4. dist. 1. qui id negat: ait enim, Sacramenta illa non iustificasse, etiam si in fide & charitate susciperentur, quia data erant, vt essent oneri, non vt iustificarent. SECVND A est communis Theologorum, iustificasse omnia illa Sacramenta ex opere operantis, id est, ex fide & deuotione susipientis: & hæc sententia est verissima. Nam est generaliter vera sententia Apostoli Rom. 2. *Factores legis iustificabuntur.* Quanquam ista iustificatio non est

est propriè Sacramentalis, sed est communis omnibus bonis operibus, quæ in charitate fiunt; nec est iustificatio prima, sed secunda. Quod autem Kemnitius in 2. part. Examinis, pag. 58. vociferatur, hanc sententiam directè, & quasi aduersa fronte pugnare cum Paulo, qui Rom. 4. ex professo docet, Abrahamum non esse iustificatum ex operibus, ex mera imperitia nascitur. Nam Paulus loquitur de operibus, quæ fiunt ex solis viribus liberi arbitrij, quibus operibus & nos fatemur, neminem iustificari. Theologi autem cum dicunt, Sacramenta vetera iustificasse ex opere operâti; loquuntur de opere, quod oritur ex gratia Dei. Vocant enim opus operantis fidem, charitatem, obedientiam, quæ sunt omnia Dei dona, cum sine speciali Dei auxilio non habeantur: de qualibus operibus Paulus Rom. 2. *Factores legis iustificabuntur.* Et Iacobus cap. 2. *Abraham nonne ex operibus iustificatus est?*

ALTERA quæstio est de Circumcisione, quæ non est propriè Sacramentum Mosaicum, sed legis naturæ: unde Ioan. 7. *Circumcisio nō est ex Mose, sed ex Patribus.* Porro de Circumcisione duæ sunt opiniones. PRIMA opinio est Alexandri, par. 4. quæst. 7. memb. 7. art. 4. Bonauenturæ, Scoti, & Gabrielis, in 4. dist. I. qui admittunt, Circumcisionem ex opere operato contulisse iustificationem. Pugnans autem cum hac sententia multa argumenta. PRIMO Scripturæ, quæ cum dicunt, Sacramenta vetera fuisse egena elementa, non excludunt Circumcisionem, immò de illa maximè loquuntur, ut postea videbimus. SECUNDO Concilia, Florentinum & Tridentinum, quæ solis Sacramentis nostris tribuunt vim iustificandi. Neque valet, quod quidam dicunt, Concilia ista cum negant, Sacramenta veteris legis iustificasse, loqui tantum de Sacramentis Mosaicis, id est, a Mose promulgatis, non autem de Circumcisione, quæ erat Sacramentum legis naturæ datum Abraham, non Mosi: hoc, inquam, non valet. Nam Concilia intendunt explicare excellentiam Sacramentorum nouæ legis; quæ quidem excellentia non minus obseruatur, si Sacramenta legis naturæ sint nostris æqualia, quàm si id tribuatur Sacramentis legis scriptæ. Præterea cum Deus in lege gradatim processerit, & legem imperfectiorem dederit in statu naturæ, quam in statu legis scriptæ; & in hoc statu imperfectiorem, quàm in statu Euangelij: idem sine dubio fecit in Sacramentis, proinde si Sacramenta Mosaica nō iustificabant, multò minus Sacramenta legis naturæ.

Hic tamen est hoc ANNOTANDUM, hanc sententiam primam non fauere hæreticis huius temporis, licet aliquod Sacramentum antiquum cum nostris æquauerit. Nam hæretici cum paria faciunt Sacramenta vetera nostris, non vetera extollunt, sed nostra deprimunt, ac deiiciunt; hæc autem prima sententia non deiicit nostra, sed extollit antiqua.

SECUNDA sententia est S. Thomæ 3. par. quæst. 70. art. 4. & discipulorum S. Thomæ, Capreoli, Scoti, Ledesmi, & aliorum, in 4. dist. 1. vel 2. qui docent, Circumcisionem vi sua non iustificasse, sed iustificasse tamen, quatenus fidei protestatio erat, & fidem applicabat. Itaque volunt ij auctores, iustificatos fuisse veteres ex merito passionis Christi, vt nos iustificamur, sed hoc meritum nobis applicari per Sacramenta, Hebræis autem per solam fidem; quæ tamen fides requirebat vt conditionem, sine qua non operabatur, Sacramentum Circumcisionis. Hæc sententia sine dubio probabilior est: sed quia non est nobis propositum, nisi fidem aduersus hæreticos propugnare, his ommissis, ad tertium caput transeamus.

CAPVT XIV.

Probatur, nullum Sacramentum legis naturæ, aut scriptæ, iustificasse ex opere operato.

NUNC probanda est veritas. Probabimus autem, nullum Sacramentum legis naturæ, aut scriptæ iustificasse ex opere operato, siue eo modo, quo iustificant Sacramenta nouæ legis, contra omnes hæreticos huius temporis, & aliquo modo etiam contra eos, qui Circumcisioni tribuunt iustificationē ex opere operato.

AC PRIMVM quidem argumentum sumitur ex diuinis literis: nam & Prophetæ, & Apostoli miro consensu docent, Sacramenta vetera non iustificasse, cum de nostris contrarium asserant.

PRIMVS locus ex Prophetis, Psal. 39. *Sacrificium & oblationem noluisti, aures autem perfecisti mihi. Holocaustum & pro peccato non postulasti.* Vbi Scriptura nō negat, Deum velle sacrificia, cum ipse ea fieri iusserit, sed negat ea velle ad expiandum peccatum. SECUNDVS locus Psal. 50. *Si voluisses, sacrificium (nimirum ad peccatum expiandum) dedissem, & tunc holocaustis non delectaberis. Sacrificium Deo spiritus contribulatus, &c.*

ius, &c. Vbi Scriptura opponit sacrificium contritioni; & de-
vino negat, quod de altero affirmat, quod nō faceret, si vtrum-
que concurreret ad iustificationem: neq; enim rectè dicere-
tur nunc, Deus non vult Baptismum, sed contritionem. TER-
TIVS locus Isai. I. *Quò mihi multitudo victimarum vestrarum?*
quis quasiuit hac de manibus vestris? QVARTVS locus Hier.
II. *Nunquid carnes sanctæ auferent à te malitias tuas, in qui-*
bus gloriata es? vbi de sacrificio pro peccato loquitur. Et certè
de Baptismo nō diceret; Nunquid Baptismus auferet à te ma-
litas: QVINTVS locus Amos 5. *Quod si obruleritis mihi holoca-*
sta, & munera vestra, non suscipiam, & vota pinguium non re-
spiciam. Porro si sacrificia non iustificabant, multò minus iu-
stificabāt alię cæremonię: nullę enim cæremonię habent cla-
riores pmissiones de remissione peccatorū, quàm sacrificia.

Iam ex verbis Apostolorum idem probari potest. PRIMVS
locus est Rom. 3. *Quid ergo amplius Iudæo est, aut quæ utilitas*
Circumcisionis? multum quidem per omnem modum. Primum,
quia credita sunt illis eloquia Dei. vbi illud, *Primum* (etiam
Caluino & Petro Martyre testibus in commentario) non est
nota ordinis, quasi vellet Paulus multas utilitates Circumci-
sionis adferre; sed significat potissimum, seu præcipuum; non
enim adfert alias utilitates. Solùm ergo, auctore Paulo, Iudæi
circumcisi præstabant Gentibus incircumcisis, quòd illi ha-
buerint Dei legem, & oracula: non ergo Circumcisio iustifica-
bat. Nam alioqui præstitissent Iudæi Gentibus etiam iustitia,
quod præcipuè Paulus refutare intendit; vnde paulò post sub-
iungit: *Quid ergo præcellimus eos? nequaquam. Causati enim*
sumus (id est, causas attulimus, & ostēdimus) *Iudæos & Græcos*
oēs sub peccato esse. vbi Paulus etiam si dixerat, Iudæos præstare
Gentibus ob Circumcisionē, quia fuerāt illis credita eloquia
Dei: tamen nunc negat, Iudæos præstare Gentilibus, quia non
præstant, quod attinet ad iustificationem, de qua agebatur; om-
nēs enim tam circūcisi, quàm incircūcisi peccatores sunt.
Quibus verbis clarissimè docet, Circumcisionem non iustifi-
casse. Non enim vult dicere, nullum fuisse iustum ante Christi
aduentum, cū constet, Patriarchas, & Prophetas, & multos
Gentiles fuisse iustos, vt Melchisedech, Iob, & alios. Sed vult
dicere, nō fuisse iustos ex eo, quod essent circumcisi, vel incir-
cumcisi, sed ex eo, quòd in Christū venturum crederent. Ibidē
addit Apostolus: *Ex operibus legis non iustificabitur omnis caro*

coram illo. Quis autem neget, Circumcisionem fuisse opus legis? Ibidem: *An Iudæorum*, inquit, *Deus tantum?* nōne & *Gentium?* immò & *Gentium*, quoniam *Unus est Deus*, qui iustificat Circumcisionem ex fide, & præputium per fidem; Quasi dicat, Deus est omnium Deus, quomodo igitur credibile est, eum dedisse remedium contra peccatum solis Iudæis? Possumus nos hinc etiam aliter argumētari: An masculorum Deus tantum: nōne & fœminarum? Quis ergo credat, Deum dedisse remedium, quod solis masculis prodesset?

SECUNDVS locus est Roman. 4. vbi Apostolus ex professo probat, Abrahamum non in Circumcisione, sed in præputio fuisse iustificatum: vt inde admoneat, Circumcisionem non esse datam, vt iustificaret. Si enim is, cui primò data est, non fuit ex ea iustificatus, quātò minus alij ex ea iustificandi erunt?

TERTIVS locus I. Cor. 7. *Circumcisio nihil est, & præputium nihil est.* vbi ita Paulus Circumcisionem vt præputium despicit, cū agitur de iustificatione.

QUARTVS locus est Galat. 4. *Quomodo iterum conuertimini ad infirma & egena elementa, quibus iterum seruire vultis?* Quorum elementorum nomine intelligit Circumcisionē, de qua præcipuè loquitur in ea epistola, & simul etiam alias cæremonias legales: & sanè non dicerentur infirma & egena, si iustificarent. Ibidē dicit, Iudæos tanquam paruulos sub elementis huius mundi seruientes fuisse: nos autem viros esse perfectos: quæ sanè differentia nō esset vera, si Sacramenta nostra non haberent aliam vim, quàm illa Iudæorum.

QUINTVS locus Gal. 6. *Neque Circumcisio aliquid valet, neq; præputium, sed noua creatura.* Vbi videmus opponi nouam creaturam tam Circumcisioni, quàm præputio; quod esset ineptum, si Circumcisio efficeret nouam creaturam.

SEXTVS locus Philip. 3. vbi Paulus dicit, se arbitrari detrimentum, iustitiam quæ est ex lege, & hoc aliquoties repetit: quod certè non diceret, si ex vlla legali cæremonia iustificatus fuisset. Vnde ibidem Circumcisionem per contemptum concisionem vocat: *Videte*, inquit, *conciſionem.* Nam (vt exponit Chrysostomus) circumciditur, quod apertè expolitur refecatis superfluis; conciditur, quod temerè & præter artem scinditur in frusta. Ibidem Apostolus ait, se non habere fiduciam in carne, & per fiduciam in carne, exponit ipse, fiduciam in Circumcisione, aliisque id genus rebus.

SEPTIMVS locus Coloss. 2. vbi omnia Sacramenta vetera dicuntur vmbra futurorum, corpus autem Christi. Quod si nostra eandem vim haberent, adhuc essemus in vmbra. Ibidem: *Circumcisi*, inquit; *estis Circumcisione non manufacta, in expoliatione corporis carnis, sed Circumcisione Christi consepulti ei in Baptismo*. Vbi Paulus Circumcisionem vocat manu factam, & proinde Baptismum non manu factum, quia principalis baptizans est Deus. Item nihil tribuit Circumcisioni, nisi carnem expoliare, & eam Baptismo opponit. NOTANDVM autem est, in textu Græco haberi: *In expoliatione corporis peccatorum carnis*; & proinde coniungendam hanc partem (*In expoliatione*, &c.) cum illa (*Circumcisi estis*) non cum illa (*Circumcisione manu facta*) vt sensus sit; Circumcisi estis in expoliatione corporis peccatorum, non Circumcisione manu facta, sed Circumcisione Christi spiritali consepulti ei in Baptismo. Ex quo textu sumitur idem argumentum, sed alio modo. Nam (vt exponunt Græci, Chrysostomus, Theodoretus, Theophylactus) Paulus docet, Circumcisionem Iudaicam fuisse denudationem vnus pelliculæ, nostra autem Circumcisio est expoliatio totius corporis peccatorum.

OCTAVVS est Hebr. 7. *Reprobatio*, inquit Apostolus, *fit præcedentis mandati propter infirmitatem & inutilitatem*. Loquitur autem de mandatis cæremonialibus, quorum præcipuum erat de Circumcisione.

NONVS locus Hebr. 9. vbi cæremonias veteres dicit fuisse iustitias carnis, & sanctificasse quidem inquinatos, sed solum ad emundationem carnis.

DECIMVS locus Hebr. 10. vbi dicit, legem vmbra habuisse, non ipsam imaginem rerum, nec potuisse accedentes perfectos facere, nec potuisse auferre peccata, & mundare conscientiam: & Deum hostias & oblationes noluisse, nec ei placuisse; quod intelligi debet in ordine ad iustificationem ex opere operato: nam alioqui negari non potest, quin ei placuerint, ex obedientia & deuotione offerentis. Nam vocantur odor suauissimus Domino, Leuit. 1.

Sed videamus, quid ad hæc loca aduersarij respondeant. Lutherus & Lutherani respondent, Scripturas cum negant, Sacramenta vetera iustificare, debere intelligi de illis, quæ non habent annexam promissionem.

At loca à nobis adducta, loquuntur expresse de Circumcisione, quam omnes concedunt habuisse annexam promissionem. Deinde nullæ cæremoniæ Iudaicæ habuerunt promissionem magis expressam, quàm sacrificia & ablutiones. Nam Leuit. 4. 5. & 6. promittitur remissio peccatorum offerenti sacrificium. Et rursus Leuit. 20. 21. & 22. promittitur sanctificatio iis, qui abluuntur aqua, vt lex præcipit: & tamen Apostolus Hebr. 10. disertis verbis dicit, impossibile esse, sacrificiis & ablutionibus Iudaicis remitti peccata.

Kemnitius in Exam. 2. par. pag. 63. post solutionem Lutheri, proponit aliam, quæ est etiam Caluini, lib. 4. Instit. cap. 14. §. 23. & 25. & Martyris in cap. 7. 1. ad Corinth. quod videlicet Scriptura cùm reprehendit tanquam inutilia Sacramenta vetera, non loquatur de illis secundum se, sed vt perperam intelligebantur à Iudæis, id est, de nudis cæremoniis, remota promissione & fide in Christum. Verissimum enim est, Sacramenta illa nihil valuisse accipientibus ea sine fide.

At contrà; nam PRIMO, non est quæstio inter nos & hæreticos, an Sacramenta illa ex fide prodescent. Id enim fatemur omnes, & hoc est quod Scholastici dicunt, & illi malè reprehendunt, Sacramenta vetera fuisse vtilia ex opere operantis. Sed quæstio est, an præterea ex diuina institutione fuerint vtilia, vt Sacramenta. Illa enim vtilitas ex opere operantis, nõ est propriè Sacramentorum, sed communis omni bono operi.

SECUNDO, Sacramenta sine promissione & fide nihil prodesse, non tantùm conuenit Sacramentis veteribus, sed etiam nouis, vt ipsi aduersarij docent: & tamen Paulus ita distinguit noua à veteribus, vt dicat, nostra saluare, regenerare, mundare, iustificare, Ephes. 5. Tit. 3. 1. Corinth. 1. vetera autem esse elementa egena, nihil valere, & nihil esse, 1. Corinth. 7. Galat. 5. Hebr. 10. & alibi.

TERTIO, Apostolus in his locis dicit, illas cæremonias fuisse inutiles ad iustificandum, vbi dicit, fuisse vmbas & figuras rerum nostrarum, Coloss. 2. 1. Corinth. 10. Hebr. 10. Ergo Apostolus vult, Sacramenta illa fuisse inutilia ad iustificandum, non solùm vt falsò exponebantur à Iudæis, sed etiam secundum se, & vt erant Sacramenta à Deo instituta. Non enim vt exponebantur perperam à Iudæis, figuræ dici poterāt, sed solùm vt erāt Sacramenta à Deo instituta. Non enim illis
figuræ

figuræ erant, qui nihil de Christo cogitabant, sed solum illo ritu acquiescebant.

DENIQUE, si Paulus solum dicere vellet, Sacramenta vetera sine fide nihil prodesse: non conferret cum præputio, nec diceret: *Circumcisio nihil est, & præputium nihil est.* 1. Corinth. 7. & Galat. 6. *Neq; Circumcisio aliquid valet, neq; præputium.* Præputium enim non solum sine fide nihil est, & nihil valet, sed absolutè nihil est, & nihil valet.

Caluinus præter hanc solutionem adhibet alias tres. VNA est lib. 4. Instit. cap. 14. §. 22. quod Paulus loquatur de Sacramentis veteribus, nõ absolutè, sed comparatiuè; ac præsertim Coloss. 2. vbi vocantur vmbre illa Sacramenta. Dicit enim Caluinus, Paulum non voluisse extenuare efficaciam illorum Sacramentorum, sed magnificare efficaciam nostrorum, quæ dant vberiore gratiam, quàm illa.

At contra, nam si solum differrent nostra à veteribus, quod nostra darent maiorem gratiam, illa minorem; Paulus non rectè diceret, illa nihil esse, & nihil valere; nec conferret cum præputio Circumcisionem; neque etiam distingueret illa vt vmbra à corpore. Vmbra enim non est corpus minus, sed nullum; nec habet aliud, nisi similitudinem corporis. Immo Hebr. 10. ita extenuat ea Sacramenta, vt dicat, non fuisse imagines, sed vmbas. Nam imago habet positiuam & realem corporis similitudinem: vmbra autem habet similitudinem priuatiam, & quæ reuera nihil est.

ALTERA solutio Caluini est ibidem, §. 24. quod Paulus loquatur de Sacramentis veteris legis pro eo tempore, quo iam erant per Christum abrogata.

At contra. Nam Rom. 2. Paulus dicit: *Circumcisio quidem prodest, si legem obserues.* Vbi indicat, se loqui de eo, quod cõueniebat Circumcisioni, cùm adhuc vigeret. Nam post abrogationem nõ prodest, sed obest, vt idem Paulus dicit, Galat. 3. Vult ergo Paulus dicere, Circumcisionem, quando vigeat fuisse vtilem, non quidem quod ipsa iustificaret, sed quia circumcisi habebant legem Dei, & poterant facilius quàm alij nosse Dei volutatem, vt idè Paulus explicat, ca. 3. *Quæ utilitas Circumcisionis? multum per omnem modum, etc.* Item 1. Cor. 7. vbi dicit, Circumcisionem nihil esse, loquitur pro tẽpore, quo vigeat; nam paulò antè dixerat: *Circumcissus vocatus est? non adducat præputium. In præputio vocatus est? non circumcidatur.*

Et est

236 *Cap. XIV. De effectu Sacrament. Lib. II.*

Et est sensus; perinde esse, vtrum quis ex Iudaismo ad fidem Christi veniat, an ex Gentilismo. Itaque loquitur de illis, qui fuerant circumcisi vigente lege, & postea ad fidem Christi venerant, & illos monet, ne glorientur præter ceteros, ob Circumcisionem olim accepta, quia nihil est. Præterea Galat 4. dicit, antiquos Patres sub elementis mundi huius fuisse seruientes. Item Philip. 3. dicit, se non habere fiduciam in carne, id est, non magnificere (vt ibidem exponit) quod fuerit circumciscus octauo die; ac proinde cõtemnit Circumcisionem, quam acceperat, cùm ea vigeret. Item Coloss. 2. & Hebræ. 10. vocat vmbra & figuras. Non autem erant vmbra & figura, nisi ante abrogationē. Item Hebr. 7. dicit, abrogata illa fuisse ob infirmitatē & inutilitatem. Denique Hebr. 10. ex professo docet, impossibile fuisse, vt sacrificiis & lotionibus illis expiarentur peccata, & propterea Christum venisse, vt perficeret quod illa non poterant.

TERTIA solutio est eiusdem ibidem, §. 25. vbi dicit, cæremonias legis vocari vmbrales, non quod nihil habeant solidi, sed quia earum complementum vsque ad Christum quodammodo suspensum erat. Addit etiam quòd vocantur vmbra, non esse accipiendum de efficacia, sed de modo significandi, quia nimirum significabant res futuras, nostra significant res præteritas.

At cõtrà. **PRIMO**, ista solutio planè destruit textum. Nam Paulus non solum vmbrales facit eas cæremonias, sed ipsam vmbra appellat. **SECUNDO**, si idè solum fuissent vmbrales, quia complementum erat suspensum vsq; ad Christum, id est, quia repræsentabāt aliquid, quod nondum aderat; nostra etiam vmbrales dici possent. Nam repræsentant resurrectionem & gloriam futuram. **TERTIO**, impudentissimè asseritur, Paulum non agere de efficacia, sed solum de modo significandi. Nam illa verba: *Nihil est, nihil valet, elementa egena, infirma, inutilia, non posse expiare peccata*, & similia, nō possunt nisi de efficacia exponi. **DENIQUE**, Apostoli quæstio cum Iudæis de efficacia erat, & de iustificatione, non de modo significandi. Neque enim tam stulti erant Hebræi, vt non intelligerent, Sacramenta vetera significasse res futuras, si Messiam venturum credebant. Atque hæc de primo argumento.

CAPVT XV.

Idem probatur ex Patribus.

ROBANDVM est hoc discrimen etiam ex Patri-
bus, tum vt res sit magis confirmata, tum quia
Kemnitius in secunda parte Examinis, pag. 56. &
sequentibus, vsque ad 60. conatur ostendere, vnū
tantum locum nos habere, eumque ex Augustino, quem ta-
men ipsum eripere nobis conatur. Proferemus igitur aucto-
res veteres, Hebræos, Græcos, Latinos viginti, præter Augu-
stinum.

I. PHILLO in lib. de Circumcisione, exponēs omnes caus-
sas Circumcisionis, quas à maioribus se accepisse fatetur, ne-
que clarè dicit, neque obscurè insinuat, eam institutam fuisse
in remedium peccati.

II. IOSEPHVS lib. I. antiquit. cap. 12. non aliam causam
Circumcisionis reddit, nisi vt posteritas Abraham ab aliis Gen-
tibus discerneretur. Et tamen si quis nosse potuit, quorsum
esset instituta Circumcisio, isti maximè, qui Hebræi erant, &
doctissimi; & vixerant etiam eo tempore, quo adhuc lex vi-
gebat.

III. IVSTINVS in Dialogo cum Triphone, ante mediū:
Quin etiam, inquit, ex eo, quod nō possunt fœmina circumcidi,
intelligitur signi causa datam esse Circumcisionem, non pro
opere iustitiæ. Et toto ferè Dialogo hoc probat, Circumcisio-
nem non iustificasse, sed datam solum, vt discernerentur Iu-
dæi ab aliis.

IV. DIONYSIVS Arcopagita in lib. de hierarchia Eccle-
siastica, cap. 5. part. I. docet, Ecclesiam esse mediam inter syna-
gogam & cœlestem patriam; quod synagoga carnalia Sacra-
menta, & umbras, ac figuras habuerit; cœlestis Hierusalem
habeat nudam veritatem sine vllis signis corporalibus: Ec-
clesia nostra cum vtraque communicet, quod habeat signa
corporalia, & simul spiritualia dona.

V. IRENAEVS lib. 4. cap. 30. *Circumcisionem, inquit, non*
quasi iustitiæ consummatricē, sed in signo eam dedit Deus, &
cognoscibile perscueret genus Abraham. Et infra: *Et quia non per*
hac iustificabatur homo, sed in signo data sunt populo, ostendit,
quod ipse Abraham sine Circumcisione credidit Deo, & repu-

238 Cap. XV. De effectu Sacrament. Lib. II.

ratum est illi ad iustitiam. Vide eundem in eodem lib. cap. 28. 29. 32. & 34.

VI. ORIGENES lib. 2. contra Celsum dicit, Christianos meritò dimisisse Circumcisionem, Sabbatham, & similia, quòd res carnales, & corporales essent, & transisse ad legem DEI spiritalem. Item homil. 3. in Genesim, ubi explicat Circumcisionis præceptum, opponit carnalem illam Circumcisionem Iudæorum, Circumcisioni spirituali Christianorum: proinde vult tantum interesse inter Sacramenta illorum, & nostra, quantum interest inter carnem, & spiritum.

VII. EVSEBIUS Cæsariensis lib. I. demonstrat. Euangelicæ, cap. 10. & lib. I. hist. cap. I. pulchrè docet, cur data fuerint primis illis parentibus Sacramenta carnalia, & sacrificia, tanquàm elementa quædà, & adumbrationes rerum spiritualium.

VIII. EVSEBIUS Emislenus homil. in Sabbatho post primam Dominicam Quadragesimæ in illud: *Faciamus hic tria tabernacula. Primum, inquit, tabernaculum est synagoga; secundum Ecclesia; tertium cælum. Primum in Umbra fuit, & figura; secundum in figura & Veritate; tertium in sola Veritate. In primo Via ostèditur; in secundo inuenitur; in tertio possidetur. Non enim Sacramenta Ecclesia, sicut Sacramenta synagoga, medicinam tantùm docent, et ostendunt, sed ipsa potius sunt medicina, & remissio peccatorum.*

IX. ATHANASIVS oratione in illud: *Omnia mihi tradita sunt à Patre meo, circa finem fusè docet Circumcisionem nihil fuisse aliud nisi umbram, & figuram Baptismi, qui est vera, & spiritualis Circumcisio.*

X. EPIPHANIVS hæc. 8. quæ est Epicureorum: *Illic, inquit, Circumcisio fuit carnalis, qua deservit tempori & squæ ad magnam Circumcisionem, hoc est, Baptismum, qui circumcidit nos à peccatis.*

XI. BASILIUS lib. de Spiritu sancto, cap. 14. *Qui Veritatem, inquit, Umbra comparans, cum quibus figuris conferens ea, qua figuris significantur, Universam pariter Evangelicam disputationem eleuare aggreditur. Et infra: Quid, inquit, cõfers laueracium lauacris, qua solam nominis appellationem habent cõmunem, rerum Verò tanta est differentia, quanta est inter somnia, & Veritatem; inter Umbras, & imagines, & inter ea, qua reuera sunt.*

XII. Ioan. CHRYSOSTOMVS hom. 27. in Genesim: *Attende,*

tende, inquit, quod Deus Circumcisionem pro lege statui voluit, non quod ad anima salutem efficere hoc possit aliquid, sed Et Iudæi pueri hoc gratitudinis indicium circumferrent, quasi signum, & sigillum, & ne liceret eis commisceri gentium commisionibus. Hinc B. Paulus signum hoc vocat, dicens: Et signū dedit Circumcisionis sigillum; nam ad iustitiam ipsa Circumcisio nihil conducit. Vide eundem homil. 39. & 40. in Genes. homil. de proditiōe Iudæ, homil. 7. in epist. ad Rom. & homil. 14. in epist. ad Hebræos.

Idem docet XIII. CYRILLVS lib. 10. in Iulianum ultra medium. XIV. THEODORETVS q. 67. in Genes. & lib. 7. ad Græcos. XV. DAMASCENVS lib. 4. de fide, cap. 10. 14. & 26. XVI. THEOPHYLACTVS in cap. 2. ad Romanos, & XVII. OECUMENIVS in cap. 4. ad Romanos.

Iam ex Latinis, XVIII. TERTULLIANVS in lib. contra Iudæos, cap. 1. Si Circumcisio, inquit, purgat hominem, Deus Adam incircumcisum cum faceret, cur eum non circumcidit, Vel posteaquam deliquit, si purgat Circumcisio? Et infra: Providens Deus, quod hanc Circumcisionem in signum, non in salutem esset daturus. Ibidem probat ex Prophetis sacrificia, & Sacramenta Iudæorum non iustificasse, ubi etiam illa vocat carnalia, & nostra spiritualia.

XIX. S. CYPRIANVS lib. 1. contra Iudæos, cap. 8. opponit carnalem Circumcisionem Iudæorum, spirituali Circumcisioni Christianorum: & addit Adamum, Henoch, Noë, & Melchisedech iustos fuisse sine Circumcisione: Quia, inquit, signaculum seminis nihil proficit. Idem lib. 3. epist. 8. ad Fidum, dicit carnalem Circumcisionem adueniente spirituali, tanquam umbram luce adueniente evanuisse.

XX. S. AMBROSIVS in epist. 72. ad Irenæum: Signum, inquit, Circumcisio corporalis, Veritas Circumcisio spiritualis: illa membrum amputat, ista peccatum. Idem: Si tamen idem, in cap. 4. ad Rom. Non ergo, inquit, Circumcisio aliquid habet dignitatis, sed signum est tantum; quod signum ideo accipiebant filij Abrahæ, Et scirentur eius filij esse, qui credens Deo hoc signum acceperat, Et amuli essent paterna fidei. Vide eundem lib. 1. de Abraham, cap. 4. ubi ex professio agit de Circumcisione, & lib. 1. de Sacramentis, cap. 4. & 6. & libro de iis, qui initiantur mysteriis, cap. 8. & 9.

XXI. S. HIERONYMVS in cap. 3. ad Galat. reddit causam cur

240 Cap. XV. De effectu Sacrament. Lib. II.

cur fueirt Circumcisio instituta, & ne verbulo quidem indicat, fuisse in remedium peccati: *Quia*, inquit, *ex semine Abraha erat Christus oriundus*, & ab Abraham, & usque ad Christum multa erant secula transitura; providens Deus, ne soboles dilecti Abraha ceteris nationibus misceretur, & paulatim familia eius fieret incerta, gregem Israëliticum quodam Circumcisionis canterio denotavit. Denique per quadraginta annos in eremo nullus est circumcissus: soli quippe sine gentis alterius commistione vivebant. Statim ut Iordanis ripam transgressus est populus, Circumcisio necessario futuro ex commistione Gentium prouidit errori. Quod autem à Iesu duce secundo scribitur populus circumcissus significat in eremo cessare Circumcisionem, quæ in Aegypto rationabiliter exercebatur; & à Domino nostro Iesu Christo spirituali Circumcisione credentes esse mundandos. Idem in cap. I. Isaiaë dicit, Deum respuere caeremonias Iudaicas, & placere ei lauacrum Baptismi: *Quod solum*, inquit, *potest purgare peccata*.

Denique S. AUGUSTINUS etiam si de Circumcisione sensit, quod antea diximus; de aliis tamen Sacramentis aperte docet, quod omnes Catholici docent. Sic enim habet in Psalm. 73. *Sacramenta*, inquit, *non sunt eadem, quia alia sunt Sacramenta dantia salutem, alia promittentia Saluatorem. Sacramenta noui Testamenti dant salutem, Sacramenta Veteris Testamenti promiserunt Saluatorem*.

Ad hunc solum locum respondent Kemnitius & Caluinus. Kemnitius in Exam. pag. 59. & 60. respondet Augustinum loqui de Sacramentis veteribus, quæ non habebant annexam promissionem, sed erant mera signa, iuxta Lutheri distinctionem.

Non valet solutio, quia Augustinus loquitur in genere de Sacramentis veteribus, & maximè de sacrificiis, & dicit omnia esse mutata, quia non dabant salutem. Præterea cum Augustinus dicit, illa Sacramenta fuisse promittentia Saluatorem, videtur maximè loqui de illis, quæ habent annexam promissionem. Quomodo enim non habebant annexam promissionem, si promittebant Saluatorem?

SECUNDO, respondet cum Caluino, lib. 4. cap. 14. §. 26. Infit. Augustinum non loqui de efficacia Sacramentorum, sed de significatione; & hoc solum velle interesse inter illa, & ista, quòd

quodd illa significabant Christum venturum, ista significant eum iam exhibitum, & datum.

At contra; nam Augustinus non dicit, nostra significare Saluatorem, sed dare salutem. Præterea ibidem ait: *Mutata sunt Sacramenta, facta sunt faciliora, pauciora, salubriora, feliciora.* At hæc ad efficaciam, non ad significationem pertinent. Denique idem Augustinus in aliis locis apertè ponit discrimen quoad efficaciam. Epist. 19. ad Hieronymum: *Cur non dicam, inquit, præcepta illa Veterum Sacramentorum, nec bona fuisse, quia eis non iustificantur homines? Umbra enim sunt prænuntiantes gratiam, qua iustificamur.* Hæc ille. Quid clarius? Nõne idem prorsus dicit Augustinus, quod postea definiuit Concilium Florentinum? lib. 19. contra Faustum, cap. 13. *Instituta sunt, inquit, alia Sacramenta Virtute maiora, & utilitate meliora.* Hæc ille. Igitur nostra excellunt antiquis, vtilitate, & virtute; non sola significatione. tract. 41. in Ioannem: *In sacrificiis, inquit, non erat expiatio peccatorum, sed Umbra futurorum.* quæst. 25. in lib. Num. *Si, inquit, per se attendantur Sacramenta Vetera, nullo pacto possunt mederi: si autem res ipsa, quarum hæc Sacramenta sunt, inquirantur, in eis inueniri poterit purgatio peccatorum.* Hæc de testimoniis Patrum.

CAPVT XVI.

Idem probatur rationibus in Scriptura fundatis.

P R I M A ratio. Sacramentum, vt iustificare possit, debet habere annexam promissionem absolutam gratiæ. Nullum tale erat in lege veteri; igitur nullum eorum iustificabat. Maior propositio est certissima apud aduersarios. Nam id asserit Lutherus in assert. primi articuli, Philippus in locis anni 58. tit. de Sacramentis, Caluinus lib. 4. Instit. cap. 14. §. 3. denique Kemnitius in 2. parte Examinis, pag. 42. ponit in ipsa definitione Sacramenti, quod habeat promissionem gratiæ, & gratiæ non cuiuscunque, sed remissionis peccatorum. Denique coguntur hoc admittere, cum velint Sacramenta iustificare excitando fidem: fides enim apud eos non iustificat, nisi apprehendendo promissionem indulgentiæ.

242 Cap. XVI. De effectu Sacrament. Lib. II.

Minor propositio probatur PRIMO, ex Apostolo Hebr. 8. *Melius, inquit, sortitus est ministerium, quāto & melioris Testamenti mediator est, quod in melioribus re promissionibus sancitum est.* Et infra, explicans quæ sint istæ promissiones meliores noui Testamenti, profert illud Hieremiæ 31. *Propitius ero iniquitatibus eorum, & peccatorum eorum non recordabor amplius.*

SECUNDO, ex Augustino tract. in Psalm. 72. vbi dicit, promissiones Testamenti veteris, & noui esse diuersas, vt ipsa etiā Sacramenta sunt diuersa: tunc enim promittebantur res terrenæ, nunc autem cœlestes.

TERTIO, probatur ex ipso Luthero. Nam in libro de captiuitate Babyl. cap. de Eucharistia, ita loquitur: *Vetus Testamentum per Moysen datum promissio erat, nō remissionis peccatorum, seu rerum aternarum, sed temporalium, nempe terra Chanaan, per quam nemo renouabatur spiritu, &nde & irrationalē pecudem in figura Christi oportebat occidi, in cuius sanguine idem Testamentum confirmabatur, vt qualis sanguis, tale Testamentum, qualis hostia, talis promissio.* Hæc ille: vbi præbet nobis contra se argumentum planè insolubile. Nec potest responderi, loqui eum de Sacramentis, quæ non habēt annexam promissionem; nam expressè meminit promissionis. Et præterea paulò post ponit exempla in iride, vellere Gedeonis, horologio Achaz, & similibus, ac dicit, ista signa habuisse tantum promissiones terrenas, & tamen in sequenti capite, quod est de Baptismo, hæc ipsa signa vult esse propriæ Sacramenta, & nostris æqualia.

Porro Calvinus negat hanc minorē propositionem. Nam lib. 4. Instit. cap. 16. §. 4. dicit, vnā esse, & eandem promissionem Sacramentorum veterum & nouorum. Probatur igitur hæc minor. QUARTO ex singulis, quæ apud illos dicuntur Sacramenta. Lutherus enim Sacramenta vocat, sacrificium Abel, iridem, vellus Gedeonis, horologium Achaz. At nullum eorum habet promissionem remissionis peccatorum. Nam de sacrificio Abel nihil legimus, nisi placuisse Deo, postquam factum fuerat. Iris habuit promissionem solius temporalis salutis: vnde Genes. 9. dicitur, data in fœdus non tantum hominibus, sed etiam bestiis terræ, & omni reptili. Similiter in vellere Gedeonis, & in horologio Achaz, facta sunt signa ad confirmandam promissionem victoriæ contra hostes
tempo-

temporales. De aliis Sacramentis, vt de Circumcisione, de sacrificiis pro peccato, de manna, mari rubro, & ceteris idem ostendam in solutione argumentorum.

SECVNDA ratio. Lex ipsa vetus tota in hoc distinguitur à noua, quod illa non iustificat, hæc iustificat: ergo fieri non potest, vt Sacramenta vetera, quæ erant pars quædam illius legis, iustificarent. Probatur antecedens. Nam PRIMO dicitur, Ioan. 1. *Lex per Moysen data est, gratia, & Veritas per Iesum Christum facta est.* Quomodo hoc est verum, si Sacramenta Mosayca gratiam cōferebant? SECVNDO, 2. Corint. 3. illa vocatur litera occidens, noua, spiritus viuificans. At cur non erat etiam illa spiritus viuificans, si eius Sacramenta iustificabant? TERTIO, Galat. 4. dicitur illa in seruitutem generasse, nostra libertatem attulisse; At cur hoc, si etiam illa gratiam conferebat, quæ liberat à seruitute peccati? QUARTO, denique illud dicitur vetus Testamentum, quia ad veterem hominem pertinet, nec renouare nouit; nostrum dicitur nouum, quia renouat, vt docet Augustinus lib. 3. contra duas epist. Pelagian. cap. 4. vnde & Apostolus ad Titum 3. vocat Baptisimum lauacrum renouationis. Neque tamen hinc sequitur, non fuisse iustificationem à peccatis in sanctis hominibus Testamenti veteris: erat enim, sed non per Testamentum vetus, aut per eius Sacramenta, sed per Testamētum nouum, ad quod illi pertinebant, & ad cuius participationem fide, ac desiderio pertingebant.

TERTIA ratio. Promissio in Sacramentis, quæ sunt instituta ad iustificandum, non potest impleri nisi fide recipiatur, vt aduersarij dicunt. At promissiones annexæ Sacramentis veteribus implebantur, etiam si homines non crederent; non igitur Sacramenta illa erant instituta ad iustificandum. Probatur minor. Nam pmissio Dei annexa arcui cœlesti, qui Luthero est verum Sacramentum, fuit de non dissipanda vnuquā amplius terra aquis diluuij. Quæ promissio impletur, & implebitur etiam si homines non credant. Sic etiā promissio annexa Circumcisioni fuit, vt fieret Abraham pater multarū Gentium, & daret posteris eius terram promissionis, vt patet Genes. 17. & Roman. 4. quæ sine dubio implenda erat, etiam si Hebræi non crederent. Ita quoque omnia sacrificia habebant annexam promissionem de Christi morte futura pro expiatione peccatorum; id enim significabant omnes il-

læ mactationes; quæ promissio implenda fuit, siue crederent homines, siue non crederent. Vnde Apostolus Rom. 3. *Nunquid, inquit, incredulitas illorum fidem Dei euacuauit? Absit. Est autem Deus Verax, omnis autem homo mendax.*

QUARTA ratio. Nostra Sacramenta dicuntur in Scripturis saluare, regenerare, iustificare, vt suprà probauimus. Nihil tale vsquam legitur de Sacramentis veteribus, vt patebit ex solutione argumentorum: igitur temerè asseruntur paria, quoad efficaciam.

CAPVT XVII.

Soluuntur obiectiones.

ARGUMENTA aduersariorum sunt quinque. PRIMVM est ex cap. 17. Genesis, vbi Deus sic loquitur de Circumcisione: *Masculus, cuius praputij caro circumcisa non fuerit, delebitur anima illa de populo suo, quia pactum meum irritum fecit.* Ex hoc loco sumunt argumentum tam Catholici, qui putant Circumcisionem iustificasse ex opere operato, quam hæretici, qui non agnoscunt discrimen inter Sacramenta noui, ac veteris Testamenti.

Ac PRIMVM Catholici Augustinum sequuti in libro decimo sexto, de ciuitate Dei, capite decimo septimo, ita argumentantur. Deus minatur omni masculo Hebræorum, etiam infanti, perpetuum interitum, nisi fuerit circumcisis; ergo per Circumcisionem liberabantur masculi ab æterna morte.

Calvinus autem libro quarto Institut. cap. 16. §. 3. & 4. ita argumentatur. In Circumcisione eadem est promissio, quæ in Baptismo, nimirum remissionis peccatorum, & vitæ æternæ: igitur non differunt nisi externo ritu, seu signo. Probat antecedens. Nam Genes. 17. vbi instituitur Circumcisio, dixit Deus Abrahæ: *Ego ero Deus tuus, & seminis tui post te.* Quibus verbis, inquit Calvinus, *vita æternæ promissio continetur: quemadmodum interpretatur Christus, qui resurrectionem inde probauit, Matthæi 22. quod dicatur Deus, Deus Abraham, Deus Isaac, & Deus Iacob: non est enim Deus mortuorum sed viuentium. Itaque idem est dicere, Ego Deus, &*
Dabo

Dabo tibi Vitam aeternam. Sed primus ingressus ad Deum est per remissionem peccatorum; ergo promisit Deus etiam remissionem peccatorum, cum ait; Ero Deus tuus, & seminis tui. Confirmat argumentum Calvinus ex eo, quod Apostolus ad Ephesios secundo dicit, Gentiles, qui erant incircumcisi, fuisse sine Deo, sine Christo, sine spe, & alienos à promissionibus. Ergo ista omnia consequabantur homines per Circumcisionem.

RESPONDEO ad argumentum Catholicorum, vim totam illius argumenti pendere ex duabus vocibus, quæ habentur in editione Græca, qua utebatur S. Augustinus. Græci enim sic legunt locum citatum: *Et incircumcissus masculus, cuius non circumcidetur caro preputij in die octavo, peribit anima illa de populo suo.* ubi illa verba: *In die octavo*, sunt addita à Græcis: non enim habentur in codicibus Hebraicis, nec in paraphrasi Chaldaica, nec in Latina vulgata editione. Porro ob illa duo verba: *In die octavo*, S. Augustinus coactus est hunc locum exponere de paruulis, ac dicere, Deum minari pœnam paruulis carentibus Circumcisione; & hinc ulterius coactus est verba sequentia: *Quia pactum meum irritum fecerunt*, exponere de peccato originali, & de pacto facto cum Adamo de non comedendo ligno scientiæ boni, & mali, quod solum paruuli prævaricari potuerunt: & hinc vltimò coactus est, illa verba: *Peribit anima illa*, exponere de morte æterna, quæ debetur peccato originali. Vide Augustinum lib. 16. ciuit. cap. 27. lib. 2. de peccato originali, cap. 30. & 31. & lib. 2. de nuptiis, & concupiscentia, cap. 11. At si remoueamus à textu duo illa verba (*In die octavo*) vt verè remouenda sunt, totum argumentum concidet. Nam non cogemur exponere hunc locum de paruulis, immò cogemur exponere solum de adultis, vt hic sit sensus; Masculus Hebræus, qui noluerit circumcidi, aut filium suum circumcidere noluerit, peribit de populo suo, quia inobediens fuit præcepto à me dato de Circumcisione. Ex qua sententia non magis sequitur, Circumcisionem iustificare, quàm quodcunque legis præceptum: millies enim Deus minatur mortem non seruantibus præcepta.

Esse autem illum sensum eius loci, ostenditur tribus modis. PRIMO, ex illis verbis: *Quia pactum meum irritum fecit.* Nam etiam si S. Augustinus hoc exposuerit de pacto facto cū Adamo, tamen luce clarius est hoc debere exponi de pacto facto cum

246 Cap. XVII. De effectu Sacrament. Lib. II.

Et cum Abraham de circumcidendis masculis. Nam in illo capite octies nominatur pactum Dei, & semper accipitur pro pacto Circumcisionis. Et quid clarius illa expositione ipsius Dei in eodem capite: *Hoc est pactum meum, quod observabitis; circumcidetur ex vobis omne masculinum?* Proinde causa cō-
minationis hōc loco non est peccatum originale, sed peccatum actuale, id est, trāsgressio præcepti de Circumcisione, cuius peccati soli adulti capaces sunt.

SECUNDO, idem probatur ex illa pœna: *Peribit anima eius de populo suo.* Non enim ista verba significant mortem æternam, seu gehennam, sed pœnam aliquam temporalem. Nam id significat illud: *De populo suo*; non enim dicit, peribit absolute, sed peribit de populo, id est, separabitur à populo suo, seu per mortem corporalem, seu per quandam veluti excommunicationem. Vox enim Hebraica *תָּבַח* propriè excindere significat. Et ponitur hæc pœna in Scriptura passim contra omnes, qui aliquam cæremoniam omisissent, vt patet Exod. 12. & 31. Leuit. 7. 17. 18. 19. 20. & 23. Numer. 15. & 19. in quo ultimo loco dicitur, peritura anima illius de populo suo, qui tetigerit cadauer, & se aqua non abluerit; quæ certè omissio non videtur crimen dignum æterna morte.

TERTIO, probatur ex cap. 4. Exodi, vbi Dominus Moysem occidere voluit, quia filium suum non circumciderat. Vbi clarè videmus, pœnam illam esse mortem corporalem, & in eum latam, qui adultus sit, & capax peccati actualis, non in infantes. Et quanquam S. Augustinus quæst. 11. in Exod. & lib. 4. de Baptismo, cap. 24. conatur ostendere filium Moylis, non ipsum Mosem in periculo fuisse ob incircumcisionem; tamen res clarissima est. Nam si Deus minaretur mortē paruulo, si non circumcidatur octauo die; quid profuisset filio Mosi Circumcisio illa facta post octauum diem? Deinde textus apertissimus est: *Cumq; esset, inquit, in itinere in diuersorio Moses, occurrit ei Dominus, & volebat occidere eum. Quē eum? nisi Mosem, de quo loquebatur in proximis verbis. Præterea sequitur: Tulit ergo Sephora acutissimam petram, & circumcidit praputium filij sui.* Si illud: *Voluit occidere eum*, de filio Mosi intelligeretur, dixisset Scriptura; Circumcidit praputium eius, non autem filij sui. Præterea addidit Sephora, & dixit Mosi: *Sponsus sanguinum tu mihi es*, id est, iam te spon-

sum.

sum meum amissura eram, nisi te sanguine filij mei redemisssem. Quare S. Hieronymus in comment. cap. 5. ad Galatas, nō dubitat, quin Moses in periculo fuerit hoc loco, nō filius eius.

Ad argumentum Caluini, nego Circumcisioni fuisse annexam promissionē remissionis peccatorum, & vitæ æternæ. Id enim repugnat. PRIMO, Apostolo, & Augustino, qui vt supra vidimus, docēt meliores esse promissiones Testamenti noui, quàm veteris. SECUNDO, repugnat primæ institutioni Circumcisionis. Nam primū imperata est ipsi Abraham, & ei primò facta est promissio: ipse autem iustissimus erat ante Circumcisionem, vt patet ex Genes. cap. 12. & sequētibz, ex Paulo Rom. 4. Non ergo promissio erat de remissione peccatorum. TERTIO, repugnat isti ipsi capiti 17. Geneseos; vbi solum legimus, Deum promississe Abraham, quando illi iniunxit Circumcisionem, propagationem posteritatis, & terram Palæstinæ: *Ponam, inquit, fœdus meum inter me & te, et multiplicabo te vehementer nimis.* & paulò pòst: *Ego sum, & ponā pactum meum tecum, erisq; pater multarum Gentium.* Et infra: *Daboq; tibi, & semini tuo terram peregrinationis tue, omnem terram Chanaam.* Et hoc idem docet Apostolus Rom. 4. Verum quidem est, promissionem hanc terrenam, figuram fuisse promissionis spiritualis, & cœlestis, quæ danda erat iis, qui non carne, sed corde circumciderentur: & hoc etiam intelligebant Patriarchæ, & Prophetæ, & alij viri perfecti illius tēporis, vt dicit Apostolus Hebr. 11. & Tobias senior. 2. Job 13. tamen ad literam, promissio terrena erat annexa carnali Circumcisioni, & hæc sola ad vetus Testamentum pertinebat; & cōtrarium asserere, quod facit Caluinus, nihil est aliud, quàm ex lege Euangelium facere, & omnia confundere.

Ad probationem Caluini ex illo; *Ero Deus tuus*, RESPONDEO; his verbis non significari promissionem vitæ æternæ, vel remissionis peccatorum, sed tantū, vt exponit Chrysosto. in commēt. huius loci, promissionem cuiusdam peculiaris protectionis; qualis debetur populo peculiari, qualis fuit Israëliticus, vt in Deuteronomio passim repetitur. Hoc autem modo Deus non tantū erat Deus bonorum, sed etiam malorum, modò essent de populo Israël. Proinde non significant promissionem remissionis peccatorum illa verba: alioqui Deus non fuisset Deus, nisi iustorum. ADDE, quòd ista verba non tam sonant promissionem Dei, quàm obligationem populi.

populi. Idem enim est: *Ero Deus tuus, & seminis tui*, ac si dixisset: Non habebitis alium Deum quàm me; iuxta illud Hierem. 24. *Ego ero illis in Deum, & ipsi erunt mihi in populum.* Et illud Genes. 29. *Si fuerit Dominus mecum, & dederit mihi panem ad manducandum, erit mihi Dominus in Deum.*

At, inquit Calvinus, *Deus non est mortuorum Deus, sed viventium, & Christus ait; Ergo, Ero Deus tuus, significat promissionem vitæ æternæ.* RESPONDEO; Christi verba nihil aliud significare, nisi Deum non esse Deum eorum, qui non sunt, sed eorum, qui sunt, siue sint boni, siue mali; siue beati, siue damnati. Nam probare volebat contra errorem Sadducæorum, animas mortuorum hominum esse immortales, & idcò non extingui cum corpore, sed reuera permanere, & viuere: id verò probauit optimè ex verbis Dei ad Moysen, Exodi 4. *Ego sum Deus Abraham, Deus Isaac, & Deus Iacob.* Cùm enim illi iam mortui essent, quantum ad corpus, nisi viueret, quantum ad animam, non diceretur, Deus esse Deus eorum; non enim Deus est Deus eorum, qui nihil sunt.

Ad illud ex epist. ad Ephesios RESPONDEO; Gentiles fuisse sine Deo, sine Christo, sine spe, & sine promissionibus, non quia carebant Circumcisione, sed quia carebant vera fide, & notitia veri Dei, & idola pro Deo colebant. Alioqui enim etiam inter Gentiles, qui Deum verum agnoscebant, vt olim Iob, & postea Cornelius Centurio, & alij nonnulli, non erant sine Deo, sine Christo, & sine spe, etiam si circumcisi nõ essent.

Argumentum SECUNDVM sumitur ex Leuit. cap. 4. 5. & 6. vbi sic legimus: *Anima qua peccauerit, & contempto Domino, negauerit proximo suo depositum, quod fidei eius creditum fuerat, vel si aliquid extorserit, aut calumniam fecerit, siue rem perditã inuenerit, & inficiens etiam petierauerit, et quodlibet aliud ex pluribus fecerit, in quibus solent peccare homines, conuicta delicti, reddet omnia, qua per fraudem voluit obtinere integra, & quintam insuper partem domino, cui damnum intulerat; pro peccato autem suo offeret arietem immaculatum de grege, & dabit eum Sacerdoti iuxta astimationem mensuramq; delicti, qui rogabit pro eo corã Domino, & dimittetur ei pro singulis, qua faciẽdo peccauit.* Hic apertè videmus promitti remissionem cuiuscunque peccati, etiam periurij, quod inter grauissima numeratur, offerenti sacrificium. Et

confir-

confirmatur argumentum. Nam si hæc cæremonia à Deo instituta cum tam insigni promissione remissionis peccatorum non iustificat, ineptè Catholici colligunt ex epistola Iacobi cap. 5. Extremam vnctionem iustificare. Nam eodem modo loquitur Iacobus: *Infirmatur quis in vobis? inducat presbyteros Ecclesie, & orent super eum, & ungentes eum oleo in nomine Domini, & oratio fidei saluabit infirmum, & allenabit eum Dominus, & si in peccatis sit, remittentur ei.*

RESPONDEO; Sacrificia vetera valuisse ad expiationem peccati, quoad pœnam temporalem, & quoad immunditiam legalem, non quoad culpam, & pœnam gehennæ, nisi quatenus signa quædam erant protestantia fidem in Christum, vt docent communiter Theologi in 4. sentent. dist. 1. & S. Thomas in 1. 2. quæst. 103. art. 2. & Alfonso Tostatus in cap. 1. Leuit. quæst. 19.

Potest autem id probari multis modis. PRIMO, quia Scriptura non instituit sacrificia pro omnibus peccatis, sed solùm pro peccatis ignorantie, præsertim contra cæremonias legis, vt patet Leuit. 4 & 5. & etiam pro peccatis circa damnum proximi, in rebus externis, & pro periurio ex cupiditate habendi res alienas prolato, vt patet Leuit. 6. Pro aliis peccatis grauioribus, vt pro blasphemia, homicidio, adulterio, idololatria, nullum inuenitur sacrificium. Neque obstat, quod Leuit. 6. dicitur, sacrificio arietis expiari omne id peccatum, quo peccare solent homines. Nam loquitur de omni peccato circa ablationem rei alienæ, non de omni peccato simpliciter, alioqui frustra capitibus superioribus ponerentur varia sacrificia pro variis peccatis. Igitur si sacrificia non expiabant omnia peccata, sed solùm quædam, sine dubio non expiabant quoad culpam, sed solùm quoad pœnam temporalem, vel immunditiam legalem. Nam Deus nunquam remittit vnum peccatum quoad culpam & pœnam æternam, quin remittat omnia; & hinc etiam apparet differentia inter promissiones istas veteris Testamenti, & promissiones Sacramenti Extremæ vnctionis. Iacobus enim absolutè de omnibus dicit: *Si in peccatis fuerit, remittentur ei.*

SECUNDO id probatur, quia sacrificia vetera, vt notat S. Thomas loco citato, non placebant Deo ex se, sed ex deuotione & obedientia offerentium; vt patet: Quia Prouerb. 15. victimæ impiorum dicuntur abominabiles Domino; Eccles.

34. *Dona iniquorum non probat Altissimus, nec respicit in oblationes iniquorum.* Isaie i. ubi Dominus dixerat, se nolle sacrificia Israëlitarum; subiungit: *Manus enim vestra sanguine plena sunt.* Malach. 2. dicit Deus malis sacerdotibus: *Maledicam benedictionibus vestris.* Et i. Reg. 15. *Nunquid vult Deus sacrificium, & non potius, ut obediatur voci Domini?* Deniq; Gen. 4. *Respexit Deus ad Abel & ad munera eius; ad Cain & ad munera eius non respexit.* Vnde GREGORIUS lib. 22. moralium, cap. 12. *Iræ Indicis placare nescit oblatio, nisi ex munditia placeat offerentis.* Et infra: *Idcirco non Abel ex muneribus, sed ex Abel munera oblata placuerunt.* Hinc ergo colligimus, sacrificia non valuisse ad expiationem peccati. Nam vel qui offerri iubebat, iustus erat, vel iniustus; si iustus, non egebat remissione peccatorum; si iniustus, nihil valebat eius sacrificium, ut iam ostendimus. DICES, valere poterat iniusto ex merito Sacerdotis offerentis. At non possunt merita vnus conferre alteri primam gratiam certò, & infallibiliter. Hic autem ponitur promissio absoluta de remissione peccatorum; ergo oportet intelligere de remissione, quoad pœnam temporale tantum.

TERTIO, Ezechiel. cap. 18. cum de remissione peccatorum agitur, nusquam fit mentio sacrificiorum. Immò Prophetæ ceteri, & Paulus disertè docent, non posse sacrificiis expiari culpas animorum. Ne igitur Scripturæ inter se pugnent, cogimur fateri, in Leuitico non agi, nisi de expiatione legalis immunditiæ, vel remissione temporalis pœnæ.

Argumentum TERTIUM sumitur ex i. Cor. 10. ubi Apostolus loquens de manna Hebræorū, & de aqua scaturiente ex petra, sic ait: *Eandem escam spirituale manducauerunt, & eundem potum spiritualem biberunt.* Hoc argumentum magni facit Calvinus lib. 4. Instit. cap. 14. §. 23. *Nihilò splendidius de illis, inquit, loquitur Apostolus, quam de his: cum docet, Patres eandem nobiscum escam spiritualem manducasse, & escam illam Christum interpretatur. Quis inane ausit facere signum illud, quod veram Christi communionem Iudæis exhibebat?* Et infra: *Ergo, inquit, primum in Sacramentis pares nobis facit, nec ullam prerogatiua particulam nobis relinquit.* Idem argumentum vrgent Petrus Martyr in commentario i. Cor. 10. & Kemnitiſ in 2. par. Examinis, pag. 67.

Porro argumentum hoc quatuor habet difficultates. Nam PRIMO, vrgent particulam (*Eandem.*) Si enim eandem escam Iudæi

Iudæi veteres manducauerunt in manna, quam nos in Eucharistia, certè eiusdem erunt virtutis manna & Eucharistia. SECUNDO, vrgent particulā (*Spiritualem*). Si enim esca illa, & ille potus spiritualia erant, certè spirituale effectum habebant, proinde nō erant nuda signa corporalia. TERTIO, vrgent statum causse. Nam (vt ipsi dicunt) Apostolus volebat admonere Christianos, ne nimium confiderent in perceptione Sacramentorum, & vt non crederent, sibi esse omnia salua, quia Baptismum & Eucharistiam perciperēt, nisi etiam perseuerarent in bonis operibus: id verò Apostolus facit exemplis antiquorū, quibus parū profuerunt similia Sacramenta, cū non abstinerint se à peccatis. Oportet igitur Sacramenta illorum & nostra eiusdem esse dignitatis & efficacis, si Pauli argumentū aliquid valere debet. QUARTO, confirmant ex Augustino, qui de isto loco Pauli disputans tract. 26. in Ioan. dicit, Sacramenta Iudæorum & nostra fuisse in signis diuersa; in re quæ significatur, paria; diuersa specie visibili, paria virtute spirituali.

RESPONDEO; Calvinum & Kemnitium secum apertissime pugnare. Nam in primis Calvinus & Kemnitius loco notato volunt, manna & aquam de petra scaturientem, immò & transitum maris rubri, Sacramenta fuisse apud Iudæos, & Sacramenta iustificantia, vt apud nos Baptismus & Eucharistia. At ipsi idem suprà negarunt, ista esse Sacramenta. Nam Calvinus li. 4. Instit. cap. 14. §. 19. dicit, Sacramenta, de quibus agimus, esse cæremonias ordinarias, non aliquid quod semel, aut iterum factum est. Et Kemnitius in Examine 2. partis, pag. 41. posuit in definitione Sacramenti, vt sit cæremonia quæ duret, quamdiu religio durat. Constat autem, tales non fuisse manna, aquam de petra, & transitum maris: illa enim nec cæremonia fuerunt, nec nisi ad breue tempus durarunt. Deinde Calvinus hoc loco dicit, ita esse paria Sacramenta vetera nostris, vt nulla prærogatiuæ particula nostris relinquatur: & tamen suprà eodem cap. 14. §. 22. dixerat, nostra esse excellentiora, eò quod vberiore gratiam conferant. Porro Kemnitius in alia re grauiore secum pugnat. Nam hoc loco admittit cum Caluino, Eucharistiam nihilo esse præstantiorem, quàm fuerit manna Iudæorum, & non aduertit, Calvinum ista argumenta proferre ad probandum, in Eucharistia non esse corpus Domini, nisi tropicè, quomodo fuit in manna, cuius contrarium docent Lutherani, & ipse Kemnitius in hac ipsa 2. par. Examinis, pag. 332.

SED his omiſſis, ad PRIMAM partem argumenti reſpon-
 deo; cū Scriptura dicit: *Eandem eſcam manducauerūt*; non
 velle dicere, eandem eſſe eſcam noſtram & illorum, ſed ean-
 dem illorum omnium: eſt enim ſenſus; Omnes Iudæi eandem
 eſcam manducârunt, & tamen non omnes placuerunt Deo.
 Id quod probatur: nam PRIMO, illa non erant Sacramenta,
 noſtra ſunt Sacramenta, vt iam oſtendimus. SECUNDO, illa
 erant communia etiam beſtiis: nam etiam beſtiæ biberunt ex
 aqua ſcaturiente ex petra, & tranſierunt mare rubrum; & ca-
 nes, & gallinæ, & ſimilia animantia domeſtica, manna in ci-
 bum ſumpſerunt; & id non caſu aliquo, aut malitia alicuius,
 quomodo etiam fieri poſſet, vt ſigna Eucharistiæ à beſtiis vo-
 rarentur: ſed ex inſtituto & voluntate Dei. Deus enim aquam
 de petra eduxit, vt biberent homines & iumenta: & mare ape-
 ruit, & pluit manna, vt tranſirent, & viuerent homines & iu-
 menta. TERTIO, quia nulla legitur promiſſio facta com-
 edenti manna, aut bibenti aquam illam, aut tranſeunti per
 mare rubrum: noſtra autem Sacramenta habent ampliſſimas
 promiſſiones. Hic planè in anguſtias rediguntur.

Petrus Martyr in comment. I. Cor. 10. conatur extricare ſe;
 & poſtquam petiit, ubi nam ſint promiſſiones annexæ mari
 rubro & manna, ita reſpondet: *Exiſtimo ea eſſe, quæ in Exodo*
& in Numeris legimus. In Exodo quippe admonēbantur, vt at-
tenderent viſuri magnalia Dei. Idemque inuenies de manna
ſcriptum, ſi omnia diligenter percurreris. Hæc ille. At iſta te-
 ſtimonia ſunt inopiæ & miſeriæ aduerſariorum. Si enim ali-
 quid haberent, notarent locum Scripturæ, non nobis injun-
 gerent, vt quæramus. Porro diligenter quæſui, & non inue-
 ni, niſi has promiſſiones. Exod. 14. filiis Iſraël tranſituris mare
 rubrum, dicitur à Moſe: *State, & videte magnalia Dei. Aegy-*
prios enim, quos nunc videtis, non videbitis ſiſtrà in ſempiter-
num. Dominus pugnabit pro vobis, & vos tacebitis. Hæc au-
 tem promiſſio temporalis eſt, & continuò impleta occiſis in
 mari rubro Aegyptiis, vt ibidem legimus. Rurſus Exod. 16. ex-
 hibetur manna populo, & coturnices, nec vlla promiſſio ad-
 ditur, niſi illa dicatur promiſſio: *Vesperè comedetis carnes, &*
manè ſaturabimini panibus. Denique Exod. 17. & Numer. 20.
 educitur aqua de petra; ſed nulla eſt ibi promiſſio, niſi iſta:
Cum eduxeris aquam de petra, bibet omnis multitudo, & in-
menta eius.

Vidit Petrus Martyr, has esse terrenas promissiones; & idcirco ne penitus caussa cecidisse videatur, ex istis ipsis promissionibus elicere conatur promissionem remissionis peccatorum. Vtitur autem hac ratiocinatione; Extremum malorum, & radix omnium aliorum est peccatum; igitur cum petimus ab aliquo malo liberari, quodcunque illud sit, tacito sensu petimus a peccato liberari. Igitur eodem modo, quęcunque bona Deus promittit aut exhibet, innituntur reconciliationi cum eo, & gratiæ ac fauori eius. At certè facilius esset, ex petra elicere aquam, quàm ex his locis Scripturę elicere promissionem reconciliationis. Nam etiamsi peccatum Adę fuit occasio omnium malorum, tamen non sunt ita connexę afflictiones huius vitę cum peccatis, vt non possint esse separatę. Sępe enim peccant homines, & tamen non puniuntur in hac vita: sępe non peccant, & affliguntur, vt patet de S. Iob, & Tobia, & aliis, qui non propter peccata, sed ad exercitium virtutis affligebantur. Et contrā in rebus bonis, sępe Deus dat affluentiam rerum temporalium iis, quibus non est daturus gratiam suam, & vitam æternam, vel vt remuneret eorum bona opera moralia, vel aliis de causis; & non dat bona temporalia iis, quibus daturus est vitam æternam, vt patet Lucę 16. exemplo diuitis & mendici; & in Scripturis passim de Nabuchodonosor, de Cyro, & aliis, quibus Deus subiecit orbem terrę, cum tamen eius amici nunquam fuerint. Vide Augustinum lib. 5. de ciuitate Dei, cap. 12. & 15. Itaque errat Martyr apertissimè, cum dicit, quęlibet bona quę Deus dat, inniti reconciliationi cum Deo, & gratiæ ipsius. Nec sequitur; Deus promisit populo Iudęorum victoriam de hostibus, vel abundantiam cibi & potus; ergo promisit remissionem peccatorum & vitam æternam. Vide BASILIUM libro de Spiritu sancto, cap. 14. vbi probat, nullam fuisse spirituales promissionem in transitu maris rubri, mannę, aquę, &c. ac dicit, eos vniuersam Euangelicam dispensationem extenuare, qui signa illa nostris æquant: *Quę, inquit, peccatorum remissio, quę vita renouatio in mari? quod donum spirituale datum est per Moysen? quę illic peccati mortificatio?*

Ad SECUNDAM partem argumēti dico; Manna & aquam de petra scaturientem vocari cibum & potum spirituales, non propter effectum, sed propter causam, & propter significationem. Propter causam quidem, quia vtrumque produ-

ctum

etum erat per miraculum opera Angelorum; vt indicant hoc loco Chrysostomus & Theophylactus. Vnde Psal. 77. manna dicitur panis Angelorum: *Panem Angelorum manducauit homo.* Et certè non dicitur panis Angelorum, quia eo vescantur Angeli, sed quia eum fecerunt Angeli. Et de aqua explicat idem Apostolus, cur diceretur potus spiritualis: *Bibebant,* inquit, *de spirituali consequente eos petra, petra autem erat Christus.* Vbi non ipsam aquam quam bibebant, vocat spiritualementem; sed petram, quæ erat causa illius aquæ; & monet, veram causam illius aquæ non fuisse petram corporalem & visibilem, quæ fixa humi iacebat, sed quandam aliam inuisibilem petram, id est, Christi Dei prouidentiam, quæ eos nunquam deserebat. Quare cum dicit Apostolus: *Bibebant de spirituali petra,* non est sensus (vt putat Calvinus) quod biberent spiritualementem petram, id est, Christum, sed quod biberent aquam ex petra spirituali, id est, Christo, tanquam ex causa efficiente profluentem. Quocirca non comparat Apostolus aquam cum Christo, sed petram, quæ erat causa aquæ. Confirmatur hæc tota expositio ex Ioan. 6. *Patres vestri manducauerunt manna in deserto, & mortui sunt. Qui manducat hunc panem, & uiuet in æternum.* Vbi Dominus apertissime docet, non fuisse manna Iudæorum cibum spiritualementem, quoad effectum, vt est Eucharistia: qui enim manna manducarunt, mortui sunt.

Respondent Calvinus lib. 4. Instit. c. 14. §. 25. & Martyr loco citato, Christum se accommodasse crassæ Iudæorum opinioni, qui manna nihil aliud, nisi cibum ventris esse cogitabant. Itaque Christum non asseruisse, se daturum meliorem cibum, quam fuerat manna reuera, sed quàm fuerat manna secundum crassam Iudæorum opinionem. At contra. Nam vel Iudæi rectè sentiebant, manna fuisse cibum corporalem tantum, vel non rectè: si rectè, igitur nostra Eucharistia est longè melior, cum sit cibus spiritualis: si non rectè, igitur Dominus approbavit illorum errorem, & non syncerè, immò nec verè loquutus est. Siquidem etiam ipse asserit, cibum illum fuisse corporalem tantum, cum ait: *Patres vestri manducauerunt manna, & mortui sunt.* & clariùs paulò antè: nam cum gloriarentur, patres suos manducasse manna in deserto, & hunc panem quasi cœlestem iactarent, Christus dixit: *Nō Moses dedit vobis panem de cælo, sed Pater meus dat vobis panem de cælo verum;* id est (vt rectè exponit Cyrillus lib. 3. in Ioan. cap. 34. & Chrysostomus

sofomus hom. 44. in Ioannem) manna non erat reuera panis cœlestis, sed terrenus, licet de cœlo, id est, ex aëre descenderit; panis autem verè cœlestis est iste, quem nunc Pater dat vobis.

Adde quod CHRYSOSTOMVS homil. 45. in Ioan. nobiscum sentit: *Animaduerte, inquit, quam faciat huius panis & manna differentiam, ab & vtriusq; scilicet sine: quòd enim manna nihil magnum praberet, addit; Patres nostri manducauerunt, &c.* Item CYRILLVS lib. 4. in Ioan. cap. II. de manna Iudæorum, ita Christum loquentem inducit: *Ego sum panis & vitæ; ille figura, imago, & imbrag; solummodo fuit.*

Ad TERTIAM partem argumenti respondeo, scopum Apostoli non esse ostendere, non esse nimium confidendum in Sacramentis, sed potius non esse abutendum Sacramentis. Nam si vellet ostendere, non esse nimium confidendum in Sacramentis, idq; exemplo Iudæorū, accepisset in exemplum vera Sacramenta Iudæorum, vt Circumcisionem, & agnum Paschalem, & similia. Ipse autem accepit alia quædam, quæ sunt quidem figuræ Sacramentorum nostrorum, non tamen sunt ipsa Sacramenta, vt supra ostendimus. Præterea id patet ex ipso contextu. Nam cap. 8. hortabatur Christianos, ne manducarent idolothyta; ne eo modo offenderent infirmos: deinde cap. 9. ostendit exemplo suo, oportere non offendere infirmos; tum cap. 10. redit ad quæstionem de idolothytis, & probat, non esse ea comedenda, quia nimis turpe sit, à mensa Domini transire ad mensam dæmoniorum; id enim est signum magnæ ingratitude in Christum, & magnæ irreuerentiæ erga Sacramenta ipsius. Ad hoc igitur ostendendum profert exempla Iudæorum. Proinde non requiritur (vt vult Caluinus) vt parem vim tribuamus mari rubro & Baptismo, manne & Eucharistiæ. Nam quòd sunt illa inferiora, eò argumentum Pauli est fortius. Si enim Iudæi puniti sunt, quòd contempserint figuras Sacramentorum nostrorū, & ingrati fuerint Deo, à quo illa beneficia acceperant; quantò iustius puniendi sunt Christiani, qui contemnunt Sacramenta ipsa, & ingrati sunt Deo, à quo acceperunt beneficia longè maiora?

Ad QUARTAM partem argumenti respondeo, S. Augustinum nusquam dicere, Sacramenta nostra & vetera esse paria, quoad efficaciam, sed tantum quoad significationem, seu rem significatam, quia nimirum eundem Christum omnia significant. Vide Augustinū non solum tract. 26. & 41. in Ioannem,

quæ

quæ loca aduersarij citant; sed etiam in Psal. 72. & 77. & tract. II. in Ioan. & homil. 27. ex lib. 50. homiliarum: ubiq; enim hoc repetit, diuersa fuisse signa, sed vnâ rem significatam, id est, Christum. Illa autem verba, quæ Calvinus citat ex tract. 26. in Ioan. *Diuersa sunt specie visibili, paria virtute spirituali*; non integrè & bona fide adducta sunt. Sic enim AUGUSTINVS loquitur: *Aliud illi, aliud nos, sed specie visibili quidem, tamen hoc idem significante virtute spirituali*: id est, diuersa erant signa, tamen quoad vim spirituales significanti, eadem erant, quia idem significabant: quod clarius paulò antè dixerat his verbis: *In signis diuersa sunt, sed in re, qua significatur, paria sunt*. Nec poterat Augustinus vllò modo dicere, quod ei Calvinus tribuit, Sacramenta vetera nostris æqualia esse, quoad efficaciam, cùm in Psal. 72. dixerit, nostra esse salubriora & feliciora; & lib. 19. contra Faustum, cap. 13. nostra dixerit esse virtute maiora, vtilitate meliora.

Vnum est hîc OBSERVANDVM, Augustini expositionem, qui per eandem escam spirituales I. Cor. 10. intelligit significari, eadem esse Sacramenta vetera & noua, quoad vim significanti, & inde illam escam dictam esse spirituales, non esse quidem contra nos, vt iam ostendimus; tamen non esse necessariò sequendam. Nam si per escam spirituales intelligeremus escam spiritualiter intellectâ, vt vult Augustinus, tunc soli iusti eam manducassent. Id quod fatetur Augustinus, & ideo notat Paulum dixisse: *Patres nostri eandem escam spirituales manducaverunt*; non autem, Patres vestri, quia loquebatur solùm de iustis, qui sunt nobis similes. Christum autem Ioan. 6. dixisse: *Patres vestri manducaverunt manna*, non, Patres nostri; quia loquebatur Dominus de malis Iudæis, qui non manducaverunt illam escam spiritualiter. At hoc repugnat Apostoli verbis, qui ait: *Patres nostri omnes eandem escam spirituales manducaverunt*; & per, *Omnes*, intelligit non omnes iustos tantùm, sed omnes absolutè tam bonos, quàm malos, qui in deserto illo fuerunt. Nam subiungit: *Sed non in pluribus eorum beneplacitum est Deo*: & paulò antè dixerat: *Patres nostri omnes sub nube fuerunt, & omnes mare transierunt*. At certè non tantùm boni, sed etiam mali sub nube fuerunt, & mare transierunt. Verior igitur est Chrysostomi & Cyrilli expositio, & aliorum interpretum, quos suprâ sequuti sumus. Nec mirum esse debet, si anteponimus in huius loci expli-

explicatione Chrysostomū Augustino. Nam ille scripsit commentaria ex professo in epistolam hanc B. Pauli; hic autem obiter explicuit hunc locum in commentariis in Ioannem.

Argumentum **QVARTVM** sumit Kemnitius ex Paulo Coloss. 2. *Circumcisi estis Circumcisione non manu facta, in expoliatione corporis carnis. Paulus, inquit Kemnitius pag. 66. permutatis Vocabulis Circumcisionis & Baptismi, significat nos, qui in nouo Testamento per Baptismum habemus expoliationem corporis peccatorū carnis, accepisse, & habere idem, quod circumcisi in Veteri Testamento per Circumcisionē acceperunt.*

RESPONDEO, hoc argumentum nihil concludere. Nam etiamsi Paulus Baptismum vocat Circumcisionem, quia Circumcisio fuit figura Baptismi; tamen non inde sequitur, eundem fuisse effectum vtriusque, immò sequitur, non esse eundem, cum non possit esse vis eadem figuræ, & rei figuratæ. Vnde idem Apostolus Circumcisionem Iudaicam vocat manu factam, nostram autem negat esse manu factam, quia qui principaliter baptizat, Deus est, non homo. Neq; tribuit Paulus effectum Circumcisionis Baptismo. Nam expoliare à corpore peccatorum, id est, à toto corpore obnoxio peccatis, & reddere hominem plenè spiritualem, tribuit Paulus soli Circumcisioni Christianæ, id est, Baptismo. Circumcisio enim Iudaica nō totum corpus, sed vnam particulam circumcidebat.

Argumentum **QVINTVM** est Kemnitij, pag. 67. ex Paulo ad Hebr. 13. *Christus Iesus heri, & hodie, ipse & in secula.*

RESPONDEO, argumentum si quid concludit, tantum concludere Sacramenta vetera idem significare, quod nostra significant, nimirum Christum, qui erat in Testamento veteri latens in figuris, & vaticiniis. At ne hoc quidem concludit. Nam Apostolus loquitur de fide, & doctrina, non de Sacramentis: vult enim credi, Christum esse æternum, non temporalem, vt somniabant hæretici.

CAPVT XVIII.

De charactere.



SEQUITVR TERTIA quæstio de effectu Sacramentorum, quæ est de charactere: an scilicet Sacramenta aliqua imprimant in anima indelebilem characterem. Tria dicemus, **PRIMO**, quid aduer-

258 Cap. XVIII. De effectu Sacram. Lib. II.

aduersarij sentiant de charactere. SECVNDO, quæ sit sententia ac doctrina Catholicorum de charactere. TERTIO, demonstrabimus ex Scriptura, Patribus, & rationibus hanc veritatem. Ex quibus argumenta aduersariorum euanescent.

Quoad PRIMVM Ioannes VViclefus lib. 4. Trialogi, cap. 15. (teste Thoma VValdensi tomo 2. de Sacramentis, cap. 109.) characterem Sacramentalem affirmat nec Scriptura, nec ratione posse probari. Idem hoc tempore docent omnes hæretici, ac in primis Ioānes Calvinus in antidoto Concilij, sess. 7. can. 9. & Martinus Kemnitius in 2. p. Examin pag. 129. & seq. & Tilmannus Heshusius in lib. de errorib. Pontificiorum tit. 5.

Argumenta sunt tria, quibus vtitur Kemnitius. PRIMVM, quodd in Scripturis, & Patribus de charactere isto mirum silentium sit. Quod argumentum etiam Caluini est; & ex his, quæ dicemus, per seipsum corruet.

SECVNDVM est, quodd inter ipsos etiam Scholasticos nihil sit certum id quod ex Gabriele probat. Et hoc etiam argumentum paulò post euanesceat.

TERTIVM, quodd primus auctor, siue excogitator characteris fuerit Innocentius III. Papa; qui multa mala partim decreuit, partim etiã fecit, ac inter alia Othonem Imperatorem creati curauit, ac postea eundem excommunicauit, ac deposuit. In quo argumento duo sunt mendacia. VNVM, quodd Innocentius III. excogitauerit primus characterem; quod mendacium est. Nam idem Innocentius cap. Maiores, extra de Baptismo, refert opinionem quorundam dicentium eos, qui inuiti baptizantur, recipere tantum characterem, vt illi qui baptizantur ficti. Non ergo ipse primus excogitauit characterẽ. ALTERVM, quodd idem Pontifex malus fuerit: fuit enim vnus ex laudatissimis Pontificibus. Nam vt omittam opera eius, libros de contemptu mundi, sermones, & epistolas, quæ pietatem spirant: laudatur ab omnibus historicis, vt optimus, & doctissimus. Ac vt omittam Italicos, Blondum, Platinam, & alios, solùm audiamus testimonium duorum Germanorum.


Albertus KRANTIVS homo Germanus, & qui ante Lutheranas contentiones scripsit, proinde nec odio, nec amore ducebatur, lib. 9. Metropolis, cap. 1. *Laudabilia*, inquit, *multa scripsit, multa constituit*. Et lib. 12. cap. 2. *Præfuit*, inquit, *Innocentius III. Pontifex, cui parem multa doctrina, rerum magnificencia, ac illa non habuit*. Idem lib. 7. Saxonia, cap. 37. scribit,

bit, Othonem Imperatorem rebellem Ecclesiæ fuisse, & ideo nihil ei prosperum successisse, & tandem in morte summum dolorem, & contritionem ob id peccatum habuisse, adeò, ut etiam iuberet ab infimis famulis domus suæ in signum pœnitentiæ collum sibi pedibus conculeari: quæ certè pœnitentia non Papam, sed Imperatorem errasse docet.

Abbas VRSBERGENSIS, item Germanus, & qui tempore Innocentij vixit, & non bene erga eum affectus fuit, quod studebat Philippo Imperatori, cui Papa aduersabatur; & denique quem solùm Kemnitius citat contra Innocentium; iste, inquam, auctor rectissimè de illo sensit. Nam ubi scribit de Philippo Imperatore, dicit, non esse credendum, quod Papa voluntatem suam Deo præferre voluerit, licet Philippo aduersaretur, quod est dicere Papam non malo animo, sed ex aliqua falsa informatione non fauisse Philippo. Et infra loquens de excommunicatione Othonis dicit, Othonem contra iuramentum Domino Papæ factum inuasisse hostiliter, & sibi usurpare voluisse terras S. Petri. Item addit Papam pro bono pacis omnes iniurias tolerare voluisse, & tamen ne sic quidem potuisse flecti Othonis obstinationem. Ibidem dicit Papam ut fortem virum, & in Domino confidentem tria ardua negotia peregisse, nimirum Othonis depositionem, expeditionem pro auxilio terræ sanctæ, & Concilium generale maximum, & Ecclesiæ utilissimum.

CAPVT XIX.

De charactere sententia Catholicorum.

 VANTVM ad SECUNDVM, sententiam Catholicorum aliquot propositionibus complectemur: quibus comprehendam solutiones omnium questionum, quas Kemnitius attingit, & de quibus dicit, nihil esse certum.

PRIMA: *Signum aliquod spirituale anima imprimitur in quibusdam Sacramentis, quod character appellatur.* Hæc est omnium Catholicorum in 4. d. 6. & habetur expressè in Conciliis generalibus Florent. in Instructione Armenorum. & Trident. sess. 7. can. 9. Est autem NOTANDVM, Theologos aliquos, ut Durandum in 4. d. 4. q. 1. & Scotum dist. 6. q. 9. & Gabrielem ibidem quæst. 2. admittere quidem characterem, sed quædam docere, quæ videntur facere pro Kemnitio. Primò Durandus

dicit, characterem nō esse aliquid reale distinctum ab anima, sed esse solum respectum rationis: tamen ibidem dicit, characterem non esse debere negari, & hoc omnes Theologos dicere. Igitur Durandi dubitatio non est de characterē an sit, sed quid sit. Porro ceteri omnes fatētur characterem esse aliquid reale distinctū ab anima. Scotus dubitat de ratione probandi characterem, ac dicit non posse probari ex aliquo manifesto Scripturæ testimonio, vel etiam ex Patribus: tamen ob Ecclesiæ auctoritatem non dubitat esse certissimum dari characterem. Gabriel dubitat etiam, an Ecclesia id definierit, tamen dicit, esse præsumptuosum negare characterem: his enim verbis utitur in fine primi dubij. Ceteri omnes non solum Ecclesiæ auctoritate, sed etiam Scripturis, & Patribus, docent characterem probari posse. Nulla ergo fuit inter Scholasticos quæstio, nisi de modo probandi characterem.

Nomen autem characteris acceperunt Scholastici ab Augustino, qui hoc nomine passim utitur: alij enim veteres ante Augustinum, signum, aut signaculum vocant, non characterem; restamen eadem est. CHARACTER enim Græca vox est, & formam significat, seu figuram, & habetur in codice Græco hoc nomen in Scripturis Hebr. I. & in codice Latino Apocal. 13. licet non de Sacramentis, sed de aliis rebus in his locis agatur.

SECUNDA propositio: *Character non est relatio, sed absoluta qualitas.* Hæc est communis, Scoto & Durando exceptis. Durandus loco citato, docet characterem esse ens rationis, id est, respectum aduenientem ex deputatione ad certum officium, qualis est relatio in Doctoribus, Prætoribus, &c. Quæ sententia vix distinguitur ab hæresi huius temporis, & videtur expressè damnata in Conciliis, quæ si Durandus videre potuisset, sine dubio aliter docuisset. Hæretici enim non negant, neq; negare possunt, quin sit aliqua relatio rationis in ministris, quæ non est in aliis, qui non sunt deputati ad ministrandum. Proinde Concilium Tridentinum cū dicit anathema negantibus characterem, & intendit errorem aliquem damnare, sine dubio damnat eos, qui negant realem characterem. Scotus vult esse realem relationem: sed certè vix id defendi potest. Nam character omnium consensu producit per actionem Sacramentalem: relationes autem non producuntur, sed consurgunt ad productionem fundamenti proximi. Præterea
quod

quod esset fundamentum huius relationis? num anima? at tunc in omnibus hominibus esset character. Num fides, aut gratia? at sine his character esse potest. Scio Scotum quoddam genus relationis constituere, ad quod actio esse possit. Sed nō est mihi propositum ista latius disputare; neq; desunt, qui sententiā illam Scoti accuratē refutauerint. Certē nomen ipsum characteris, nōne aliud quā relationem significat? Deniq; modus loquēdi Patrum, qui dicunt characterem imprimi, & infigi, coq; nos consecrari, & consignari, absolutam rem nominant. Est igitur character qualitas absoluta, ex qua tamen consurgit relatio similitudinis ad Christum, cui configuramur per characterem.

TERTIA propositio: *Character tria habet officia, aptum facere ad cultum diuinum, configurare Christo, & distinguere ab aliis.* Explico: **PRIMUM** officium est aptum facere. Est enim character potestas quādam spiritualis & supernaturalis, partim actiua, partim passiuā. Nam tria sola Sacramenta imprimunt characterē, Baptismus, Confirmatio, Ordo. Character Baptismatis est passiuā potestas: facit enim hominem aptum ad suscipienda omnia alia Sacramenta; & sine ipso nulla Sacramentorum aliorum susceptio est rata. Character Ordinis est actiua potestas ad ministranda aliis Sacramēta. Character Confirmationis habet vtrumque: nam & facit aptum ad alia Sacramenta suscipienda, & facit etiam aptum ad profitendam fidem. Videtur tamen magis principaliter esse actiuus, quā passiuus, character iste Confirmationis. Nam sine isto characterē tenent reliqua Sacramenta, quod non esset, si iste character esset principaliter passiuus, sicut character Baptismi. Est tamen hīc **NOTANDVM**, istam potentiam non videri Physicā, sed moralem. Non enim character attingit effectum, sed tantū operari dicitur, quia vbicunq; est talis character, Deus ex pacto adest, & concurrat ad effectum supernaturalem producendum, quod non facit, vbi non est talis character.

SECUNDVM officiū oritur ex primo. Quia enim ista potentia deriuatur à Christo, & est quādā quasi participatio potestatis Christi, qui vt summus Sacerdos habet omnem potestatem in Sacramentis, idē character configurat nos Christo, & similiores illi facit, quā sint alij, qui nō habent characterem.

TERTIVM officium oritur ex secundo. Quia enim per characterem Christo configuramur speciali quadā ratione, inde

fit vt distinguantur isti ab aliis, vt sacerdotes à laicis, & laici confirmati à non confirmatis, & baptizati à non baptizatis. Atq; hinc intelligitur cur Theologi dicant, characterem esse Sacramentum, & rem Sacramenti, cùm signum externum sit Sacramentum tantum, gratia autem sit res tantum. Nam character est effectus Sacramenti sensibilis, & sic dicitur res: & simul est signum, quòd homo sit consecratus Deo, & Christi miles, &c. immò etiam gratiæ, quæ vel adest, vel adesset, nisi poneretur obex.

QUARTA propositio: *Character Sacramentalis in sola anima est, tanquam in subiecto.* NOTA, conuenire omnes, characterem esse in anima inhæsiuè. Accidens enim non inheret in accidente, sed in substantia: tamen potest accidens vnum esse in alio duobus modis. PRIMò, quia mediante illo est in substantia; quomodo accidentia corporalia sunt in quantitate. SECUNDO, quia perficit operationē alicuius alterius accidentis, quomodo fides dicitur esse in intellectu, spes & charitas in voluntate. Hoc modo characterem aliqui ponunt in intellectu, vt necessariū ad exercendos actus intellectus. Alij ponunt in voluntate, quia putant disponere ad charitatem, quæ est in voluntate. Alij ponunt simpliciter in substantia animæ, & hoc videtur verius, quia non est habitus, vel potentia operatiua. Vnde Concilia Florent. & Trident. dicunt, imprimi in anima.

QUINTA propositio: *Character indelebilis est.* Hæc habetur in Conciliis notatis, & ab omnibus conceditur. Ratio à posteriori est, quia constat, Sacramenta quæ imprimunt characterem, non posse repeti. A priori multæ rationes adducuntur, sed potissima est, quia character non habet contraria, & est in subiecto incorruptibili. Non enim est sicut habitus fidei aliarumque virtutum, qui per actus contrarios tolluntur: vel est sicut potentia secundum quosdam, vel sicut forma, seu figura secundum alios. Accedit quod character est quædam consecratio animæ: consecratio autem tamdiu durat, quamdiu durat res consecrata.

SEXTA propositio: *Tria solum Sacramenta imprimunt characterē; Baptismus, Confirmatio, Ordo.* Hæc etiam habetur in Conciliis prædictis, & ab omnibus conceditur; & ratio à posteriori eadem est, quæ superioris Conclusionis. A priori difficile est, & minimè necessarium, reddere rationem. Illa potissimum adduci solet, quod in his tribus accipit homo nouam potesta-

potestatem, ac deputatur nouo ministerio per nouam consecrationem, & quodammodo statum mutat; & proinde accipit nouum signaculū. Nam in Baptismo trāsit homo à Diabolo ad Christum, & adscribitur in eius familiam, & accipit potestatem participandi Sacramenta, aliaq; bona Ecclesiæ Christi. In Cōfirmatione adscribitur ad militiam Christi, vt gerat vexillum eius in fronte, & accipit robur, & potentiam, vt ex officio pugnet contra dæmones. In Sacramento Ordinis adscribitur in numerum ducum, & præpositorum huius militiæ, & accipit potestatem distribuendi aliis bona Domini sui. In aliis Sacramentis non fit mutatio status, nec deputatur homo nouo ministerio, nec accipit nouam potestatem; sed vel aliter spiritualiter, vt in Eucharistia, vel accipit medicamentū contra morbos, & vulnera peccatorum, vt in Sacramento Pœnitentiæ, vel accipit antidotum contra reliquias peccatorum, vt in Extrema vnctione, vel denique accipit remedium contra concupiscentiam, vt in Matrimonio.

SEPTIMA propositio: *Nec Circumcisio, nec ulla Sacramentum Veteris legis imprimebat characterē in anima.* Ita S. Thomas 3. p. q. 63. art. 1. Contrariū sentit Scotus de Circumcisione in 4. d. 6. q. 9. ad 1. sed verior est sententia S. Thomæ. Nam Circumcisio imprimebat in corpore caractere, & eo modo figura erat Baptismi, qui characterem in anima impressurus erat. Præterea character nobis imprimitur ad suscipienda vel ministranda opera supernaturalia: nulla autem opera Sacramentorum legis veteris erant supernaturalia. Deniq; Scotus, quia docuerat, Circumcisionē ex opere operato conferre gratiam, non sine causa tribuit etiam impressionem characteris Circumcisioni. At nos, qui docemus Circumcisionē nullam vim habuisse ex se, nisi ad præcidendam carnem: debemus etiam consequēter negare vim imprimendi spirituale characterem.

OCTAUA propositio: *Nullus in Christo character fuit creatus.* Est etiam S. Thomæ 3. par. quæst. 63. art. 5. Et ratio est; quia character est quædam participatio sacerdotij Christi, igitur solum est in illis, qui habent hoc sacerdotium per participationem. Item signari caractere, est ouium, seruorum, militum, deniq; subditorum, qui recipiuntur ab aliquo maiore ad aliquod ministerium; Christus autem est Pastor, Dux, Dominus, &c. Item Christus non accepit vlla Sacramenta, ergo nec eorum characteres. Denique nos egemus caractere, vt Deus

nobiscum quasi ex pacto concurrat ad actiones Sacramentales; at Christus non eget, vt vllus cum eo ex pacto concurrat, cum sit ipse causa principalis vt Deus, & instrumentalis coniuncta vt homo. Non enim facit vllus pactum secum, aut cum suo brachio de concursu.

CAPVT XX.

Probatur character ex Scripturis.

QUANTVM ad TERTIVM, probandum est ex diuinis literis, characterem esse. Vbi interim OBSERVANDVM est, non esse mirandum, si non inueniantur tot testimonia, & tam expressa de characterē, vt inueniuntur de gratia. Nam gratia est effectus principalis, character secundarius: item gratia est effectus omnium Sacramentorum, character aliquorum tantum; proinde vera ratio Sacramenti potest sine characterē consistere. Denique; notitia gratiæ magis necessaria est, quàm characteris. Non desunt tamen loca Scripturę, ex quibus character colligi possit, præsertim adiuncta explicatione Patrum, & Ecclesiæ, sine qua nullum dogma Ecclesiasticum omnino certò statui potest.

PRIMVM testimonium est 2. Cor. I. *Qui conxit nos Deus, & signauit nos, & dedit pignus Spiritus in cordibus nostris.* Hic tres effectus ponuntur regenerationis, & iustificationis, quæ fit in Baptismo. PRIMOVNCTIO, quæ sine dubio fit per gratiam gratum facientem. Vt enim oleum sanat morbos, reddit robusta membra, illustrat, consolatur, &c. ita gratia iustificans facit. SECVNDO est signum, seu obsignatio quædam, qua consecramur Deo, & deputamur ad eius cultum; & per hanc intelligimus characterem, quem Patres passim signum & sigillum vocant. TERTIO pignus spiritus, id est, testimonium bonæ conscientię, quod sequitur iustificationem, & est quasi arrabo futuræ gloriæ. Nihil enim in hoc mundo iucundius testimonio bonæ conscientię: hæc est enim pax, quæ exuperat omnem sensum. Neque potest responderi per hoc signum intelligi ipsum Sacramentum externum, quo obsignantur promissiones, vt aduersarij volunt; tum quia Paulus loquitur de obsignatione cordis, non corporis, vt etiam de vnctione interna, & testimonio interno; tum etiam quia Paulus dicit

nos obfignari, non promiffiones. Alioqui etiam oporteret dicere iungi promiffiones: nam eodem modo loquitur Paulus de figno, & de vnctione. Vide Ambros. lib. I. de Spiritu sancto, cap. 6. Haym. & Theod. in hunc locum.

SECUNDVS locus est Ephes. I. *In quo & credentes signati estis Spiritu promissionis sancto, qui est pignus hereditatis.* Vbi NOTA illud (credentes) in Græco esse temporis præteriti *πιστεύοντες*, id est, postquam credidistis. Quocirca loquitur de Baptismate, quod datur post fidem; ac dicit in Baptismate dari obfignationem virtute Spiritus sancti. Et ita exponunt de signaculo, quod accipitur in Baptismo, Græci & Latini, Chrysostomus, Theophylactus, Hieronymus, Haymo, Beda, Anselmus, & alij. Nec possumus dicere hîc agi de obfignatione promissionem ad excitandam fidem, quandoquidem hæc obfignatio datur post fidem.

TERTIVS locus est Ephes. 4. *Nolite contristare Spiritum sanctum Dei, in quo signati estis in diem redemptionis.* vbi per *diem redemptionis*, intelligit diem regenerationis per Baptismum, vt Haymo, & Oecumen. annotârunt. Neq; obstat particula illa, *in diem*, quia Apostolus solet vsurpare præpositionem *ἐν*, quæ coniungitur accusatiuo, pro præpositione *ἐν*, quæ coniungitur datiuo apud Græcos, & ablatiuo apud Latinos: vt 2. Tim. vlt. *Saluabit me in regnum suum cæleste*, id est, in regno suo cælesti.

Hæc omnia loca Calvinus in commẽtario exponit de obfignatione promissionum, quam Deus in cordibus facit, vt fides magis confirmetur. Sed repugnat modus loquendi Apostoli, qui semper dicit, nos obfignari. esset enim nimis impropria, & inusitata loquutio, obfignari hominem, pro eo quod est, obfignari promiffiones homini factas.

His accedat figura, & vaticinium Testamenti veteris. Nam Circumcisio fuit figura Baptismi omnium cõsensu. Circumcisio autem non solum præcidebat carnem, quo significabatur iustificatio à peccato, sed etiam relinquebat in corpore quoddam veluti cauterium, quo discernebantur Iudæi à non Iudæis. Quod cauterium si quid significabat, certè significabat characterem, quem in anima gerunt Christiani, quo discernemur in æternum à non Christianis. Vaticinium habetur Isa. 66. vbi loquens Dominus de vocatione gentiũ: *Omnes*

gentes, inquit, & lingua venient, & videbunt gloriam meam, & ponam in eis signum, &c. Quamuis enim per hoc signum possit intelligi signum crucis, aut aliquid aliud, tamen nihil repugnat, si dicamus intelligi characterem: præsertim cum videamus Paulum loqui de signo quodam spirituali interno, & oporteat Scripturam exponere per Scripturam, cum id fieri potest.

Aliqui addunt aliam figuram ex Exod. 12. vbi signantur postes, & superliminaria sanguine agni; & vaticinium Ezech. 9. *Signa Thau in frontibus gemetium, & dolentium.* Sed hæc loca non sunt ad rem. Nam exponuntur à Patribus de signo crucis, quod inscribitur in fronte, & rectè: nam Ezechiel nominat frontem, & idem significat superliminare, quod est in porta domus id, quod est frons in homine. Vnde etiã Apoc. 7. vbi habetur similis obsignatio, etiã nominatur frons; *Donec signemus servos Dei nostri in frontibus eorum.* Et præterea in utroque loco dicuntur saluari omnes signati, & nulli non signati saluari: quod certè non conuenit characteri; multi enim cum characterem damnabuntur, & multi sine characterem saluabuntur. At omnes saluantur, qui signantur Christi cruce sanguine, id est, quibus applicatur meritum crucifixi, cuius figura est signum crucis; & nulli saluantur quibus hoc meritum non applicatur. Vide de his locis Cyprianum tract. cõtra Demetrianum. Hieronymum in cap. 9. Ezech. Gaudentium tract. 5. in Exod.

CAPVT XXI.

Idem probatur ex Patribus.

IONYSIUS AREOPAGITA lib. de Eccles. hierar. cap. 2. par. 1. dicit, Baptismum formare hominem ad alia suscipienda Sacramenta. Illam formationem vocamus nos characterem. Idem par. 3. de eo qui baptizatur, ita loquitur: *Hunc, inquit, diuina Maiestas in sui consortium intus admittit, eiq; lucem suam perinde ac signum aliquod tradit.*

CYRILLVS Hierosolymitanus in præfatione Catecheson, describens Baptismum per effectus eius, vocat regenerationem, remissionem peccatorum, signaculum sanctum & indelebile. Item Catechesi 4. *Spiritus sanctus, inquit, tempore Baptismi animam tuam obsignat.* & Catechesi 16. *Hic, inquit,*
ad ho-

ad hodiernam &sq; diem obsignat animas in Baptismo. Vide etiam Catechesim 17.

BASILIVS oratio. 13. quæ est exhortatio ad Baptismum: *Deus, inquit, sub se militantibus dat tesseræ, &c.* Et infra: *Quomodo vendicabit te Angelus sibi, quomodo eripiet ex hostibus, si non agnouerit signaculum?* Et infra: *Thesaurus non obsignatus facile diripitur à furibus: ovis non signata, citra periculum insidiis appetitur.* & infra definiens Baptismū per suos effectus, vocat signaculum inuiolabile.

GREGORIUS NAZIANZENSIS oratione in sanctum lauacrū, simili phrasi dicit, Baptismum esse sigillum, quo cōseruantur fideles, & quo tanquā signo cognoscimur esse Dei possessio.

CHRYSOSTOMVS hom. 2. in epist. ad Ephes. Porro idem, inq̃t, *charactere Spiritus sancti nos insigniuit.* Et infra: *Signati sunt etiam Israëlita, sed Circumcisionis nota, & pecora, nos autem & filij signati sumus Spiritu sancto.* & homil. 14. nos dicit esse signatos, vt gregem Dominicum.

EPIPHANIVS hæc. 8. quæ est Epicureorum, postquam dixerat, Circumcisionem fuisse carnalem abscissionem, & carnale signaculum, subiungit de Baptismo: *Circumcidit nos à peccatis, & obsignat in nomine Dei.* & hæresi 30. vocat Baptismum signaculum Christi.

AMBROSIVS lib. 1. de Spiritu sancto, cap. 6. *Spiritu, inquit, signamur, & splendorem, atq; imaginem eius, & gratiam tenere possimus: quod est & itq; spiritale signaculum.* Item de iis, qui initiantur mysteriis, cap. 7. *Repete, inquit, quia accepisti signaculum spiritale.*

AVGVSTINVS lib. 6. de Baptismo, cap. 1. dicit in generali Concilio hoc approbatum: *Satis, inquit, eluxit Pastoribus Ecclesia Catholica toto orbe diffusa, per quos postea plenarū Concilij auctoritate, originalis consuetudo firmata est, & o-nem, qua foris errabat, & Dominicum characterem à fallacibus depra-datoribus suis foris acceperat, venientem ad Christiana unitatis salutem ab errore corrigi, à captiuitate liberari, à vulnere sanari, characterē tamen Dominicum in ea agnoscipotiùs, quàm improbari.* Vide eundem epist. 23. 50. & 204. tractat. 5. & 6. in Ioannem, lib. 2. contra epistol. Parmeniani, cap. 13. lib. 2. contra literas Petil. cap. vlt. lib. 1. contra Cresconiu, cap. 30. & tract. 5. in epist. Ioan. Similia vide apud Theodoretum in ca. 1. 2. ad Cor. Haymonem, Primasium, Anselmum, Theophy-

268 Cap. XXI. De effectu Sacrament. Lib. II.

Theophylactum, Occumenium in 1. & 4. ad Ephes. Damascenum lib. 4. de fide, cap. 10.

Ad hæc loca solum responderi posset, à Patribus non vocari characterem, seu signaculum id, quod nos dicimus, sed externum symbolum. Nam AUGUSTINVS in serm. de gestis cum Emerito tria dicit, quæ videntur valde fauere huic solutioni. PRIMO dicit, exterius characterem cognosci, & agnitum approbari. SECUNDO dicit, quod si Donatus in nomine Donati baptizaretur, Donati characterem infingeret. At certè Donati character in anima infixus nullus esse potest. TERTIO dicit, characterem esse ipsam inuocationem Trinitatis, quæ fit in Baptismo: *Attendo, inquit, fidem in nomine Patris, & Filij, & Spiritus sancti: Iste est character Imperatoris mei: de isto characterè militibus suis, vel potius comitibus suis, ut hunc imprimerent eis, quos congregabant castris eius, præcepit, dicens: Ite, baptizate gentes in nomine Patris, & Filij, & Spiritus sancti.*

RESPONDEO, characterem apud Augustinum, & alios Patres, non posse esse externum symbolum, seu Sacramentum. Nam PRIMO Patres dicunt, hoc signaculum esse in anima, non in corpore, ut Cyrillus; vel esse spiritale, ut Ambrosius; vel opponunt cauterio Circumcisionis, quod erat in corpore, ut Epiphanius, & Chrysostomus; vel denique esse quandam consecrationem, ut Augustinus lib. 2. contra epist. Parmen. cap. 13. Et certè anima consecratur propriè, non corpus, iuxta illud TERTULLIANI lib. de resurrect. carnis: *Caro inungitur, & anima consecratur.* SECUNDO dicunt, hære, & manere, quod non conuenit symbolo externo, quod non mansit, nisi dum fieret. AUGUSTINVS lib. 2. contra epist. Parmen. cap. 13. *Non minus, inquit, hærent Sacramenta Christiana, quàm nota corporalis, cum videamus nec apostatas carere illis, quæ propterea illis respicientibus non restituuntur, quia amitti non potuerunt.* Idemque habent alij Patres, qui dicunt esse sigillum indelebile, ut Cyrillus, Nazianzenus, & alij. Quò etiam spectant aliæ Augustini loquutiones locis citatis, ubi dicit characterem infigi, imprimi, portari, & alia, quæ non possunt quadrare in actionem transeuntem. TERTIO, si Symbolum externum diceretur à Patribus character, vel signaculum, omnia Sacramenta imprimerent characterem: omnia enim sunt externa symbola obsignantia promissionem, ut ipsi dicunt.

eunt. Cur ergo nullus vnquam Patrum per Eucharistiam dixit imprimi characterem?

AD loca autem Augustini cōtrā allata RESPONDEO, characterem posse exterius videri, & cognosci, non in se, sed in sua causa. Cū enim cognoscimus aliquem ritē baptizatum, simul cognoscemus illi infixum characterem, quia hic est effectus, qui semper, & necessariō sequitur illā causam. Et quod hoc satis sit, patet; nam etiam actum externum non videmus, postquam transiit; quare nec de externo symbolo Augustinus rectē dicere potuisset, illud videri, & agnosci, quando veniunt ad Ecclesiam, qui fuerant ab hæreticis baptizati.

AD illud de characterē Donati dicō, Augustinum loqui ex hypothesi, non absolutē: vult enim dicere, si Donatus in nomine suo posset Sacramenta conferre, characterem suum imprimeret. Alioqui non ignorabat Augustinus, Baptismum in nomine Donati collatum non modō non imprimere characterem in anima, sed neque esse Sacramentum externum.

AD vltimum dico, inuocationem Trinitatis, & ipsum totum externum symbolum dici posse characterem non impressum, sed imprimentem. Vt enim eadem imago est in sigillo, & in cera, sed imago sigilli est character imprimens, in cera est character impressus: ita Sacramentū externum, ac præcipuē forma Sacramenti est character imprimēs, cū ad eius collationem mox sequatur character in anima, & ex vi, & impressione Sacramenti sequatur.

CAPVT XXII.

Idem ostenditur ratione.

PRIMA ratio sumitur ex diuina liberalitate & consuetudine. Deus enim in hoc differt ab hominibus, quod homines cum hominibus iniungunt aliquod officium, non tribuunt eis aliquid internum, quo fiant apti ad illud officium; & cū diligunt aliquē, non faciunt bonum, & pulchrum, sed diligunt, quia talis est, & cū volunt se ab aliis diligī, aut sibi credi, aut in se sperari, non tribuunt eis vim aliquam internam, qua diligant, sperent, aut credant. Deus autem cū diligit, diligendo facit bonum, & pulchrum, infundēdo gratiam: & cū vult sibi credi,

in se

in se sperari, se diligere, infundit habitum fidei, spei, & charitatis. Igitur eodem modo credibile est, cū Deus aliquem deputat & consecrat ad Sacramenta, vel danda, vel recipienda, vel alia ministeria, id non faciat per simplicem deputationē, vt homines facere solent, sed infundendo certas qualitates, quibus illi fiant apti, & idonei ad talia officia, vel ministeria; & eas qualitates vocamus characteres.

SECUNDA ratio. Baptismus ex communi sententia, exceptis Anabaptistis, aliquid Sacramētale confert, etiam si detur, & percipiatur sine fide; Eucharistia, & Absolutio nihil cōferunt; igitur aliquem effectum Sacramētalem habet Baptismus, præter gratiam. Et idem argumentū fieri posset de Confirmatione, & Ordine. Probatur antecedens; Nam qui baptizatur ab infidelibus, & communicat cum eis infidelitate, dicitur verē, & propriē baptizatus, si seruatus sit debitus ritus, & forma verborum cum intentione; neq; id negant Lutherani & Caluinistæ: at qui absoluitur sine fide, non verē est absolutus; & qui sumit Eucharistiam sine fide, non verē communicat corpori Domini, secundum Calvinum: & secundum Catholicos sumit quidem ore verum corpus Domini, sed nihil recipit in anima, nisi peccatū. Manet igitur ex Baptismo effectus aliquis Sacramentalis, qui non est gratia, cū gratia sine fide non detur, nec est ipsa actio exterior, quia illa reperitur etiam in Eucharistia, & Absolutione; est igitur aliquid aliud permanens in anima, & hoc vocamus characterem. Alioqui reddant aduersarij rationem, cur sine fide homo verē baptizetur, & non verē absoluator, aut communice corpori Domini. Et hæc fuit antiqua quæstio Donatistarū, qui non putabant Baptismum habere alium effectū, quā dare gratiam, & idē inanem putabant esse, cū sine fide percipiebatur.

TERTIA ratio. Baptismus non potest repeti, si fuerit semel ritē collatus, vt etiam Confirmatio & Ordo: cetera possunt repeti, vt notum est de Eucharistia, & Absolutione. Sed vera caussa non potest assignari huius discriminis, nisi character; igitur necesse est fateri imprimi per Sacramēta quadam characterem. Maior propositio est recepta ab omnibus, etiā hæreticis huius temporis, exceptis Anabaptistis. Minor probatur; Nam in primis si ponatur character, perspicua erit ratio discriminis. Idē enim quædā Sacramenta non possunt repeti, quia semel data semper manent in suo effectū: alia re-

petuntur,

petuntur, quia non manent nec in se, nec in suo effectu; gratia enim, quæ est effectus solus aliorum Sacramentorum, facile potest amitti, & sæpe amittitur. Præterea etiam si aliquando non amittatur, tamen augeri potest, & sic Sacramentum potest repeti, ut gratia augeatur. At character non potest augeri per iterationem Sacramenti eiusdem. A D D E, quod gratia non est Sacramentum, sed effectus Sacramenti tantum: character autem Sacramentum est, & Sacramenti effectus. Hæc igitur ratio rectè ostendit, cur Sacramenta illa non repetantur, & alia repetantur, ut Concil. Florentinum & Tridentinum docent. Si autem hæc ratio non admittatur, nulla alia sufficiens reddi potest: quod ostendo ex refutatione earum, quæ adferuntur à Caluino, & Kemnitio.

Calvinus lib. 4. Instit. cap. 18. §. 19. dicit, Baptismum non posse repeti, quia est ingressus in Ecclesiam, & initiatio quædam fidei: unde sicut unus est Deus, in quæ credimus, & una Ecclesia, in quam ingredimur; ita unus Baptismus.

Hæc ratio non est solida. P R I M O, quia qui baptizantur ab hæreticis, & eis credunt, non intrant in Ecclesiam, nec initiantur ad fidem, ut patet, cum apud hæreticos, neque sit Ecclesia, neque fides: ergo possent isti iterum baptizari. S E C U N D O, qui in Ecclesia Catholica baptizantur, & postea per hæresim, aut apostasiam ab illa discedunt, iterum debent, si salvi esse velint, intrare in Ecclesiam, & initiari ad fidem; cur ergo non possunt iterum baptizari? Quare ratio Caluini solum aliquid probaret, si homo baptizatus non posset exire extra Ecclesiam; nec perdere fidem; quæ tamen falsa esse constat. T E R T I O, non minus intramus in Ecclesiam, & iniciamur ad fidem per verbum, quam per Baptismum: sed verbum repeti potest, ut magis confirmemur in fide, & Ecclesiæ fortius adhæreamus; cur ergo non poterit etiam repeti Baptismus? Q U A R T O, Ordinatio non est initiatio fidei, neque ingressus in Ecclesiam, & tamen repeti non potest, ut Augustinus docet, lib. 1. de Baptismo, cap. 1.

Iam verò Kemnitius in 2. part. Exam. pag. 133. ponit unam rationem non suo nomine, sed Gabrielis, quod videlicet divina institutio sit causa, cur quædam Sacramenta iterari possint, quædam non possint. At hæc ratio parum valet: non enim sine magna ratione Deus prohiberet rem tam utilem repeti. Qui ergo non possunt ullam causam assignare, cur Deus prohibuerit, temerè

temerè dicunt Deum prohibuisse. Vnde enim ipsi sciunt Deum id prohibuisse? nam Scripturæ id non apertè dicunt. Quod si confugas ad Patrum, & Conciliorum traditionem; illa vtrumque simul docet, nimirum Deum id voluisse, quia Sacramenta quædam imprimunt characterem, alia non imprimunt.

Ipse autem Kemnitius, pag. 136. remittit nos ad alium locum, vbi pollicetur se ex diuinis literis solidissimas rationes redditurum. Id verò præstat postea, pag. 238. 239. & 240. examinans Canonem II. de Baptismo. Ibi autem ponit quatuor rationes, quas fatetur non esse admodò solidas: deinde alias quatuor solidissimas.

PRIMA igitur ex non solidis est, quia Baptismus significat Christi mortem: Christus autem semel tantum mortuus est. Hæc non valet; nam Eucharistia etiam significat Christi mortem, I. Corinth. II. & tamen repeti potest: & sacrificia Iudæorum significabant omnia Christi mortem, & tamen frequentissimè repetebantur. DICENT, non esse hæc similia. Nam per Baptismum nos ipsi cōmorimur Christo: morimur enim peccato, vt ille mortuus est corporaliter. Contrà; nam vel vis rationis Kemnitij sumitur ex eo, quòd Christi mors, quæ vna fuit, per Baptismum repræsentatur, vel quia nos ipsi morimur peccato. Si primum dixerint, ratio nihil concludit, quia quod semel fit, potest sæpius repræsentari, vt patet in comœdiis, vbi repræsentantur res semel gestæ: & quantum ad hoc, per accidens est, quòd nos etiam moriamur in Baptismo. Si dicant secundum, tunc etiam ratio illa nihil concludit, quia potest idē homo sæpius commori Christo; si nimirum sæpius peccet, & sæpius eum pœniteat peccatorum. Præterea Ordinatio, non est repræsentatio mortis Christi, & tamen repeti non potest. Non igitur vera causa prohibens repetitionem, est repræsentatio mortis Christi.

SECUNDA ratio ex non solidis, quia Ioan. 13. dicitur: *Qui lotus est, non indiget nisi vt pedes lauet; sed est mundus totus.* Hæc non valet, quia loquitur de eo, qui reuera est mundus. Vnde qui post Baptisma iterum factus est immundus, non prohibetur ex hoc testimonio iterum baptizari.

TERTIA ratio ex non solidis est, quia ad Hebræos 6. dicitur: *Impossibile est eos, qui semel sunt illuminati, renouari iterum ad pœnitentiam,* vbi per illuminationem intelligitur Baptisma.

ptisma. Hęc non valet, quia loquitur Paulus de illis, qui semel sunt illuminati, & renouati, id est, iustificati, vt patet ex illis verbis: *Iterum renouari*. Quare possent ij saltem secundò baptizari, qui in primo Baptismo non fuerunt iustificati.

QUARTA ratio non solida est, quia Ephes. 4. dicitur: *Vnū Baptisma*. Hęc non est solida, quia vnum Baptisma dicitur, quia solum Christi Baptisma salutare est, idque vno certo ritu celebratur. Nam alioqui etiam dicitur vna fides ibidem; & 1. Cor. 12. vnus panis dicitur Eucharistia: & tamen repetimus fidei confessionem; & Eucharistię sumptionem. Et si quis fidem amittat, potest & debet eam iterum acquirere, & tamen non potest Baptismum iterum accipere.

PRIMA ratio solidissima est, quia pactum Dei nobiscum in Baptismo initum, perpetuum est. Non enim sequitur illam vulgarem regulam Deus: *Frangenti fidem, fides frangatur eadem*. Sed semper ipse seruat pactum suum etiam si nos infidelissimus. Roman. 3. *Nunquid infidelitas illorum, fidem Dei euacuauit? absit*. Quare cum peccamus post Baptismum, non est opus nouo pacto, sed satis est recurrere ad illud primum iam initum semel in Baptismo.

Hęc ratio minus est solida, quàm superiores. Nam PRIMO, Hebræ. 6. Paulus negat posse hominem peccantem post Baptismum redire ad pactum Baptisimi. Ided enim non ait; Impossibile est iterum baptizari, sed: *Impossibile est iterum renouari*; id est, non potest homo amplius ea facilitate redire ad amicitiam Dei, & remissionem totius culpæ, & pœnæ, vt quoddam in Baptismo, sed eget iam laboriosa pœnitētia, ieiuniis, lachrymis, &c. proinde eget alio pacto Dei multò magis seuerò, quàm esset illud primum.

SECUNDO, cùm quis sine fide baptizatur, non facit Deus pactum cum illo vllum: pactum enim est inter duos consentientes. Vnde etiā Kemnitius dicit, per Baptismum non solum offerri, sed etiam exhiberi, applicari, & dari gratiam. At certè non applicatur, nec datur ei, qui non credit: igitur saltē possent rebaptizari secundum istam rationē illi, qui sine fide Baptismum acceperunt, quod falsum esse ipsi quoque cōcedunt.

TERTIO, sicut Baptismus est pactum, ita etiam verbum Dei, ac præsertim secundum aduersarios, qui dicunt eodem prorsus modo se habere in iustificatione verbum & Sacramentum. At verbum quotidie repetitur.

QUARTO, Eucharistia non minus continet pactum Dei, quàm Baptismus, & tamen repeti potest.

DENIQUE falsum est, pactum Dei esse perpetuum illi, qui Deo fidem frangit, ita ut promissio seruanda sit, qualemcunque se præbeat is, cui promissio facta est. Nam promissiones Dei sunt conditionatæ: promittit enim se fore patrem, & sponsum in Baptismo, si nos perseveremus esse filij, & sponsæ, alioqui dicit idem Deus. Hierem. 18. *Repente loquar aduersus gentem, & aduersus regnum, ut eradicem, & destruiam, & disperdam illud. Si pœnitentiam egerit gens illa à malo suo, agam & ego pœnitentiam, quod cogitavi, ut facerem ei: & subito loquar de gente, & de regno, ut adificem, & plantem illud. Si fecerit malum in oculis meis, pœnitentiam agam super bono, quod loquutus sum, ut facerem ei. Quod autem Kemnitius adducit ex Roman. 3. Nunquid infidelitas eorum fidem Dei euacuauit?* intelligitur de promissionibus absolutis, qualis erat de Messia mittendo: sed non talis est promissio in Baptismo. Nam, ut minimum, pendet ex fide recipientis, ut ipsi docent, proinde non est absoluta.

SECUNDA ratio solidissima, Kemnitij est, quia de Baptismo nusquam scriptum est, ut repetatur: de aliis scriptum est, ut de Eucharistia, 1. Corinth. 11. *Quotiescunque feceritis.* Et de Pœnitentia, Matth. 18. *Non dico tibi septies, sed septuagies septies.* At neque hæc ratio multum valet. Nam ut omittam, quod locus Matthæi non intelligitur de Sacramento Pœnitentiæ, sed de condonatione iniuriarum, possumus Kemnitio respondere, quod respondit Lutherus Carolstadio, in libro contra cœlestes Prophetas, de nomine Sacram. non esse quidem scriptum, ut Baptismus reperatur, sed neque esse scriptum, ut non repetatur. Et sicut AUGUSTINVS libro 7. Trinit. cap. 4. dicit de nomine trium personarum: *Dicimus in Deo tres personas, non quia Scriptura dicit, sed quia non contradicit:* ita & nos possemus rebaptizare, non quia Scriptura dicit, sed quia nō contradicit, & res est bona, & utilissima Baptismus, si non esset periculum sacrilegij ob characterem iam impressum.


TERTIA ratio solidissima est, quia non habemus exemplum in Scripturis Anabaptismi; & præterea Circumcisio, quæ est figura Baptismi, tantum semel recipiebatur. At hæc est similis superiori. Nam in Scriptura non habemus etiam
exem-

exemplum alicuius, qui fuerit prohibitus baptizari; iminò secundum aduersarios habemus exemplū Anabaptismi. Nam Actor. 19. Paulus iussit baptizari eos, qui fuerant a Ioanne Baptista baptizati: & secundum Lutheranos omnes; & ipsi sunt Kemnitium, eadem erat vis, & efficacia Baptismi Christi, & Ioannis. Si igitur solū exempla Scripturæ quæramus, oporteret omninò rebaptizare. Deberent itaque aduersarij aperire oculos, & intelligere post Baptisma Ioannis potuisse rebaptizari, quia illud non habuit effectum in anima indelebilem, ut habet Christi Baptisma. Si respiciamus exempla Patrum, deberent Lutherani omninò rebaptizare. Nam Cyprianus, & alij Africani, necnon plurimi in Asia rebaptizabant: resistebat autem illis Romana Ecclesia, quæ volebat rebaptizari, ut patet ex Eusebio, libro 7. histor. Quare aduersarij non sequuntur potiùs Africanos, & Asiaticos Patres in hac re, quàm Romanam Ecclesiam, ut in aliis omnibus rebus facere solent? Quod autem de Circumcisione Kemnitius profert, pro nobis est. Nam idem Circumcisio non reperebatur, quia imprimebat in carne indelebilem characterem.

QVARTA ratio solidissima est, quia per Baptismum nascimur spiritualiter. Vna autem tantum est natiuitas spiritalis, ut vna est natiuitas corporalis. Vnde Nicodemus, Ioan. 3. *Quomodo potest, inquit, homo nasci, cum sit senex?* Et rectè iudicabat de natiuitate corporali. Hanc rationem Kemnitius furatus est Catholicis: eam enim habet sanctus Thomas 3. q. 66. artic. 9. Sed hoc interest inter Catholicos, & Kemnitium, quod Catholici ea utuntur, ut congruentia quadam; & simul notant veram causam, quæ est impressio characteris. Quam solam, ut veram, & solidam posuit Concilium Florentinum, & Tridentinum, suprà citatum. At Kemnitius explosa vera causa, amplectitur istam congruentiam, ut solidissimam rationem.

Ostendam igitur & hanc rationem non esse solidam. Nam IN PRIMIS homo nō solū per Baptismum, sed etiam per fidem, & verbum Dei generatur spiritaliter; ut aduersarij concedunt, & patet ex Paulo, 1. Corinth. 4. *Per Euangelium ego vos genui.* & tamen fidei actus, & conciones sæpe repetuntur. Præterea SECUNDO, etiamsi generatio corporalis


vna tantum sit naturaliter, tamen supernaturaliter potest repeti, immo reipsa repetetur in resurrectione, quam Dominus vocat regenerationem, Matthæi 19. Cum ergo Baptismus sit generatio supernaturalis, quid prohibet eum repeti? **TERTIO**, etiamsi generatio corporalis nullo modo posset repeti, tamen non eadem est ratio spiritualis generationis. Nam ut mors corporalis vna tantum est, ita natiuitas corporalis. At mors spiritualis multiplex est, ut patet: cur igitur non possit etiam multiplex esse spiritualis generatio? **QUARTO**, Ordinatio non est generatio, & tamen non potest repeti. **DENIQUE**, qui sine fide baptizantur, reuera non regenerantur, & tamen rebaptizari non possunt: & contra, qui sunt regenerati ante Baptismum per fidem, & contritionem, & desiderium Baptismi, nihilominus postea baptizantur, ut patet de Cornelio, Actor. 10. Non igitur illa est ratio.



CONTROVERSA

QVINTA.

De numero, & ordine Sacramentorum.



CONTROVERSA QVINTA, QUÆ est de numero Sacramentorum, quatuor habebit partes. Nam **PRIMO** exponemus hæreticorum sententias. **SECUNDO** probabimus Ecclesia Catholica veritatem. **TERTIO** refellimus argumenta aduersariorum. **QUARTO** addemus per modum appendicis aliquid de ordine Sacramentorum.

C A P V T XXIII.

Quid hæretici sentiant de numero Sacramentorum.

QUON AD PRIMVM, aduersarij inter se multùm dissentiant de numero Sacramentorum, quibus omnibus viam strauit Lutherus in libro de captiuitate Babylonica. Nam in eo libello anno XX. edito, multa docuit. Initio libri dicit, vnum tantùm esse Sacramentum, si secundum vsum Scripturæ loquendum sit. Ibidem tamen dicit, neganda esse septem Sacramenta, & tria pro tempore ponenda, Baptismum, Panem, & Pœnitentiam. In fine libri dicit, si rigidè loqui velimus, duo esse Sacramenta, Baptismum, & Panem. In medio libri, cap. de Confirmatione dicit, se non damnare septem Sacramenta, sed tantùm negare ea ex Scripturis probari posse. At non bene hoc cohæret cum initio libri, vbi dicit, neganda esse septem, & tria ponenda: non enim aliud est damnare, aliud negare septem Sacramenta. Ex hac inconstantia Lutheri natæ sunt variæ Lutheranorum atque aliorum hæreticorum sententiæ, quas breuiter enumerabo.

PRIMA igitur est, vnum tantùm esse Sacramentum, quãuis plura sint Sacramentalia signa. Ita Lutherus loco citato. Sed non habuit in hac opinione sectatores: omnes enim alij plura ponunt, & secundum vsum Scripturæ ea ponere se putant.

SECUNDA opinio est eorum, qui tantùm duo numerant Sacramenta propriè dicta, Baptismũ, & Eucharistiam. Hanc, vt dixi, Lutherus indicauit, in lib. de captiuit. Babylon. Idem sensit Philippus in locis anni XXI. & XXII. cap. de signis, vbi solùm ista duo agnoscit. Idem Illyricus in Confess. Antuerpiensi, cap. II. de Sacramentis, & cap. 18. de Absolutione. Nicolaus Selneccerus in 2. part. suæ pædagogicæ, cap. de Sacramentis, & Kemnitius in 2. part. Exam. cap. de numero Sacramentorum, pag. 12. & sequentibus.

TERTIA opinio est eorum, qui tria Sacramenta numerant, Baptismum, Eucharistiam, & Pœnitentiam. Hæc est cõmunior, & magis recepta apud Lutheranos. Nam in primis

Lutherus etiam si rigide duo tantum esse voluerit, in libro de captiuit. Babylon. tamen etiam tria esse dixit ibidem, & hoc semper postea repetiuit, vt anno XXIII. in lib. ad Pragenses de instituendis ministris, & anno XXXIV. in libro de Missa priuata, & deniq; anno XLV. qui fuit penultimus vitæ ipsius, in assertionibus contra Louanienses. Sic enim habet assertio 35. *Pœnitentiam cum virtute clauium Absoluentium Sacramentum libenter confitemur: habet enim promissionem, & fidem remissionis peccatorum propter Christum.* Idem habent ferè omnes Catechismi Lutheranorum, vt Catechismus Philippi, Brentij, & aliorum. Item libri rituales, seu agendæ ipsorum, & denique Apologia Confessionis Augustanæ, art. 13.

Vbi NOTANDUM est, Illyricum, & Kemnitium non posse defendi à periurio, & defectione à Confessione Augustana. Nam vt refert Tilmannus Heshusius, in libro de præsentia Corporis Christi in cœna, iurant omnes apud Lutheranos in verba Confess. & Apologiæ, qui promouentur ad gradus, vel pastorum. Sed respondent Illyricus in Apolog. Confess. Antuerpien. cap. 18. & Kemnitius in 2. parte Examinis, pag. 44. & 903. Apologiam Confessionis largo modo appellasse Pœnitentiam Sacramentum, non quod sit verè, & propriè Sacramentum. At solutio non valet; nam Apologia habet hæc verba: *Si Sacramenta vocamus ritus, qui habent Dei mandatum, & quibus est addita promissio gratiæ, facile est iudicare, quæ sint propriè Sacramenta.* Et paulò post applicans definitionem: *Verè igitur, inquit, sunt Sacramenta, Baptismus, Cœna Domini, Absolutio, quæ est Sacramentum Pœnitentiæ; nam hi ritus habent mandatum Dei, & promissionem gratiæ.* Hæc ibi. Præterea idèò solùm Kemnitius non vult Absolutionem esse propriè Sacramentum, quia non habet ritum à Deo præceptum. At Apologia proficitur Absolutionem habere ritum à Deo præceptum: igitur ex sententia Apologiæ Absolutio est verissimum Sacramentum.

QUARTA opinio est Zvvinglij, in libro de vera, & falsa religione. Nam cap. de Sacramentis, duo esse docet Sacramenta, Baptismum, & Cœnam, tamen cap. de Matrimonio, addit etiam Matrimonium. Verum est quidem non libenter à Zvvinglio Matrimonium vocari Sacramentum, sed causa non est, quod puret, Sacramenti definitionem non conuenire

nire Matrimonio, sed quia timer, ne Sacramenti vocabulo obscureretur, & inquineretur dignitas Matrimonij: dicit enim esse vocabulum multò illustrius Matrimonij, seu coniugij, quàm Sacramenti.

QVINTA opinio est Caluini, qui tria Sacramenta numerat, sed non eadem cum Luthero, & Zvinglio: vult enim Sacramenta esse Baptismum, Cœnam Domini, & Ordinationem. Et si enim lib. 4. Institut. cap. 18. §. 19. & 20. duo tantùm esse dicat Sacramenta, Baptismum, & Cœnam, tamen paulò post, cap. 19. §. 31. sicut & antea, cap. 14. §. 20. etiam Ordinationem inter vera Sacramenta numerat, ac monet, se, cùm tantùm duo esse dicit, loqui de Sacramentis ordinariis, & toti Ecclesiæ communibus. Hinc etiam in Antidoto Concilij Tridentini, sess. 7. can. 1. quatuor tantùm Sacramenta reiecit à numero Sacramentorum; Confirmationem, Pœnitentiam, Vnctionem extremam, & Matrimonium. Proinde tria reliqua admittit.

SEXTA opinio composita ex Lutherismo & Caluinismo, est aliorum, qui quatuor Sacramenta recipiunt, Baptismum, Cœnam, Pœnitentiam, & Ordinationem. Hæc est Philippi, qui licet cum Luthero primò posuerit duo tantùm Sacramenta, & postea tria: tamen in locis editis, anno XXXVI. & LII. & LVIII. quæ fuit vltima editio, habet hæc verba in cap. de numero Sacramentorum: *Mihi maxime placet etiam addi Ordinationem, Et vocant, id est, Vocationem ad ministerium Euangelij; quia hac etiam mandato Euangelico precipitur, & addita est promissio, &c.* ac toto capite fusè probat Ordinationem esse Sacramentum, ac proinde quatuor esse Sacramenta. Eandem sententiam habet Lucas Lossius in Catechismo, edito anno LVII. nam in eo, quem ediderat anno LIV. tantùm tria posuerat.

SEPTIMA opinio composita, ex Lutherismo, Caluinismo, & Zvinglianismo non apertè, sed obscurè fuit Philippi. Nam in locis vltimè editis, anno LVIII. licet quatuor tantùm faciat Sacramenta, tamen propèdebat maxime ad quintum addendū, id est, Matrimonium cum Zvinglio: Fatetur enim Matrimonium esse signum rei sacræ, & habere mandatum diuinum, & habere annexam promissionem. Vnum tan-

tum dicit ei deesse, quod fuerit ante Christum. At hoc non debuit eum impedire, quò minus Matrimonium faceret Sacramentum; nam Baptismus Ioannis ex sententia ipsius fuit verissimum Sacramentum, & idem cum nostro Baptismo, & tamen fuit ante Christum. Sicut igitur Baptismus vult esse Sacramentum, quia à Christo receptum, & confirmatum, cur non eadem ratione & Matrimonium?

OCTAVA opinio est, sex esse Sacramenta. Hanc tribuit Lindanus in tabulis analyticis Gulielmo Postello in sua Panthenosia: qui tamen vir postea Catholicè obiit.

NONA opinio est, septem esse Sacramenta. Licet enim fide Catholica nos teneamus, septem esse Sacramenta: illis tamen hæc sententia, opinio, non fides esse potest: qui enim in vno articulo hæreticus est, fide simpliciter caret. Est igitur opinio hæc aliquorum Lutheranorum, quibus placuit, quòd Lutherus initio dixerat, se non damnare septem Sacramenta; licet ibidem etiam dixerit, se negare septem Sacramenta. Scribit Ioan. Sleidanus, lib. 20. histor. biennio post obitum Lutheri, id est, anno XLVIII. in quodam Lipsensi Conciliabulo, determinatum fuisse, Confirmationem, & Extremam vnctionem esse ritus conferentes gratiam, atque adedò septem Sacramenta recipienda esse. In quo Conciliabulo interfuisse Theologos multos VVittenbergenses, ac Lipsenses, & cum iis Philippum Melanchthonem; ac tum primùm cœpisse hos, molles Lutheranos appellari scribit Surius in sua hist. anni XLVIII. Vnde Matthias Illyricus in libro qui inscribitur; Adhorratio Illyrici ad constantiam in agnita Iesu Christi religione, & Augustana Confessione; queritur, quod in Lipsensi Interim (sic enim appellatur) septem Papistarum Sacramenta restituantur. Et præfatione septimæ Centuriæ, Hæresiarchas appellare non dubitat principes mollium, seu politicorum Lutheranorum.

Ex his colligere licet PRIMO, miram fuisse inconstantiam Lutheri, & Philippi præcipuorum patrum Lutheranorum, idque in re grauissima. SECUNDO, nō posse apud aduersarios verā Ecclesiam esse. Nam nota præcipua veræ Ecclesiæ apud eos est consensus in doctrina Sacramentorum. Ita enim habet Lutherus in lib. de notis Ecclesiæ, & Cōfess. Augustana, & Apolog. ar. 7. Ipsi aut ita conueniunt, vt adhuc non potuerint
Sakra-

Sacramenta communi consensu enumerare. Quod si quisque eorum ad se solum trahat Ecclesiam, mirum, si non pudeat eum suæ paucitatis. Hinc etiam TERTIO colligitur, non posse diu durare eiusmodi hæreses. Nam omne regnum in se ipsum diuisum, desolabitur. Vnde Lutherus ipse hoc annotauit in Psalm. 5. *Nulli, inquit, hæretici victi sunt vi, aut astu, sed mutua dissensione; nec aliter cum eis pugnat Christus, quam misso inter eos spiritu vertiginis, & dissensionis, sicut inter Sichimitas, Iud. 9. & inter Babylonica turris operarios, Genes. II. & in noua lege, inter Arianos, Donatistas, & Pelagianos.* Hæc ille. Quod idem multò antè scripsit Hilarius, lib. 7. de Trinitate.

CAPVT XXIV.

*Ex Scripturis, & Patribus probatur veritas
Catholica de numero septenario Sacramen-
torum.*



VANTVM ad SECUNDVM, sententia Catholicorum vna est, ac semper fuit, septem esse propriè dicta Sacramenta, quæ probanda est tripliciter. PRIMO, ex testimoniis Scripturæ, & Patrum, quæ quidem non numerant Sacramenta, tamen re ipsa omnia ista septem Sacramenta vera, & propria esse testantur. SECUNDO, ex testimoniis aliis Conciliorum, & Doctorum, quæ præcisè numerum istum septenarium ponunt. TERTIO, rationibus seu congruentiis quibusdam.

Quantum ad PRIMVM genus testimoniorum, notanda sunt tria. PRIMO, non debere aduersarios petere, vt ostendamus in Scripturis, aut Patribus nomen septenarij numeri Sacramentorum. Nam nec ipsi ostendere possunt nomen binarij, vel ternarij, vel quaternarij: Scriptura enim, & Patres non scripserunt Catechismum, vt modò facimus propter hæresum multitudinem, sed tantùm tradunt res ipsas variis in locis. Neq; est hoc proprium Sacramentis, sed commune aliis multis rebus. Nam Scriptura refert Christi miracula, & nunquam numerat quot sint: tradit articulos fidei, & nusquam dicit, quot sint. Apostoli postea ediderunt symbolum duodecim articulorum certis de causis. Sic etiam ex Scriptura non po-

rest sciri, quot sint libri Canonici: sed Concilia postea ediderunt Canonem, & certum numerum, quem ex traditione didicerant.

SECUNDO notandum, non debere etiam aduersarios petere, vt ostendamus in Scripturis nomen Sacramenti attributum Confessione aut Ordinationi, & similibus. Nam non disputamus de nomine, sed de re: & nec ipsi ostendent hoc nomen tributum Baptismo, aut Eucharistia, sed soli Matrimonio, quod tamen ferè omnes hæretici negant esse verum Sacramentum. Et contrà inuenimus nomē Sacramenti in Scripturis tribui multis rebus, quæ omnium consensu non sunt Sacramēta, de qualibus nunc agimus; vt Ephes. i. propositum vocandi Gentiles ad fidem, dicitur Sacramentum voluntatis Dei. Et i. Timoth. 3. Sacramentum pietatis dicitur incarnatio Verbi. Et Apocal. 17. dicitur, Sacramentum mulieris, signum quoddam impressum in fronte mulieris, quæ Babyloniam repræsentabat.

TERTIO notandum, id omninò sufficere, si ostendamus ex Scripturis, & Patribus definitionem Sacramenti conuenire ritibus non paucioribus, nec pluribus, quàm septem. Licet autem non conueniamus in explicanda definitione Sacramenti (vt suprà fusè ostendimus lib. i. in secunda controuersia) tamen conuenimus in definitione quadam generali; nimirum quòd Sacramenta sint ritus, seu signa externa, & sensibilia, quæ ex diuina institutione annexam habeant promissionem gratiæ iustificantis. His notatis accedamus ad probationem.

Quod Baptismus sit Sacramentum.

AC primùm de Baptismo nulla quæstio est. Est enim ritus expressus: *Lauacrum aqua in Verbo Vita*, Ephes. 5. & institutio, ac mandatum, Ioan. 3. *Nisi quis renatus*. Et Matt. vlt. *Baptizantes eos*. Et promissio gratiæ, *Matth. vlt. Qui crediderit, & baptizatus fuerit, saluus erit*. Et Tit. 3. *Saluos nos fecit per lauacrum*. Idem docent omnes Patres suprà citati in quæstione de effectu Sacramentorum.

Quod Eucharistia sit Sacramentum.

DE Eucharistia etiam nulla quæstio est; habetur enim ritus, *Matth. 26. & i. Cor. ii. Accepit panem, gratias agens, fregit,*

fregit, &c. Et institutio, ac mandatum ibidem: *Hoc facite.* Et Ioan. 6. *Nisi manducaueritis, &c.* Et promissio gratiæ, Ioan. 6. *Qui manducat hunc panem, uiuet in æternum.* Idem etiam Patres docent, Augustinus epistola 118. cap. 1. ubi cum dixisset, Christum instituisse Sacramenta numero paucissima, significatione præstantissima, obseruatione facillima, ponit loco exempli Baptismum, & Eucharistiam.

Quod Confirmatio sit Sacramentum.

DE Confirmatione habemus ritum externum, manuum impositionem, Actor. 8. & 19. Habemus effectum gratiæ ibidem. Nam per manus Apostolorum dabatur Spiritus sanctus, eadem phrasi qua dictum est, Tit. 3. de Baptismo: *Per lauacrum regenerationis saluos nos fecit.* Institutio, & mandatum non habetur expressè in Scriptura, tamen colligitur euidenter ex locis citatis. Nunquam enim Apostoli ita confidenter, & ordinariè imposuissent manus ad gratiam Spiritus sancti communicandam, nisi Dominus id præcepisset. Non enim ignorabant non posse vllum hominem instituere cæremoniam, ad quam sequeretur gratia Spiritus sancti. Nam etiam Kemnitius in 2. parte Examinis, pag. 13. & Apologia Confessionis Augustanæ, art. 13. & Calvinus lib. 4. Institut. cap. 19. §. 2. affirmant, non posse vllum hominem efficere, vt externum symbolum contineat certam promissionem gratiæ. Proinde oportet vel Apostolos fuisse temerarios, quod nemo diceret, vel habuisse Christi mandatum. Fuisse autem cæremoniam illam ordinariam, & necessariam, & non satis fuisse orare Deum pro aduentu Spiritus sancti, ex eo colligitur, quod Apostoli primarij Petrus, & Ioannes tantum laboris, & itineris susceperunt, vt irent ex Hierosolyma in Samariam, ad imponendas manus iis, quos Philippus Diaconus baptizauerat. Nam orare poterant pro illis manentes Hierosolymæ.

Est autem NOTANDUM, impositionem manuum coniunctam fuisse cum vñctione & signo crucis: simul enim hæc fiunt dum crucis signum Chrismate pingitur in fronte confirmandorum, idque ministerio manus Episcopalis. Vnde DIONYSIVS libro de Ecclesiastica Hierarch. cap. 2. par. 3. & cap. 4. part. 3. meminit apertè Chrismatis in hoc Sacramento.

Et

284 *Cap. XXIV. De effectu Sacram. Lib. II.*

ET TERTULLIANVS libro de resurrectione carnis, vbi ponit Confirmationem in eodem ordine, cum Baptismo, & Eucharistia: *Caro abluitur*, inquit, *Et anima emaculetur; caro vngitur, Et anima consecratur, &c.* Et de præscript. hæreticorum, docens diabolum imitari Sacramenta Christiana, ponit exemplum in his duobus: *Tingit*, inquit, *Et ipse quosdam vtrique credentes, Et fideles suos; signat illic in fronte milites suos.* Et in libro de Baptismo: *De hinc*, inquit, *manus imponitur per benedictionem, pronocans, Et inuitans Spiritum sanctum.* Vbi vides Tertullianum antiquissimum auctorem omnia tria ponere, vnctionem, signum crucis in fronte, & manus impositionem.

Item CYPRIANVS lib. I. epist. 12. & lib. 2. epist. 1. modò vocat vnctionem, modò manus impositionem, & præterea vocat apertè Sacramentum. Nam sic ait lib. 2. epist. 1. de Baptismo, & Confirmatione loquens: *Tunc plenè sanctificari, Et esse Filij Dei possunt, si Sacramento vtroque nascantur.* AVGVSTINVS li. 2. contra literas Petiliani, cap. 104. *Sacramentum*, inquit, *Chrismatis in genere visibilibus signaculorum sacrosanctum est, sicut ipse Baptismus.*

De Pœnitentia.

IOAN. 20. *Quorum remiseritis peccata, remittuntur eis, Et quorum retinueritis, retenta sunt.* Hic habemus PRIMORITUM, nimirum externum, & iudiciale absolutioem, quæ est signum interioris, quæ fit à Deo per verbum externum, tanquam instrumentum. SECUNDO habemus promissionem gratiæ: *Remittuntur eis.* TERTIO habemus mandatum ibidem: *Sicut misit me Pater, Et ego mitto vos.* Vnde Apostolus, 2. Cor. 5. *Deus*, inquit, *dedit nobis ministerium reconciliationis.* Et infra: *Pro Christo legatione fungimur.*

AMBROSIVS libro I. de Pœnitentia, cap. 7. *Quid interest, utrum per Pœnitentiam, an per lauacrum hoc ius sibi datum Sacerdotes vendicent? Vnum in vtroque ministerium est. Sed dices, quia in lauacro operatur mysteriorum gratia. Quid in Pœnitentia? nõne Dei nomen operatur?*

CYRILLVS li. 12. in Ioan. cap. 56. comparat reconciliationem pœnitentium cum Baptismo.

AVGVSTINVS libro 5. de Baptismo, cap. 20. numerat cum Baptis-

Baptismo, Eucharistia, & Confirmatione, etiam Reconciliationem, per manus impositionem, & in Psal. 146. in illud: *Qui alligat contritiones eorum*, disertis verbis Sacramentum appellat reconciliationem pœnitentium: *Qua sunt*, inquit, *ista alligamenta? temporalia Sacramenta. Alligamenta medicinalia sunt contritionis nostra, Sacramenta interim temporalia, quibus habemus consolationem.* Et infra: Hæc Sacramenta esse dicit Eucharistiam, & manus impositionem Præpositi in Pœnitentiam, quæ in cœlo non erunt.

De Extrema unctione.

IACOBI 5. habemus ritum: *Orent super eum, & ungētes eum oleo in nomine Domini.* Item promissionem: *Et alleniabit eum Dominus, & si in peccatis fuerit, dimittentur ei.* Deniq; mandatum colligitur euidenter ex eo, quod Apostolus non auderet ita absolurè promittere tantum effectum, nisi à Domino id accepisset, vt suprà ostendimus etiam testimonio Apologiz, Caluini, & Kemnitij.

Ex Patribus, INNOCENTIUS I. in epist. i. ad Decentium, cap. 8. loquens de oleo sancto infirmorum: *Pœnitentibus*, inquit, *istud infundi non potest, quia genus est Sacramenti. Nam quibus reliqua Sacramenta negantur, quomodo & unum genus putatur posse concedi?*

BERNARDVS in vita S. Malachiz, scribit eum vocatum, vt fœminam morituram inungeret, sed dum differtur vnctio, illam expirasse; Malachiam autem vehemēter doluisse, quod sine gratia Sacramenti huius obiisset; itaque tamdiu orasse, ac fleuisse, donec eam à mortuis reuocauit, & tum demum eam vnxisse, & eam omninò conualuisse: *Vnxit eam*, inquit, *sciens in hoc Sacramento remitti peccata.*

De Ordinis Sacramento.

HABEMUS ritum externum, manus impositionem, 1. Tim. 4. Item promissionem gratiz ibidem: *Noli negligere gratiam, qua in te est, qua data est tibi per prophetiam, cum impositione manuum presbyterij.* Et 2. Tim. i. *Admoneo te, & resuscites gratiam Dei, qua est in te per impositionem manuum mearum.* Deniq; institutio, & mandatum, Ephes. 4. *Ipse dedit quosdam quidem Apostolos, alios Euangelistas, alios Pastores,*

Et Doctores, &c. Et præterea, vnde sciebat Apostolus datam esse Timotheo gratiam per impositionem manuum, si à Deo non didicerat, eo signo conferri gratiam?

AVGVSTINVS lib. 2. contra epistolam Parmeniani, cap. 13. loquens de Baptismo, & Ordinatione: *Vtrumque, inquit, Sacramentum est, & quadam consecratione Vtrumque homini datur, illud cum baptizatur, istud cum ordinatur. Itaque in Catholica Ecclesia, Vtrumque non licet reiterare.* Similia habet lib. 1. de Baptismo, cap. 1.

De Matrimonio.

HABEMUS nomen ipsum Sacramenti, Ephes. 5. *Sacramentum hoc magnum est.* Item ritum externum, id est, contractum visibilem inter virum, & foeminam: de hoc enim Apostolus dicit, quòd sit magnum Sacramentum, vt exponit Chrysostomus, & Hieronymus in hunc locum, qui etiam Nazianzenum citat, & omnes alij. Habemus etiam institutionem diuinam, Matth. 19. *Quod Deus coniunxit, homo non separet.* Denique gratiam annexam colligimus ex hoc ipso loco Pauli. Nam coniunctio viri, & foeminæ, significat coniunctionem Christi cum Ecclesia. Illa autem coniunctio duplex est; vna per naturæ conformitatem, quæ facta est in incarnatione, & hæc Christum coniungit non solum cum Ecclesia, sed etiam cum toto genere humano: altera est per gratiam, & charitatem, & hæc est cum sola Ecclesia; & ratione huius dicitur Christus sponsus, & Ecclesia sponsa, iuxta illud, 2. Corinth. 11. *Despondi vos Vni Viro Virginem castam exhibere Christo.* Igitur Matrimonium viri, & foeminæ, vt possit significare vtramque vnionem Christi cum Ecclesia, oportet vt non solum sit inter coniuges vnio quædam naturalis, & carnalis, qualis etiam inter Gentiles reperitur, sed etiam vnio spiritualis ex gratia, & charitate proueniens. Proinde Sacramentum hoc gratiam istam confert, vt significatio sit perfecta. Quare Paulus Ephes. 5. sæpe monet viros, vt diligant vxores, sicut Christus Ecclesiam, & foeminas monet, vt viris subiectæ sint, sicut Ecclesia subiecta est Christo: & rationem reddit, quia hæc eorum coniunctio, Sacramentum est Christi, & Ecclesiæ.

Iam ex Patribus, A V G V S T I N V S passim hoc docet, lib. de bono coniugali, cap. 18. *In nostrorum, inquit, nuptiis plus valet sanctitas Sacramenti, quam fecunditas Vteri.* Et cap. 24. *Bonum nuptiarum per omnes Gentes, & omnes homines in causis generandi est, & in fide castitatis: quod autem ad populum Dei attinet, etiam in sanctitate Sacramenti, per quam nefas est etiam intercedente repudio alteri nubere.* Atq; hæc hoc loco sufficiant: nam in disputatione de singulis Sacramentis plura adferemus.

Lotionem pedum non esse Sacramentum.

NVnc superest demonstrare, non esse plura Sacramenta, quam septem prædicta. Et quidem multa dicuntur à veteribus Sacramenta, præter ista septem. Nam Alexander I. Papa in epist. 1. vocat aquam benedictam Sacramentum. Augustinus lib. 19. contra Faustum, cap. 14. & in Psal. 141. signum crucis vocat Sacramentum, & in Psal. 65. ac lib. 4. de symbolo, cap. 1. vocat Sacramenta cærimonias, quæ fiunt ante Baptismum, ut exorcismos, & similia, & lib. 2. de peccatorum meritis, & remiss. cap. 26. vocat Sacramentum panem quendam benedictum, qui dabatur Catechumenis. Deniq; Ambrosius lib. 3. de Sacramētis, cap. 1. & Cyprianus in serm. de ablutione pedum, & Bernardus in serm. de cœna Domini contendunt ablutionem pedum, quam Dominus instituit, Ioan. 13. Sacramentum esse. Sed ex his omnibus nihil est, quod habeat difficultatem, præter ultimum. Nam I N P R I M I S nec aqua benedicta, nec signum crucis, nec panis benedictus, nec exorcismi, & aliæ cærimonie Baptismum præcedentes in Scripturis inveniuntur: proinde non possunt aduersarij ea pro Sacramentis habere. D E I N D E illa omnia dantur etiam ante Baptismum, ut ex iisdem locis Augustini constat; At Baptismus omnium consensu est, omnium Sacramentorum primum, & quasi ianua. D E N I Q U E nihil eorum habet promissionem gratiæ gratum facientis; neque constat an à Christo instituta sint, an ab Apostolis, cum tamē vera Sacramenta à solo Christo institui potuerint.

De lotionem pedum videtur maior difficultas. Nam habemus Ioan. 13. ritum externum, ipsam pedum lotionem. item promissionem gratiæ: *Si non lauero te, nō habebis partem mecum.* Item mandatum Dei: *Exemplum dedi vobis. Item: Et vos debetis*

debetis alter alterius lavare pedes. Item esse mysterium, indicant illa verba: *Quod ego facio tu nescis modò, scies autem postea.* Denique testimonia illa Patrum, Ambrosij, Cypriani, Bernardi; cuius testimonium adducit Kemnitijs, pag. 32. ad probandum, Sacramenta esse plura, quàm septem, si testimoniis Patrum standum sit.

RESPONDEO tamen, lotionem illam pedum, nihil habuisse commune cum Sacramentis propriè dictis, & solum posse dici Sacramentum largo modo, quemadmodum Sacramenta dicuntur omnia, quæ mysticum sensum habent, & figuræ sunt, ac typi aliarum rerum. Nam fuit reuera lotio illa signum Christi humilitatis, & charitatis. Item fuit signum puritatis, qua debent homines ad Eucharistiam accedere: idè enim immediatè ante Eucharistiæ institutionem Christus hoc fecit. Denique fuit etiam signum, & figura quædam purificationis, quam eramus habituri per Christi passionem, ut Cyrillus hoc loco exponit.

Non fuisse autem Sacramentum propriè dictum, patet PRIMO, quia non habemus promissionem gratiæ iustificantis; illud enim: *Nisi lavero te, non habebis partem mecum,* ad literam non promittit gratiam, sed minatur pœnam ob inobedientiam, ut exponunt hoc loco Chrysostomus, & Cyrillus, & Basilij li. i. de Baptismo, cap. 2. Si enim Petrus obstinatè recusasset illam lotionem, periisset in æternum: non quia illi deerat lotio pedum, sed quia peccauerat contra Christum, & deerat illi obedientia. Mysticè tamen significare potest, ut exponit hoc loco Augustinus, etiam iustos indigere, ut Christus eos quotidie lauet à peccatis venialibus, quæ sunt veluti sordes, quæ pedibus adhærent ob humanam conversationem. Sed hoc non sufficit ad Sacramentum efficiendum, quia hîc agitur de lotionem peccatorum venialium, quæ non eget noua gratia gratum faciente. Vnde Dominus ait: *Qui lotus est, non eget, nisi solum pedes lauet, sed est mundus totus,* id est, mundus est simpliciter, & absolutè, cum sit iustus: tamen adhuc eget lotionem à peccatis venialibus. Et præterea non habemus ex hoc loco ipsam lotionem pedum reipsa tollere peccata venialia, alioqui deberemus quotidie lavare pedes: sed solum lotionem illam vnam, qua Dominus pedes lauit discipulorum fuisse figuram internæ lotionis, quam accipimus à Christo.

sto. Non igitur ipsa pedum lotio est Sacramentum propriè dictum.

SECUNDO, non habemus mandatum, seu institutionem huius ritus frequentandi, quod requiritur in omni Sacramento: alioqui peccarent ferè omnes homines, qui non utuntur ista cæremonia. Et licet fuerit hæc cæremonia vñitata olim in quibusdam Ecclesiis statim post Baptismum, tamen non fuit vnquam ab omnibus recepta, nec ab ipsa Romana Ecclesia, vt testatur Ambrosius loco citato. Neque obstat illud mandatum: *Exemplum dedi vobis. Item: Et vos debetis alter alterius lauare pedes. Et: Quod ego facio tu nescis modò, scies autem postea.* Nam hoc mandatum præcipit humilitatem, & charitatem, vt exponunt Chrysostomus, & Cyrillus, non autem ipsam materialem lotionem pedum, vt patet ex praxi Ecclesiæ; nunquam enim Christiani putarunt se habere speciale mandatum de lotionem pedum.

Ad loca illa Patrum facile est respondere. Nam Ambrosius vocat Sacramentum, & mysterium, quia in ipsius Ecclesia seruabatur, vt sacra cæremonia, & vt aliquid Sacramentale: tamen non putabat ipse esse hanc lotionem propriè dictum Sacramentum, vt patet tum ex eo, quod fatetur non remitti peccata lethalia per eam lotionem, sed quasdam reliquias peccati originalis: tum etiam, quia dicit se non reprehendere Ecclesiam Romanam, vbi hæc cæremonia non erat in vsu; quod certè non diceret, si putaret esse verum Sacramentum. Porro Cyprianus, & Bernardus, si attentè legantur, non dicunt ipsam lotionem pedum materialem, esse Sacramentum, quo homines sanctificantur: sed solùm dicunt illam vñicam lotionem pedum Apostolorum à Christo factam, fuisse Sacramentum; quia per eam significabatur aliquid sacrum, quod in nobis quotidie fieri debet, id est, expiatio peccatorum venialium, quæ fit in nobis quotidie à Christo per orationem, ieiunia, humilitatem, & exercitia pietatis erga proximos, quibus vacamus. Et sanè si putarent lotionem pedum esse Sacramentum, oporteret nos quotidie ex eorum sententia lauare inuicem pedes: id enim ipsi dicunt, hoc Sacramentum esse quotidianarum culparum expiationem.

CAPVT XXV.

Septem esse Sacramenta, probatur ex posterioribus Conciliis, & Doctoribus.

SECUNDA probatio sumitur ex testimoniis, quæ præcisè ponunt numerum septenarium, quæ testimonia tria sunt. PRIMVM est omnium Theologorum, & proinde totius Ecclesiæ ab annis vt minimum CD. Nam Magister Sentent. lib. 4. dist. 2. & omnes inde Theologi septem Sacramenta esse tradiderunt. Neque verò Magister aliquid nouum scripsit, sed quod inuenit in vsu Ecclesiæ; quod argumentū maximi ponderis esse debet. Nam si falsum esset, quod dicimus, errasset tota Ecclesia per annos CD. perniciosissimè. NAM si Sacramenta essent pauciora, magna impietas fuisset, & superstitio, & magna deceptio animarum, habuisse tamdiu pro Sacramentis ea, quæ Sacramenta non erant. Si verò essent plura, fuisset magna impietas, tamdiu contempsisse vera Dei Sacramenta, & magnum detrimentum animarum. SECUNDO, magis perniciosus est error circa Sacramenta, quàm circa alia dogmata: nam reliqua ferè speculatiua sunt, & earum ignoratio multos simplices excusat. At Sacramentorum cognitio ad praxim pertinet, & ad praxim singulorum hominum. TERTIO, sincerus Sacramentorum vsus ad notas Ecclesiæ pertinet ex sententia omnium hæreticorum huius temporis. Quare si his CD. annis erratum est in Sacramentis tam grauitè, consequenter dicere debent, Ecclesiam periisse de orbè terrarum: non enim inuenient facilè, qui aliter senserint hoc tempore de Sacramentis. Nam ipsi etiam Hussitæ, & VValdenles, qui ferè soli erant hæretici, cùm Lutherus apparuit, septem Sacramenta recipiebant. De Hussitis patet in Concil. Constantiensi, sess. 15. art. 8. de VValdensibus, id testatur Lutherus in libro ad eos scripto.

SECUNDVM testimonium est Concilij Florentini in institutione Armenorum, vbi septem Sacramenta asseruntur, & explicantur. Vbi NOTANDA sunt duo mendacia Kemnitij. Is enim in 2. parte Examinis, pag. 35. dicit, septenarium numerum Sacramentorum apud Græcos tentatum, Armenis verò obtru-

obtrusum fuisse: & addit, Armenos à S. Bartholomæo Apostolo ad fidem conuersos, post mille, & eo amplius annos septenarium numerum Sacramentorum à Romano Pontifice tandem accepisse. Vbi mentitur IN PRIMIS cùm dicit, hunc numerum tentatum à Concilio apud Græcos, quasi dicere velit, conatos fuisse Patres id persuadere Græcis, sed non potuisse. At in toto Concilio, nihil omninò de numero Sacramentorum cum Græcis actum esse, ex ipso Concilio, quod exstat Græcè, & Latinè, perspicuum est. Immo instructio hæc Armenis data est toto approbante Concilio, paulò antè eius dissolutionem, ut ibidem legimus in decreto Eugenij IV. vbi hæc ipsa institutio habetur. Ex quo intelligimus, Græcos idem omninò cum Latinis semper sensisse de numero Sacramentorum: alioqui Græci non tam facillè sine vlla quæstione instructionem approbassent.

SECUNDO mentitur Kemnitius, cùm dicit, obtrusum fuisse Armenis hunc numerum Sacramentorum, cùm eum ignorassent per annos mille, & amplius. Nam (ut in decreto Eugenij legimus) ante vnionem Armenorum cum Latinis, collationes factæ sunt inter eos de fide Trinitatis, & Incarnationis, & Sacramentorum, & inspecti libri vtriusque nationis, & tum demum præscripta formula instructionis: Quare non obtrusa fuit, sed post maturam discussionem, ab eis accepta: & sanè non tam facillè accepissent, nisi vidissent conformem esse antiquis libris, & ritibus Ecclesiæ suæ. Adde quod in eadem instructione traditur Armenis doctrina de tribus personis diuinis, & de duabus Christi naturis. Ut igitur Kemnitius dicit, obtrusum illis numerum septem Sacramentorum, cur non dicit etiam obtrusum numerum personarum diuinarum, & naturarum Christi?

TERTIVM testimonium est Concilij Tridentini, sess. 7. canon. I. vbi additur anathema negantibus septem esse vera & propria Sacramenta; quod testimonium etiam si nullum haberemus aliud, deberet sufficere. Nam si tollamus auctoritatem præsentis Ecclesiæ, & præsentis Concilij, in dubium reuocari poterunt omnium aliorum Conciliorum decreta, & tota fides Christiana. Semper enim hæc fuit consuetudo apud Christianos, ut exortas controuersias definirent Episcopi, qui tunc vivebant. Et præterea omnium Conciliorum, veterum,

& omnium dogmatum firmitas pendet ab auctoritate præsentis Ecclesiæ. Non enim habemus testimonium infallibile, quod Concilia illa fuerint, & legitima fuerint, & hoc aut illud definierint, nisi quia Ecclesia, quæ nunc est, & errare non potest, ita sentit, & docet. Quod enim historici quidam meminerint eorum Conciliorum, non potest parere fidem, nisi humanam, cui potest subesse falsum.

CAPVT XXVI.

Idem probatur ex congruentiis.

CATHOLICI Doctores confirmare solent septenarium Sacramentorum numerum variis congruentiis. **P**RIMA est à similitudine vitæ spiritualis, & corporalis. Siquidem in vita corporali quædam requiruntur ex parte hominum singulorum, quædam ex parte totius Reipublicæ. Ex parte hominum singulorum requiruntur tria per se, generatio, augmentatio, & nutritio; & duo per accidens, remedium contra morbos, si contingat hominem ægrotare: & remedium contra reliquias morbi, ut perfectè conualescat. Ex parte Reipublicæ requiruntur duo. Primò parètes, qui propagent vitam corporalem hominum. Secundò Principes, & Magistratus, qui eam ordinent, & regant. Eodem igitur modo in vita spirituali. **P**RIMO, requiritur regeneratio, quæ est per Baptismum. **S**ECUNDO, augmentatio, per Confirmationem. **T**ERTIO, nutritio, per Eucharistiam. **Q**UARTO, remedium, contra morbos, si contingat regeneratum peccare, per Pœnitentiam. **Q**UINTO, remedium contra reliquias peccatorum, per Vñctionem extremam. **S**EXTO, ex parte Reipublicæ, Matrimonium, quo propagentur homines ad cultum Dei deputandi. **S**EPTIMO, Ordo sacer, quo regantur, & gubernentur.

SECUNDA ratio ex numero peccatorum, & vulnerum. Nam Baptismus est præcipuè contra originale, Pœnitentia contra actuale mortale, Vñctio extrema contra reliquias peccatorum, Confirmatio contra infirmitatem, Eucharistia contra malitiam, Matrimonium contra concupiscentiam, Ordo contra ignorantiam.

TERTIA ratio ex numero virtutum, Baptismus respon-

det

det fidei, Confirmatio spei, Eucharistia charitati, Pœnitentia iustitiæ, Vnctio extrema fortitudini, Ordo prudentiæ, & Matrimonium temperantiæ.

QUARTA ratio ex celebritate numeri septenarij in expiationibus. Vide Exod. 29. Leuit. 4. & 8. 13. 14. 15. 16. 23. Numer. 19. Deuter. 15. 2 Paral. 29. Iob ult. vbi semper videbis in expiatione offerri septem animalia, vel septem diebus, vel septies aspergi sanguinem, &c. Vnde etiam 4. Reg. 5. Naaman septies iussus est lauari ad purgandam lepram. Vide S. Thomam in 4. dist. 2. quæst. 1. 3. par. quæst. 65. art. 1. & contra Gentes, lib. 4. cap. 58.

Sed Kemnitius in 2. parte Examinis, pag. 16. 17. & 18. tria dicit de his rationibus. PRIMO affirmat, esse fundamenta principalia, & demonstrationes nostræ sententiæ: *Hæ sunt*, inquit, *demonstrationes, hæc fundamenta, quibus septenarius numerus Sacramentorum in Ecclesiam inuectus & receptus fuit à scriptoribus Scholasticis.* SECUNDO dicit, has demonstrationes nihil valere, quia alioqui probaremus etiam septem fuisse Sacramenta in lege veteri: nam etiam tunc erant virtutes, & peccata, & vita spiritualis, & corporalis. TERTIO dicit, si ex numeris celebratis in Scriptura numerus Sacramentorum desumi debeat, posse probari tria esse Sacramenta, vel etiam duodecim, aut plura, quia multi sunt numeri celebres & sacri in Scripturis.

SED hæc leuia sunt. Nam in primis nullus Theologorum dixit, ista esse fundamenta, & demonstrationes, sed solum congruentias supposita fide. Id enim Scholastici facere solent, vt ea, quæ ex fide habemus, ostendant etiam non repugnare rationi, sed illi potius esse conformia. Nec tamen argumentum Kemnitij concludit, oportuisse nimirum etiam in veteri lege esse Sacramenta septem. Nam Sacramenta vetera (vt supra ostendimus) non erant instituta ad perficiendum hominem in vita spirituali, nec ad remedium peccati, excepta Circumcisione, sed solum ad significanda mysteria Christiana, & alios quosdam fines: nostra autem sunt instituta in remedium peccati, & ad iustificandum, & perficiendum hominem in vita spirituali, vt ex Scripturis apertissimè deducitur. Itaque congruentiæ illæ rectissimè se habent, si applicentur nostris Sacramentis, non autem si applicentur veteribus. Denique illa ratio Kemnitij de variis numeris in Scriptura celebris,

bribus, nihil concludit. Nam ratio Catholicorum sumitur ex numeris, quæ significabant expiationem peccatorum, non autem ex quibuscunque numeris. Porro in Scriptura, ita frequens est numerus septenarius in expiationibus, ut tota Scriptura clamare videatur, futurum aliquando fuisse tempus, quo septem insignia, & efficacissima remedia darentur à Deo in expiationem peccatorum.

C A P V T XXVII.

Soluuntur obiectiones.

RESTAT ut obiectiones aduersariorum diluamus, quæ sunt partim ex Scriptura, partim ex Patribus, partim ex ratione. Primum igitur ex Scriptura triaproferunt argumenta. PRIMVM negatiuum, quia Scripturæ nusquam tradunt septem esse Sacramenta. SECUNDVM affirmatiuum, quia Scripturæ duo tantum Sacramenta esse docent. Nam Ioan. 19. ex latere Christi fluxerunt sanguis, & aqua, id est, (ut exponunt Chrysostomus, Cyrillus, & Theophylactus eum locum, & Damascenus lib. 4. de fide, cap. 10. & Augustinus lib. 2. de symbolo, cap. 6. & tract. 9. in Ioanem, & alij.) Eucharistia & Baptismus. TERTIVM, quia Scripturæ non solum non ponunt septem, & ponunt tantum duo, sed etiam negant esse septem. Nam Apocal. 17. Angelus vocat Sacramentum bestiam, quæ septem capita habebat; ex quo significari videtur septenarium numerum Sacramentorum ad Antichristum pertinere, qui per eam bestiam designatur. Hæc sunt argumenta Kemnitij ex Scriptura, quæ ipse habet in 2. parte Examinis, pag. 18. & 50. Sed hæc leuia sunt.

Ad PRIMVM suprâ respondimus, Scripturam neque septem, neque duo, neque tria, vsquam expresse numerare.

Ad SECUNDVM, locus ille Ioannis non malè ita exponi potest, ut significantur per sanguinem, & aquam, Eucharistia, & Baptismus, ut exponunt ferè Græci omnes, sed non propterea excluduntur cetera Sacramenta. Solum enim duo posita sunt, quia sunt illa magis communia, & magis principalia, & ex illis poterat idem iudicium de ceteris fieri. Sicut etiam Hebr. 6. Paulus, duo tantum ponit Sacramenta, Baptisma, &

manuum impositionem, id est, Confirmationem: *Non rur-*
sum

sum iacentes fundamentum penitentia ab operibus mortuis, & fidei ad Deum, Baptismatum doctrina, impositionis quoque manuum. vbi per manuum impositionem intelligunt Chrysostomus, Theodoretus, Theophylactus, Oecumenius, & alij Confirmationem, quæ dabatur post Baptismum, nec meminit Eucharistiæ, quæ simul dabatur (vt etiam modò datur cum baptizantur adulti) cum Baptismo, & Confirmatione.

Dico tamen SECVNDO, non esse necessarium sequi illam expositionem Græcorum de sanguine, & aqua. Alij enim æquè magni expositores aliter exponunt. Cyrillus Catechesi 3. & Hieronymus in epist. 83. ad Oceanum, intelligunt per sanguinem, & aquam, significata esse duo Baptismata, vnum in sanguine, id est, Martyrium, aliud in aqua. Ambrosius lib. 10. in Lucam, cap. 105. & Leo epistola 4. & Augustinus, ac Beda in cap. 19. Ioannis, intelligunt per sanguinem, redemptionis pretium, per aquam, Baptismum. Et hæc videtur maximè literalis expositio, vt nimirum intelligamus ex Christi latere fluxisse Baptismum, qui omnem suam vim habet ex Christi sanguine. Nam idèd non dixit; Exiuit aqua, & sanguis, vt ordo postulabat, si ageretur de Baptismo, & Eucharistia, cùm Baptismus præcedat Eucharistiam; sed dixit: *Exiuit sanguis, & aqua*, id est, precium, & applicatio illius precij. Quod etiam confirmatur ex illo 1. Ioan. 5. *Hic est, qui venit per aquam, & sanguinem, IESVS Christus, non in aqua solùm, sed in aqua, & sanguine.* Vbi videtur ipsemet Ioannes explicare mysterium, quod posuerat, Ioan. 19. & simul ostendere differentiam inter Baptismum Christi, & Ioannis, quòd Ioannes venerit in aqua solùm, id est, Baptismum attulerit non efficacem. At Christus attulerit Baptismum efficacissimum, cùm aquam dederit sanguini suo admistam.

Ad TERTIVM respondeo, blasphemum esse Kemnitium, cùm Sacramenta Christi capita bestię esse dicit. Nam cogitur, velit nolit, ea etiam Sacramenta numerare inter capita bestię, quæ ipse habet pro veris Sacramētis, nimirum Baptismum, & Eucharistiam: hæc enim sunt ex numero illorum septem. Adde, quòd Ioannes non dicit septem illa capita esse septem Sacramenta, sed vnum Sacramentũ: proinde, (si liceret nugari) id magis quadraret in Lutherũ, qui vnum Sacramentum esse dixit, & plura signa Sacramentalia. Denique ipsemet

Ioannes septem illa capita septem Reges interpretatur. Ex quo ruit totum ædificium blasphemie Kemnitianæ.

Iam ex Patribus, PRIMO, Calvinus lib. 4. Instit. cap. 19. §. 3. dicit, veteres cum loquuntur propriè de Sacramentis, duobus contentos esse, Baptismo, & Eucharistia. Id probat ex Augustino, lib. 3. doct. Christ. cap. 9. & epist. 118. Addit Calvinus probationem. Nam Augustinus solet, ut plurimum quærere mysteria in numeris: *Immo, inquit Calvinus, in observandis numeris curiosior esse solet, quam necesse foret: Et tamen de isto numero septenario Sacramentorum nihil vnquam scripsit.*

Kemnitius in 2. part. Examinis, pag. 25. & sequent. tria asserit ex Patribus. PRIMO, si propriè loquamur de Sacramentis, vetustissimos Patres non agnouisse, nisi duo, Baptismum, & Eucharistiam. Id probat ex Iustino, Apologia 2. ex Irenæo, ex Tertulliano li. 1. & 4. in Marcionem, & de corona militis, item ex Cyrillo in Catechesibus, ex Ambrosio in lib. de Sacramentis, & de iis, qui initian. myst. qui duo auctores ex professo tractant de Sacramentis, & tamen non ponunt nisi duo.

SECUNDO, affirmat Patres recentiores ponere plura Sacramenta, quàm duo, sed pauciora, quàm septem; propriè loquendo de Sacramentis. Id probat ex Dionysio, quem dicit à nobis fingi esse Areopagitam, qui in Ecclesiastica hierarchia, quatuor tantum Sacramenta exponit, Baptismum, Eucharistiam, Confirmationem, & Ordinem. Item ex Gregorio can. multi secularium, i. q. 1. apud Gratianum, qui tria ponit, Baptismum, Chrisma, Eucharistiam. Item ex Rabano, & Paschasio de cœna Domini. Denique ex incerto auctore, qui sub nomine Cypriani, scripsit de operibus Cardinalibus Christi. Is enim in sermonibus de cœna Domini, de ablutione pedum, & de Chrismate, pauciora ponit, quàm septem.

TERTIO affirmat, Patres, cum largo modo de Sacramentis loquuntur, plura numerare quàm septem, & probat ex variis locis Augustini. Ex quibus omnibus colligitur, neq; propriè, neq; impropriè loquendo Sacramenta esse septem apud veteres, sed vel pauciora, vel plura.

Respondeo PRIMVM ad hæc omnia, nullum ex Patribus scripsisse vnquam Sacramenta non esse septem; aut esse tantum duo, vel tria: sed solum ad suum propositum mentionem fecisse aliquorum Sacramentorum, de aliis nihil dixisse. Non

autem

autem pugnant cum Theologis, qui septem asserunt Sacramenta, ij qui neque septem esse negant, neque dicunt tantum esse duo, vel tria. Adde quod iidē Patres in multis locis vnus tantum Sacramenti mentionem faciunt: in aliis locis nullius. Quare secundum Kemnitij Dialecticam, oporteret colligere vnum esse Sacramentum, aut etiam nullum. Satis igitur esse debet, quod Patres in variis locis, aut certē varij Patres eiusdem ætatis omnium septem Sacramentorum alicubi meminerint, vt nos supra ostendimus. Hac solutione premissa respondeo etiam ad singulos Patres.

AC PRIMVM ad Augustini testimonia à Caluino citata, dico Augustinum in illis duobus locis non dicere esse tantum duo, sed ponere duo, loco exempli. Id quod patet ex iisdem locis. Nam lib. 3. doct. Christianæ, cap. 9. sic habet AVGVSTINVS: *Pauca pro multis, eademq, factu facillima, & intellectu augustissima, & conseruatione castissima ipse Dominus, & Apostolica tradidit disciplina, sicuti est Baptismi Sacramentum, & celebratio corporis & sanguinis Domini.* Vbi vides particulam (*sicuti*) aperte indicare ista esse exempla. Sic etiam in epistol. 118. vbi Augustinus dixit, nos habere Sacramenta numero paucissima, significatione præstantissima, obseruatione facillima, subiungit: *Sicuti est Baptismus, et communicatio corporis Domini, etsi quid aliud in diuinis literis commendatur.* Vbi etiam vides exempla esse, & indicari etiam plura esse, quàm duo; quod clarius repetit in Psalm. 103. concione 1. in illa verba: *Qui regit aquis superiora eius. Respice, inquit, ad munera ipsius Ecclesiæ, munus Sacramentorum in Baptismo, in Eucharistia, in ceteris sanctis Sacramentis.* Et in epist. 119. ad eundem Ianuarium, cap. 7. *Ad celebrationem, inquit, Sacramentorum sumus de sensibilibus rebus, aqua, frumento, vino, & oleo.* Vbi vides numerari materias omnium Sacramentorum, excepta Pœnitentia, & Matrimonio, quæ duo non habent vllam materiam consecratam.

Adde quod Augustinus etsi in quibusdam locis non meminerit, nisi duorum, tamen alibi expressè ponit plura; & præsertim de Confirmatione, & de Ordine affirmat illa esse Sacramenta, sicut est Baptismus, lib. 2. contra literas Petiliani, cap. 104. & lib. 2. contra epist. Parmeniani, cap. 13. Mentitur

igitur Calvinus impudenter, cū dicit, Augustinum duobus tantū Sacramentis esse contentum.

Ad Confirmationem; retorqueo argumentum in auctore. Nam si S. Augustinus tantū duo Sacramenta esse credidit, & erat curiosior, quā oporteret in mysteriis numerorum; cur non indicauit, quæ mysteria lateant in binario numero Sacramentorum? Præterea non est verum, S. Augustinum tam curiosum fuisse, ut dicit Calvinus, in mysteriis numerorum. Non enim ignorabat esse duodecim articulos fidei, tres virtutes Theologicas, decem præcepta decalogi, & alia id genus multa, de quorum tamen numerorum mysteriis, nihil Augustinus scripsit. Sic igitur neque scripsit de mysteriis septenarii numeri Sacramentorum, ne Calvinus nimis eum curiosum in his rebus appellaret.

Venio ad loca citata à Kemnitio. Ad locum Iustini **R E S P O N D E O**, Iustinum in Apologia illa tantū meminisse duorum Sacramentorum, quia id requirebat argumentum illius operis: respondet enim iis, quæ obiiciebantur à Gentilibus. Gentiles autem duo quædam obiiciebant. **P R I M O**, quòd Christiani essent athei, quia non colebant Deos. **S E C V N D O**, quòd in suis conuenticulis multa turpia, & scelerata agerent, ac præcipuè, quòd humanas carnes vorarent, & idè ad suam Synaxim non admitterent ullos præter suos. De quibus calūniis vide etiam Tertullianum in Apologetico, Athenagoram in Apologia, & Minutium in Octauio. Iustinus igitur ad illa duo respondet, & idè in maxima parte Apologiæ tractat de fide, ac docet, Christianos nō esse atheos, cū colant tres diuinas personas, & præterea venerentur Angelos, &c. Deinde in altera parte tractat de Synaxi, & obiter meminit Baptismi, ut doceat solis baptizatis licere interesse Synaxi; & breuiter exponit quid Christiani agant singulis Dominicis diebus in sua Synaxi, ubi necessariò differere debuit de Eucharistia, quia hoc mysterium præcipuū est in Synaxi, & de hoc potissimū malè audiebant Christiani; putabantur enim vesci carnibus alicuius pueruli. De aliis Sacramentis non fuit opus, ut quidquam diceret, quia illa partim erant ignota Gentilibus, partim sine calumnia exercebantur.

Ad Irenæum **R E S P O N D E O**, Irenæum nunquam instituisse disputationem de Sacramentis, sed pro locorum oportunitate

tate modò meminisse vnius, modò alterius. Nam lib. i. cap. 9. tractat de Eucharistia, refellens deliramenta Marci cuiusdam circa Eucharistiam, cap. 18. tractat de Baptismo refellens deliramenta aliorum eius temporis hereticorum circa Baptismū. Rursus lib. 4. cap. 32. 33. & 34. tractat de sacrificiis legis veteris, & nouæ, & ideò simul agit etiā de Eucharistia. Item lib. i. c. 2. tractat de Pœnitentia, & lib. 3. cap. 4. meminit Confessionis. Neq; obstat, quòd nō vocet Pœnitentiam Sacramentū: nam nec Baptismum, aut Eucharistiam vocat Sacramenta.

Ad Tertullianum idem dici posset; non enim instituit vsquam disputationem de Sacramentis: sed præterea perspicue distinguit in libro de resurrectione carnis quatuor diuersa, Baptismum, Chrisma, Eucharistiam, Ordinationem. Neque valet glossa Kemnitij, quod Tertullianus Chrisma, & manus impositionem non faciat noua Sacramenta, sed velit esse cæremonias Baptismo annexas. Nam Tertullianus distinguit illa quatuor, & tribuit singulis proprios effectus. Et præterea, si de cæremoniis Baptismi ageret, non poneret manus impositionem post Eucharistiam.

Sed videamus loca à Kemnitio adducta. PRIMÒ, adfert librum primum in Marcionem. Sed locus ille pro nobis est: non enim dicit in eo libro vsquam duo esse Sacramenta, sed dicit in Sacramentis Deum vti voluisse aqua, pane, & oleo; quæ sunt materiæ, quæ consecrantur in quinque Sacramentis. Nec meminit Tertullianus aliorum duorum, quia solùm volebat ostendere Deum nostrum esse verum Creatorem elementorum, & aliarum rerum sensibilibium, cōtra Marcionis errorem, qui id negabat. Id autem probat egregiè; quia si res istas creasset alius Deus, non eis vteretur Deus noster in Sacramentis suis.

SECUNDO, adducit librum quartum contra Marcionem, vbi in margine ad numerum 51. est annotatio B. Rhenani: *Baptismus, & Eucharistia, duo Sacramenta primitiua Ecclesia.* Quæ annotatio Kemnitium decipit: non enim eo loco Tertullianus dicit tantum esse duo ista Sacramenta, sed reprehendit Marcionem, quod ad hæc Sacramenta nō admitteret, nisi eos, qui damnabant coniugium.

TERTIO, adducit librum de corona militis, vbi etiam nō nominantur, nisi Baptismus, & Eucharistia. Sed non aduertit Kemni-

Kemnitius in eo libro non agi de Sacramentis, sed de cęremo-
niis Ecclesię, quę non habentur ex Scriptura, sed ex traditio-
ne. Vnde ibi enumerat varias traditiones circa hæc Sacramē-
ta; & ne putaremus non esse alia Sacramenta, vel alias cęre-
monias, addit: *Harum, & aliarum eiusmodi disciplinarum, si
legem postulas Scripturarum, nullam inuenies; traditio tibi
obtenditur auctrix, consuetudo confirmatrix, & fides obser-
uatrix.*

Ad Cyrillum, & Ambrosium dico duo. PRIMO, falsum ef-
se eos duo tantum Sacramenta agnoscere: vterque enim in li-
bris à Kemnitio citatis, meminit Chrismatis, tanquam Sa-
cramenti à Baptismo, & Eucharistia distincti; vt patet ex Cy-
rillo Cateches. 3. & ex Ambrosio lib. 3. de Sacramentis, cap. 2.
& de iis qui mysteriis initiantur, cap. 7.

SECUNDO, dico, non esse mirum, si isti auctores in his li-
bris de tribus tantum Sacramentis tractant: scribunt enim ex
professo ad Catechumenos, & eos instruunt de his rebus, quę
fiunt tempore Baptismi. Porro cum baptizantur adulti, tria
Sacramenta eodem die illis ministrantur, Baptismus, Confir-
matio, & Eucharistia: id quod certum est, tum ex praxi, quę
hodie est in Ecclesia, tum ex libris citatis Ambrosij, vbi totum
ordinem Baptismi, & rerum consequentium describit. Vnde
AMPHILOCHIVS in vita S. Basilij, ita de illius Baptismo
scribit: *Baptizauit, inquit, Episcopus Maximinus Basilium, et
Eubulum, atque Singens eos sancto Chrismate, tradidit eis vi-
uificam communionem.*

Ad Dionysium Areopagitam dico, eum tantum differere
in eo libro de hierarchia Ecclesiastica, vt ipsum nomen indi-
cat, ac de solennibus actionibus Hierarchę, id est, Episcopi.
Itaque tractat de Baptismo, & Eucharistia, quę solenni ritu
Episcopus administrare solet. Item de Consecratione olei, de
Ordinatione clericorum, quę à solis Episcopis fieri possunt:
cetera tria omisit. Nam Extrema vnctio, priuatim à presby-
tero confertur: Matrimonium non eget, quoad essentiam
suam, ministerio Sacerdotum, tamen præsentia Parochi ex
decreto Concilij Tridentini omnino requiratur: & benedi-
ctio, quam nouis nuptis dare solet Ecclesia, à presbytero pri-
uatim celebretur. Denique Pœnitentiam sollemniter quidem
olim Episcopi imponebant, & deinde in sancta hebdomada
pœniten-


pœnitentes absoluebant: sed videtur id cœpisse post Apostolorum mortem, cùm peccata multiplicari cœpta essent. Quare hoc potius est argumentum antiquitatis horum librorum. Nec tamen ignorauit Dionysius Sacramentum Pœnitentiæ, cùm eius meminit in epist. ad Demophilum.

Ad Gregorium dico, verba illius Canonis non videri Gregorij, nec enim in eius operibus inueniuntur: exstant autem apud Isidorum, lib. 6. Etymologiarum, cap. 19. sed cuiuscunq; sint, non ponit ille auctor, nisi exempla quædam.

Rabanus in libris de institutione Clericorum, tractat de Sacramentis omnibus, quæ conueniunt Clericis, lib. i. cap. 6. de Ordine ibidem, ca. 24. de Baptismo, Confirmatione, & Eucharistia, lib. 2. cap. 29. de Pœnitentia, ibidem cap. 11. de Extrema vñctione. Matrimonium solum omisit, quia ad Clericos non pertinet.

Paschasius in lib. de cœna Domini, quid mirum, si non tractet nisi de Eucharistia, cùm hoc solum requirat argumentum illius libri? Denique Cyprianus seu quicumque sit auctor sermonum de operibus Cardinalibus Christi, nō meminit omnium Sacramentorum; quia solum explicat Sacramenta, quæ Dominus instituit in cœna, quæ sunt Eucharistia, Chrisma, & Ordinatio. Vide sermones de cœna Domini, de ablutione pedum, & de Chrismate. Ad alia loca Kemnitij nihil opus est respondere: fatemur enim Sacramenta largo modo sumpta esse plura, quàm septem.

Vltimo loco Kemnitius argumentatur ex ratione, ac probat duo tantum esse Sacramenta, quia duobus tantum conuenit definitio Sacramenti. Sed vt hoc possit efficere, fingit sibi nouam definitionem, eamque longissimam: tot enim particulas in ea posuit, quot sufficere videbantur ad excludenda quinque Sacramenta. Sed hanc definitionem nos supra diligenter refutauius in disputatione de definitione Sacramenti.



CAPVT XXVIII.

*De ordine, & comparatione Sacramentorum
nouæ legis inter se.*

VNVM hoc superest ad finem quæstionis de numero Sacramentorum, vt eorum etiam ordinem ostendamus. Est enim vnus ex Lutheranorum erroribus, non esse vnum Sacramentum alio præstantius: ita enim loquitur Lutherus in lib. de instituendis ministris ad Prageneses: *Sacramentum altero dignius esse non potest, cum eodem verbo Des omnia constent.* Quod idem maiori ratione dicere coguntur Calvinistæ, qui cum in Eucharistia non ponant Christi corpus, nisi tropicè, non est vlla ratio, cur eam Baptismo anteponant. Sed nec Lutherani rationem habent, cur Eucharistiam anteponant Baptismo. Et si enim fatentur in pane esse verum Christi corpus, tamen idem corpus Christi coguntur eodem modo ponere in aqua Baptismi, cum vbique illud ponant. Sicut etiam non est ratio, cum eundem effectum vtrique Sacramêto tribuant, nimirum obfirmare promissiones ad alendam fidem.

Contra hunc errorem posuit Concilium Tridentinum, sess. 7. can. 3. in quo dicitur anathema iis, qui septem Sacramenta nouæ legis paria faciunt. Circa quem Canonem, & totam hanc rem, pauca quædam notanda sunt. PRIMVM est, Calvinum in Antidoto, & Kemnitium in Examine 2. par. pag. 75. & sequentibus, omninò dissimulasse statum quæstionis præsentis, & rem totam ad iocum, & calumnias vertisse. Nam vterque dicit hunc canonem à se maximè seruari, cum ipsi non faciant paria septem Sacramenta, immò tantum discrimen ponant inter Baptismum, & Eucharistiam ab vna parte, & cetera quinque ab altera, vt priora duo Christi institutionem esse dicant, reliqua verò hominum inuenta. Sed hoc (vt dixi) est dissimulare statum quæstionis. Concilium enim cum dicit anathema iis, qui septem Sacramenta faciunt paria, non vim facit in numero septenario, sed in ratione Sacramenti: hic enim est sensus canonis; Si quis Sacramenta nouæ legis, quæ in 1. can. septem esse diximus, paria facit, ita vt non sit vnum alio dignius, anathema sit. Esse autem hunc sensum patet,

tet, tum quia Concilium suis canonibus Lutheranorum errores damnat; error autem Lutheranorum non est, quòd parem faciant Baptismo Confirmationem, aut aliud eiusdem generis eorum, quæ ipsi non habent pro Sacramentis, sed quod inter Baptismum, & Eucharistiam discrimen dignitatis non ponant; tum etiam id patet ex ipso Concilio. Nam infrà sess. 13. cap. 3. asserit Eucharistiam excellere omnibus aliis Sacramentis, quam comparisonem non facit Concilium in aliis.

Nota SECVNDO, Kemnitiũ dissimulata vera causa huius canonis, alias quasdam ponere, nimirum quod Concilium renouare voluerit antiquam contumeliam, quod scilicet Chrisma præstet Baptismo. Item quod Ordinis Sacramentum antecellat ceteris, quia secum adfert pingues præbendas. Deniq; quod Ordinis Sacramentum tantò sit excellentius coniugio, ut simul cum eo manere non possit. Sed ista omnia meræ calumniæ, ac meræ nugæ sunt auctoribus suis dignissimæ. Nam Concilium, ut dixi, præcipuè intēdit damnare errorem Lutheranorum de paritate Baptismi, & Eucharistiæ: atque ad hoc respondere debuissent isti censores. Neque dicimus Sacramentum Ordinis pugnare cum Matrimonij Sacramēto, sed actum Matrimonij habere aliquid indecens in sacerdote. Nam si laici continere debent ab vxore ad tempus causa orationis, 1. Corinth. 7. certè actus coniugij impedit orationem, & multò magis sacrificium. Alioqui veros coniuges, sed continentes, ordinamus sacerdotes.

Nota TERTIO, Sacramenta septem, licet sint eiusdem generis, & proinde omnia verè, & propriè Sacramenta: tamen differre specie, & secundum varias rationes nullum esse, quod alicui alteri non præstet. Nam Baptismus excellit omnibus, quoad effectum remittendi peccata; nam remittit peccatum originale, quod nullo alio Sacramento remittitur: item remittit omnia actualia, & omnem pœnam eis debitam, quod non faciunt Sacramenta cetera.

Confirmatio excellit omnibus, & ipsi etiam Baptismo (etiã si nolint Lutherani) quoad effectum gratiæ ad benè operandum. Nam in eo Sacramento confertur plenitudo Spiritus sancti, & est Confirmatio quædam perfectio, & consummatio Baptismi: præsupponit enim totũ effectum Baptismi, & superaddit gratiam copiosiore. Vnde Apostolis dicitur,
Luc.

Lucæ vlt. *Sedete in ciuitate, donec induamini Virtute ex alto.* Et ante Confirmationis effectum, quam acceperunt in die Pentecostes, licet baptizati essent, timidissimi erant, ita vt omnes in passione fugerent; postea verò accepto Spiritu sancto, facti sunt robustissimi. Quare Cyprianus lib. 2. epist. 1. & Cornelius in epist. ad Fabianum apud Eusebium lib. 6. histor. cap. 33. non timuerunt dicere non esse plenè sanctificatos, nec perfectos Christianos, qui carent Sacramento Chrismatis; etiam si hanc vocent Caluinus & Kemnitius veterem contumeliam.

Eucharistia excellit omnibus, quoad ipsam substantiam Sacramenti. Nam cetera constant ex re sensibili, & virtute quadam agendi sibi à Deo communicata per motum: at Eucharistia nō solū virtutem quadam operatiuā, sed ipsū Christum auctorem illius virtutis verè continet.

Pœnitentia excellit ceteris necessitate, solo Baptismo excepto, cum quo est illi hæc excellentia communis.

Extrema vnctio aliquo modo excellit Pœnitentiæ, quoad effectum gratiæ, sicut Confirmatio Baptismo. Nam præsupponit totum effectum Pœnitentiæ, & superaddit gratiam copiosiore, quæ non solū posset delere omnia peccata si adessent, sed etiam tollit reliquias peccatorum.

Ordo excellit omnibus, excepta Confirmatione, ratione ministri; nam solū ab Episcopo conferri potest. Immo etiam videtur excellere in hac re Confirmationi. Nam Confirmatio aliquando ex dispensatione confertur à simplici sacerdote: Ordines autem sacri, ac præsertim sacerdotium, nunquam nisi ab Episcopis conferuntur. Præterea Ordo ceteris præstat, quoad aliquid sibi proprium, quia constituit homines in gradu sublimiore, quàm sint ceteri Christiani, non (vt nugatur Kemnitius) quia præbendas pingues secum adfert.

Denique Matrimonium excellit significatione: significat enim Christi vnionem cum Ecclesia; vnde ab Apostolo magnum Sacramentum appellatur, Ephes. 5.

Nota **QUARTO**, simpliciter Eucharistiam omnibus excellere; nam eius excellentia est in ipsa Sacramenti substantia. Et præterea est hoc Sacramentum consummatio omnium Sacramentorum, vnde etiam post singula conferri solet,

let, quando ea traduntur adultis: de qua re alibi dicendum erit.

Nota Qvinto, ordinem, quem seruat Concilium in Sacramentis numerandis, non esse ordinem dignitatis, sed primò poni quinque, quæ ad omnes pertinent, deinde duo, quæ non ad omnes: & quidem in primis quinque seruari ordinem temporis, quo ex natura sua sumi deberent. Primò enim datur Baptismus. Secundò Confirmatio. Tertiò Eucharistia: hic enim ordo seruatur cùm baptizatur adulti, & est ordo naturalis. Quartò datur Pœnitentia, si contingat peccare post Baptismum. Quintò Extrema vnctio in fine vitæ. Post ista quinque, quæ sunt omnibus communia, ponuntur alia duo, quæ non conueniunt omnibus, Ordo, & Matrimonium; & quidem prius Ordo, quàm Matrimonium, quia Ordo est excellentior: hic enim non debuit haberi ratio temporis, cùm non coniungantur hæc duo Sacramenta in vno homine, nisi per accidens.



CONTROVERSID

S E X T A.

De cæremoniis Sacramento- rum in genere.

DERITIBVS SINGVLORVM SACRAMENTORVM suis locis agemus; hic tantum de ritibus in genere disputandum est. Quam postremam cōtrouersiam disputare institui-
mus, tum quia res dignissima est, quæ sciatur, tum etiam vt nullus sit canon Concilij Tridētini de Sacramentis in genere, quem non defenderimus; hætenus enim omnes defendimus, præter vltimum, qui dicit anathema iis, qui cæremonias

306 *Cap. XXIX. De effectu Sacrament. Lib. II.*
nias Ecclesiæ, vel contemnunt, vel sine peccato pratermit-
ti posse putant.

Erunt autem quatuor partes huius quæstionis. PRIMÆ
de nomine, definitione, & partitione caeremoniarum. SE-
CUNDÆ de statu causæ, & hæreticorum erroribus, & mē-
daciis. TERTIÆ de explicatione, & probatione veritatis.
QUARTÆ de obiectionibus aduersariorum.

CAPVT XXIX.

De nomine, definitione, & partitione caeremo-
niarum.

QUOD ad PRIMVM attinet, notanda sunt quæ-
dam pro statu causæ intelligendo. PRIMVM est,
quid sit caeremonia. Est autem caeremonia actus
externus religionis, qui non aliunde habet lau-
dem, nisi quia fit ad Dei honorem. Religio enim, quæ est no-
bilissima moralium virtutum, tres habet actus, vt quæuis alia
virtus. PRIMO, actum internum elicitum, qui est velle Deo
debitum honorem, & cultum dare. SECUNDO, actum exter-
num interno respondentem, qui est quælibet externa actio,
quæ non aliunde est bona, & laudabilis, nisi quia fit ad Deum
colendum, vt sacrificium, genu flexio, & similia. TERTIO, a-
ctum imperatū, id est, actum cuiusvis virtutis, qui à religione
ordinetur ad Dei honorem. Hoc modo ieiunia, elecmolynæ,
& alia id genus dici possunt actus religionis, quando fiunt ad
colendum Deum, licet alioqui sint etiam actus aliarum virtu-
tum. De hoc tertio actu dixit S. Iacobus cap. i. religionem esse
visitare pupillos, & immaculatum se custodite ab hoc seculo;
& S. Augustinus in Enchirid. cap. 3. dixit, Deum coli fide, & spe,
& charitate. Ex his tribus actibus, primus nullo modo est cæ-
remonia; tertius non est etiam caeremonia, nisi quatenus im-
peratur à religione; secundus est propriè, & simpliciter cære-
monia, & de eo tractamus hoc loco.

Quod autem ad nomen attinet: Cæremonia apud Hebræ-
os dicuntur קריא quod nomen propriè significat non tam
ipsam

ipsam externam actionem, quam legem, seu statutum, quo actio illa præcipitur. Vnde etiam in nouo Testamento ceremoniæ Iudaicæ nomine legis appellari solent, vt Matth. II. *Lex, & Propheta &sq. ad Ioannem.* Galat. 5. *Testificor omni homini circumcidenti se, quoniam debitor est vniuersæ legis faciendæ.* Eam vocem Græci reddunt vbiq; per *δικαιόματα*, id est, iustificationes, quia erant ritus ad hominem iustificandum, & purgandum institutæ. Latinus interpres ferè semper vertit cæremoniam in Testamento veteri vocem Hebræam *קרי*. Nomen autem hoc Latinum vel dictum est ab oppido Cære, vt volunt Liuius lib. 5. & Valerius Maximus lib. 1. cap. 1. quod in eo oppido sacra Romana seruata sint, quo tempore Galli Romam diripuerunt; vel fortè rectius dictum est à cærendo, vt sit cæremonia, quasi carimonia, vt vult S. Augustinus lib. 2. retract. cap. 37. & Gellius lib. 4. cap. 9. & Macrobius lib. 2. Saturnal. cap. 3. eò quòd quædam cæremoniæ in abstinendo, & cærendo positæ sunt, qualis erat apud Iudæos cære vsu carnis sülle, & omnia ferè vota Nazaræorum, & aliorum, qui vini, & aliarum multarum rerum vsu, & voto cærebant.

Sed ad partitionem veniamus. Quinque sunt partitiones cæremoniarum. PRIMÆ partitiō sumitur à fine seu effectu. Quædam enim instituuntur ad iustificandum, vt Sacramenta, & de his modò non agimus: quædam ad alios quosdā effectus spirituales, vt ad demones coërcendos, vt exorcismi, aqua benedicta, &c. quædam ad solum ornatum, & significationem, vt vestis alba neophytorum, lumina cereorum, &c. & de his agimus.

SECUNDA partitiō sumitur à causâ efficiente, id est, ab institutore. Quædam enim sunt ab ipsa natura quodammodò institutæ, quæ naturales dici possunt: quale est respicere in cælum, tollere manus, flectere genua, tundere pectus cū Deum oramus: ista enim natura ipsa docet, vnde etiam communes sunt etiam Gentilibus, & quibuscunq; scētis. Quædam sunt à Deo institutæ, vt multæ in Testamento veteri, & Sacramenta quædam in nouo; atque hæ diuinæ cæremoniæ appellantur. Quædam deniq; sunt ab Apostolis, vel eorū successoribus institutæ, quæ dicuntur Ecclesiasticæ. Et similis est partitiō verborum,

borum, sunt enim cæremoniæ quædam verba visibilia. Videmus enim quasdam voces esse naturales, vt sunt eę, quibus varios effectus exprimimus; nam omnes eodem modo plorant, suspirant, rident, &c. alias à Deo institutas, vt Genes. 1. nomen cœli, terræ, maris, & alibi nomina aliquorum magnorum virorum. denique alias ab hominibus institutas, vt Genes. 2. Adam imposuit nomina animantibus.

TERTIA partitio sumitur à causâ formali. Quædã enim cæremonię sunt immediatè cultus Dei, vt sacrificium, oratio, adoratio, &c. quædam disponunt ad colendum Deum, vt ieiunia, cœlibatus, vitæ asperitas, &c. quædam sunt instrumenta diuini cultus, vt templa, aræ, calices, &c.

QUARTA partitio à causâ materiali, seu ab obiecto materiali. Quædam enim cæremoniæ versantur circa personas; vt Exorcismi, insufflationes, aspersio cineris, &c. quædam circa locum, vt consecratio templi; quædam circa tempus, vt dies festi, vigiliæ, Quadragesima, & sic etiam sunt tempora determinata Sacramentorum celebrationi: quædam circa modum, vt quod Latinè Sacramenta ministrentur; denique quædam circa res ipsas, vt benedictiones aquæ, olei, vestium, palmarum, &c.

QUINTA partitio sumitur ab accidentibus, vt quod aliæ sint vniuersales, aliæ particulares; vt ieiunium Sabbathi temporibus S. Augustini seruabatur Romæ, non Mediolani; & contrà lotio pedum post Baptisma, seruabatur Mediolani, non Romæ. Vide Augustinum epist. 118. & Ambrosium libro de Sacramentis 3. cap. 1. Item aliæ temporales, vt abstinentia à sanguine, & suffocato, Actor. 15. aliæ perpetuæ, vt ritus Sacramentorum. Denique aliæ in præcepto, aliæ liberæ; de quibus vide Augustinum epist. 118.

CAPVT XXX.

De statu causæ.



AM vt statum causæ intelligamus, obseruanda sunt tria. **PRIMO** non pauca esse, in quibus aduersarij nobiscum conueniunt. **PRIMO** enim fatentur aliquas cæremonias necessarias esse ad Sacramen-

cramentorum administrationem, præter cæremonias, quibus continetur Sacramentorum essentia. **SECUNDO** eas cæremonias esse adhibendas, quæ habent in Scriptura mandatum, vel exemplum, ut orationes, gratiarum actiones, exhortationes, psalmodiam: ista enim fuisse in usu Apostolorum, patet ex 1. Cor. 14. & 1. Tim. 2. **TERCIO** fatetur posse Ecclesiam statuere de his cæremoniis, quæ habentur in Scripturis, certum ordinem, & modum, quo seruari debent, ne sit confusio. Ita Lutherus in lib. de piis cæremoniis, & in lib. de formula Missæ. Calvinus lib. 4. Instit. cap. 10. §. 14. Kemnitius in Examine, 2. part. pag. 171. Denique idem probat tot agenda, quas singulæ ferè Ecclesiæ ipsorum ediderunt.

SECUNDO obseruandū est, multa ab aduersariis reprehendi in doctrina de cæremoniis Catholicorum, sed omnia esse ipsorum mendacia, nō dogmata nostra: quocirca sunt hæc omnia notanda, & separanda, ut verus causæ status appareat.

Igitur Kemnitius in 2. parte Examinis, pag. 157. & sequentibus, hæc omnia nobis tribuit. **PRIMO**, quod Cōcilium Tridentinum approbauerit quoscunque ritus ab hominibus excogitados, licet absurdissimos. Idem habet Calvinus in Antidoto huius canonis. At falsum est: nam Concilium non approbat, nisi ritus receptos ab Ecclesia vniuersali, quos etiam ita approbat Augustinus epist. 118. ut dicat contra eos disputare esse insolentissimæ insanix.

SECUNDO, quod asseramus retinendos ritus, qui pugnat cum Dei verbo. **TERCIO**, quod Papa possit immutare Christi instituta. **QUARTO**, quod sit peccatum mortale, & anathemate dignum, mutare vel minimum in his cæremoniis. Idem habet Calvinus in Antidoto. **QUINTO**, quod anteponamus humanas cæremonias diuinis præceptis. Idem habet Calvinus lib. 4. Instit. cap. 10. & Confessio in Apologia August. artic. 15. & vlt. **SEXTO**, quod putemus sine his ritibus humanis non habere Sacramenta veritatem, & efficaciam. Quod sanè est mendacium impudentissimum: & idem tamen mendacium est apud Tilmannum Heshusium lib. de 600. erroribus Pontificiorum, tit. 15. errore 13. **SEPTIMO**, quod singulis cæremoniis tribuamus vim aliquam spiritualem. **OCTAVO**, quod aliquibus cæremoniis tribuamus efficaciam Sacramentorum, ut cereo Paschali. Simile quid habet Lutherus in vlt.

homilia de Baptismo, vbi dicit, Catholicos putare aquam benedictam, & similes res consecratas, esse Sacramēta; quamuis contrarium idem Lutherus dicat in lib. de captiui. Babyl. cap. de Ordine. Non o, quòd præferamus cæremonias nostras ipsis Christi Sacramentis. Idem habet Calvinus in Antidoto, vbi impudētissimè mentitur, nos antepondere salē, & oleum, & sputum aquæ Baptismi. De c i m o, quòd Tertullianus, & Cyprianus ex errore Montanistarum docuerint, exorcismos, & vñctionē habere spirituales effectus. At nihil tale docuisse Montanistas vsquā legimus: sed in Parribus omnibus passim id legimus. V n d e c i m o, quòd Cyprianus, & Cornel. tribuerint vñctioni effectum Baptismi, & quòd postea, teste Magistro Sententiarum, correctæ fuerint istæ opiniones, & nunc tamen à Concilio Tridentino iterum renouentur. Sed ista omnia mendacia sunt. Nam Cornelius, & Cyprianus non loquuntur de cæremoniis Ecclesiasticis, sed de Sacramēto Confirmationis; & ei tribuunt non effectum Baptismi, sed alium proprium. Neque apud Magistrum exstat vllum verbum de correctione huius sententiæ; solum enim corrigitur error Cypriani de Anabaptismo, lib. 4. sent. dist. 6.

His addunt alij quod sentiamus præcipuum Dei cultum in his cæremoniis consistere. Ita Calvinus lib. 4. Instit. cap. 10. §. 9. & 12. item Confessio Augustana, art. 26. qui est de discrimine ciborum. Item per has cæremonias homines iustificari, & in Christi locum quodammodò successisse. Ita Calvinus loco citato, §. 15. & Apologia Confess. art. 15. Sed hæc omnia mendacia sunt, & ad statum quæstionis non pertinent. Fate-mur enim omnes Catholici cæremonias Ecclesiasticas non esse præcipuum cultum; nec ab iis pendere essentiam, & efficaciam Sacramentorum; nec habere vim iustificandi, vt habent Sacramēta, proinde inferiores esse Sacramentis, nec esse approbandos ritus qui pugnant cum verbo Dei; nec esse nimis multiplicandos, ita vt sua multitudine obruant quodammodò religionem, cui seruire debent. Vt enim agricolæ cupiunt in vitibus præter vuas etiam pampinos, quibus ornentur, & adiumentur vuæ; sed si nimium pampini crescant, & impediunt potius, quàm iuuent, eos rescant: ita faciendum esse in eiusmodi ritibus, docet Augustinus epist. 119. cap. 19. In his ergo cum aduersariis conuenimus.

Nota TERTIO, totam controuerſiam conſiſtere in ſex capitibus. PRIMVM eſt, an ſint aliquæ cæremoniæ à Chriſto, vel Apoſtoliſ inſtitutæ, quæ non habeantur in Scriptura, ſed ex traditione ſola cognoscantur. SECVDVM eſt, an cæremoniæ, quæ non ſunt Sacramenta, habeant vim aliquam ſpiritualem, vt coërcendi dæmones. TERTIVM eſt, an Eccleſia poſſit inſtituere nouas cæremonias. QVARTVM, an poſſit eas ita inſtituere, vt teneantur fideles, in conſcientia eas ſeruare, etiam citra ſcandalum. QVINTVM, an eiufmodi cæremoniæ ſint res bonæ, & meritoria, & pars aliqua diuini cultus. SEXTVM, an lingua Latina Sacramenta celebranda, & miniſtranda ſint.

Ad hæc omnia Catholici reſpondent affirmatiuè, ad eadem capita, ſolo excepto tertio, omnes ferè Lutherani, & Caluiſtæ reſpondent negatiuè: de tertio inter ſe non conueniunt. Lutherus enim in lib. de formula Miſſæ, & in lib. de piis cæremoniis, & Confeſſio Auguſtana, artic. 15. & 26. & Philip-
pus in locis, titul. de cæremoniis, & Illyricus in Apologia pro Confeſſione Antuerpienſi, cap. 10. & communiter Lutherani, fatentur poſſe Eccleſiam inſtituere aliquas cæremonias ad eruditionem, & ſplendorem, & ordinem Eccleſiæ; modò abſit obligatio, & opinio cultus. At Caluius lib. 4. Inſtit. cap. 10. §. 11. contendit id non licere vllò modo, & idem ſentire videtur Brentius in Confeſſione VVirtembergeniſi, cap. de cæremoniis. Dicit enim, poſſe Eccleſiam inſtituere diſpoſitionem concionum, lectionum, feſtorum, & aliarum rerum, quæ ſecundum mandata, vel exempla Scripturarum celebrantur: ſed non licere commiſci nouos ritus ad adumbrandam veritatem, iam in Euangelio patefactam; quales ſunt interdium accendere cereos, vti vexillis, ſeu crucibus, ad ſignificandam victoriam Chriſti, &c. Idem denique ſatis aperte docet Kemnitius, pag. 166. Nam poſteaquam dixit arduam quæſtionem eſſe, an hominibus permiſſum ſit, aliquos ritus quocunque conſilio ſuperaddere iis, quos Dei Filius inſtituit: ſubiungit, diuinæ inſtitutioni nihil addendum, aut detrahendum eſſe; & eos qui addunt, id videri facere, quaſi cæremoniæ à Chriſto inſtitutæ, non ſint ſatis idoneæ, & ſufficientes.

CAPVT XXXI.

Explicatur, & defenditur veritas.

NUNC vt veritas explicetur, & probetur, adferemus aliquor propositiones. *PRIMA: Caremonias aliquas Christus, vel Apostoli instituerūt, quas ex nullo Scriptura, sed ex sola traditione habemus.* Hæc probanda est fusiùs, cum de singulis agetur: nunc breuiter probatur ex eo, quod Sacramentum Chrismatis sacrosanctū est, sicut Baptismi Sacramentum, vt Augustinus affirmat lib. 2. cap. 104. contra literas Petiliani; at Sacramenta solus Deus instituere potest; igitur Sacramentum Chrismatis Christus instituit: & tamen nusquam habemus in Scriptura mentionem Chrismatis. Item 1. Corinth. 11. Apostolus ait: *Cetera cum Venero, disponam.* Et tamen nihil postea scripsit de ritu Sacramenti Eucharistiæ, de quo ibi agitur: neque credibile est eum non præstitisse, quod promiserat, aut eius leges postea interiisse. Quare B. Augustinus affirmat epist. 118. inter alias Apostolorum leges vnā fuisse, vt Eucharistiam ieiuni susceperemus; idque cum aliis ritibus, quos Ecclesia seruat Apostolum promississe, cum ait: *Cetera cum Venero, disponam.* Basiliius libro de Spiritu sancto, cap. 27. multa enumerat, ac primo loco signum crucis, quæ ab Apostolis instituta ad nos sola traditione non scripta venerunt. Pari ratione aqua vino miscenda in Eucharistia Christum ipsum instituisse asserit Cyprianus lib. 2. epistol. 3. & ex eo Augustinus lib. 3. doctrin. Christ. cap. 21. & tamen non habetur hoc expressè in vlla Scriptura. Sed de his alijs.

SECVNDA propositio: Aliqua caremonia vim habent spiritualem. De hac etiam alibi dicendum est; interim probatur de signo crucis. Nam omnes Patres passim affirmant frontem armandam, & muniendam contra omnes insidias Dæmonum; & miram eius esse virtutem. Vide Tertullianum initio Scorpiaci. Origenē homil. 6. in cap. 15. Exod. Cyprianum lib. 4. epist. 6. Lactantium lib. 4. cap. 26. & 27. Nazianzenum oratione 1. in Iulianum. Nyssenum in vita Gregorij Thaumaturgi. Epiphanium hæres. 30. Chrysostomum homil. quod Christus sit Deus. Ephrem in lib. de armatura spiritali. Palladium in hist.

in hist. Lausiaca, cap. 2. & 54. Hieronymum in vita Hilarionis. Sulpitium in vita S. Martini. Augustinum lib. 22. de ciuit. Dei, cap. 8. Prudentium in hymno ante somnum. Paulinum Natali 8. Sed nomine aliorum audiamus. ATHANASIUM in libro de Incarnatione & salutari aduentu Domini: *Signo crucis, inquit, omnia magica compescuntur, & Veneficia inefficacia sunt.* Et infra: *Veniat, qui istorum dictorum experimentum capere velit, & in ipsis prastigiis demonum, & imposturis Vaticiniorum, & in miraculis magia & tatur signo crucis ab ipsis deriso, nomenq; Christi inuocet, & Videbit, quomodo eius rei metu daemones fugiant, Vaticinia conquiescant, magia & Veneficia iaceant.*

Est autem OBSERVANDUM, tribus modis operari signum crucis in dæmonibus terrendis. PRIMO, ex apprehensione ipsorum dæmonum. SECUNDO, ex deuotione hominis. TERTIO, idque potissimum ex instituto Dei, atque ad eum ex opere operato. Ac primum dubium esse non potest, quin dæmon, cum signum crucis fieri videt, recorderetur se Christi cruce deuictum, ac proinde horreat illud signum suæ calamitatis, & fugiat, quomodo canes fugiunt, cum baculum, aut lapides vident. Deinde vim habet hoc signum ex deuotione hominis se signantis, eo modo, quo vim habet oratio vocalis. Est enim signum crucis quædam inuocatio meritorum Christi crucifixi signo expressa; loquimur enim corde, ore, & nutibus. Itaque opponere Diabolo, & cuius malo signum crucis, est opponere Christi passionem, id est, inuocare Deum per Christi merita. Quocirca tunc effectus magis procedit ex interna fide & deuotione, quam ex ipsa figura crucis, sicut cum oramus voce, & impetramus, impetratio non tribuitur sono vocis, sed fidei, & deuotioni. Præter hos duos modos est etiam tertius ex Dei institutione, & ex opere operato. Nam sæpe homines Iudæi, vel Ethnici, sine vera fide, aut deuotione signo crucis adiuti sunt, ut patet de Iuliano apostata apud Nazianzenum orat. 1. in Iulianum. & de Iosepho Hebræo apud Epiphanium hæresi 30. & de alio Hebræo apud Gregorium lib. 3. Dialogor. cap. 3. Quare S. AYGVS TINVS lib. 83. qq. q. 79. *Nec mirum, inquit, quod hac signa valent, cum à bonis Christianis adhibentur, quando etiam cum & surpantur ab extraneis, qui omnino suum nomē ad istam militiam non dederunt, propter honorem*

tamen excellentissimi Imperatoris Valens. Cùm autem non cedunt his signis huiusmodi potestates, Deus ipse prohibet occultis modis, cùm id iustum, atque utile iudicat. Nam nullo modo illi spiritus audent hac signa contemnere, contremiscunt hac ubique illa proplexerint. Hæc ille.

TERTIA propositio: *Potest Ecclesia instituire novas ceremonias, non quidem ad iustificandum impium, sed ad alios effectus spirituales.* **NOTA** pro explicatione, ceremonias ab Ecclesia institutas tribus modis posse esse utiles. **PRIMO**, ad ornandum, & repræsentandum aliquod mysterium religionis, & eo modo iuuandos rudiores; & de hoc inter Catholicos nulla potest esse dubitatio. **SECUNDO**, ad morbos curandos, & demones pellendos, & peccata venialia purganda, & alia id genus, idq; per modum impetrationis, ut cùm Ecclesia benedicit candelas, palmas, agros, &c. Ista enim valent ad effectus illos, ad quos instituuntur ex vi ordinum Ecclesiæ, quæ sine dubio exaudiuntur; & de hoc etiam non est quaestio apud Catholicos. **TERCIO** modo probabile est, posse Ecclesiam instituire eiusmodi ceremonias ad eosdem effectus per applicationem Christi meritorum; ita ut ex opere operato illos effectus producant, quomodo Sacramenta ex opere operato iustificant. Christus enim sine dubio meruit Ecclesiæ suæ non solum gratiam, & gloriam, sed etiam omnia alia beneficia, quæ illi utilia esse possunt. Et quidem ad gratiam, & iustificationem impij consequendam instituit ipse Sacramenta, quibus applicentur ipsius merita; nec licet iam alia signa instituire ad effectum illum principalem: ad alia beneficia minora reliquit Ecclesiæ potestatem, ut instituat signa, quibus applicentur ipsius merita. Ita quidam disputant, sed non est hoc usque ad eò certum, præsertim cùm videamus non habere signa ista infallibilem effectum. Quanquam posset dici habere effectum infallibilem, si id sit utile hominibus, non autem absolute, quia sæpe non expedit nobis ea beneficia consequi: quomodo de extrema Vnctione dicere solemus, quoad effectum sanitatis corporalis.

Sed quidquid de hoc sit; nostra propositio solum asserit contra hæreticos, licere Ecclesiæ instituire novas ceremonias, non ad iustificandum à peccatis mortalibus, sed ad alios fines. Probatur **PRIMO** exemplis Synagogæ, vel hominum priua-

priuatorum in Testamento veteri. Non est enim vlla ratio, cur non possit Ecclesia Christi id, quod sine Dei mandato expresso, quanquam non sine Dei inspiratione, aliqui priuati homines vel Synagoga poterat. Gen. 28. Iacob cum nondum Patriarcha esset, sed priuatus homo, Deo quidem vt videtur, impellente non tamen expressè mandante, nouam cæremoniã excogitauit. Erexìt enim lapidem in titulum, fundens oleum desuper, & vocauit nomen loci illius Bethel in memoriam visionis, quam in eo loco habuerat. Item Synagoga Iudæorum auctore Mardocheo addidit nouum festum diem solennem omnibus celebrandum, quem Deus nõ instituerat in lege, vt habemus Ester 9. Idem factum est tempore Iudith in additione alterius festi; sic enim legimus cap. vlt. *Dies autem victoria huius festiuitatis ab Hebrais in numero sanctorum dierum accipitur, & colitur à Iudæis ex illo tempore, &sq̃ue in presentem diem.* Neq; obstat, quod hunc librum heretici non recipiunt: satis enim est nobis, si fidem illi habeant, quam habent Liuius, aut Salustius; non enim hic agitur de aliquo abstruso dogmate, sed de historia rei gestæ. Simile habemus in Machabæis lib. I. cap. 4. vbi instituitur nouum festum dedicationis altaris, ad quod festum celebrandum, etiam Dominus ipse in Hierusalem ascendit, Ioan. 10.

SECUNDO probatur ex Apostolorum exemplo. Apostoli enim Actor. 15. congregati in Concilio, nouam cæremoniã instituerunt, nimirum vt Gentiles abstinerent à sanguine, & suffocato; quod certè nusquam Deus iusserat, nisi Iudæis, & præterea iam erat euacuata, & abrogata lex illa Iudaica per Christi mortem. Vnde fuit verè noua cæremonia illa Apostolorum instituta ad alium finem, quàm olim Iudaica; vnde vocatur dogma Apostolorum Actor. 16. Et præterea iam suprâ probauimus multa alia Apostolos instituisse, licet in Scripturis non habeantur. Nulla autem est ratio, cur non possit modò Ecclesia, quod tunc poterat. Non enim Apostoli id fecerunt ex aliqua noua reuelatione sibi concessa, sed ex potestate ordinaria gubernandi Ecclesiam; vt patet ex eo, quod Concilium coegerunt, & collatis sententiis statuerunt, quod vtile esse iudicârunt.

TERTIO; Si Ecclesia non posset id facere, vel repugnantia esset ex parte Ecclesiæ, vel ex parte cæremiarum, vel ex parte noui-

nouitatis, id est, vel non posset, quia non habet auctoritatem aliquid statuendi, vel quia cæremoniæ (vt dicit Brentius) sunt propriæ Testamenti veteris, proinde non conueniunt Testamento nouo, vel quia non licet aliquid addere cæremoniis à Christo institutis: At nihil horum dici potest: nam Ecclesiam posse aliquid statuere, manifestè patet, vel ex eo, quod ab initio fidei singulis ætatibus, Concilia celebrata sunt, quæ semper canones ediderunt: damnare autem omnia Concilia, manifesta infania esset; vt interim omittam argumenta plurima, quibus hoc ipsum alibi demonstraui. Non repugnare autem cæremonias nouæ legi, patet ex Sacramentis à Christo institutis, quæ sunt verissimæ cæremoniæ, vt etiam aduersarij concedunt. Denique non repugnare ipsam nouitatem, patet, quia nusquam Dominus prohibuit, ne adderemus cæremonias ad Sacramenta ipsius commodius, & vtilius administranda. Immò cum Dominus paucissimas cæremonias instituerit, nec tradiderit modum, quo ministrari deberent, id reliquit sine dubio prouidentia pastorum ipsius Ecclesiæ, vt rectè docet Augustinus epist. 118. cap. 6.

QVARTAPROPOSITIO: Cæremonia ab Ecclesia instituta non possunt omitti sine peccato, etiam citra scandalum. Hæc pendet ab alia quæstione, An leges Ecclesiasticæ obligent in conscientia: quam disputauius lib. 4. de Pontifice, cap. 15. & sequentibus. Ratio præcipua est ex Paulo Rom. 13. *Non est potestas nisi à Deo: quæ autem à Deo sunt, ordinata sunt, itaq; qui resistit potestati, Dei ordinationi resistit: qui autem resistunt, ipsi sibi damnationem acquirunt.* Et infra: *Id eoq; necessitate subditi estote, non solum propter iram, sed etiam propter conscientiam.* Quæ sententia etiam si ab Apostolo applicetur in particulari temporalibus Principibus, cum subiungit: *Si male egeris, time; non enim sine causa gladium portat.* tamen sententia est generalis de omnibus habentibus potestatem, vt Calvinus concedit lib. 4. Instit. cap. 10. §. 5. & patet ex illis verbis: *Non est potestas, nisi à Deo.* Ista enim propositio æquiualeat huic; Omnis potestas à Deo est. Esse autem in Ecclesia potestatem quandam Præpositorum supra ceteros, negari non potest, cum id Scriptura passim doceat, vt Rom. 12. *Qui præest, in sollicitudine.* 2. Cor. 13. *Hæc absens scripsi, & non præsens durius agam secundum potestatem, quam dedit mihi Dominus.*

mus. Hebr. 13. Obedite Præpositis Vestrīs. Efficitur igitur, ut qui leges Ecclesiæ non seruant, peccent in conscientia. Id enim significant illa omnia: Dei ordinationi resistunt: & ipsi sibi damnationem acquirunt: & necessitate subditi estote: & non solum propter iram, sed etiam propter conscientiam. Vide plura loco citato.

Sed in particulari, quoddam cæremoniæ non sint omnes liberæ obseruationis, probatur ex eo, quod propter cæremonias natæ sunt in Ecclesia grauissimæ dissensiones, & sub pœnis grauissimis impositæ sunt leges de cæremoniis, & tandem hæretici habiti sunt, qui non obediebant. Quæ omnia sunt argumenta manifesta, rem istam non esse liberam: non enim de rebus liberis nascuntur dissensiones.

PRIMA dissensio in Ecclesia fuit ob cæremonias legales, quæ dissensio sopita est ab Apostolis Acto. 15. Vbi cum dicunt: *Visum est Spiritui sancto, & nobis, nihil vltra imponere vobis oneris, præter hac necessaria, ut abstineatis vos à sanguine, &c.* non vocarent onus legem cæremonialem; neque rem necessariam, nisi obligaret in conscientia.

SECUNDA dissensio fuit de die Paschatis, hoc est, de alia cæremonia. Et tanti fecit Ecclesia hanc cæremoniam, ut Victor Papa I. totam Asiam separare voluerit ab vnitæ fidei, quod nollet Asiatici in ea reparere. Testis est Eusebius lib. 5. hist. cap. 25. Deinde verò Concilium Nicænum propter istam quæstionem potissimum conuenit, ut scribunt Epiphanius hæres. 70. & Constantinus in epistola sua apud Eusebium lib. 3. de vita Constantini: & Athanasius in epistola de synodis Arimini, & Seleuciæ: vbi etiam addit Concilium Nicænum disertis verbis imperasse, ut omnes obedirent. Et Concilium Antiochenum paulò post celebratum excommunicat can. 1. eos, qui legem Concilij Nicæni de Paschate non sequant. Denique à Patribus habiti sunt hæretici, qui eam cæremoniam diuerso modo seruare volebant, ut patet ex Epiphanio hæres. 50. Augustino hæres. 29. & Theodoro to lib. 3. de fabulis hæreticorum.

TERTIA dissensio fuit de ritu Baptismi, an hæretici verè baptizarent. Quæ etiam dissensio multum exercuit Ecclesiam, & multa inde Concilia facta sunt, & tandem habiti sunt hæretici

retici Donatistæ, quodd non obtemperarent definitioni Concilij generalis. Vide Eusebium lib. 6. hist. cap. 3. & Augustinum in magna parte tomi 7.

Aliæ fuerunt postea dissensiones de delectu ciborum, de temporibus ieiuniorum, de diebus festis, peregrinationibus, vigiliis, cereis, aliisque cæremoniis, ob quas numerati sunt inter hæreticos Encratitæ apud Epiphanium hæresi 46. & Augustinum hæresi 23. Deinde Manichæi, qui plurimas cæremonias Ecclesię reiiciebant apud Augustinum lib. 20. contra Faustum, cap. 3. & 4. Deinde Eustatiani apud Socratem lib. 2. cap. 33. tum Aëriani apud Epiphanium hæresi 75. & Augustinum hæresi 53. tum Vigilantius apud Hieronymum in libro contra Vigilantium. Inde Claudius Taurinensis apud Ionam in libris tribus de sacris imaginibus. Inde Petrobrusiani apud Bernardum in epist. 240. Inde VValdenses apud Guidonem in summa de hæreticis: & Thaburitæ apud Æneam Syluium libro de origine Bohemorum, cap. 35. Denique Ioannes VViclefus apud Thomam VValdensẽ, tomo 3. de Sacramentalibus.

Vltimò probatur hæc propositio: quia si libera esset cæremoniarum obseruatio, nullo modo fieri posset, vt aliquis ordo, & vniformitas in Ecclesia seruetur. Si enim nunc vix seruetur vniformitas in rebus quibusdam præcipuis, cum tam seuerè id præcipiatur, quid fieret si esset res libera? Et tamen iubet Apostolus 1. Corinth. 14. vt omnia honestè, & secundum ordinem fiant. Quæ ratio Caluinum mouit, vt cæremonias suas voluerit lege sanciri. Nam lib. 4. Instit. cap. 10. §. 27. dicit, dissolui suis neruis, & deformari, ac dissipari Ecclesiam, si vnicuique liceat mutare cæremonias, & §. 31. dicit, libera quidem conscientia debere seruari cæremonias, sic tamen, vt non contemptui habeantur, nec supina negligentia prætereantur: & infra dicit, non esse crimen si per imprudentiam, aut obliuionem aliquid omittatur; vbi indicat esse crimen si per contemptum, vel crassam negligentiam omittantur. At nihil aliud Ecclesia de suis cæremoniis docet.

QVINTA propositio: *Cæremonia non sunt res indifferentes, sed sunt res vtilis, meritoria, & pars quadam cultus diuini.* Probanda sunt hæc omnia per partes. Ac PRIMVM, quodd cæremonię sint vtilis, probatur his rationibus. PRIMO; Cæremonię,

monia, vt oriuntur ex interna pia affectione, & deuotione, ita etiam illam conseruant, nutriunt, augment, vt Augustinus docet libro de cura pro mortuis, cap. 5. & epist. 119. cap. 11. & lib. 9. Confess. cap. 6. & 7. Et nos ipsi hoc experimur, cum intramus Basilicas ornatas, & mundas, & crucibus, ac sacris imaginibus, & aris instructas, & accensis lampadibus, deuotionem facillimè concipimus: contrà autem cum ingredimur rempla hæreticorum, vbi nihil est, nisi sedes ad concionandum, & mensa lignea ad cœnam faciendam, videmur ingredi profanam aulam, non domum Dei.

SECUNDA vtilitas est, quòd nò solùm affectum, sed etiam intelligentiam iuuant cæremonia, vt Augustinus docet eadem epist. 119. cap. 7. & præsertim rudibus sunt cæremonia loco Scripturæ, vel picturæ. Adde, quòd aliquando ex vetustis cæremoniis melius persuadentur aliqua dogmata, quàm multis testimoniis. Certè S. Augustinus lib. 1. de peccatorum merit. & remis. cap. 34. & lib. 6. in Iulianum, cap. 2. apertissimè se probare putauit, peccatum originale esse in paruulis ante Baptismum, quia secundum vsum Ecclesiæ exorcizantur, & insufflantur, & iubentur per ora gestantium abrenunciare Diabolo, & operibus eius.

TERTIA vtilitas est, quòd iuuant memoriam. Nisi enim quotannis repræsentaremus variis cæremoniis Domini ortum, apparitionem, passionem, aliaque mysteria redemptionis, facillè mandarentur obliuioni tam insignia beneficia.

QUARTA est exercitium fidei. Valde enim fidem exercemus cum contra Diabolum armamur signo crucis, vel aqua benedicta, vel similibus rebus. Protestamur enim ea cæremonia nos certò credere, tantam esse potentiam crucifixi, vt ad eius solam imaginem dæmones fugiant.

QUINTA est conseruatio religionis. Id enim cæremonia præstant, ne religio vilescat, & contemnatur, & sic paulatim pereat. Nam excellentia religionis nostræ præcipua, quia spiritalis est, nò facillè perspicitur à nobis, qui corporei sumus. Ideò non proponuntur nuda mysteria, sed vestiuntur, & ornantur, vt externam quãdam maiestatem sensibus obiciant, & per eam maiori cum reueretia ab ipsa mente percipiuntur. Itaq; id sunt cæremonia religioni, quod sal carnib⁹, & cortex medullæ. Quocirca rectè Augustinus lib. 19. contra Faustum, cap. 11.

cap. II. affirmat nullam religionem, neque veram, neque falsam sine cæremoniis posse consistere. Atque hinc apud veteres, Theologum esse, nihil erat aliud, nisi scire, quæ numina, quibus cæremoniis colerentur, vt ex Platone intelligi potest in Dialogo de regno. Et apud Iudæos summum quid fuisse, scire cæremonias, patet ex cap. 18. Exod. vbi Ieremo monet Moysen, vt iudicia ciuilia committat aliis, ipse autem doceat populum cæremonias, & ritum colendi. Apud Christianos quoque fuisse etiam in magno pretio cognitionem cæremoniarum, vel vna quæstio de Paschate, abundè demonstrat. Quod idem colligitur ex Basilio epist. 63. Leone epist. 4. Innocentio epist. I. ad Decentium, qui reprehendunt Episcopos, qui cæremonias ignorant.

SEXTA est distinctio Catholicorum ab hæreticis. Nam Sacramenta sunt quidem symbola quædam, quibus discernimur ab infidelibus, tamen ab hæreticis vix per Sacramenta distingui possumus, sed per cæremonias optimè distinguimur. Hoc enim tempore signum crucis, abstinencia à carnibus feria sexta, & similia sunt optima signa distinguentia Catholicos ab hæreticis. Hac de causa initio Ecclesiæ mutârunt Apostoli Sabbathum in Dominicam, ne videremur iudaizare: & Epiphanius in fine librorum contra omnes hæreses, recensuit cæremonias Ecclesiæ, vt indicaret quasdam veluti notas, quibus Ecclesia ab omnibus sectis discernitur. Hinc etiam sancti viri semper maluerunt mori, quàm cogi ad aliquam cæremoniam dimittendam, cùm intelligerent non abiicere signum militiæ, nisi militiæ desertores. Testis est S. Eleazarus lib. 2. Machab. cap. 6. qui maluit occidi, quàm simulare se comedisse carnem suillam, neco modo videretur religionem suam deseruisse: quem postea sequuti sunt septem fratres Machabæi lib. 2. cap. 7. Testis est etiam ille, qui Tertulliano auctore in lib. de corona militis, mori maluit, quàm cum ceteris militibus laurea coronari: quoniam apud Christianos tum cæremonia erat id non facere.

Iam verò, quod sint meritoria, ac Deo placeant, PROBATVR, quia omnia opera virtutum Deo placent, & apud eum præmium merentur, si fiant vt oportet, id est, cum fide & charitate. Sunt autem cæremoniæ opera virtutum. Nam vt minimum sunt actus religionis, sæpe etiam sunt actus simul religionis,

gionis, & alicuius alterius virtutis, & denique cùm sunt imperate, sunt etiam actus obedientię. SECUNDO, professio fidei exterior Deo placet, vt patet Matth. 10. *Qui me confessus fuerit, &c.* Et Rom. 10. *Ore confessio fit ad salutem.* Sed cæremoniis profitemur fidem, vt patet; quia non minus cognosceret Turca me esse Christianum, si videat me venerari crucem, quàm si dicam me esse Christianum. Vnde etiam aduersarij fatentur, per Sacramenta nos protestari fidem. TERTIO, Deo placet fides, spes, charitas, deuotio, & omnis interior actus bonus; ergo etiã placebunt actus exteriores, qui partim sunt effectus interiorum, partim illos ipsos (vt diximus) augent & conseruant. Vnde Exod. 17. cùm Moses oraret eleuatis manibus, populus Dei vincebat, cùm dimitteret manus, vincebatur.

Quod autem dici possint pars cultus diuini, PROBATUR; Nam ipsa naturalis ratio docet hominem, qui constat animo & corpore, debere Deum honorare & colere, & animo per actus interiores, & corpore per exteriores. Vnde CYPRIANVS in sermone de oratione Dominica: *Cogitemus*, inquit, *nos sub conspectum Dei stare: placendum est diuinis oculis, & habitu corporis, & modo vocis.* SECUNDO, omnes alię virtutes, licet in animo consistant principaliter, tamen consummantur per actus exteriores, vt patet de temperantia, fortitudine, & ceteris; cur ergo non idem dicamus de religione? Et confirmatur, quia si oratio vocalis omnium consensu est cultus Dei, cur non etiam adoratio corporalis? Vt enim oratio vocalis est cultus, quia est signum mentalis; ita adoratio erit cultus, quia est signum internę adorationis. TERTIO, natura docet, Deum esse colendum summo modo, cùm sit summum Esse. At magis colit qui corpore, & animo, quàm qui animo tantùm; igitur corporalibus cæremoniis Deus potest coli. QUARTO, Deus verè offenditur, & ignominia afficitur non solùm actu interno, sed etiam externo; igitur honorandus est non solùm actu interno, sed etiam externo.

Sed ad hæc omnia responderent aduersarij, non negare se, quin aliquibus cæremoniis Deus coli possit, & debeat, sed id negare de cæremoniis ab hominibus inuentis. Deo enim non placet vllus cultus, quem ipse non instituit, aut certè, cui non dederit testimonium verbo suo.

At contrā; Nam aut requiritur, vt in particulari, & expressè Deus approbauerit cultum, aut sufficit si in genere, & in virtute probauerit. Non potest dici primum, Deo videlicet non placere cultum, quem ipse in particulari expressè non probauerit. Nam sine dubio placuit illi cultus Abel, qui obtulit de adipibus gregis sui, Genes. 4. & Hebr. 11. & tamen hoc Deus non præseperat: & similiter placuit cultus Iacob, qui crexit lapidem in titulum, Genes. 28. & cultus B. Virginis, quæ vouit perpetuam virginitatem, quam Deus nusquam imperauerat: ergo fatis erit, si in genere Deus aliquid commendauerit. Et hoc fatetur Calvinus. Nam lib. 4. Instit. cap. 10. §. 30. probare volens geniculationem in oratione esse bonam, immò & diuinam, adfert illud testimonium Apostoli, 1. Cor. 14. *Omnia honestè, & secundum ordinem fiant in vobis;* ac dicit, geniculationem esse bonam, & diuinam, quia in genere indicatur à Paulo in illo decore, quod præscribit in oratione. At hoc modo omnes nostræ cæremoniæ sunt bonæ, & diuinæ: nam indicantur in genere à Deo, & probantur multis modis. PRIMO, in hoc ipso testimonio Pauli non magis includitur geniculatio, quam cereorum accensio, & sacræ vestes, & alia id genus. SECUNDO, cùm Deus iubet obediri præpositis, in genere iubet seruari omnes leges Ecclesiasticas; quarum non pauce sunt de cæremoniis. DENIQUE, Deus est auctor omnium virtutū; nam Sap. 8. dicitur de diuina Sapientia: *Sobrietatem, & prudentiam docet, & iustitiam, & virtutem, quibus nihil est in vita utilius hominibus.* vbi enumerantur quatuor virtutes Cardinales, ad quas omnes aliæ reducuntur. Deus ergo docet, & commendat religionem, quæ est pars iustitiæ, & proinde cultum externum, qui est pars quædam religionis.

Sexta propositio: *Sapientissimè institutum est, vt in Ecclesia Latina, Latine Sacramenta administrentur.* NOTA PRIMO; Cùm de lingua, qua Sacramenta ministrari debent, agitur, debere excipi Matrimonium. Quia enim Matrimonium consistit in consensu mutuo, necessariò requiruntur verba, vel nutus, qui ab vtraque parte intelligantur. Et similiter Confessio peccatorum debet fieri lingua vtrique nota: licet Confessio non tam sit Sacramentum, quàm Sacramenti materia.

Nota SECUNDO; Non esse de iure diuino, qua lingua Sacramen-

cramenta ministrantur, neque id ad essentiam Sacramento-
rum pertinere: tam enim valebit Baptismus, si ministretur
Latinè, quàm si Italicè, vel alia lingua: tamen ob multas, eas-
que grauissimas causas, visum est Ecclesiæ, & ipsi Spiritui san-
cto, qui eam regit, vt Sacramenta non ministrantur lingua
vulgari, nisi fortè in casu necessitatis.

Nota TERTIO; Nos loqui de Ecclesia Latina: nam in Ec-
clesia Græca rectè faciunt, cùm Græca lingua vtuntur, & in
Ecclesiis Syriæ, cùm vtuntur lingua Chaldaica. Nam requi-
ritur ad ministerium Sacramentorum lingua non vulgaris,
sed quæ tamen non sit omnino incognita, saltem doctis, alio-
qui non inuenirentur pastores, & ministri necessarij. Tales
autem sunt lingua Græca, Chaldaica, & Latina: nulla enim
est vulgaris, & tamen quælibet est communis, & nota peritis
in suis regionibus. Idem ferè dici potest de Arabica, quæ nunc
est communis multis orientalibus Prouincijs, & in ea cele-
brantur officia diuina, sed alia est Arabica vulgaris, alia Ara-
bica, qua vtuntur in sacris.

PROBATVR hæc propositio PRIMO, ex Ecclesiæ antiqua
consuetudine. Ecclesia Latina semper Latinè Sacramenta mi-
nistravit, licet iam diu deserit lingua Latina esse vulgaris. Id
patet ex Isidoro, Alcuino, Amalario, Rabano, Strabone, Mi-
crologo, Ruperto, Thoma VValdensi, qui scripserunt de di-
uinis officijs in Hispania, Gallia, Germania, Italia, Anglia,
quo tempore lingua Latina nusquam erat vulgaris, & aper-
tissimè docent, lingua Latina Sacramenta ministrari solita.
Describunt enim Latinè totum ritum, & formalia verba, qui-
bus vti oportet. Præterea in Sacramentis ministrandis sem-
per leguntur aliquæ partes diuinæ Scripturæ, & maximè apud
aduersarios: at non exstabant tunc Scripturæ, nisi Hebraicè,
Græcè, & Latinè, vt patet ex Beda lib. i. hist. Gentis suæ, cap. i.
vbi dicit, in Anglia sua ætate fuisse quatuor linguas vulgares,
sed Latinam fuisse communem omnibus ratione Scriptura-
rum. Rabanus quoque lib. 3. de Institut. Clericorum, cap. 8. di-
cit, non exstitisse sua ætate, nisi in his tribus linguis diuinas
litteras. Denique non proferent aduersarij editionem Germa-
nicam, vel Gallicam, vel etiam Hispanicam, aut Italicam
Scripturarum, nisi à paucis annis factam. Possent obicere
editionem Gothicam, quam VVlphilas Episcopus Gothorum
X 1 fecisse

324 *Cap. XXXI. De effectu Sacram. Lib. II.*

fecisse dicitur in Tripartita histor. lib. 8. cap. 13. & apud Socratem lib. 4. cap. 27. Sed Episcopus ille non prius id fecit, quàm Arianus cum toto suo populo esse cœpit. ADDE vltimò duo exempla, quæ apertè indicant olim non fuisse vsum linguæ vulgaris in Sacramentorum celebratione. VNUM est Moruorum, qui vt est apud Æneam Syluium de origine Bohemorum, cap. 13. impetrârunt à Pontifice Romano, vt possent officia diuina celebrare lingua Sclauonica. ALTERVM Bohemorum, quibus idem petentibus, negauit Gregorius VII. vt est in 7. lib. epistolarum eius. At si fuisset vsus communis tunc linguæ vulgaris, non petiissent hanc licentiam.

SECUNDO probatur ratione. Nam nulla est necessitas, quæ cogat lingua vulgari Sacramenta ministrari, & contrà multa sunt incommoda, si id fiat. Non esse vllam necessitatem probatur. Nam si vlla esset necessitas, ea maximè, vt intelligant id quod dicitur, qui Sacramenta percipiunt: at hæc non est vera necessitas. Nam verba Sacramentorum aut diriguntur ad elementa, vt consecratio Eucharistiæ, benedictio aquæ, & olei; elementa autem nullam linguam intelligunt: aut diriguntur ad Deum, vt formæ verborum deprecatoriæ, qualis est in extrema vnctione. Deus autem omnes linguas intelligit: aut diriguntur ad personas; sed consecrandas, vel absoluendas, non autem instruendas, & docendas, vt in Baptismo, & Absolutione, & proinde per accidens est, si persona intelligat. Cuius signum est, quia verissimè, & efficacissimè baptizantur, & reconciliantur etiam ij, qui non vtuntur ratione, vt patet in Baptismo infantium, & in Reconciliatione agrotorum, qui sunt à sensibus alienati. quos posse reconciliari, vt etiam baptizari, si Baptismo careant, docet Augustinus lib. 1. de adulterinis coniugiis, cap. 26. & 28. & Concilium IV. Carthaginense, can. 76. & Leo I. epist. 91. ad Theodorum. Adde, quod nulli ferè sunt in Ecclesia Latina adultitiam rudes, qui non intelligant verba Sacramentorum, licet Latina, aut certè non intelligant in genere per ea verba sibi tale, aut tale Sacramentum ministrari.

Esse autem incommodum, si vtamur lingua vulgari, patet PRIMO, quia impeditur commercium Ecclesiarum; non enim poterunt conuenire in Ecclesiis Germanorum, Anglorum, Polonorum, Itali, Galli, Hispani, neque contrà. Quod multum

multum nocet vnitati, & communicationi, quæ deberet esse inter membra vnius corporis. Et præterea cogentur Christiani extra suas regiones carere diuinis officiis.

SECVNDO, Sacramenta requirunt maiestatem, & reuerentiam quandam, quæ certè melius conseruatur, si vtamur lingua non vulgari, & communi. Quomodo enim æquum est vt in Sacramentis ministrandis vtamur alia domo, aliis vestibulis, aliis instrumentis, quàm ordinariis, & quotidianis: ita par esse videtur, vt vtamur alia lingua. Nec tamen somniamus, vt putat Kemnitius, linguam Latinam esse magis sacram, quàm sint ceteræ, sed hoc ipso dicimus eam habere plus venerationis, quod non est vulgaris.

TERTIO expedit, vt verba Sacramentorum conceptis verbis, & eodem modo ab omnibus proferantur, vt periculum caueatur mutationis, vel deprauationis. Id autem facillimè seruabitur, si eadem lingua omnes vtantur; difficillimè, si diuersis.

QUARTO, si lingua vulgari Sacramenta ministrentur, aperietur porta latissima ignorantie: contenti enim erunt ministri, si sciant legere. Itaque paulatim obliuiscuntur linguam Latinam, atque ita non legent Patres, & proinde non intelligunt Scripturas.

CAPVT XXXII.

Soluuntur obiectiones contra caeremonias.

IOANNES Calvinus lib. 4. Instit. cap. 10. multa obicit contra caeremonias, quæ ordine refellenda sunt. PRIMVM argumentum, §. 2. *Apostolus I. Corinth. 7. ne vna quidem in re laqueum iniicere ausus est; neq; id nulla causa. Prospiciebat enim quantum vultus infligeretur conscientis, si earum necessitas illis imponeretur, quarum relictæ esset à Domino libertas.*

RESPONDEO; Agit Apostolus eo loco de continentia virginali, quam Dominus non imperauerat, sed consuluerat; & ianè æquum fuerat, vt Apostolus non faceret præceptum, quod Dominus consilium esse voluit. At non eadem est ratio aliarum rerum, de quibus Dominus nihil in particulari præscripsit. Illa enim possunt ab Ecclesia, vel imperari, vel cõsuli,

prout res ipsę requirunt. Vnde idem Apostolus, qui continentiam imperare noluit, multa alia imperauit, & præter cetera 2. Thess. ult. sic ait: *Quòd si quis non obedit verbo nostro per epistolam, hunc notate, & ne commisceamini cum illo, & confundatur.* Et Apostoli Act. 15. imposuerunt Gentibus onus abstinendi à sanguine, & suffocato, & necessarium id esse dicunt; & tamen Dominus liberum id reliquerat.

SECUNDVM argumentum, §. 8. *Apostolus in epistola ad Colossenses docet, non esse de vero Dei cultu petendam ab hominibus doctrinam: quia Dominus fideliter nos, & ad plenum instruit, qualiter sit colendus. Quo hoc demonstrat; primo capite dicit in Evangelio contineri omnem sapientiam, qua perfectus reddatur homo Dei in Christo: initio secundi capitis dicit, omnes thesauros sapientiæ & scientiæ in Christo esse absconditos: inde postea concludit; Caveant fideles, ne per inanem Philosophiam abducantur à grege Christi secundum constitutiones hominum: in fine autem capitis maiore adhuc fiducia damnat omnes εθελογρηκειας, hoc est, fictitios cultus, quos homines sibi ipsis commiscuntur, vel ab aliis accipiunt, & quacunque de cultu Dei tradere precepta ex se audent.*

Respondeo PRIMVM, epistolam illam ad Colossenses, nihil habere contra Ecclesiasticas leges de cæremoniis. Nam vt ex Chrysostomo, Ambrosio, Theodoro, Theophylacto & Oecumenio constat, scripta est contra Simonem Magum, & alios eius temporis hæreticos, & impostores, qui persuadebāt hominibus, per Angelos quosdam oportere accedere ad summum Deum, nec sufficere Christum; & præterea obtrudebant Christianis cæremonias, partim Iudaicas, partim Ethnicas. Hinc igitur in 1. cap. fusè tractat de excellētia Christi, ac dicit, eum esse caput omnium, & super omnia, & Angelos ab ipso, vt auctore pendere. Deinde in 2. cap. monet, ne decipiantur per Philosophiam, videlicet Platonis, & similium, qua utebantur Simoniani, & Gnostici, & simul arguit eos, quod Sabbatha, & neomenias seruent, quę Iudaica sunt, & euacuata per Christum; & quod abstinerent à cibis quibusdam, vt immundis; & quod in religione Angelorum ambularent, putātes per eos tantum ascendi posse ad Deum; quę omnia sunt falsa & superstitiosa.

Deinde RESPONDEO ad singulas propositiones Caluini. PRIMA est; *Christus ad plenum nos instruxit de vero Dei cultu.*

RESPON-

RESPONDEO, id verum esse de instructione generali, non autem de particulari, ut ipse etiam Caluinus fatetur infra, §. 30. ubi agit de geniculatione.

SECUNDA est: *Apostolus docet non esse petendam ab hominibus doctrinam de vero cultu.* RESPONDEO, docet non esse petendam ab hominibus, qui contraria Christo doceant, ut erant Philosophi, & Simoniaci, sed bene esse petendam ab hominibus, qui super Christum ædificant, & secundum eius regulam, & doctrinam docent in particulari, quod ille solum in genere indicauit. Ipse enim ait, Lucæ 10. *Qui vos audit, me audit.*

TERTIA est: *Apostolus damnat omnem cultum humanum, & voluntarium.* RESPONDEO, vocari cultum humanum, & voluntarium apud Paulum eum, qui est merè humanus, & proprio ingenio inuentus, id est, qui non est conformis fidei, & principiis doctrinæ Christi. Quæ autem ab Ecclesia docentur, nō sunt merè humana, cum Deo inspirante instituantur. Vnde 1. Cor. 14. posteaquam instituerat Paulus varios ritus in Ecclesia de ordine prophetandi, & loquendi, & ut mulieres taceant, de quibus Dominus nihil expressè mandauerat, subiungit Apostolus: *Si quis Prophetæ, aut spiritualis est, cognoscat quæ scribo vobis, quia Domini sunt mandata.* ubi vocat mandata Domini, quia eius inspiratione data erant, idè vult à spiritualibus cognosci. Si enim fuissent expressa Domini præcepta, non fuisset opus spiritu ad ea cognoscenda.

Argumentū TERTIVM, §. 9. *Apostolus Gal. 3. non patitur illo modo, ut fidelium conscientia in seruitutem redigantur. Non ergo licet instituire caremonias, quæ obligent in conscientia.*

RESPONDEO, loquitur Paulus de seruitute Iudaica, qua seruierant illi sub antiqua lege, nō autem de quauis obedientia legis. Nam alioqui idem Apostolus, Rom. 13. docet, obediendum potestati: *Non solum propter iram, sed etiam propter conscientiam.* Vbi NOTANDVM est, legem veterem dici iugum seruitutis, non quia obligabat in conscientia; id enim est commune omni veræ legi) sed quia difficillima, & laboriosissima erat, & non habebat secum annexā gratiā, qua impleri posset, amore iustitiæ: vnde vel nō implebatur, vel implebatur timore pœnæ, (si qui enim amore iustitiæ illā implebant, quales Patriarchas, & Prophetas, & multos alios fuisse negari nō potest;

id non ex lege, sed ex gratia noui Testamenti habebant) & modo premebat, & grauabat more grauissimi iugi. Atque ab hoc iugo deterret Apostolus Galatas. Illi enim cum circumcidi vellent, excidebant à gratia Christi, & simul obligabant se ad omnem legem seruandam: quod erat prorsus redire ad statum veteris Testamenti. Itaque Calvinus pessima fide Scripturas tractat, dum eas detorquet à vero sensu ad suam hæresim comprobandam.

Argumentum QVARTVM, §. 10. & 15. *Dominus, Matth. 15. reprehendit traditiones hominum, & idem facit Isaias 29. Frustrà colunt me mandatis hominum.* RESPONDEO, in hoc §. 10. sunt multa impudentissima mendacia, quæ toto sapone Geneuensi nunquam elui possent: vt, quod Catholici interdiciant coniugium, & concedant scorta; quod grauius iudicent, si quis die Veneris modico carnis gustu linguam infecerit, quàm si omnibus diebus totum corpus scortando fœdauerit, &c. Ad loca Scripturæ, quæ etiam passim afferuntur à Philippo, Brentio, Kemnitio, & aliis, dico Dominum tria reprehendere solitum in cæremoniis Iudaicis. PRIMO, quod quædam pugnarent cum mandatis Dei; vt erant illa Matth. 15. & Marci 7. vt filij donarent Sacerdotibus, quæ necessaria fuissent parentibus. SECUNDO, quod multa ex Iudaicis traditionibus Phariseorum inanes essent, & inutiles prorsus, vt lauare toties manus. Atque hæc duo genera cæremoniarum Dominus vocat mandata hominum, quod nihil haberent nisi humanum. TERTIO, quod quasdam alias bonas, & utiles seruarent, sed peccarēt in modo, constituentes in eis summam religionis, & pluris istas facientes, quàm diuina mandata; & de his loquitur Dominus, Matthæi 23. nec vocat eas humanas traditiones, sed dicit: *Hæc oportuit facere, & illa non omittere.* Cæremoniæ autem Christianæ ab Ecclesia approbatæ, non sunt primi, aut secundi generis, nec aduersarij adhuc protulerunt argumenta, sed sola mendacia, ad probandum contrarium. Quod si qui sunt inter Catholicos rudiores, qui pluris faciant cæremonias, quàm grauiora mandata, eos corrigendos putamus. Non enim probamus, quid quid homines faciūt, alioqui multa peccata approbaremus: sed id, quod facere debent secundum sanam doctrinam Ecclesiæ.

QVINTVM argumentum, §. 12. *Romanenses partim ex Gentilium deliriis sibi desumpserunt exemplum, partim simiarum more temerè imitati sunt veteres Iudaicos ritus, qui nihilo magis ad nos pertinebant, quàm pecudè Victimæ.* RESPONDEO PRIMVM, idem argumentum fecisse olim Manichæos apud Augustinum, lib. 20. contra Faust. cap. 4. & Vigilantium apud Hieronymum, in lib. contra Vigilant. quod ad Gentilium imitationem attinet. Itaque agnoscere debet Calvinus, à quibus maioribus descenderit. SECUNDO dico, si argumentum aliquid valeret, deberet etiam tolli Baptismus, & cœna Domini; nam etiam Gentiles utebantur Baptismo, cùm initiarent suos Mithræ sacris; & Sacramentum etiam panis celebrabant, ut Tertullianus refert in libro de præscriptionibus. Iudæi quoque frequentissimè utebantur expiationibus per aquam, nec eis deerant panes propositionis. Dico TERTIO, non debere mirum videri, si nostræ cæremoniæ habent aliquam similitudinem cum Iudaicis; nam erant illæ figuræ rerum nostrarum, ut I. Corinth. 10. legimus. Eadem ratione nō debet esse mirum si interdum nostræ similes sunt ritibus Gentilium. Diabolus enim, qui semper simia Dei esse voluit, imitari conatus est Iudaicos ritus à Deo institutos, ut loco citato Tertullianus notat, quos rerum nostrarum figuras fuisse diximus. Dico QUARTO, licet in externo symbolo sit aliqua similitudo inter nostros ritus, & ritus Gentilium, & Iudæorū: absolute tamen maximum esse discrimen. Nam à fine, & intentione sumunt externæ actiones speciem suam. Ritus Gentilium fiebant ad cultum Dæmoniorum: nostri fiunt ad colendum verum Deum; ideò tantum interest inter illos & nostros, quantum inter sacrum & sacrilegium; quantum inter pietatem & impietatem, & quantum inter Deum & Diabolum. Nam etiam sacrificia erant eadem Gentilium, & Iudæorum, & tamen erant illa idololatræ, ista piæ, & religiosæ. Et hoc modo respondent Hieronymus Vigilantio, & Augustinus Manichæis, locis citatis. Ritus autem Iudaici boni erant, sed Christum venturum prænunciantes; nostri item sunt boni, sed ab illis diuersi, quia partim sunt in memoriam rerum præteritarum, partim ad significandam gloriam futuram.

SEXTVM argumentum, §. 13. sumitur ex epistola Augustini 119. cap. 19. qui conqueritur, quòd multitudine cæremoni-

niarum ita aliqui Ecclesiam onerauerint, vt tolerabilior sit conditio Iudæorum. **R**ESPONDEO, **A**VGUSTINVS loquitur de cæremoniis, quas priuati homines, & maximè mulierculæ sibi ipsis imponunt. Nam idem Augustinus ibidem loquens de cæremoniis superuacaneis, sic ait: *Omnia talia, quæ neque sanctarum Scripturarum auctoritatibus continentur, neque in Conciliis Episcoporum statuta inueniuntur, neque consuetudine Ecclesiæ vniuersæ roborata sunt, sed diuersorum locorum, diuersis moribus innumerabiliter variantur, rescanda existimo.*

SEPTIMUM argumentum, §. 14. *Deus hoc discrimen esse voluit inter nos & Iudæos, quod illos & pueros docuit per signa sensibilia, nos & viros, simplicius, sine talibus signis. Id patet ex cap. 4. Ioannis, ubi Dominus ait: Venit hora, qua veri adoratores in spiritu, & Veritate adorabunt Patrem. Et Galat. 4. Apostolus comparat Iudæos paruulis sub pedagogo degentibus.* Idem argumentum facit Kemnitius, pag. 166. vbi dicit, vmbra, & figuras esse proprias Testamenti veteris, nos autem in noua lege luce verbi Dei admoneri, non vmbreis. Similia etiam habet Brentius in Confessione VVirtembergensi, cap. ultimo, quod est de cæremoniis. **R**ESPONDEO, discrimen inter Iudæos, & Christianos, quod ad cæremonias attinet, duobus modis intelligi posse, **V**NO, vt illi solas habuerint cæremonias externas, nos autem solam lucem verbi, & spiritualem, ac simplicem veritatem. Et hoc videntur sonare verba aduersariorum, ac præsertim Kemnitij: sed id manifestè falsum est. Nam Iudæi præter cæremonias habuerunt etiam lucem verbi; vnde est illud Psalm. 118. *Lucerna pedibus meis Verbum tuum.* Nec solum ab eis Deus cultum externum, sed etiam internum requirebat. Nam Isaïæ 29. Iudæos reprehendit Deus, cum ait: *Populus hic labiis me honorat, cor autem eorum longè est à me.* Et contrà Christiani, præter lucem verbi habent etiam Sacramenta sensibilia, quæ sunt vmbra, & figuræ rerum præteritarum, & futurarum. Et sicut non repugnant nouo Testamento Sacramenta externa, & sensibilia, vt notum est; ita non repugnant aliæ cæremoniæ. Ecclesiæ enim Christiana, licet versetur in magna luce respectu synagogæ, tamen versatur etiam in vmbra respectu cœlestis Hierusalems. Nam per fidem, quæ obscura est, ambulamus, &

non

non per speciem. ALTERO modo potest intelligi discrimen illud, quod cultus Iudaicus, quatenus Iudaicus, id est, veteris Testamenti, erat principaliter externus, & corporalis; cultus Christianus, id est, noui Testamenti, est principaliter internus, & spiritualis. Et hoc est verissimum. Nam cultus internus, & spiritualis à spiritu fidei, & charitatis procedit, qui spiritus est ipsa gratia noui Testamenti, & ex lege veteri nullo modo haberi potest. Vnde Paulus 2. Corinth. 3. vetus Testamentum vocat literam, nouum vocat spiritum. Et Ioan. 1. illud dicitur lex, hoc gratia. Denique Ioan. 4. illud: *In spiritu, & Veritate*, significat (vt exponunt Chrysostomus, Cyrillus, & Euthymius) cultum Christianum esse in spiritu, vt opponitur Iudaico, qui erat corporalis, & esse in veritate, vt opponitur eidem Iudaico, qui in vmbribus, & figuris consistebat. Quamuis non malè etiam Theophylactus, & beatus Thomas in commentario eiusdem loci illud: *In spiritu*, opponant Iudaico cultui, qui erat corporalis, illud: *In Veritate*, opponant cultui Samaritanorum, qui erat falsitati, & errori admixtus. Vnde paulò antè Dominus dixerat: *Neque in monte hoc*, id est, Garizim, vbi Samaritani adorabant. *Neque in Hierosolymis adorabitis Patrem*, ac si diceret; Non coletis Deum deinceps cultu Samaritanorum falso, neque cultu Iudaico, præcipuè corporali, sed cultu Christiano, qui erit in spiritu, & veritate, id est, spiritualis, & purus ab omni errore.

Est tamen OBSERVANDUM, licet cultus Iudaicus, vt veteris Testamenti, fuerit corporalis, tamen non placuisse Deo sine spirituali, & idè Deum ab eis quæsiuisse cultum etiam spiritualem, vt ostendimus ex Isaia 29. Sed qui eum præstabant, id non ex veteri Testamento, sed ex nouo habebant; ad quod iam tunc pertinere incipiebant. Sicut etiam notum est, timorem esse veteris Testamenti proprium, & amorem noui: & tamen Deus à Iudæis petebat, vt ex toto corde diligerent, & verè id sancti illius temporis præstabant, non ex vi Testamenti veteris, sed ex gratia noui. Pari ratione, licet cultus Christianus sit principaliter spiritualis, tamen sine corporali esse non potest in hac peregrinatione, & idè Sacramenta, & cæremonias alias admittit, quæ cultui spirituali deserviant.

OCTAVVM argumentum, §. 15. *Quidquid commendationis habent opera, id totum habent obedientia intuitu, quam solum Deus respicit, & testatur per Prophetam: Non praecepi de sacrificiis, & victimis, sed tantum & audiendo audiatis vocem meam.* Ierem. 7. & 1. Regum 11. *Nunquid vult Deus sacrificium, & non potius, & obediatur voci Domini? non ergo caeremonia, quas Deus non instituit, ipsi placere, aut meritoria esse possunt.* Confirmat ibidem argumentum suum, quia caeremonia nostrae non solum non sunt meritoriae, sed nec utiles, cum vix ab ullo intelligantur. RESPONDEO; Antecedens falsum esse, & contra apertissimas Scripturas. Nam Deus placuit sacrificium Abel, Hebrae. 11. quod tamen Deus non imperauerat. Et 1. Corinth. 7. *Qui non nubit, melius facit.* Et ibidem de vidua: *Beator erit, si sic permanserit.* & tamen ibidem asserit, non esse praeceptum, non nubere, etiam secundò. Et 1. Corinth. 9. contendit sibi fuisse licitum viuere de bonis eorum, quibus praedicabat, & tamen se maluisse viuere ex proprio labore, ut maiorem mercedem haberet; id enim significant illa verba: *Melius est mihi mori, quam & gloriam meam quis euacuet.* Porro Scripturae illae anteposunt obedientiam sacrificiis. Sed non ideo licet concludere; Ergo sacrificia non imperata nihil merebantur, modò cum fide, & deuotione offerrentur: cum còstet ex Scripturis contrarium, ut iam ostendimus. Ad confirmationem RESPONDEO, caeremonias Ecclesiae facillimè intelligi saltem in genere, ut patet, si quis discurret per caeremonias à persona, à loco, à tempore, à rebus sumptas. Quod si aliqua caeremonia non ab omnibus intelligantur, ut est multitudo vestium in Missa, & signorum, tamen non carent utilitate, etiam apud rudissimos, cum sine dubio concilient venerationem rebus sacris. Certè Iudaei parum admodum intelligebant, & tamen non frustra eas acceperunt.

NONVM argumentum, §. 17. *Annón illa semel Ecclesia dicta lex aeterna manet? Quod praecepit tibi, hoc obseruabis, & facias. Non addes quidquam, nec detrahes.* Et Prouerb. 30. *Non addas ad verbum Domini, neque minuas ex eo, ne te forte arguat, inueniarisq; mendax.* RESPONDEO; Non prohibet Dominus in his locis quamlibet additionem. Nam siue per verbum, intelligantur libri sacri, siue praecepta moralia, aut iudicia-

iudicialia, aut cæremonialia, semper inuenimus factam fuisse additionem. Nam post Deuteronomium, vbi habetur illa prohibitio additionis ad verba Domini, scripti sunt omnes alij libri sacri, tum historici, tum prophetales, & totum nouum Testamentum. Item multa sunt moralia præcepta in Prophetis, & in libris Salomonis, quæ videntur addita Pentateucho: & Dauid addidit iudiciale præceptum, vt æqualiter diuiderent prædam in bello, qui pugnabant, & qui sarcinas custodiebant, 1. Regum 30. Addiderunt etiam posteriores Iudæi cæremoniales leges de nouis festis diebus, Ester 9. Iudith vltimo. & 1. Machab. 4. Prohibet igitur Dominus additionem corruptentem; & idem est: *Non addes, nec minuas*, ac si diceret; Intègrè, & perfectè obserua, quod ego præcipio. Id patet ex ratione, quæ redditur, Prouerb. 30. *Ne forte arguas te, & inueniaris mendax*. Non enim potest dici mendax, & falsarius, qui instituit nouam cæremoniam, modò illa nihil officiat cæremoniis Dei; sed ille dicitur mendax, & falsarius, qui corrumpit Dei verba, aut præcepta. Potest autem duobus modis fieri ista corruptio. Vno modo, si quis ipsis Dei verbis, aut præceptis aliquid addat, vel minuat, quo illa corrumpantur; vt si quis in sacrificiis Christi offerret panem sine vino, aut panem, & vinum, & mel. Alio modo, si quis vendicaret pro Dei verbo librum non Canonicum, aut pro Sacramento aliquam cæremoniam à se inuentam: aut contralibrum verè Canonicum, aut verum Sacramentum detraheret de numero librorum sacrorum, aut Sacramentorum; quod peccatum hæretici committunt, cùm multos sacros libros negant esse Canonicos, & quinque Sacramenta tollunt de numero Sacramentorum. Idem videmus in monetarum corruptione: illi enim dicuntur falsarij, qui vel ipsas monetas corrumpunt, addendo stannum argento, aut minuendo ipsum argentum; vel qui monetas à se cufas obtrudunt pro moneta Principis. Nihil autem horum inuenient in cæremoniis Ecclesiæ.

DECI-MVM argumentum, §. 23. sumit Calvinus à tribus exemplis diuinæ Scripturæ, 4. Regum 17. Qui incolebant Samariam à feris discerpti dicuntur, quòd illi nouis cæremoniis Deum colerent, quas Deus non instituerat, 4. Regum 16. Reprehenditur Achaz, quòd nouum altare posuerit in templo,

plo, quod quidem ad ornatum templi videri poterat: *Et rati-
men videmus*, inquit Calvinus, *Et Spiritus audaciam illam
detestetur, non alia de causa, nisi quod hominum inuenta in
Dei cultu, impura sunt corruptela.* 4. Reg. 21. *Aggravatur*, in-
quit Calvinus, *hac circumstantia crimen Manasse, quod alta-
re nouum exstruxerit in Hierusalem.*


RESPONDEO, in his omnibus exemplis more suo Calui-
num mala fide vti. Nam 4. Regum 17. non arguuntur Sama-
ritani illi, quod nouis cæremoniis Deum colerent, sed quod
initio non timerent Dominum, neq; colerent, quippe Gen-
tiles erant, nec sciebant legem Dei; deinde autem edocti le-
gem Dei, simul Deum colere incoepissent, & sua idola. Et 4.
Regum 16. Achaz reprehenditur, non quod nouum altare in
templo exstruxerit, sed quod iusserit fieri in templo Domini
altare nouum ad similitudinem altaris idolorum, quod erat
in Damasco, & remouerit altare Domini de loco suo, vt in o-
ptimo loco constitueret altare illud idololatricum. Deni-
que 4. Regum 21. Manasses non solum nouum altare in tem-
plo posuit, sed altare, vbi sacrificaretur idolis. Sic enim Scri-
ptura loquitur: *Exstruxit altaria &niuersa militia cali in
duobus atrijs templi Domini.* Et infra: *Posuit quoque idolum
luci, quem fecerat in templo Domini.* Alioqui enim nouum al-
tare erigere in templo Domini, nullum crimen fuisset. Nam
3. Regum 8. legimus, Salomonem iussisse mediam partem a-
trij sanctificari ad holocausta offerenda, quoniam altare æ-
neum, in quo offerri debuissent, non erat capax tantæ multi-
tudinis victimarum: obtulit enim tum Salomon viginti duo
millia boum, & centum viginti millia ouium. Atque hæc ex
Caluino. Simili fide Scripturas tractat Melanchthon. Nam
in Apologia Confessionis Augustanæ, artic. 15. præter alia,
profert hæc argumenta. PRIMO, Ezech. 20. *In preceptis Pa-
trum vestrorum nolite incedere: Ergo non licet instituire no-
uos cultus sine Dei mandato.* At loquitur Ezechiel de Patri-
bus idololatriis: nam alioqui Scriptura dicit, Prouerb. 22. *Ne
transgrediaris terminos, quos posuerunt Patres tui.* Item SE-
CVNDO argumentatur Philippus: *Si licet hominibus institue-
re cultus; iam omnium Gentium cultus erunt approbandi, &
illi etiam quos instituit Ieroboam.* Egregiè sanè, quasi verò li-
ceat condere legem iniustam, si licet condere legem nouam.

TERTIO

TERTIO addit, Daniel. cap. II. *Significat novos cultus humanos ipsam formam Antichristi fore. Sic enim inquit; Deum Maosim in loco suo coler, & Deum, quem non nouerunt Patres eorum. Et hoc præclarum est argumentum, quasi idem sit colere Deum verum nouo cultu, & colere nouum Deum, id est, falsum, & fictitium Deum.*

Finis librorum de Sacramentis in genere.

Ad honorem DEI.



ERRATA.

Fol. 18. versu 14. inutiliter. fol. 80. v. II. Catechumenos.
fol. 95. v. 9. pronuntiat. fol. 99. v. 22. apponit.



[Faint, illegible text, likely bleed-through from the reverse side of the page.]





SECUNDI TOMI
SECUNDA
CONTROVER-
SIA GENERALIS,

DE BAPTISMO ET
CONFIRMATIONE,

DVOBVS LIBRIS
EXPLICATA.

A R. P. ROBERTO BEL-
LARMINO POLITIANO,
SOCIETATIS 7^{ESV}.





INDEX

LIBRORVM ET
CAPITVM.

L I B E R P R I M V S,

De Sacramento Baptismi.

*Argumentum, & partitio disputationis de
Baptismo.*

- CAP. I. De nomine, definitione, & partibus Baptismi.*
II. De materia Baptismi.
III. De forma Baptismi.
IV. De necessitate & institutione Baptismi.
V. Quo tēpore cōperit Baptismus esse necessarius.
VI. De Baptismo sanguinis & flaminis. —
VII. De ministro Baptismi.
VIII. De Baptismo infantium, contra Anabapti- —
stas.
IX. Soluuntur obiectiones Anabaptistarum.
X. Quid sentiant aduersarij de fide, quæ requiri-
tur in Baptismo paruulorum. —
XI. Declaratur quæ fides requiratur in Baptismo
paruulorum, & refelluntur errores aduer-
sariorum.
XII. Qui sint veri, aut falsi effectus Baptismi.
XIII. Quod Baptismus verè tollat peccatum. —

- XIV. *Quòd Baptismus non faciat homines impeccabiles.*
- XV. *Per Baptismum non liberari homines à seruāda lege Dei.*
- XVI. *Per Baptismum non liberari homines ab obligatione legis Ecclesiastica.*
- XVII. *Per Baptismum non fieri irrita omnia vota.*
- XVIII. *Sola memoria Baptismi non posse dimitti peccata, quæ sunt post Baptismum.*
- XIX. *De Baptismo Ioannis, qui fuerint errores.*
- XX. *Baptismum Ioannis non fuisse Sacramentum idem cum Baptismo Christi.*
- XXI. *Baptismum Ioannis nō habuisse eandem vim, et efficaciam, quam habet Baptismus Christi.*
- XXII. *Quòd post Baptismum Ioannis necessariò percipiendus erat Christi Baptismus.*
- XXIII. *Soluuntur obiectiones.*
- XXIV. *De caeremoniis Baptismi.*
- XXV. *Ceremoniæ ante Baptismum sunt duodecim.*
- XXVI. *De caeremoniis, quæ Baptismum comitantur.*
- XXVII. *De caeremoniis, quæ sequuntur Baptismum.*

LIBER SECVNDVS,
De Sacramento Confirmationis.

- CAP. I. *De erroribus, & mēdaciis circa Sacramentum Confirmationis.*
- II. *Probatur ex Scriptura Sacramentum Confirmationis.*
- III. *Probatur veritas testimoniis summorum Pontificum.*

IV. *Idem*

- IV. *Idem probatur ex Conciliis.*
V. *Idem probatur ex Patribus Græcis.*
VI. *Idem probatur ex Latinis.*
VII. *Diluuntur solutiones aduersariorum ad Patrum testimonia, quæ sunt etiã argumenta ipsorum contra veritatem.*
VIII. *De materia Sacramenti Confirmationis.*
IX. *Soluuntur obiectiones contra materiam Confirmationis.*
X. *De forma Sacramenti Confirmationis.*
XI. *De effectu huius Sacramenti.*
XII. *De ministro huius Sacramenti.*
XIII. *De ceremoniis Confirmationis.*





DE SACRAMEN- TO BAPTISMI.

LIBER VNICVS.

Argumentum, & partitio dispu-
tationis de Baptismo.



DE BAPTISMO, QVAE DISPV-
tari solent, ad nouem capita reuocari
possunt. PRIMVM est, de nomine,
& definitione. SEC VNDVM, de
materia. TERTIVM, de forma.
QVARTVM, de necessitate. QVIN-
TVM, de ministro. SEXTVM, de suscipientibus. SEPTI-
MVM, de effectis. OCTAVVM, de comparatione Baptis-
mi Christi, & Ioannis: precipua enim comparatio circa ef-
fecta versatur. NONVM, de ritu, & caeremoniis. In quibus
omnibus controuersis explicandis, duos precipue fines in-
tuebimur. VNVM, vt Canones Concilij Tridentini de Ba-
ptismo, qui habentur in 7. sessione, defendamus contra Cal-
uini Antidotũ, et Examen Kemnitij. ALTERVM, vt preci-
puorũ huius temporis hæreticorum sententias, & argumẽta
benè intelligamus, & efficaciter, Deo adiunãte refellamus.

CAPVT

CAPVT PRIMVM.

De nomine, definitione, & partibus Baptismi.

DE NOMINE Baptismi nulla dissensio est: vtuntur enim omnes hac voce, quod in Scripturis passim habeatur. Significat autē βαπτισμα proprie immersionem. Ordinariē enim Baptismus fit per mersionem, idq; ad Christi sepulturam repræsentandam, iuxta illud Coloss. 2. *Consepulti ei per Baptismum.* Habet autem apud Patres alia multa nomina, de quibus vide præcipuē Clementem, lib. I. Pædagogi, cap. 6. Nazianzenum oratione de Baptismo, & Chrysostomum, homil. ad baptizatos; qui vocant Baptismū illuminationem, gratiam, donum, sigillum, mysterium, expurgationem, & alia quædam: sed præcipuum nomen, & communissimum est φωτισμός, id est, illuminatio: hoc eī præter tres citatos Patres, vtuntur omnes alij Græci posteriores, & ante eos Dionysius Areopagita de Ecclesiastica hierarchia, cap. 2. immò & ipse Apostolus, Hebr. 6. cū ait: *Impossibile est eos, qui semel sunt illuminati, &c.* Et cap. 10. *Rememoramini pristinos dies, in quibus illuminati magnum certamen sustinistis passionum.* Vnde etiam Cyrillus Hierosolymitanus Catecheses suas de Baptismo, vocat Catecheses illuminatorum. Dicitur autem Baptismus illuminatio, quia in eo infunditur habitus fidei.

Quod autem attinet ad definitionem, S. Thomas, 3. parte q. 66. art. 1. aliquot definitiones adfert. Sed ex Scripturis Catechismus Romanus aptissimē ita definiuit: *Baptismus est Sacramentum regenerationis per aquam in verbo vite.* Quæ definitio partim sumitur ex Ioan. 3. partim ex Paulo ad Ephes. 5. Et quidem PRIMO loco ponitur, *Sacramentum*, quod est genus. DEINDE additur, *regenerationis*, quæ differentia est contrahens genus, & distinguens à Sacramentis veteris legis. TERTIO additur, *per aquam*, quæ est alia differentia, adhuc magis contrahens, & distinguens ab aliis Sacramentis nouæ legis. Et si enim cetera nō dicuntur proprie regenerare, tamen iustificat impium, ac præsertim Pœnitentia: iustificatio autem impij, præsertim hæretici, aut apostatæ, parum

6 Cap. I. De Sacramento Baptismi. Lib. I.

aut nihil differt à regeneratione. Vnde Galat. 4. Paulus, *filii mei, quos iterum parturio*. Sed cùm additur, *per aquam*, iam perspicua differentia est. Non enim reconciliatio pœnitentium est regeneratio per aquam, sed reformatio quædam, & quasi reuocatio ab inferis.

Vbi & illud OBSERVANDUM est, Sacramentum Baptismi non esse ipsam aquam, quæ est res permanēs, sed ablutionem, quæ est res transiens. Itaque Baptismus est Sacramentum regenerationis per aquam, id est, signum externum sanctificans per aquæ asperisionem. DENIQUE additur, *in verbo vitæ*, ut exprimat etiam forma Sacramenti, quæ est præcipua pars essentia.

Philippus in locis, anni LVIII. tit. de sacrificio, ita definit Baptismum: *Baptismus signum est, quo Deus nobiscum agit, & recipit nos in gratiam*. Sed hæc definitio conuenit omni Sacramento, immò etiam ipsi verbo, quod tamen non est Sacramentum.

Calvinus lib. 4. Instit. cap. 15. §. 1. ita definit: *Baptismus est signum initiationis, quo in Ecclesia cooptamur societatem, & Christo insiti inter filios Dei censeamur*. Quæ definitio multa habet vitia. Nam neque est essentialis; cùm nō attingat vllam partem essentia Baptismi; neque explicat effectum, seu finem principalem huius Sacramenti. Nam finis principalis secundum Catholicos, immò secundum Scripturas est iustificare, & regenerare; secundum Calvinum (ut ibidem ipse subiungit) est alere fidem more diplomatis signati, qui certè finis in ea definitione non explicatur, sed solum finis quidam secundarius, qui est testari fidelitatem, quam Deo, & Ecclesiæ debemus, & sic agnosci, ac numerari inter filios Dei.

ADDE, quòd ista definitio conuenit etiam Circumcisioni. Nam Circumcisio erat signum initiationis, quo Iudæi cooptabantur in Ecclesiæ societatem, & Christo inferebantur. Nam etiam si Iudæorum cœtus dicatur Synagoga, quādo distinguitur contra Ecclesiam; tamen absolute Ecclesia erat, & Ecclesia Dei veri, antequam Christum negaret. Ipse etiam Christus, licet non fuerit homo tempore Synagogæ, nisi in vltimis diebus, tamen ut Deus, semper fuit caput totius Ecclesiæ. Immò etiam, ut homo venturus, & passurus, iam tum erat caput, cui per fidem Hebræi coniungebantur, ei que inferebantur. Vnde, 1. Corinth. 10. Iudæi dicuntur in deserto tentasse

tentasse Christum. Et Apocal. 13. dicitur; Agnus occisus ab origine mundi. Eadem etiam definitio verbi Dei prædicato convenire videtur: nam etiam per verbum Dei initiamur, & copramur in Ecclesiam, & Christo inferimur.

CAPVT SECVNDVM.

De materia Baptismi.

DE materia nulla ferè dissensio est, tamen si nō pauci errores de hac re aliquando existerint, vel etiam existant. PRIMVS fuit error Manichæorum, qui teste Augustino, libro de hæres. cap. 46. Baptismum in aqua non putabant adhibendum, quòd videlicet aquam, ut res ceteras corporales, non Deus, sed Diabolus procreasset. Magis verecundi fuerunt Marcionistæ, qui etsi crederent aquam esse opus mali principij, id est, Diaboli, non Dei boni: tamen eam adhibebant in Baptismo ob Christi præceptum. Refert Theodoretus, lib. 1. fabul. hæret. se vidisse senem quendam Marcionistam, qui fatebatur in mysterio aquam adhibendam, & tamen ita illam oderat, ut faciem suam mallet proprio sputo, quàm aqua ablueri, ne videlicet creatore indigere videretur.

SECUNDVS error fuit Seleuci, & Hermiæ, qui aquam ex Baptismo excludebant, idq; ob auctoritatem Scripturarum, quæ ubicunque comparant Baptismum Ioannis cum Christi Baptismo, semper affirmant Ioannē baptizasse in aqua, Christum baptizaturum Spiritu sancto, & igne, Matthæi 3. Luc. 3. Ioan. 1. Marc. 1. Actor. 1. Referunt hunc errorem Philastrius in lib. de hæresibus, & Augustinus de hæresibus, cap. 59.

TERTIVS error ex eodem fundamento fuit Iacobitarum, qui loco aquæ Baptismalis ferro candente imprimebant in frōtibus crucis figuram. Testis est Bernardus Lutzemburgensis in Catalogo hæreticorum.

QUARTVS est Paulicianorum, qui teste Euthymio in 2. parte Panopliæ, titul. 21. pro elemento aquæ in Baptismo illa verba substituunt; Ego sum aqua viva.

QVINTVS error Lutheri est, qui in symplosiacis colloquiis, cap. 17. interrogatus, num deficiente aqua liceat baptizare in lacte, aut ceruisia: primùm respondit, iudicio diuino id esse committendum: deinde addidit, quidquid balnei nomine

8 *Cap. II. De Sacram. Baptismi. Lib. I.*

nuncupari potest, illud esse aptum ad baptizandum. At certe balnea vini, & lactis, nedum ceruissæ fieri posse, nemo dubitauit vnquam.

Aduersus hæc omnia deliramenta statuit Concilium Tridentinum, sess. 7. can. 2. aquam veram, & naturalem requiri ad Baptismum. Ex quo intelligimus duo. PRIMO, nullum liquorem esse materiam Baptismi, qui non sit vera, & naturalis aqua. SECUNDO, omnem veram, & naturalem aquam, quantumuis accidentaliter alteratam, & mutatam, esse materiam idoneam ad Baptismum. Id verò patet ex apertissimis Scripturis. Nam Ioan. 3. dicitur: *Ex aqua, & Spiritu sancto.*

Item ibidem orta est emulatio discipulorum Ioannis, quia videbant Christum baptizare per discipulos suos in aqua, vt etiam ipse Ioannes baptizabat. Actor. 8. *Ecce aqua, quis prohibet me baptizare?* Ephes. 5. *Lauacro aqua in verbo vite.* 1. Cor. 10. Paulus comparat Baptismum mari rubro. 1. Pet. 3. comparat Petrus eundem Baptismum diluuio. Denique etiam Prophetæ expressè prædixerunt Baptismum aquæ, vt Ezechiel cap. 36. *Effundam super vos aquam mundam.* Cur autè aquam Deus elegerit potius, quàm aliud elemētum, causas reddunt auctores adferentes varias aquæ proprietates: quas vide apud S. Thomam 3. part. quæst. 66. art. 3. & Gulielmum Parisiensem in lib. de Sacramentis, cap. de Baptismo.

Neque testimonia à Seleucianis allata concludunt. Nam non docent discrimen esse inter Baptisma Ioannis, & Christi, quod vnum esset in sola aqua, alterū in solo Spiritu, vel igne; sed quod vnum esset in sola aqua, alterum non in sola aqua, sed in aqua, & Spiritu, vt dicitur Ioan. 3. Vnde 1. Ioan. *Hic est, qui venit per aquam, & sanguinem, non in aqua solum, sed in aqua, & sanguine.* Quod autè additur de igne Matt. 3. & Luc. 3. non significat ignem aliquem elementalem, vt stultè putârunt Iacobitæ, sed ignem quendam cœlestem, & diuinum: nam idè coniungitur cum Spiritu sancto. Potest autem ille ignis, vel significare linguas igneas, quæ descenderunt in Apostolos in die Pentecostes, vel ignem Purgatorij, vt Hieronymus docet in caput 3. Matthæi, & Beda in cap. 3. Lucæ, vel etiam ignem diuini iudicii, vt exponit Hilarius canone 2. in Matth. vel denique ignem tribulationis in hac vita, qui nulli baptizato deest, vt exponit auctor operis imperfecti in cap. 3. Matth.

Kemnitius in hunc canonem nihil aliud notat, nisi non esse necessarium, ut aqua exorzizetur, & benedicatur: si aqua vera, & naturalis sufficit. Sed malè id colligit: nam etiamsi ad substantiam Sacramenti non requiratur benedictio aquæ, tamen rectè est instituta, ut infra dicemus.

CAPVT TERTIVM.

De forma Baptismi.

FORMAM Baptismi etsi hoc tempore ferè omnes admittant, quod ad praxim attinet, quæ est singularis Dei prouidentia, ne innumerabiles infantes pereant, tamen fuerunt, & sunt non leues de hac re errores. PRIMVS fuit quorundam, qui ipso tempore Apostolorum baptizabant in nomine trium principio carentium, id est, trium Patrum, vel in nomine trium filiorum, aut trium Paracletorum. Qui error refertur, & damnatur can. 48. aliàs 49. Apostolorum.

SECUNDVS fuit Gnosticorum, qui teste Irenæo lib. I. cap. 18. baptizabât in nomine Ignoti Patris, in veritate Matris omnium, & in nomine descendentis IESV.

TERTIVS fuit Cataphrygum, & Paulianistarum, qui non baptizabant in nomine Patris, & Filij, & Spiritus sancti, ut Innocentius I. testatur in epist. 22. cap. 5. & ideo iterum baptizari iubentur in Concilio Nicæno, canone 19. & Laodicensi, can. 8.

QUARTVS fuit aliquorum Arianorum, qui baptizabant in nomine Patris per Filium in Spiritu sancto. Refert Nicephorus lib. 13. cap. 35. ita baptizare voluisse quendam Episcopum Arianum nomine Deuterium; sed diuino miraculo continuè aqua euanuisse. Alios item Arianos non seruasse veram Baptismi formam patet ex Concilio I. Arelatensi, ubi can. 8. iubentur interrogari Ariani, cum ad Ecclesiam redeunt, sub qua forma verborum à suis baptizati sint: non enim eodem modo omnes baptizabant. Multi quoque eorum Catholicos rebaptizabant, ut Augustinus testatur lib. de hæres. cap. 49.

QVINTVS error fuit quorundam Eunomianorum, qui non baptizabant in nomine trium personarum, sed in Domini mortem, ut refert Socrates lib. 5. cap. 23.

10 Cap. III. De Sacramento Baptismi. Lib. I.

SEXTVS fuit Græcorum, qui aliquando ita adhærebant suæ formæ, qua dicunt, Baptizetur N. seruus Christi, in nomine Patris, & Filij, & Spiritus sancti, vt rebaptizare auderent Latinos baptizatos, illis verbis; Ego te baptizo, &c. Refert, & damnat hunc errorem Concilium Lateranense sub Innocentio III. cap. 4. vbi non damnatur forma baptizandi Græcorum, quæ non differt à nostra, quoad substantiam, vt in Concilio Florentino sess. vlt. declaratum est, sed damnatur Græcorum error, qui nostram formam damnare audebant sine vlla ratione, vel causâ.

SEPTIMVS error est Lutheri, Zvinglij, & Brentij, qui licet forma vtitata vtendum esse doceant; tamen id non putant necessarium ad Baptismi substantiam. Lutherus in lib. de captiu. Babyl. cap. de Baptismo, affirmat Baptismum esse ratum, quibuscunque verbis collatum, modò non in nomine hominis, sed in nomine Domini detur. Immodò addit, etiam si impius minister non der in nomine Domini, tamen esse ratum, si suscipiatur in nomine Domini. Zvinglius in lib. de vera, & falsa religione, cap. de Baptismo sub finem, apertè docet, non esse necessariam vllam certam verborum formam in Baptismo: licet dicat se non vetare, quo minus vtamur sacris verbis iam receptis. Vnde Zvingliani quidam, vt refert Ioannes Eckius homil. 10. de Baptismo, baptizabant in nominibus Patris, & Filij, & Spiritus sancti; qui est manifestus Arianismus. Nomen enim, potestatem, & auctoritatem significat in Scriptura. Marc. vlt. *In nomine meo Dæmonia eiicient.* Ioan. 5. *Ego Veni in nomine Patris mei.* Vt autem est vna Deitas trium personarum, ita vnum nomen, vna virtus, vna auctoritas. Vnde Ambrosius lib. 2. de Sacramentis, cap. 7. & Hieronymus in cap. 4. ad Ephes. notant in Baptismo trinam fieri mersionem, & tamen non dici, In nominibus, sed in nomine Patris, & Filij, & Spiritus sancti. Ioannes Brentius in suo Catechismo, cap. de Baptismo scribit, verum esse Baptismum, si minister post recitatum à Catechumeno Symbolum fidei, ita diceret: *Audiui iam ex te confessionē fidei tue, quod credas in Deum Patrem, Filium, & Spiritum sanctum: in hanc igitur confessionem intingo te in aquam, & hoc signaculo certus sis te esse insertum Christo; & ade in pace.* Monet tamen, vt forma Ecclesiæ vtitata seruetur. Quod quidem benè monuit, alioqui non esset ratum Baptismus.

Præter

Præter hos errores est opinio quædam incommoda multorum Catholicorum, qui putarunt sufficere ad Baptismum, inuocationem vnius personæ diuinæ tantum, ac præsertim Christi. Ita videntur sentire S. Ambrosius lib. 1. de Spiritu sancto, cap. 3. Beda in cap. 10. Actor. qui ipsa verba Ambrosij citat. Bernardus epist. 340. ad Henricum, qui docet, ratum sibi videri Baptismum, quem quidam contulit ex imperitia, In nomine Dei, ac sanctæ & veræ crucis. Item Hugo de S. Victore lib. 2. de Sacramentis, parte 6. cap. 2. & Magister lib. 4. sentent. dist. 3. & deniq; Nicolaus Papa in epist. ad Bulgaros, vt habetur can. A quodam Iudæo, de consecrat. dist. 4. qui nihil quidem definit, sed profert Ambrosij auctoritatem, & eam approbare videtur.

Fundamenta horum auctorum sunt duo. PRIMVM, auctoritas Apostolorum, qui baptizabant in nomine Christi, vt habetur Actor. 8. & 10. & 19. SECVNDVM, quia in qualibet persona diuina implicitè continentur omnes tres. Qui enim dicit Patrem, simul dicit Filium, & Spiritum oris eius; qui dicit Christum, dicit vngentem, id est, Patrem, vnctum, id est, Filium, & vnctionem, id est, Spiritum sanctum; qui dicit Spiritum sanctum, dicit Patrem, & Filium, à quibus ille spiratur. Sed fundamentum præcipuum omnium auctorum post Ambrosium, est ipsius Ambrosij auctoritas; quare si fortè Ambrosius non illud voluerit dicere, quod verba eius sonare videntur, ruit fundamentum præcipuum illius opinionis.

Sed quidquid de hoc sit, certum est, Baptismum, aut absolute, aut sub conditione repetendū, si detur in nomine Christi, aut alterius cuiusvis personæ, sine expressione aliarum, vt rectè docent Theologi omnes grauiores in 4. dist. 3.

Est igitur hæc vera forma Baptismi: *Ego te baptizo in nomine Patris, & Filij, & Spiritus sancti.* Vbi non est de essentia, illa particula, *Ego*, & licet ea non debeat omitti cum præscribatur ab Ecclesia, tamen si omitteretur, Baptismus esset integer, quia satis exprimitur persona ministri in verbo, *Baptizo*.

Porrò hanc esse veram & necessariam formam Baptismi, colligitur ex Euangelio, sed non euidenter ex solo Euangelio, sed cogimur recurrere ad traditionem, & Ecclesiæ declarationem. Quod est NOTANDVM contra Calvinum, & alios hæreticos, qui eandem formam præscribunt in ritu Baptismi, & eadem vtuntur, cum tamen nolint traditiones, sed solam

Scriptu-

Scripturam admittere. In Euāgelio nihil habemus nisi vnum testimonium, Matth. 28. *Euntes, docere omnes Gentes, baptizantes eos in nomine Patris, & Filij, & Spiritus sancti.* Ex quibus verbis, si sola considerentur, non cogimur dicere, Ego te baptizo, sicut non cogimur dicere cū prædicamus, Ego vos doceo; sed videmur satisfacere, si baptizemus, & doceamus, etiam si nō exprimamus verbis nos id facere. Pari ratione non colligitur euidenter ex hoc solo loco, oportere dicere, In nomine Patris, & Filij, & Spiritus sancti: posset enim exponi hic locus, vel de fide Trinitatis, vt baptizemus in fide Trinitatis; ve etiam de auctoritate, id est, vt baptizemus auctoritate à Deo accepta; quemadmodum cū Marci vlt. legimus: *In nomine meo demonia eicient, &c.* Si tamē adiungamus ad hunc locum Euangelij, Ecclesiæ auctoritatem, constabit certissimè, omnia illa verba ad formam Baptismi pertinere.

Nam IN PRIMIS esse dicendum: *Ego baptizo*, vel aliquid eiusmodi, quo exprimatur actio ministri; docet Concilium Florentinum in instructione Armenorum: docet etiam Alexander Papa II. extra de Baptismo, & eius effectu, cap. Si quis puerum: docent omnes catechismi, & rituales libri, etiam antiquissimi. Denique etiam ratio id docet. Nam sola illa verba: *In nomine Patris, & Filij, & Spiritus sancti*, etiam cum ipsa lotionem externam, non determinatè significant id, quod hoc Sacramento significari debet. Nam posset fieri lotio illa ad refrigerandū, aut curandum ab aliquo morbo, & ad id etiam rectè inuocaretur auxilium sanctæ Trinitatis. Itaque addendum est verbum, *Baptizo*, quo ex vsu Ecclesiastico significatur ablutio à sordibus non tam carnis, quàm spiritus.

DEINDE esse exprimendam aliam personam à ministro diuersam; quod facimus per pronomen (*Te*) ac proinde non posse vllum baptizare seipsum; docet præter testimonia iam allata, disertis verbis Innocentius III. extra de Baptismo, & eius effectu, cap. Debitum.

DENIQUE esse exprimendas tres diuinas personas; præter allata testimonia, docent duo summi Pontifices, Pelagius can. Si reuera, & can. Multi sunt, & Zacharias can. In Synodo, de consecr. dist. 4. qui affirmant, Baptismum non esse ratum, si detur in nomine Domini, aut in nomine Christi, nisi discretè exprimantur tres personæ. Idem confirmat traditio omnium Patrum, qui affirmant, Baptismum dari debere in nomine

mine Patris, & Filij, & Spiritus sancti. Vide can. 49. Apostolorum. Dionysium de Eccles. hierar. cap. 2. Iustinum in Apologia 2. Origenem in cap. 6. ad Rom. in illud: *Quicumq; in Christo baptizati sumus*. Vbi etiam dicit, non haberi ratum Baptismum in nomine solius Christi, nisi addantur alia persone. Item Athanasium serm. 3. contra Arianos, parum à medio: vbi dicit, non esse perfectam initiationem, nisi in nomine trium personarum; quod idem habent Basilius lib. de Spiritu sancto, cap. 12. & Didymus lib. 2. de Spiritu sancto, non procul ab initio. Vide etiam Nyssenum in lib. de Baptismo ante medium. Chrysostomum in c. 5. ad Ephes. in illud: *Mundans eam lauacro*. Nazianzenum oratione in sanctum lauacrum prope finem. Damascenum lib. 4. cap. 10. & Theophylactum in cap. vlt. Matth. Præterea ex Latinis Tertullianum lib. contra Praxeam, & lib. de corona militis. Cyprianum in epist. ad Iubaianum. Hilarium libro de Synodis in fine. Ambrosium lib. 2. de Sacramentis, cap. 5. & 7. de iis, qui initiantur mysteriis, cap. 4. Hieronymum in cap. 4. ad Ephes. Siricium in epist. 1. Innocentium epist. 22. Augustinum lib. 6. de Baptismo, cap. 25. Leonem in epist. 4. Fulgentium de incarnatione, & gratia Christi, cap. 11. Gregorium lib. 9. epist. 61.

Neq; illa argumenta quæ posuimus pro eorum opinione, qui putabant Baptismum esse ratum, si in nomine solius Christi daretur, aliquid concludunt. Ad PRIMVM de exemplo Apostolorum, aliqui Scholasticorum respondēt, Apostolos id fecisse ex quadam peculiari Dei dispensatione. Sed, cum neq; in Scriptura, neq; in vlllo Concilio, neq; in Patribus legatur talis dispensatio, solidius respondēt, qui negant Apostolos baptizasse, nisi in nomine Patris, & Filij, & Spiritus sancti; id quod etiā confirmatur ex ca. 19. Act. Nam cum quidam Paulo dixissent: *Neque si Spiritus sanctus est, audiuimus*; subiunxit Paulus: *In quo ergo baptizati estis?* Quibus verbis indicat etiam suo tempore in ipsa forma Baptismi nominari solitum Spiritum sanctum. Et cum certum sit, nunquam datum esse in nomine solius Spiritus sancti, sequitur vt datus sit in nomine trium personarum. ADDE, quod cum in Canonibus Apostolorum damnentur, qui aliter baptizant, quàm in nomine Patris, & Filij, & Spiritus sancti, & antiquissimi Patres, qui vel Apostolos viderūt, vel eorum discipulos, vt Dionysius, & Iustinus, eandem formam Baptismi præscribant, non est vlllo modo credibile, Apostolos aliter baptizasse.

Quod

Quod autem Lucas dicit in Actis, cap. 2. 8. 10. & 19. baptizasse Apostolos, in nomine Domini Iesv: potest intelligi multis modis, nimirum, vt baptizasse dicantur in fide Domini Iesv, vel auctoritate Domini Iesv, vel Baptismo à Christo instituto, vel denique in nomine Domini Iesv, sed non solius, verum adiuncto Patre, & Spiritu sancto. Fortasse enim ad magis commendandum nomen Christi, ita dicebant; Ego te baptizo in nomine Patris, & Filij eius Iesv Christi, & Spiritus sancti.

Et hoc modo videntur mihi intellexisse hæc loca, Hilarius, Basilus, & Fulgentius. Nam Hilarius in libro de Synodis prope finem, enumerat varia loca Scripturæ, quæ videntur inter se pugnare, ni rectè intelligantur: & inter alia ponit hæc loca, quod Apostoli Matth. ult. iussi sint baptizare, in nomine Patris, & Filij, & Spiritus sancti, & tamen in Actis Apostolorum referatur baptizasse in nomine Christi. Et quamvis non explicet Hilarius quomodo hæc intelligenda sint, tamen ex modo loquendi ipsius, & ex aliis similibus locis in speciem pugnantibus, colligitur eum sensisse Apostolos baptizasse in nomine Patris, & Filij, & Spiritus sancti: alioqui, vt ipse dicit, in crimine fuissent, tanquam præuicatores regulæ diuinæ sibi datæ; sed Lucam in Actis id ipsum breuissimè significasse, exprimendo nomen Christi, & non negando nomina aliarum personarum. Fulgentius de incarnatione, & gratia Christi, cap. 11. apertissimè dicit, Apostolos baptizasse, in nomine Patris, & Filij, & Spiritus sancti, & hoc ipsum esse baptizare in nomine Domini Iesv, vt dicitur Actor. 2. vel in morte Christi, vt dicitur Rom. 6. Basilus in lib. de Spiritu sancto, cap. 12. scribit in nomine Filij, intelligi omnes personas, cum Scriptura dicit, Apostolos baptizasse in nomine Christi: proinde Apostolos reuera in nomine Patris, & Filij, & Spiritus sancti baptizasse, non in nomine solius Christi. Vbi vult S. Basilus in vna persona intelligi omnes, quod attinet ad verba S. Lucæ in Actis, non autem quod attinet ad ipsam formam Baptismi. Et hoc etiam modo aliqui volunt loquutū esse Ambrosium, & ex eo Bedam. Nam Ambrosius videtur sequi Basilium, cum eadem testimonia adducat, & de eadē re loquatur, & frequentissimè soleat Basilij sententias suas facere: certè Catechismus Romanus cap. de Baptismo, coniungit in hac re Ambrosium cum Basilio.

Ad SECVNDVM argumentum respondeo, non sufficere in Baptismo implicitam mentionem trium personarum, tum quia Dominus in Euangelio, & omnes Patres explicitam tradunt, tum etiam quia Sacramenta sunt signa externa, & sensibilia; proinde oportet inuocationem trium personarum exterius, & sensibilibiter sonare, nec sufficit, si vnus persone inuocatio exterius sonet, aliarum autem solà mente concipiatur, quod fit, quando implicitè solùm inuocantur.

CAPVT QVARTVM.

De necessitate & institutione Baptismi.

DIXIMVS de causa materiali, & formali, nunc de necessitate dicendum, quæ ad causam finalem pertinere videtur. Ac primum nulla quæstio est, quin Baptismus sit necessarius ad salutem ex diuino Christi mandato. Id enim etiam Calvinus fatetur in Antidoto Concilij, sess. 7. canon. 5. Sed controuersia est, an sit necessarius, ut medium ad salutem, ita ut si quis non baptizetur, pereat, etiam si fortè ob ignorantiam excusetur à præuaricatione præcepti. Ac præcipuè habet locum controuersia in paruulis, qui non sunt capaces præcepti. Tres autem sunt quæstiones. PRIMÀ, an Baptismus sit necessarius. SECVNDÀ, quando cœperit esse necessarius. TERTIÀ, an possit suppleri per materiam, aut pœnitentiam, quæ dicuntur Baptismata, illud sanguinis, hoc flaminis.

De PRIMÀ quæstione fuit olim hæresis Pelagianorum, Baptismum non esse necessarium ad remissionem peccati originalis, sed solùm ad assequutionem regni cœlorum, teste Augustino lib. de hæresibus, cap. 69.

Sed nostri hæretici Pelagianis multò audaciores, non solùm ad remissionem peccati, sed etiam ad regnum cœlorum negant Baptismum esse necessarium. Id in primis negauit Ioannes VViclef, ut testatur Thomas VValdensis tom. 2. cap. 96. Deinde Zvinglius libro de vera, & falsa religione satis apertè negat, Baptismum esse necessarium ad salutem; quod nihil sit nisi externum symbolum. Martinus Bucerus in cap. 3. Matth. idem docet, sed ex alio fundamento, nimirum, quia pueri prædestinati etiam sine Baptismo saluantur, non prædestinati autem, etiam cum Baptismo damnantur. Ioannes Calui-

nus in Antidoto Concilij ad 6. sels. cap. 5. & lib. 4. Institution. cap. 16. §. 24. & 25. docet, paruulos fidelium etiam sine Baptismo esse sanctos, & membra Ecclesiæ, & si moriantur, saluari. Fundamentum eius est, quia putat filiis fidelium non imputari peccatum originis, idque ex vi fœderis Dei facti cum Abraham, Genes. 17. *Ero Deus tuus, & seminis tui*. Nos enim successimus per Christum in Abraham posteritatem. Idem habet Petrus Martyr in cap. 7. 1. ad Corinth. in illa verba: *Alioquin filij vestri immundi essent, nunc autem sancti sunt*. Vbi apertè dicit, filios fidelium saluari sine Baptismo, & profert eadem argumenta, quæ Calvinus. Idem quoque habet Henricus Bullingerus Zvvinglij successor in Tigurina synagoga in eundem locum, 1. Corinth. 7. Hoc tamen videtur interesse inter Bullingerum, & Calvinum; quòd Calvinus solos eos facit sanctos, ante Baptismum, qui nascuntur ex parentibus fidelibus: Bullingerus autem in libro de Testamento, seu fœdere Dei vnico, & eterno, docet, satis esse, si parentes aliquando fuerint fideles, licet tunc non sint, quando filij eis nascuntur. Immo etiam videtur dicere, satis esse, si maiores fuerint fideles, licet immediati parentes non sint fideles. Ex quo sequitur secundum opinionem huius hominis saluari ferè omnes pueros: rari enim sunt, qui non habuerint aliquem ex maioribus suis fidelem.

Contra hos errores posuit Concilium Tridentinum, sels. 7. canon. 5. *Si quis dixerit, Baptismum non esse necessarium ad salutem, anathema sit*. Probat hęc veritas PRIMO ex Dei verbo expresso, Ioannis 3. *Nisi quis renatus fuerit ex aqua & Spiritu sancto, non potest introire in regnum Dei*. Quæ verba non sonant præceptum, sed medium, vt Augustinus demonstrat libro 1. de peccatorum meritis & remissione, cap. 30. vbi hunc locum accuratè expendit. Et patet etiam ex ratione, quæ redditur: *Quod natum est ex carne, caro est, & Oportet vbi nasci denuò*. Indicat enim Dominus homines nasci carnales, & peccatores, atque aded seruos peccati, & proinde necessarium esse remedium contra hęc mala, quod remedium deinceps erit Baptismus. Idem apertissimè conuincitur ex figura ænei serpentis, quam ibidem Dominus ponit. Vult enim ita esse remedium contra mortem æternam renasci per fidem, & Baptismum suum, vt olim fuit serpens æneus remedium vnicum contra morsum serpētium. Itaq; illud: *Nisi quis renatus*

renatus fuerit, &c. simile est, ac si quis diceret; Nisi comedas, non viues. vel; Nisi pharmacum sumas, non conualescas. Ista enim non tam præceptum, quàm medium necessarium significant. Neque de hoc aduersarij disputant; sed nituntur variis expositionibus ita deprauare hunc locum, vt non possit ex eo colligi aquam necessariam esse.

Calvinus in Antidoto loco notato duo dicit. PRIMÒ, secundum aliquos Patres aquam accipi pro mortificatione; quod idem habet Kemnitius in Examine, can. 2. sess. 7. & nominat Basilium, qui per aquam intelligit mortificationem. AT hoc vanum est. Nam Basilius libro de Spiritu sancto, cap. 15. non explicat quid ad literam significet aquæ vocabulum, Ioannis 3. sed præsupponens significare veram, & naturalem aquam, quærit cur aqua adiungatur Spiritui in Baptismo, & causam reddit, vt aqua significet mortificationem peccatorum, spiritus autem resurrectionem virtutum.

SECUNDO Calvinus dicit, aquam hoc loco esse epithetum Spiritus, & sensum esse; Oportere nasci ex Spiritu, qui purgat ad modum aquæ. SED hanc expositionem refutauimus suprà libro 1. de Sacramentis, capite 31. vbi attulimus quindecim testimonia Patrum, qui hunc locum intelligunt de aqua Baptismi: & præterea idem confirmauimus aliquot rationibus.

Petrus Martyr in cap. 7. 1. ad Cor. præter hæc Caluini explanationem, quam non improbat, adfert aliam, quòd videlicet nō sit vis facienda in illa copulatiua: *Ex aqua, & spiritu.* satis enim est, si ex Spiritu homines renascantur, quomodo Rom. 10. dicitur: *Corde creditur ad iustitiam, & ore confessio fit ad salutem.* Vbi habetur eadē copulatiua particula, &, & tamen non est eiusdem necessitatis fides cordis, & confessio oris. AT hoc etiam miserum est effugiū. Nam in primis confessio oris, & fides cordis non referuntur ad eandem fidem, seu effectum; fides enim cordis necessaria est ad iustitiam acquirendam; confessio oris ad salutem non amittendam. At in Baptismo, Spiritus & aqua ad eandem regenerationem pertinent: quare loca illa non sunt similia. Præterea si non est vis facienda in copulatiua, certè æquiualebit disiunctiuæ: inde autē sequetur satis esse renasci ex aqua sine Spiritu, quod absurdissimum est. Quod enim Martyr dicit, Christum velle, vt renascamur ex

Spiritu, gratis dicit. Si enim particula, &, copulatiuè accipitur, vtrumq; est necessarium; sin disiunctiue, alterutrum sufficit, quodcunque illud sit.

Zvvinglius in cap. i. Marc. exponit per Baptismum concionem. Ioan. Brentius in cap. i. Matth. totum locum Euangelij: *Nisi quis renatus fuerit*; exponit de pœnitentia, vt sensus sit: *Nisi quis pœnitentiam egerit, non intrabit in regnum cœlorum.* Deniq; Ioannes VViclef, teste Thoma VValdensi, tomo 2. cap. 101. per aquam in loco Euangelij Ioan. 3. intelligit aquâ illam, quæ fluxit ex Christi latere, vt sensus sit; *Nisi quis renatus fuerit ex aqua, quæ fluet ex meo latere, id est, ex passione mea, &c.*

Sed hæc & similia somnia faciliè refutantur. PRIMO, ex communi consensu Patrum suprâ citatorum. Cùm enim hic locus tam variè exponatur ab hominibus huius, & superioris ætatis, nihil rectius facere possunt homines prudētes, etiam si Christiani non essent, quàm appellare ad iudicium antiquorum, qui ante nostras lites hunc locum exposuerunt.

SECUNDO, refelluntur ex communi axioma Theologorum, quo docemur Scripturam intelligere secundum verborum proprietatem, vbi non cogimur euidenti absurdo; alioqui possemus deprauare omnia loca, etiam clarissima, si liceat pro arbitrio fingere nouos sensus. Porro aduersarij nullum absurdum ostendunt, quod sequatur, si hoc loco per aquam intelligamus aquam, nisi quia hinc refellitur ipsorum hæresis. ●

TERTIO, quia si hoc loco per aquam non intelligimus aquam, difficile erit statuere, Sacramentum Baptismi constare ex aqua: quod tamen affirmant hoc tempore omnes tum Catholici, tum hæretici. Nam cetera loca Scripturæ, vbi fit mentio aquæ in Baptismo, vt Act. 8. & Ephes. 5. probant quidē posse homines baptizari aqua, sed non probant non posse baptizari aliis etiam liquoribus. Et præterea poterunt ea loca detorqueri ad metaphoras, non minus, quàm iste. Rectè igitur Concil. Tridentinum, sess. 7. can. 2. anathema dicit omnibus, qui hunc locum Euangelij detorquent ad metaphoras, & non intelligunt de vera, & naturali aqua, vt verba sonant.

SECUNDO, probatur eadem veritas ex traditione Ecclesiæ, & Patrum: semper enim Ecclesia credidit, infantes perire, si absque Baptismo de hac vita recedant. Ac PRIMVM habemus testimonia Conciliorum Carthagenensis, & Mileuitani apud

apud Augustinum epist. 90. & 92. in quibus ex professo damnatur sententia eorum, qui putant paruulos saluari sine Baptismo. Quibus consonat Tridentinum Concilium, sess. 6. cap. 3. & sess. 7. can. 5.

SECUNDO, habemus testimonia Pontificum. Siricii in epist. 1. ad Himericum, cap. 2. & Innocentij 1. epist. 26. ad Concilium Mileuitanum, qui docent, paruulos omnino perire, si absque Baptismo decedant. Item Leonis I. epist. 80. aliàs 78. ad Episcopos Campaniæ, ubi dicit, in periculo vitæ quocumq; tempore esse homines baptizandos, ne careant necessaria liberatione.

TERTIO, habemus testimonia omnium ferè Patrum, qui idem docent, vt Irenæi li. 3. cap. 19. Origenis in cap. 6. ad Rom. Nazianzeni oratione in sanctum lauacrum. Basilij orat. 13. de exhortatione Baptismi. Item Cypriani lib. 3. epist. 8. ad Fidum. Ambrosij lib. 2. de Abraham, cap. vlt. Hieronymi lib. 3. contra Pelagianos. Augustini lib. 1. de peccatorum meritis, & remis. cap. 16. 23. 24. & 27. & epist. 28. lib. 2. de origine animæ, cap. 12. & lib. 3. cap. 9. Prosperi lib. 2. de vocatione Gentium, cap. 8. Fulgentij lib. de fide ad Petrum, cap. 30. Bernardi serm. 66. in Cantica, & Petri Cluniacensis in epist. contra Petrobrusianos, qui ex professo hoc tractat. Sed audiamus vnum aut alterum AVGVSTINI testimonium nomine aliorum, li. 3. de origine animæ, cap. 9. *Noli, inquit, credere, noli dicere, noli docere, infantes antequam baptizentur morte prauentis, peruenire posse ad originalium indulgentiam peccatorum, si vis esse Catholicus.* & in epist. 20. ad Hieron. *Quisquis dixerit, quod in Christo viuificabuntur etiã paruuli, qui sine Sacramenti eius participatione de vita exeunt, hic profecto, & contra Apostolicam predicationem venit, & totam condemnat Ecclesiam: Vbi propterea cum baptizandis paruulis festinatur, & curritur, quia sine dubio creditur aliter eos in Christo omnino viuificari non posse.*

TERTIO, probatur ratione deprompta ex fundamentis aduersariorum. Nam fundamentum ipsorum est, quia filij Christianorum nascuntur liberi à reatu peccati originalis, non quidem, quod non habeant peccatum, sed quia eis non imputatur, cum sint filij sanctorum. Hoc enim fundamentum facilè potest euerti. PRIMO, quia Iacob, & Esau, filij erant optimi patris Isaac, & tamen Deus Iacob dilexit, Esau autem odio habuit, antequam aliquid boni, vel mali egissent, Rom. 8. Non ergo filij sanctorum nascuntur sancti.

Respondet Petrus Martyr in comment. 1. Corinth. 7. filios sanctorum nasci sanctos, quando sunt prædestinati: quia tamen nos ignoramus, qui sint prædestinati, idèd benè speramus de omnibus filiis sanctorum, donec illi per mala opera non prodant suam reprobationem. **I N S P E R T A** responsio; Nam si res ita se habet, impertinens erit nasci ex fideli, vel infideli, & benè sperandum erit de omnibus infantibus; sæpissimè enim contingit, vt filij fidelium sint reprobi, & filij infidelium prædestinati. Præterea si filij fidelium non prædestinati, non nascuntur sancti, malè allegat Petrus Martyr Calvinum, sequutus illam promissionem Genes. 17. *Ero Deus tuus, & seminis tui.*

Respondet Martyr, illam promissionem non esse vniuersalem, sed solùm habere locum in prædestinatis. **A T** hoc gratis dicitur; Verba enim Scripturæ absoluta sunt, neque vlla sit in toto illo capite mentio prædestinationis. Et denique promissio illa inanis additur, si adiungenda est conditio prædestinationis: nullā enim consolationem inde capere possunt, vel parentes, vel filij, cùm ignorent an sint prædestinati. Simile est si Rex diceret alicui; Do tibi hanc urbem pro te, & posteris, si tamen mihi placuerit posteris tuis illam concedere.

S E C V N D O, Dauid erat filius hominis fidelis, & tamen Psal. 50. dicebat: *In iniquitatibus conceptus sum, & in peccatis concepit me mater mea.* Et Apostolus erat filius sanctorum, vt ipse affirmat 2. Corinth. 12. & tamen ait Ephes. 2. *Eramus & nos natura filij iræ.*

Respondent: Hæc dici de corruptione naturæ, & de peccato quod reuera inest, non de reatu, qui non est in filiis fidelium, cùm eis peccatum non imputetur. **S E D** certè, esse filium iræ, apertissimè sonat reatum. Filius enim iræ non est, nisi qui est obnoxius pœnæ, & vindictæ. Non autem est obnoxius pœnæ, cui peccatum non imputatur. Vnde Paulus non ait; Sumus filij iræ, sed, *Eramus*, & tamen secundum aduersarios, peccatum semper manet etiam post Baptismum.

T E R T I O, loca Apostoli Pauli de peccato originali generalia sunt, Rom. 5. *In qua omnes peccauerunt.* Et 2. Corinth. 5. *Christus pro omnibus mortuus est, ergo oēs mortui sunt.* Nec possunt hæc loca exponi de vicio naturæ, nō de reatu: alioqui nemo haberet reatum. Nec potest dici, filios fidelium contrahere peccatum originale, sed mox dimitti eis, antequam nascantur.

scantur. Nam si filij fidelium idèò sanctificantur, quia sunt filij fidelium, eodem momento incipient sancti esse, quo incipiunt esse filij fidelium; at eodem momento incipiunt esse filij fidelium, quo incipiunt esse simpliciter; ergo nunquam habent peccatum originale, quod est contra Paulum, & contra ipsos aduersarios, qui admittunt peccatum originale, & non aduertunt se pugnantia dicere.

QUARTO, fundamentum aduersariorum, pugnat cum axioma omnium Patrum, inimò etiam omnium Christianorum; quod est, Christianos non nasci, sed fieri; vt Hieronymus ait epist. 7. ad Letam. Tertullianus in Apologetico, cap. 17. in fine, & alij passim. Iam enim secundum Caluinum, & Martyrem Christiani nascuntur, non fiunt.

Sed argumenta ipsorum videamus. PRIMO obiiciunt illud Genes. 17. *Ero Deus tuus, & seminis tui.* Quod quidem dictum est Abrahamæ, & eius posteritati: sed nos per Christum successimus in posteritate Abrahamæ. Christus enim soluit maceriam, quæ nos separabat à populo Dei.

RESPONDEO, promissionem illam, vt suprà ostendimus in quæstione de differentia Sacramentorum nouæ & veteris legis, ad literam non fuisse promissionem remissionis peccatorum, sed peculiaris protectionis, & gubernationis, & terrenæ felicitatis; tamen sensu quodam mystico, fuisse etiam spirituales promissiones, & remissionis peccatorum, ac vitæ æternæ, & ad nos pertinere: sed ad nos descendere non per carnalem generationem parentum, sed per spiritualem regenerationem Christi. Nam Apostolus Rom. 4. & 9. & Galat. 3. & 4. apertè docet eos esse veros Abrahamæ filios, non qui sunt filij carnis, sed qui sunt filij fidei, id est, qui imitantur fidem Abrahamæ. Tunc ergo incipimus secundum Apostolum esse filij Abrahamæ, cum incipimus esse fideles; quod paruuli nō faciunt, nisi cum baptizantur; illis enim baptizari est credere, vt dicit Augustinus lib. 1. de peccatorum meritis, & remiss. cap. 27. Et præterea ratio idem docet. Nam per carnalem generationem nō possumus fieri filij Abrahamæ, cum parentes nostri ab Abraham non descendant, sed quia Christus verè fuit filius Abrahamæ; tunc & nos incipimus esse filij Abrahamæ, cum incipimus esse Christi filij, vel fratres. Id autem certum est non fieri nisi per Baptismum. Vnde Ioan. 1. *Qui non ex sanguinibus, neq; ex voluntate carnis, neq; ex voluntate viri, sed ex Deo nati sunt.* Et Ioan. 3.

22 *Cap. IV. De Sacram. Baptismi. Lib. I.*

Oportet vos nasci denuò. Vide Augustinum epist. 200. ad Asellicum.

SECUNDO obiiciunt illud Apostoli I. Cor. 7. *Filij & sistri immundi essent, nunc autem sancti sunt.*

RESPONDEO cum Augustino lib. 3. de peccatorum merit. & remis. cap. 12. quidquid significetur per hanc filiorum sanctitatem, non posse vlllo modo intelligi, quod aduersarij volunt, filios fieri sanctos sine Baptismo. Nam ibidem Paulus dicit, sanctificari coniugem infidelem per fidelem, & tamen stultissimum esset credere, coniugem infidelem, sine conuersione ad Deum, & Baptismo Christi posse peruenire ad remissionem peccatorum hoc solo, quod adhæret coniugi fidei.

Porrò tres sunt huius loci Patrum expositiones. VNA est, sanctos hîc vocari filios sanctitate quadam ciuili, quod videlicet legitimi, non spurij sint. Ita commentarius, qui tribuitur Ambrosio, & S. Thomas, & Anselmus in hunc locum.

Refellit Martyr hanc expositionem, quia filij essent legitimi, etiam si vterq; coniunx esset infidelis: & tamen Apostolus dicit, filios nasci sanctos ex vno coniuge fidei, altero infidei; quia sanctificatur infidelis per fidelem; aliqua igitur alia sanctitas hoc loco agnoscenda est. SED malè reprehenditur hæc expositio. Nā alia ratio est coniugij inter duos infideles, alia inter fidelem, & infidelem. Nam cum vterq; coniunx est infidelis, coniugium sine dubio est legitimum, vt ciuilis quidam contractus; neque de eo dubitari poterat; vt etiam non potest dubitari cum vterq; est fidelis. At cum alter fidelis est, alter infidelis, dubitari poterat, an coniugium esset legitimum propter religionis disparitatem: videtur enim fidelis pollui ob cohabitationem cum infidei. Ided Apostolus monet Christianos, etiam tum Matrimonium esse legitimum, neq; pollui fidelem ob cohabitationem cum infidei, sed è contrario sanctificari infidelem per fidelem: maior enim vis est fidei, quàm infidelitatis. Esse autem etiam in tali disparitate religionis, legitimum coniugium, probat ex eo, quod filij eorum non censentur immundi, id est, infames, & spurij, sed sancti, id est, legitimi & liberi à ciuili ignominia.

ALTERA expositio est, filios horum coniugum dici sanctos, quia consecrantur Deo ab altero coniuge fidei, & per Baptismum Christiani fiunt, & in Dei timore educantur.

Horta-

Hortatur enim Apostolus coniuges Christianos, vt non discedant à coniugibus infidelibus, si ipsi infideles velint cum fidelibus permanere, & rationem reddit, quia sanctificatur infidelis per fidelem, id est, vel conuertitur ad fidem, vel certè est candidatus fidei, cum non abhorreat à consuetudine coniugis fidelis: inde autem sequitur, vt filij sancti sint, id est, Christiani fiant. Quod certè non fieret, si noller infidelis cum fidele habitare, vel non sanctificaretur infidelis per fidelem; tunc enim filij sequerentur parentem infidelem, & proinde immundi, & infideles essent. Ita exposuit Tertullianus lib. 2. ad uxorem, & ex eo S. Hieronymus lib. 1. in Iovinianum, & in epist. 133. ad Paulinum, & Augustinus lib. 2. de peccatorum meritis, & remiss. cap. 26. & lib. 3. cap. 12. & lib. 1. de serm. Domini in monte, cap. 27.

Carpit etiam hanc expositionem Petrus Martyr, vt suam hæresim ex hoc loco Apostoli stabilire possit. Nam sæpe accidit, vt qui ex scortatione filios suscepit, eos Christianos fieri curet, & in timore Dei enutriet, vt Augustinus ipse fecit cum filio suo Adcodato, & tamen nemo inde probaret sanctam esse coniunctionem cum scorto. Paulus autem probat sanctum esse coniugium etiam infidelis cum fidele, quia inde nascuntur filij sancti. At immeritò reprehendit Martyr hanc expositionem. Nam coniunctio cum scorto, res est per se mala, & ideò nō potest fieri sancta per coniunctionem fidelis, nec potest fieri laudabilis, & retinenda, etiam si inde nascantur filij, qui Christiani fiant. Nam non sunt facienda mala, vt veniant bona, Rom. 3. At coniugium etiam infidelium res est bona, & ideò potest fieri melior, si alter eorum conuertatur ad fidem, & potest commendari, & suaderi perseverantia in tali coniugio; ob bonum, quod inde sequitur, vt filij Christiani fiant.

TERTIA expositio est aliorum, vt referunt Augustinus, & Anselmus locis citatis, qui dicebant, sanctificari coniugem infidelem per fidelem, quia discebat seruare leges coniugij, & non abuti Matrimonio. Infideles enim qui ignorant Deum, etiam si legitimè coniuncti sint, tamen sæpe abutuntur Matrimonio, neq; abstinere se à cōpula coniugali tempore mēstrui, neque semper naturalem modum seruant: inde autem polluitur coniugium, & filij nascuntur immundi; à qua pollutione liberantur & parentes & filij, per hoc quod infi-

24 *Cap. IV. De Sacramento Baptismi. Lib. I.*

delis consentit habitare cum fidei, & proinde seruare leges casti coniugij.

TERTIUM argumentum Caluini; Prophanatur Baptismus cum datur ei, qui ad Christum non pertinet, quomodo prophanatur sigillum regium, cum eo signatur falsum diploma.

RESPONDEO; Baptismus non prophanari, cum datur immundis, sed contra potius sanctificare, & purgare immundos. Non enim est sigillum, ut Caluinus somniat, acceptæ gratiæ, sed est instrumentum conferens gratiam, & signum gratiæ, quæ tunc datur.

QUARTUM argumentum; Infantes Iudæorum, qui ante octauum diem moriebantur, non poterant circumcidi, & tamen non est verisimile eos periisse; igitur sine Circumcisione saluabantur. At eadem ratio est Baptismi apud Christianos, & Circumcisionis apud Iudæos.

RESPONDEO; Totum argumentum constare ex rebus incertis. Nam **IN PRIMIS** multi veterum (ut supra diximus) negant Circumcisionem datam in remedium contra peccatum. **DEINDE** non scimus an ante octauum diem haberent infantes Iudæorum aliquod remedium, & quod illud esset. **DENIQUE** non est eadem ratio Christianorum, & Iudæorum. Nunc enim determinatum est à Christo certum remedium, & quidem communissimum, & facillimum, præter quod non licet fingere aliud; tunc autem quid fieret, certo sciri non potest, cum Scriptura nihil dicat. Illud vnum certo scimus ex diuinis literis, omnes homines nasci peccatores, nec saluari, nisi per Christi passionem certis mediis applicatâ, ut Augustinus fusè docet in tribus libris de peccatorum meritis, & remissione, & libris quatuor de origine animæ.


QUINTUM argumentum; Si Baptismus est necessarius, peribunt sine sua culpa infiniti infantes, quod alienum videtur à Dei misericordia. Hoc argumentum Petri Martyris, fuit etiam quorundam Catholicorum, ut Caietani, Gabrielis, & aliorum, qui non quidem docent, filios Christianorum nasci sanctos, sed tamen conantur inuenire alia remedia pro paruulis, præter Baptismum.

SED respondemus cum Augustino lib. 2. de bono persecrantia, cap. 12. & Prospero lib. 2. de vocatione Gentium, cap. 8. Dei iudicia esse occulta, cur tot paruulos perire sinat; interim tamen esse iustissima. Nam etiam si paruuli sine sua culpa non bapti-

baptizantur, non tamen sine sua culpa pereunt, cum habeant originale peccatum. Qui autem fingunt aliud remedium præter Baptismum, apertissimè pugnant cum Euangelio, Conciliis, Patribus, atque Ecclesiæ vniuersæ consensu. Nam vt Augustinus ait, epistol. 28. non alia de causa in Ecclesia festinatur, & curritur cum infantibus periculis ad Baptismum, nisi quia constat nullum esse aliud remedium. Videntur autem, qui ista fingunt, non cogitare curam infantium magis ad Deum, quàm ad se pertinere; & Christum cum Baptismum necessarium asseruit, Ioan. 3. bene sciuisse, multos eo remedio sine sua culpa priuandos, & facillimum esse Deo, si veller, providere infantibus omnibus Baptismum, sicut reipsa providet omnibus electis. Quod enim Bucerus, & Martyr dicunt, infantes prædestinatos etiam sine Baptismo saluari, ineptissimè dicitur, vt Augustinus ostendit lib. 3. de origine animæ, cap. 10. Quos enim Deus prædestinauit, iis remedia ad salutem efficacissimè prouidit. Proinde omnes, qui in infantia moriuntur, si prædestinati sint, sine dubio baptizantur, & contrà si reprobi sint, non baptizantur.

CAPVT QVINTVM.

Quo tempore cæperit Baptismus esse necessarius.



Quo tempore cœperit Baptismus esse necessarius, quæstio est inter Theologos. Sed quia non est controuersia cum hereticis, exponam solum paucis propositionibus, quæ mihi esse probabilior sententiæ videatur.

PRIMA propositio: *Baptismus ante passionem Domini institutus est.* NOTA, negari non posse, quin aliquem Baptismum Christus in vsu habuerit ante passionem. Nam Ioan. 3. & 4. dicitur Christus baptizasse per discipulos suos. Sed dubiū esse potest, an ille Baptismus fuerit Sacramentum illud, quod nunc habemus, & de quo fit mentio Matth. ult. an verò fuerit præparatio quædam ad Baptismi Sacramentum postea instituendū, vt erat Baptismus Ioannis. Et quidē CHRYSOSTOMVS homil. 28. in Ioan. & Theophylactus in cap. 3. Ioan. apertè docent Baptismum illū, quo discipuli Christi baptizabāt, Ioan. 3.

доп

26 Cap.V. De Sacramento Baptismi. Lib.I.

non remississe peccatum, & fuisse in aqua tantum sine Spiritu; nec ullam fuisse differentiam inter Baptismum discipulorum Christi, & Ioannis, sed utrumque fuisse preparationem ad fidem: & ideo Christum non baptizasse per se, sed per discipulos, quia non decebat eum baptizare sine Spiritu. Idem videtur sentire S. LEO epist. 4. ad Episcopos Siciliae, cap. 3. *Ipsa, inquit, operis qualitas docet celebranda generaliter gratia eum esse legitimum diem*, id est, diem Resurrectionis, *in quo orta est & Virtus muneris, & species actionis. Ad cuius rei confirmationem plurimum valet, quod ipse Dominus Iesus Christus, posteaquam resurrexit a mortuis, discipulis suis, in quibus omnes Ecclesiarum principes docebantur, & formam, & potestatem tradidit baptizandi, dicens: Euntes ergo nunc docete omnes gentes, baptizantes eos, in nomine Patris, & Filij, & Spiritus sancti. De quo utique eos etiam ante passionem potuisset instruere, nisi proprie voluisset intelligi, regenerationis gratiam ex sua Resurrectione cepisse.* Hæc ille. Probabilius tamen est, quod nos diximus. Quod ex professo docent Cyrillus lib. 2. in Ioan. cap. 57. & sequentibus, & Augustinus tract. 13. & 15. in Ioan. & epist. 108. ad Seleucianam, & Hugo de S. Victore lib. 2. de Sacramentis, part. 6. cap. 4.

Est hæc communior Theologorum sententia, cum Magistro in 4. dist. 3. Et ratio est. PRIMO, quia Ioan. 3. dicitur Christus baptizasse, cum tamen non ipse baptizaret, sed discipuli eius, ut ibidem adiungit Euangelista. Ergo ille Baptismus erat proprie Christi Baptismus, ut distinguitur à Baptismo Ioannis; alioqui non ipse, sed Ioannes diceretur baptizasse eos, quos discipuli Christi baptizabant. Si autem erat proprie Christi Baptismus, necessariò erat in aqua, & spiritu, non in sola aqua. Semper enim Scriptura ponit hoc discrimen inter Christum, & Ioannem, quòd iste in aqua, ille non in sola aqua, sed etiam in Spiritu baptizaret. Nec decebat ut Christus institueret inanem caeremoniam, aut munus Ioannis sibi usurparer, nimirum baptizandi in sola aqua. Adde, quod Ioan. 1. dicitur de Christo in præsentem: *Hic est, qui baptizat in Spiritu sancto.*

SECUNDO probatur hoc idem, quia Actor. 19. legimus rebaptizatos, quos Ioannes, baptizauerat. At nusquam legimus rebaptizatos, quos discipuli Christi ante passionem eiusdem baptizauerant. Immo probabilissimum est (ut Augustinus docet in

cet in

cet in epistol. 108.) Apostolos non fuisse baptizatos, nisi ante Christi passionem.

TERTIO Patres cōmuni consensu docent, Christum, cūm baptizaretur in Iordane dedisse aquis vim sanctificandi, vt patet ex Tertulliano libro contra Iudæos, cap. de passione; ex Hilario can. 2. in Matth. Ambrosio lib. 2. in Luc. cap. 12. Hieronymo in Dialogo cōtra Luciferianos; Nazianzeno in oratione in sancta Lumina; Beda in cap. 3. Luc. & ex aliis. At certè non habuerunt aquæ vim sanctificandi, nisi ab eo tempore, quo cœperunt esse materia Baptismi.

DENIQUE fundamentum contrariæ sententiæ non est solidum. Solum enim adferunt Chrysostomum & Theophylact. in illud Ioan. 7. *Nondum erat Spiritus datus, quia nondum Iesus erat glorificatus.* At hic locus intelligitur de plenitudine Spiritus sancti, quæ dari cœpit visibiliter in Pentecoste; alioqui enim omnes sancti habuerunt Spiritum sanctum, etiam ante Christi passionem.

SECUNDA propositio: *Baptismus Christi institutus est, quando Dominus ipse in Iordane à Ioanne baptizatus est.* NOTA de hac re, id est, quo puncto tēporis Christus Baptismum instituerit, esse plurimas opiniones Scholasticorū, sed communio rem, & probabiliorem esse, quam nos sequimur, quam etiam amplectitur Catechismus Concilij Tridentini, & Magister cum S. Thoma, & aliis lib. 4. dist. 3.

NOTA præterea, non velle nos dicere, Christum in die sui Baptismi verbis docuisse materiam, aut formam Baptismi; id enim falsum est; sed tum primum statuisse, ac decreuisse, quod postea declarauit Ioan. 3. Nicodemo, & alio tempore suis discipulis; vt aqua esset materia Baptismi, & vt forma esset inuocatio trium diuinarum personarum. Determinauit enim aquas, ad Baptismi materiam, cūm ea tactu mundissimæ carnis suæ, consecrare, & illustrare dignatus est, vt docent Patres citati. Et simul determinauit formam, cūm in eius Baptismate tota Trinitas sensibiliter apparuit, vt patet Matth. 3. Christo enim baptizato aperti sunt cœli, & vox Patris intonuit; & Spiritus apparuit in specie columbæ, & Filius ipse Dei in carne assumpta præsens erat; vbi etiam simul (Hilario teste loco citato) declaratus est effectus Baptismi à Christo instituti, nimirum, quod baptizatis aperitur cœlum, & à Patre in Filios adoptantur, & Spiritu sancto replentur, &c.

28 *Cap. V. De Sacramento Baptismi. Lib. I.*

TERTIA propositio: *Baptismus Christi non fuit necessarius, necessitate medij, aut precepti ante Christi mortē.* PROBATVR, quia vsque ad Christi mortem lex antiqua vim suam retinuit, vt patet, quia Christus eam seruauit vsque ad mortem. Nam pridie quam pateretur, seruauit ceteremoniam agni Paschalis. & Matth. 23. monebat homines, vt seruarent, & facerent, quæ Scribæ, & Pharisei docebant ex cathedra Moſis; ergo etiam Circumcisio, si in remedium peccati data fuerat, vsq; ad Christi mortem vigeat. Non igitur toto eo tempore Baptismus Christi necessarius erat vt medium ad salutem, quandoquidem sine eo poterant homines, etiam paruuli iustificari. Quare illud Christi verbum Ioan. 3. *Nisi quis renatus fuerit, &c.* non significat ab eo die, quo Dominus cum Nicodemoloquebatur, fuisse Baptismum necessarium, sed significat necessarium futurum fuisse in lege noua, postquam cessarent cæremoniæ legales, vt rectè exponit Bernardus epist. 77. ad Hugonem. Et eodem modo exponendum est, quod ait Fulgentius lib. de fide ad Petrum, cap. 3. ex quo tempore dictum est: *Nisi quis renatus fuerit*, neminem sine Baptismo posse saluari. Accipit enim nomine temporis, non illum diem, quo ea dicebantur, sed tempus legis nouæ. Denique illud etiam Lucæ 16. *Lex, & Propheta vsq; ad Ioannem*; non significat tunc legem cessasse, quoad vim, aut obligationem, sed quoad prædicationem: Ioannes enim fuit vltimus Prophetarum. Vnde subiungitur: *Ex eo regnum Dei euangelizatur.* Præterea in morte Christi cessauit efficacia ceteremoniarum, & totius legis veteris; ergo cessauit etiam vis Circumcisionis; ergo vsque ad illud tempus vim habuit lex vetus. Porro in morte Christi cessasse vim legis, patet ex Euangelio Matth. 27. *Scissum est Velum.* & Ioan. 19. *Consummatum est.* Item ex Apostolo Rom. 7. *Mortificati estis legi per corpus Christi.* Item omnes ferè cæremoniæ legis figuræ erant Christi, Coloss. 2. & Hebr. 10. Christus autem in morte compleuit opus redemptionis.

QUARTA propositio: *Baptismus Christi capis esse necessarius necessitate medij, & precepti à die Pentecostes.* NOTA, legem veterem simpliciter cessasse in morte Christi, quia tunc cessauit vniuersaliter ratio legis; tamen ob ignoratiã huius rei adhuc obligasse Iudæos, vsq; ad publicam promulgationē Euangelij: & contra legem Euangelicā, & Sacramenta Christiana condita fuisse, & multum profuisse etiam ante Christi mortem,

mortem, tamen non habuisse vim præcepti, nisi post promulgationem solennem, ut Concilium Tridētinum, sess. 6. cap. 4. dicit de Baptismo. Et ratio est, quia promulgatio est de essentia legis, ut S. Thomas docet, part. 2. quæst. 90. art. 4. Promulgatio autem solennis nouæ legis facta est in die Pentecostes. Quod probatur PRIMO, quia, ut diximus, lex vetus viguit usque ad Christi mortem: ab eo autem tempore usque ad Pentecostem, neque Christus, neque Apostoli publicè ad populum loquuti sunt. SECUNDO, non debuit promulgari solenniter lex noua, nisi completis omnibus mysteriis redemptionis; mysteria autē completa sunt in Ascensione Christi. TERTIO, lex vetus solenniter promulgata fuit in monte Sina die quinquagesimo post primum Pascha Iudæorum; ergo lex noua promulgari debuit die quinquagesimo post primum Pascha Christianorum. Fuisse enim illam legis promulgationem, figuram promulgationis Euangelij, docent Augustinus epist. 119. Leo sermon. 1. de Pentecoste, & alij. QUARTO, concioni primæ, quam habuit S. Petrus Actor. 2. ipso die Pentecostes, conueniunt omnes conditiones promulgationis solennis. Nam habita est in vrbe Regia Hierosolymorum, præsentibus omnibus hominibus omnium nationum, ut Lucas testatur, à summo Præcone Euangelij, qui erat Apostolus Petrus, & in eā concione comprehensa sunt præcipua capita totius doctrinæ Euangelicæ. Denique continuò etiam cœpit vsus Sacramentorum.

CAPVT SEXTVM.

De Baptismo sanguinis, & flaminis.



QVOD attinet ad POSTREMAM partem disputationis de necessitate Baptismi, quæstio est, an Baptismus aquæ suppleri possit per Martyrium, tam in paruulis, quàm in adultis; & per veram cordis Conuersionem in adultis.

Martinus Kemnitius in 2. part. Examinis, pag. 90. 91. & 92. admittit hæc tria Baptismata, ac dicit, ab antiquis venustè distincta esse tria Baptismata, sanguinis, flaminis, & fluminis. Sed dissentit à Catholicis in modo explicandi: non enim vult Martyrium aut Pœnitentiā remittere peccata, ut facit Baptismus aquæ, sed solā fidem, quæ tempore Martyrij & Pœnitentiæ,

tia, apprehendit Christum, esse eam quæ iustificat. Illyricus quoque Cent. 5. cap. 4. col. 517. dicit, Prosperum contra verbum Dei, & cum magna iniuria Baptismi æquasse Martyrium Baptismo. Sed Illyricus nō adfert argumenta: Kemnitius autem probat, quia Martyrium & Pœnitentia sunt opera nostra; absurdum autem, & impium est, opera nostra equare sanguini Christi, & virtuti Baptismi. Confirmat ex Augustino, qui lib. 4. contra Donatistas, cap. 22. dicit, bonum latronem, qui cum Christo pendeat in cruce, non passione sua obtinuisse remissionem peccatorum, sed ex fide apprehendente Christum, cuius cōtrarium docuerat Cyprianus, sed eum Augustinus loco notato refutavit.

Hæc sententia Kemnitij non solū est falsa, sed etiam secum ipsa pugnat, & mendaciis suis non caret. Nam cū idem Kemnitius passim doceat cum Magistro suo Luthero, in ipso etiam Baptismo aquæ solam fidem iustificare; an non aperte secum pugnat cū dicit, Martyrium & Pœnitentiam non remittere peccatum, eo modo, quo Baptismus, quia in eis sola fides iustificat? Mendacia verò duo sunt in hac sentētia Kemnitij. PRIMVM, cū ait, Augustinum asserere bonum latronem sola fide Christum apprehendente iustificatum. Non enim hoc Augustinus dicit; sed bonum latronem fide, & conuersione cordis ad Deum iustificatum esse. SECUNDVM, cū ait, ab Augustino refutari Cyprianum, qui crediderat Martyrium iustificare, eo modo, quo facit Baptismus. Id em̄ est impudens mendacium. AVGVSTINVS enim non modò non refutat, sed etiam laudat Cypriani sententiam. Sic enim ait: *Baptismi sanè viscem aliquando implere passionem, de latrone illo cui non baptizato dictum est: Hodie mecum eris in Paradiso, non leue documentum idem B. Cyprianus assumit.* Hæc ille. Docet quidem paulò infrà Augustinus, latronem illum non posse dici Martyrem, nec saluatum Baptismo sanguinis, sed Baptismo flaminis, sed hoc dicit ad confirmandam Cypriani sententiam; si enim Baptismus flaminis iustificat, multò magis Baptismus sanguinis, vt Cyprianus dixerat. Vt autem res tota explicetur, ponam aliquot propositiones.

PRIMA propositio: *Martyrium rectè dicitur, & est quoddam Baptisma.* Probatur hæc propositio duplici ratione. PRIMO, quia Scriptura diuina, & sancti Patres Martyrium Baptisma nominare solent. Marci 10. *Potestis bibere calicem,*
quem

quem ego bibiturus sum; aut Baptismo, quo ego baptizor, baptizari? Et quomodo coarctor, donec perficiam illud? Idem etiam Patres passim docent. TERTULLIANVS in libro de Baptismo, de Martyrio loquens: *Hic, inquit, est Baptismus, qui lauacrum regenerationis non acceptum refert, & el perditum reddit.* PROSPER in Epigrammatis:

Et quidquid sacri fert mystica forma lauacri,

Id totum impleuit gloria Martyrij.

Cyprianus præfatione libri de exhortatione Martyrij, dicit Martyrium esse Baptismum, & quidem Baptismo aquæ præstantiorem. Ambrosius in Psal. 118. serm. 3. tria Baptismata distinguit, vnum aquæ, alterum sanguinis, tertium purgatorij in alia vita. Hieronymus in cap. 4. ad Ephes. in illud: *Vnum Baptisma*, distinguit Baptismum aquæ, à Baptismo Martyrij. Augustinus lib. 13. de ciuit. Dei, cap. 7. epist. 108. ad Seleucianum, lib. 1. de origine animæ, cap. 9. lib. 4. de Baptismo, cap. 21. & 22. Cyrillus Catechesi 3. ponit etiam duo ista Baptismata, vt faciunt quoque Nazianzenus, oratione in sancta lumina. Damascenus lib. 4. cap. 10. Bernardus in epist. 77. & Hugo de sancto Victore lib. 2. de Sacramentis, part. 6. cap. 7.

ALTERA ratio est, quia Martyrium conuenit cum Baptismo aquæ in tribus effectibus; nimirum, quod PRIMO configurat hominem Christi passioni, & morti. SECUNDO remittit peccatum originale, & reliqua omnia, si quæ sint admissa. TERTIO, quod remittit omnem pœnam peccato debitam, tam æternam, quàm temporalem: quod inter Sacramenta proprium est solius Baptismi.

Hic tamen OBSERVANDVM est, non esse hæc omnia æquæ certa. AC PRIMVM certum est, quod Martyrium sit configuratio mortis Domini, vt nouum est, & configuratio nobilior, quàm Baptismi aquæ; quia illa est realis, hæc Sacramentalis. ITEM certum est apud omnes, quod remittat omnem pœnam, ita vt Martyres continuò perueniant ad coronam. Id quod patet vel ex eo, quod Ecclesia nūquam orat pro animabus Martyrum, sed illis potius se commendat: *Iniuriam*, inquit AVGVSTINVS sermon. 17. de verbis Apostoli, & INNOCENTIVS cap. cū Marthæ, extra, de celebratione Missarū, *facit Martyri, qui orat pro Martyre.* Vnde CYPRIANVS li. 4. epist. 2. ad Antonianum conferens Martyres cum aliis Christianis morientibus: *Aliud, inquit, est ad veniā stare, aliud ad*

32 *Cap. VI. De Sacramento Baptismi. Lib. I.*

gloriam peruenire, aliud missum in carcerem non exire inde, donec soluat nouissimum quadrantem, aliud statim fidei, & virtutis accipere mercedem, aliud pro peccatis lōgo dolore cruciatum emēdari, & purgari diu igne, aliud peccata omnia passione purgasse, aliud deniq; pendere die iudicij ad sententiam Domini, aliud statim à Domino coronari.

De SECVNDO effectū est maior difficultas. Nam non desunt Theologi, vt Dominicus à Soto, & Martinus Ledesmius in 4. dist. 3. q. vn. art. ii. qui docent, Martyrium non dare gratiam ex opere operato, sed tantū ex opere operantis, nec dare vllum gradum gratiæ, præter eum, qui respondet merito charitatis ipsius Martyris. Martyrium enim sine charitate susceptum nihil prodest, vt Paulus ait 1. Corinth. 13. Qui autem est in charitate, sine dubio est in gratia. Vnde etiam credimus, omnes veros Martyres habuisse veram, immò etiā summam charitatem, antequam Martyrium subirent, iuxta illud Ioan. 15. *Maiorem charitatem nemo habet, quàm vt quis ponat animam suam pro amicis suis.*

Probabilior sententia est, Martyrium ex opere operato cōferre primam gratiam, ita vt si quis ad Martyrium accedat adhuc in peccatis existens, tamen sine affectu ad aliquod peccatum, & cum fide, & dilectione inchoata, & pœnitentia saltem imperfecta, qualis requiritur etiam ante Baptismum aquæ; is virtute Martyrij ex opere operato iustificabitur, & saluabitur. Ita docet expressè S. Thomas in 4. dist. 4. quæst. 3. art. 3. quæst. 3. ad 1. & quæst. 4. tota, & Ioan. Maior, Gabr. & alij eadem dist. 4. lib. 4. & probatur PRIMO ex Martyrio infantum: constat enim infantes pro Christo occisos non solū saluari, sed etiam haberi ab Ecclesia in numero Martyrum, vt patet de festo sanctorum Innocentium, cuius meminit Bernardus in serm. de Innocentibus, & antè eum Augustinus lib. 3. de lib. arbit. cap. 23. & epistol. 28. ad Hieronymum, & ante Augustinum, Origenes homil. 3. in diuersos Euangelij locos, & Cyprianus lib. 4. epist. 6. ad Thibaritanos. At paruuli nihil operari possunt, & peccatores sunt antequam baptizētur Baptismo aquæ, vel sanguinis.

Respondent quidam, eos Innocentes fuisse circumcisos, proinde ante Martyrium iustificatos. SED hoc nihil est. Nam incertum est, an fuerint illi omnes circumcisi; immò probabilissimum est, & ferè certum non fuisse omnes circumcisos.

Nam

Nam occidit Herodes omnes pueros, qui erant in Bethlehem, & finibus eius, nec iussit filios tantum Iudæorum, sed omnes omnino occidi: fortasse autem non pauci erant Gentiles inter eos. Præterea iussit occidi à bimatu & infra, omnes infantes; proinde eos etiam, qui nondum peruenerant ad octauum diem, quo solo poterant circumcidi. Denique non est de fide, Circumcisionem iustificasse, & tamen Ecclesia absolute omnes illos infantes certo credit esse saluos. Præterea Ecclesia eos innocentes non solum ut saluos, sed etiam ut Martyres honorat; ergo passio pro Christo suscepta aliquid eis contulit ex opere operato. Neque valet quod Sotus respondet, esse hoc priuilegium paruulorum: id enim sine ullo fundamento asseritur. Si enim Martyrium ex opere operato infantibus prodest, cur non adultis? certe non minus est Martyrium; nec minus potens, & efficax ad ultorum, quam infantium, sed contra potius, nobilius, & efficacius.

SECUNDO probatur ratione S. Thomæ. Nam gratia, quæ datur Martyri, remissionis omnium pœnarum, non potest esse ex opere operantis; nam vel esset ex ipsa tolerantia pœnæ; vel ex feruore charitatis. Non tolerantia pœnæ, quia multi Martyres fuerunt antea homines scelestissimi, qui milles mortem promeriti fuerant, & sine dubio non erat sufficiens satisfactio mors quædam leuissima, ut per capitis abscissionem; & tamen si verè sint Martyres, dimittuntur eis omnes pœnæ. Multietiam Confessores, plura sæpe patiuntur, quam Martyres, & tamen non semper eis dimittitur tota pœna. Non etiam id potest tribui merito charitatis. multi etiam sancti Confessores maiorem habuerunt charitatem multis Martyribus, & tamen non habuerunt indulgentiam omnium pœnarum: Martyres autem etiam si non haberent nisi vnum gradum charitatis, tamen hoc ipso quod sunt Martyres, habent indulgentiam omnium pœnarum. Fatendum est igitur, Martyrium ex opere operato, id est, ex pacto, & institutione Christi conferre gratiam. Quod si Martyrium ex opere operato confert gratiam, certè poterit etiam primam gratiam conferre: id enim solum ob stare videbatur, quod non haberet vim ex opere operato.

TERTIO Ecclesia, ut aliquem colat ut S. Martyrem, nunquam examinat, an antea fuerit in gratia, sed indifferenter omnes honorat, quos constat pro Christo occisos in confes-

sione veræ fidei, & vnitæ Ecclesiæ. Hæretici enim, & schismatici Martyres esse non possunt, cum ponant obicem gratiæ Dei per peccatum infidelitatis, & schismatis, in quo actu perseverant.

QUARTO, si Martyrium non conferret primam gratiam ex opere operato, sed tantum ex fervore charitatis operaretur, non verè distingueretur Baptismus sanguinis à Baptismo flaminis; sed utrumque esset Baptisma flaminis, cum utrumque cōsisteret in interna cōversione, & motione animi in Deum. At reuera Baptismus sanguinis distinguitur à Baptismo flaminis, quia ipsa sanguinis effusio supplet Baptismum in Martyrio; in Baptismo autem flaminis sola interna conuersio, & aspiratio Spiritus sancti.

QUINTO sit aliquis, qui comprehensus in persecutione malit mori, quàm Christum negare, & re ipsa moriatur; & tamen non habuerit ante ipsum Martyrium veram contritionem, sed solum attritionem quandam suorum peccatorum; & deniq; non habuerit maiorem dispositionem, quàm eam, quæ necessaria est ad Baptismum aquæ. Aut iustificabitur iste, & saluabitur, aut non: si sic, ergo Martyrium ex opere operato dat primam gratiam; neque enim iste aliquid mereri potuit ante ipsum Martyrium, cum non esset iustus: si non, ergo Baptismus sanguinis non supplet Baptismum aquæ; iste enim verè baptizatur in suo sanguine, & verè Martyr est, cum pro vera fide moriatur. fatendum est igitur eum ex opere operato iustificari.

SEXTO & ultimo videtur omninò hæc sententia Patrum. CYPRIANVS in epistola ad Iubaianum: *Nunquid potest, inquit, vis Baptismi esse maior, aut potior, quàm confessio, quàm passio?* Item AVGVSTINVS lib. 13. de ciuit. Dei, cap. 7. *Quicumque etiam non percepto regenerationis lauacro pro Christi confessione moriuntur, tantum eis valet ad dimittenda peccata, quantum si abluerentur sacro fonte Baptismatis.* Hæc illi. At falsa hæc erunt, si Baptismus primam gratiam confert, & peccata etiã quoad culpam dimittit; Martyrium autem neutrum facere potest: sic enim erit longè maior virtus Baptismi aquæ, quàm Baptismi sanguinis; cuius contrarium Patres docent.

Ad argumentum, quod contrà fieri solet, ex 1. Corinth. 13. *Si tradidero corpus meum, ita ut ardeam, charitatem autem*

non

non habuero, nihil mihi prodest. Et Ioan. 15. *Maiorem charitatem nemo habet, quàm ut animam suam ponat quis pro amicis suis.* RESPONDEO, hæc loca non concludere, oportere Martyrem ante ipsum Martyrium habere veram charitatem, & proinde esse iustificatum. Nam PRIOR locus non requirit, ut charitas præcedat, sed ut comitetur reliqua bona; sine charitate enim nihil sufficit ad salutem. Et hoc est verissimum; nam etiam Martyrium nihil prodesset, si Martyr de hac vita decederet sine charitate. Sed nõ potest decedere sine charitate, cum vi ipsius Martyrij, ex pacto & privilegio Dei infundatur gratia, & proinde charitas. Quodd autem non sit necesse propter hunc locum Pauli, charitatẽ præcedere, saltem tempore, ipsum Martyrium, patet, quia ibidem Paulus dicit, sine charitate non prodesse fidem, & scientiam; & tamen ordinariè prior est fides, & sæpe etiam scientia in homine, quàm charitas: & tamen si fides, & scientia semper maneat sine charitate, non saluant hominem, ut rectè Apostolus dixit. ADDE, quodd id, quod dicit Apostolus de Martyrio, dicere possumus etiam de Baptismo: qui enim habet Baptismum, si nõ habeat charitatem, non saluatur; & tamen nemo negat Baptismum dare primam gratiam.

ALTER locus docet, summam esse charitatem ex parte operis, ponere vitam pro amico, quia non habet aliquid maius homo, quod det pro amico, quàm vitam: tamen non docet hic locus, omnem, qui dat vitam pro amico, habere summam charitatem quoad habitũ, vel actum internum, ut notum est; cum multi qui non dederunt vitam, habuerint maiorem charitatem iis, qui dederunt, ut patet de beata Virgine, de sancto Ioanne Euangelista, & aliis. Præterea etiam si qui vitam ponit pro Christi amore, habet sine dubio magnam, & veram charitatem, ut hic locus Euangelij docet, & tales videntur fuisse Martyres plurimi: tamen potest etiam fieri, ut aliquis nondum plenè iustificatus, raptus ad Martyrium, vitam ponere decreuerit, non tam propter Dei charitatẽ, quam nondum habet, quàm metu gehennæ, vel spe cœlestis præmij: certè de tali non potest dici, quod habeat veram charitatem; & tamen benè facit ponendo vitam in confessione Christi, & Martyr est, id est, testis veritatis. Ac de eiusmodi dicimus, remitti illis peccata, & infundi gratiam ex opere operato Martyrij.

SECUNDA propositio: *Perfecta Conuersio, ac Pœnitentia rectè Baptismus flaminis dicitur, & Baptismum aqua saltem in necessitate supplet.* NOTA, Baptismum flaminis non dici quamlibet conuersionem, sed perfectam, quæ includit veram contritionem, & charitatem; & simul etiam desiderium, seu votum Baptismi.

NOTA SECUNDO, non fuisse apud veteres tam certam hanc propositionem, vt erat superior. Nam de Martyrio nullus veterum, quod sciam, negauit eo suppleri Baptismum aquæ: at de conuersione, & pœnitentia, non desunt, qui id negauerint. Nam liber, qui inscribitur de Ecclesiasticis dogmatibus, qui falsò tribuitur Augustino, cap. 74. apertè dicit, Catechumenum non saluari, etiamsi in bonis operibus vixerit, nisi Baptismo aquæ, aut sanguinis purgatus fuerit. Tempore etiam sancti Bernardi fuisse, qui idem sentirent, patet ex epistola eius 77.

At sine dubio credendum est, veram conuersionem supplere Baptismum aquæ, cum non ex contemptu, sed ex necessitate sine Baptismo aquæ aliqui decedunt. Id enim expressè habetur Ezechielis 18. *Si impius egerit pœnitentiam à peccatis suis, iniquitatum eius non recordabor amplius.* Idem apertè docet AMBROSIVS oratione de obitu Valentiniani iunioris: *Quem eram, inquit, regeneraturus, amisi; sed ille gratiam, quam sperauerat, non amisit.* Idem Augustinus lib. 4. de Baptismo, cap. 22. & Bernardus epistol. 77. & post eos Innocentius III. cap. Apostolicam, de presbytero non baptizato. vnde etiam Concilium Tridentinum, sess. 6. cap. 4. Baptismum dicit esse necessarium in re vel in voto. Denique vera conuersio conuenit cum Martyrio, & cum Baptismo aquæ, in nomine Baptismi, & in effectibus duobus; ergo credibile est conuenire etiam in alio effectû, qui est dimittere culpam, & iustificare hominem, & eo modo supplere Baptismum aquæ. Antecedens probatur. Ac primùm de nomine Baptismi, legimus Marc. 1. & Luc. 3. *Prædicans Baptismum pœnitentia in remissionem peccatorum.* Et 1. Corinth. 15. *Quid faciunt qui baptizantur pro mortuis? Si mortui non resurgunt, & quid baptizantur pro illis?* Non enim vlla dari potest huic loco aptior expositio, quàm si per Baptismum intelligamus opera pœnitentiæ, & afflictionis, quæ viuentes suscipiunt pro animabus defunctorum. Præterea pœnitentia configurat hominem Christi

Christi passioni, vt facit Martyrium, licet non tam perfectè, quàm facit Martyrium: dimittit etiam totâ pœnam perfectâ conuersio, vt fuit in conuersione Mariæ Magdalenæ, boni latronis, & aliorum. Neque enim dicitur Baptismus flaminis absolutè, & simpliciter, interna conuersio, nisi quando est ita perfectâ, & feruens, vt omnem rubiginem peccati tollat. Alio- qui enim, si non tollat totam pœnam, vt plerumque fit, non est Baptismus, nisi imperfectè.

TERTIA propositio: *Tam Martyrium, quàm Pœnitentia peccata remittunt; nō autem sola fides, qua Martyres, aut Pœnitentes Christum apprehendunt.* Hæc est cōtra Kemnitium, & probatur Scripturis, Patribus, & ratione. **PRIMO** Scripturæ ipsi passioni, & pœnitentiæ tribuūt remissionem peccatorum. Matth. 10. & 16. *Qui perdiderit animam suam propter me, inueniet eam.* Marc. 8. & Luc. 9. *Qui perdiderit animam suam propter me, saluam faciet eam.* Ezechiel. 18. *Cum auerteris se impius ab impietate sua, & fecerit iustitiam, ipse animam suam uiuificabit.* Et Luc. 7. Magdalenæ dicitur: *Remittuntur ei peccata multa, quoniam dilexit multum.* **SECUNDO**, Patres supra citati nunquam soli fidei, sed ipsi passioni, aut pœnitentiæ, & desiderio Baptismi tribuunt iustificationem. **TERTIO**, si sola fides operaretur in Martyrio, & Pœnitentia, nō essent tria Baptismata, sed duo, vel potius vnum tantum: proinde non rectè diceret Kemnitius tria Baptismata venustè à Patribus distincta. Quod si dicat esse tria Baptismata, quia sunt tria instrumenta excitandæ fidei; dicam ego esse multò plura, quia multò plura sunt instrumenta excitandæ fidei, vt patet.

Neq; argumentum Kemnitij concludit. Nam non æquamus opera nostra virtuti Baptismi, aut Christi sanguini, cum dicimus, per Martyrium, & Pœnitentiam remitti peccata, & suppleri Baptismus: sed æquamus Dei gratiam, Dei gratiæ, & Christi pactum, & institutionē, Christi pacto, & institutioni. Nam vt in Baptismo aquæ, quod præcipue operatur, est institutio diuina, & gratia; ita etiâ in Martyrio, & Pœnitentia: nō em̃ passio Martyrum ex se vim habet iustificandi, sed ex pacto, & promissione Christi. Similiter pœnitentia, & conuersio, est solum dispositio quædâ, ad quam ex pacto, & promissione Dei sequitur iustificatio. Adde, quod nec ipsa dispositio est præcipuum opus nostrum, sed Dei, qui primò inspirat pœnitentiâ, & amorem Martyrij, & postea iuuat ad perficiendum.

38 Cap.VII. De Sacramento Baptismi. Lib. I.

QUARTA propositio: *Martyrium, et Conuersio ad Deum, licet Baptismata quadam sint, non sunt tamen Sacramenta.* Probatur PRIMO, quia non habent essentiam Sacramenti: nam in Martyrio non est vlla forma verborum de essentia; in Conuersione, neque est forma verborum, neque signum eternum sensibile, quod necessariò requiratur. SECUNDO, Sacramenta sunt remedia contra peccatum ordinaria, & omni tempore conuenientia. At Martyrium non est ordinarium remedium, nec omni tempore potest haberi. TERTIO, Sacramenta sunt causa gratiæ, vt actiones Dei per suos ministros: at Martyrium non est actio Dei per suum ministrum, sed actio Diaboli per suum satellitem. Vnde Martyrium concurrir ad iustificationem dispositiuè tantùm, vt etiam Conuersio in Baptismo flaminis: atque ita diuerso modo iustificant ex opere operato Sacramenta & Martyrium. Ibi enim opus operatum est causa actiua instrumentalis gratiæ, hîc solùm est dispositio.

CAPVT SEPTIMVM.

De ministro Baptismi.

SEQVITVR QVINTA controuersia de causa efficiente ministeriali; de qua re, vna solùm quæstio est, vtrum scilicet laici possint baptizare. Nouam enim hæresim Calvinus excogitauit, lib. 4. Instit. cap. 15. §. 20. 21. & 22. vbi docet, nec in extrema quidem necessitate licere baptizare iis, qui non sunt ordinarij Ecclesiæ ministri ad hoc ipsum vocati, & ordinati: quod etiam repetit in Antidoto Concilij Tridentini, sess. 7. can. 10. de Sacramentis in genere. Vtrum autem existimet Baptismum non esse ratum, si à laico detur, an tantùm non licere sine peccato laicis baptizare; non satis aperrè explicat.

Porrò Catholici Doctores communi consensu, sex pronuntiata affirmant. PRIMO, ius baptizandi ex officio ordinario conuenire solis Sacerdotibus, id est, Episcopis, & Presbyteris, sic tamen, vt Presbyteris conueniat cum subordinatione, & dependentia ab Episcopis. Quemadmodum enim potestas absoluendi à peccatis datur Presbyteris, in sua ordinatione, & tamen, quia absolvere à peccatis est actus iurisdictionis, quæ est Episcoporum propria, ideò Presbyteri non

non possunt vti ea potestate, nisi quantum eis Episcopi concedunt: ita quoque de potestate baptizandi sentiendum est. Hinc conciliari possunt testimonia quædam auctorum, quæ alioqui contraria videri possunt. Quidam enim simpliciter affirmant, officium baptizandi ad Presbyteros pertinere, vt Isidorus, lib.2. de officiis diuinis, cap.24. Alij dicunt Presbyteros baptizare non posse sine Episcopi facultate, vt Tertullianus lib. de Baptismo, & Hieronymus in Dialogo contra Luciferianos.

SECUNDO docent, Diaconis quoque ex officio conuenire baptizare, sed in absentia Sacerdotum, aut eorum iussu. Ita docent iidem auctores, Tertullianus, & Hieronymus. Neque his repugnant Ignatius in epist. ad Heronem, & Epiphanius hæresi 79. qui negant Diaconis conuenire munus baptizandi, & proprium id esse dicunt Sacerdotum. Nam loquuntur Epiphanius, & Ignatius de ordinario officio, Tertullianus, & Hieronymus de extraordinario, & vtrique rectè dicunt: ordinariè siquidem ad solos Sacerdotes pertinet baptizare, extraordinariè etiam ad Diaconos. Quod etiam habet Gelasius in epist.1. cap.9. & exprimitur in ipsa ordinatione Diaconorum.

TERTIO Catholici docent, nunquam licere laicis solenniter baptizare, neq; etiam priuatim præsentente Sacerdote, aut Diacono, aut iis etiam absentibus, extra casum necessitatis. Docet hoc Augustinus lib.2. contra epistolam Parmen. cap.13. & rationem reddit, quia nemini licet vsurpare alterius officium.

QUARTO docent, laicis baptizatis licere in casu necessitatis baptizare. De hoc enim nunquam in Ecclesia dubitatum inuenio: vnde noua est & inaudita Caluini hæresis.

QUINTO docent etiam, non baptizatis in casu necessitatis licere Baptismum dare, si sciant ritum. De hoc tamen veteres dubij fuisse videntur. Nam TERTULLIANVS in libro de Baptismo reddit causam, cur liceat laicis baptizare: *Quia, inquit, quod ex aquo ab omnibus accipitur, ex aquo ab omnibus dari potest.* Et HIERONYMVS in Dialogo contra Luciferianos, Tertullianum imitatus, inquit: *Scimus etiam licere laicis, vt enim accipit quis, ita & dare potest.* & Concilium Elibertinum, can.38. dicit, laicos posse baptizare, modò sint ipsi baptizati, & non bigami. Augustinus similiter dubius fuit. Nam lib.2. contra epistol. Parmeniani, cap.13. proponit quæ-

tionem, an non baptizatus possit baptizare, & dicit se non audere rem determinare, cum in nullo generali Concilio res definita sit. Idem etiam habet lib. 7. de Baptismo, cap. 53. Denique Gregorius I. in epistola ad Bonifacium, & habetur etiam apud Gratianum, can. Quos à paganis, de consecr. dist. 4. iubet rebaptizari à paganis baptizatos.

Ceterum res iam definita est in Concilio generali, ut Augustinus cupiebat. Nam in Florentino Concilio habetur, in casu necessitatis licere laico, seu viro, seu feminæ, seu Christiano, seu pagano baptizare, modò adsint materia, forma, & intentio debita. Quod idem multò antea statuerat Nicolaus Papa, ut habetur can. A quodam Iudæo, de consecr. dist. 4. & idem habetur ibidem, can. Romanus. Et ratio idem suadet. Nam cum non requiratur in ministro Baptismi fides aut probitas, aut ordinatio, ut notum est, nulla est ratio, cur non sit verum Baptisma, quod à Pagano aut Iudæo confertur, si adsint ea, quæ necessaria sunt ad Baptismi essentiam.

ADDE, quod nullum testimoniorum contra prolatorum conuincit, non licere Baptismum à non baptizato accipere. Nam Gregorius II. non tam creditur iussisse rebaptizari à pagano baptizatos, propter vitium ministri, quàm propter vitium formæ Sacramentalis, quam illi pagani, & imperiti fortè non tenebant. Augustinus autem etsi dubius fuit, tamen paratus erat generali Concilio acquiescere. Et præterea lib. 7. de Baptismo, cap. 53. apertè dicit, si sententia ipsius quærat, se responsurum, Baptismum esse ratum à quocunque, & ubicunque traditum, modò verbis Euangelicis consecratum. Elibertinum Concilium asseruit, quod erat certum, laicum baptizatum licitè baptizare: non autem negauit expresse contrarium, sed reliquit sub dubio. Denique Tertullianus, & Hieronymus id solùm fortè dicere voluerunt, Baptisma ab omnibus posse dari, ut ab omnibus accipitur, id est, quia est Sacramentum omnibus necessarium, idè ab omnibus posse accipi, & similiter ab omnibus posse dari, nò quòd oporteat eum, qui dat, prius accepisse. Id mihi persuadeo, tum quia verba hunc sensum ferre possunt, tum quia si alium sensum faciant, absurdam rationem continent. Non enim est bonum argumentum; Hic habet Baptismum, ergo potest dare; alioqui posset etiam presbyter ordinare presbyteros, & diaconus diaconos, quia habet ille presbyterium, & hic diaconatum. Neq;

est

est bonum argumentum, si negatiuè ratiocinemur; Non habet iste Baptismus, ergo non potest dare; alioqui non posset minister impius, per verba, & Sacramenta alios iustificare, quia nimirum caret ipse iustitia, & pietate. Non igitur requiritur, vt habeat in se Baptismus formaliter, qui est futurus minister; sed satis est, si habeat virtualiter, & ministerialiter, quomodo omnes habent, qui habent vsum rationis, linguæ, & manuum, vt possint ex intentione verba proferre, & aquam spargere.

SEXTO docent, non modò viros, sed etiam fœminas in extrema necessitate posse baptizare. Ita habet expressè Concilium Florentinum, ita Concilium Carthaginense IV. can. 100. vt infra citabimus, & Urbanus II. in epist. ad Vitalem, & habetur 30. quæst. 3. can. Super his. & deniq; idem habet consuetudo Ecclesiæ, & ratio manifesta, quæ suprà facta est pro non baptizatis.

His ergo ita constitutis, superest solum, vt contra Caluinum probemus, licere in casu necessitatis baptizare iis, qui ministri Ecclesiastici non sunt. Probatur igitur PRIMO, exemplo Testamenti veteris. Nam Exod. 4. Sephora vxor Moy- sis filium suum circumcidit, & eo modo virum suum à mortis periculo liberauit. At Circumcisio figura erat Baptismi, & secundum Caluinum idem omninò efficiebat, quod nunc facit Baptismus; igitur licebit etiam in casu necessitatis mulieribus baptizare.

Caluino, loco notato, lib. 4. cap. 15. §. 22. mouit hoc exemplum bilem vehementissimam; dicit enim Sephoram stultam mulierem, & temerariam fuisse: *Inscitè, inquit, ad imitationem trahitur, quod egit stulta mulier.* Et infra: *Lectores attendere velim, nihil minus Sephora fuisse propositum, quàm vt Deo ministerium præstaret. Filium periclitari videns, fremit, obmurmurat, nec sine indignatione praputium in terram proiicit, marito sic conuiciatur, vt Deo quoq; succenseat. Denique hoc totum ab animi impotentia profectum esse palàm est, quia Deo, & marito obstrepit, quod filij sanguinem fundere cogitur. Adde, quod si in aliis omnibus probè se gessisset, hæc tamen est inexcusabilis temeritas, quod præsentem marito circumcidit filium, non priuato quopiã homine, sed Moyse primario Dei Propheta, quo nullus in quã maior in Israël surrexit, quod nihilo magis ei licebat, quàm hodie mulieribus sub Episcopi oculis.* Hæc ille.

SED Calvinus, qui arguit Sephoram temeritatis, & impotentiae animi, non aduertit se ex mera impotentia animi, & libidine detrahendi incredibili temeritate id facere. Nam ut ab ultimo incipiam; non peccauit Sephora, quod praesente viro filium circumciderit; id enim fecit coacta ab ipso Moyse, vel potius à Deo. Licet enim Moyses esset praesens, tamen non poterat ipse per se id facere, cum esset in angustiis maximis, & penè exanimatus. Quod enim Scriptura dicit: *Occurrit ei Dominus, & volebat occidere eum*, vel significat, ut non malè exponit Rabbi Abenezra, immissum fuisse Moyse diuinitus grauiissimum morbum, vel, ut nostri exponunt, apparuisse ei Angelum nudato gladio, qui eum continuò vexauit, & quiescere nō permisit, donec Sephora filium circumcidit; tunc enim demum Angelus Moysen dimisit. Itaque non potest dubitari, quin Moyses, si poruisset, filium ipse circumcidisset, sed quia non poterat, significauit uxori ut ipsa id faceret. Id quod ipse etiam Calvinus nesciens quid loquatur, & secum pugnans, indicauit, cum ait: *Deo, & marito obstrepit, quod filij sanguinem fundere cogitur*. Nam si coacta est à Deo, & à marito, non igitur temerè id sibi sumpsit, ut praesente Moyse filium circumcideret. Vbi est ergo temeritas Sephoræ, quam Calvinus inexcusabilem esse dicit?

Quod autem Calvinus dicit, Sephoram circumcidisse filium sine proposito obsequendi Deo, & proiecisse preputium in terram, & obmurmurasse contra Deum, & contra maritum, sunt mera mendacia sine vllo fundamento, & ex mera libidine detrahendi profecta; Scriptura enim nihil tale dicit. Vnum est verbulum, quod fortè Caluinum decepit adiuncta Lyrani expositione. Quod enim Scriptura dicit: *Et dimisit eum*, postquam dixerat: *Sponsus sanguinum tu mihi es*, Lyranus ita exponit, quasi Sephora dimiserit Moysen, & recesserit ab eo indignata ob filij Circumcisionem.

SED fallitur Lyranus, & quicumque ita exponit. Illa enim verba: *Et dimisit eum*, non possunt referri ad Sephoram, sed ad Angelum, qui dimisit Moysen, id est, destitit eum vexare, quando Sephora peracta Circumcisione dixit: *Sponsus sanguinum tu mihi es*. nam vox Hebræa est masculini generis אֱלֹהִים, proinde non potest conuenire Sephoræ. nec significat אֱלֹהִים dimittere propriè, quomodo cum vnus ab alio recedit, sed signi-

significat lenem esse, seu remissum, id est, non amplius persequi, & vexare, quod propriè conuenit Angelo, qui placatus ob Circumcisionem, destitit à Moyse vexando. Vnde Græca editio addit nomen Angeli καὶ ἀπὸ λθην ἀπὸ ἀντὶς ὁ ἄγγελος. Ex quo etiam colligitur, Sephoræ factum Deo placuisse: proinde fuisse rectum, & bonum, quandoquidem eo continuo placatus est.

Sed respondet Caluinus ad hanc nostram consequentiam: *Quòd placatus, inquit, fuit Dei Angelus postquam illa arrepro lapide filium circumcidit, inde perperam colligitur factum illius probatum fuisse Deo. Alioqui dicendum esset, placuisse Deo, quem Gentes ab Assyria traducta crexerant cultum.* Hæc ille. Sed quæ est inter ista similitudo? Nam Gentes illæ ab Assyria traductæ, quia falsum cultum instituerunt, discerpebantur à leonibus, 4. Reg. 17. Sephora autem circumcidendo filium, liberauit Moysen à mortis periculo. Si fortè respondeat Caluinus, non se loqui de eo tempore, quo colebant idola sua Gentes illæ, & à leonibus discerpebantur: sed de tempore posteriore, quo Deum simul cum idolis colebant, & à leonibus immunes erant: contrà obiciam, Gentes illas à leonibus liberatas, quia Deum verum vero ritu colebant, edoctæ nimirum à Sacerdote Israëlita, ut eodem loco dicitur: non autem quia idola simul colebant, vel quia ritu aliquo à se excogitato utebantur. Licet enim Gentes illæ Deo non placerent, nec apud Deum aliquid mereri possent, cum Deum simul, & idola colerent: Deus tamen indicare voluit, quantum interesset inter cultum à se institutum, & impias Gentium superstitiones; & idèd leones immisit in eas Gentes, quando idola tantum colebant, & leones repressit, quando Deum verum vero cultu honorare cœperunt.

SECUNDO, probatur eadem veritas ex eo loco, vnde Caluinus sumit præcipuum argumentum, nimirum, Matth. ult. *Euntes, docete omnes Gentes, baptizantes eos, &c.* Hac dicuntur solis Apostolis, qui à Christo instituti sunt ministri Verbi, & Sacramentorum: Non ergo licet aliis id munus usurpare. Ita Caluinus. Sed ex hoc ipso nos argumentamur, licet ministerium Verbi sit proprium Apostolorum & Episcoporum, qui eis succedunt, tamen omnibus licet; immò omnes tenentur in articulo necessitatis docere, & instruere ignorantes, præsertim in periculo æternæ salutis. Exemplum habemus, Actor.

44 *Cap. VII. De Sacram. Baptismi. Lib. I.*

18. de Aquila, & vxore eius Priscilla, qui videntes Apollinem quendam prædicare, cum non bene teneret fidem Domini, instruxerunt eum diligenter.

Ergo eodem modo, licet munus baptizandi sit proprium Sacerdotum, tamen in necessitate licebit etiam laicis, & fœminis baptizare: immò maiori ratione id licebit, cum sit magis proprium Apostolorum, & Episcoporum prædicare, quàm baptizare: *Non misit me Dominus, inquit Paulus, 1. Corinth. 1. baptizare, sed prædicare.*

TERCIO probatur exemplis Scripturæ, Actor. 8. Philippus Diaconus baptizauit. Qui quidem licet non fuerit laicus, tamen non erat Apostolus, nec Episcopus, aut Sacerdos: & tamen secundum Caluinum soli Apostoli acceperunt à Christo baptizandi potestatem; sic enim loquitur, §. 20. *Neque enim aut mulieribus, aut hominibus quibuscumque mandauit Christus, ut baptizarent, sed quos Apostolus constituerat, iis mandatum hoc dedit.* Præterea, Actorum 9. Ananias Paulum baptizat, qui neque Apostolus, neque etiam Diaconus erat, sed planè laicus. Id enim factum est primo anno à passione Domini, quo tempore nondum erant ordinati vlli Episcopi, aut Sacerdotes, præter Apostolos, neq; erant vlli Diaconi, præter septem. Item Act. 10. Petrus Cornelium, & eius familiam baptizari iussit à fratribus, qui secum venerat: quos certè fratres probabilissimum est non fuisse Apostolos, nec Diaconos, sed simplices discipulos. Deniq; Actor. 2. antequam vlli ordinarentur Episcopi, Presbyteri, aut Diaconi, ipso die primo Pentecostes baptizata sunt tria hominum millia; quod certè non potuit commodè fieri per solos Apostolos; oportuit igitur, ut etiam alij baptizarent, qui laici erant. Nam etiam 72. discipuli eo tempore laici erant: non enim Dominus Sacerdotes ordinauit, nisi in vltima cœna, vbi soli erant Apostoli.

QUARTO, probatur testimoniis, & exemplis Patrum. TERTULLIANVS, lib. de Baptismo, vbi dixerat ius baptizandi propriè conuenire Episcopis, & Presbyteris, nec non etiam Diaconis, si Episcopus iubeat, subiungit: *Alioqui & laicis ius est baptizandi. Quod enim ex aquo accipitur, ex aquo dari potest.*

ALEXANDER Episcopus Alexandrinus, cum vniuersa sua Ecclesia ratum habuit Baptismum, quem Athanasius adhuc puer, & laicus aliis pueris contulerat, teste Rufino, lib. 10. hist. cap. 14. Concilium NICÆNVM, teste Hieronymo, in lib. contra

Lucife-

Luciferianos, statuit Baptisma hæreticorum esse ratum, modò detur secundum formam Ecclesiæ. Quod antea definierat Stephanus Papa, & Martyr, vt Cyprianus refert in epistola ad Pompeium. At non poterant ignorare Stephanus, & Patres Concilij Nicæni apud aliquas hæreses non esse verum Sacerdotium, proinde laicos esse, qui baptizarent, licet fortasse dicerentur Sacerdotes. Concilium ELIBERTINVM, circa hoc idem tempus celebratum, can. 38. docet fideles laicos posse baptizare, cum Ecclesia procul abest, & aliquis Catechumenus vicinus est morti. AMBROSIVS, seu auctor Commentariorum in epistolas Pauli, quæ Ambrosio tribuuntur, in cap. 4. ad Ephes. dicit, in primitiua Ecclesia omnibus licuisse prædicare, & baptizare, ob ministrorum paucitatem; nunc autem rebus Ecclesiasticis suo ordine constitutis, non licere clericis, & laicis prædicare, vel baptizare. At certè, quod licuit in primitiua Ecclesia ob ministrorum paucitatem, eadem ratione licere debet quocunque tempore in extrema necessitate. HIERONYMVS in Dialogo contra Luciferianos: *Baptizare*, inquit, *si necessitas cogat, scimus etiam licere laicis*. AVGVSTINVS li. 2. contra epist. Parmeniani, cap. 13. idem habet & Concilium CARTHAGINENSE IV. cui Augustinus interfuit, can. 100. *Mulier*, inquit, *baptizare non presumat, nisi necessitate cogente*. Quamuis enim non habeatur in tomis Conciliorum illa exceptio: *Nisi necessitate cogente*, tamen ita canonem hunc citat Petrus Lombardus, lib. 4. sent. dist. 6. & Gratianus can. *Mulier*, de consecrat. dist. 4. Denique idem docent de laicis baptizantibus, Gelasius epist. 1. Isidorus lib. 2. de officiis diuinis, cap. 24. & Magister cum vniuersa Schola, li. 4. dist. 6. & postremò Florentinum Concilium.

Ad hoc argumentum more suo ita Calvinus respondet: *Quod autem multis ab hinc sæculis, adeoq, ab ipso ferè Ecclesia exordio & su receptum fuit, & in periculo mortis laici baptizarent, si minister in tempore non adesses, non video quàm firma ratione defendi queat*. Hæc ille. At hæc ipsa est grauißima ratio; siquidem in rebus huiusmodi, quid maius habere possumus totius Ecclesiæ consensu, eoq, antiquissimo atq; adeò ab ipso exordio Ecclesiæ ad nos deducto? Sed videamus nunc quid ille contrà adferat.

PRIMO, obiicit Christi mandatum, Matth. vlt. *Euntes docete, &c.* quod quidem ad solos Apostolos pertinet. Respòdeo

PRIMUM,

PRIMUM, non esse certum, an hæc dicta sint solis Apostolis. Licet enim Matthæus mentionem faciat tantum vndecim Apostolorum; tamen probabile est, fuisse tunc præsentibus multo plures. Videntur enim dicta illa verba in die Ascensionis, quo die aderant cum Apostolis quingenti fratres, ut Apostolus testatur, 1. Cor. 15. Deinde SECUNDO responderi potest, Apostolica facta mandatum istud exposuisse. Cum enim Apostoli ratum habuerint, ut Stephanus, qui non erat Apostolus, concionaretur. Philippus, qui etiam non erat Apostolus, concionaretur, & baptizaret; & idem multi alij facerent, qui neque Apostoli, neque Diaconi erant, ut Ananias, & alij: aperte declararunt, urgente necessitate licere omnibus, id quod alioqui ad quorundam speciale officium pertinet. Ut autem tunc urgebat necessitas propagandæ Ecclesiæ, cum paucissimi essent ministri ad hoc ordinati; ita nunc aliquando urget necessitas, cum quis est in periculo vitæ absentibus Sacerdotibus.

SECUNDO obiicit, quod ipsis etiam veteribus non constabat, an rectè fieret, ut laici in necessitate baptizarent, licet hunc morem ipsi quoque tenerent, vel permitterent. Et probat ex AUGUSTINO, qui sic loquitur, lib. 2. contra epist. Parmeniani, cap. 13. *Et si laicus necessitate compulsus Baptismum dederit, nescio an piè quisquam dixerit, Baptismum esse repetendum. Nulla enim cogente necessitate si fiat, alieni muneris usurpatio est, si autem necessitas urgeat, aut nullum, aut veniale delictum est.* RESPONDEO, nullam hîc esse Augustini dubitationem. Nam priora verba continent quidem oratoriam phrasim, sed planè assertiuam. Idem enim est dicere; Nescio an aliquis piè hoc dixerit, ac; Non nisi impiè id affirmari potest. Posteriora verba significant peccatû esse veniale, cum laici non adhibent omnem diligentiam, ut Sacerdotem inueniant, qui baptizet: nullum autem esse peccatum, cum adhibita diligentia, & Sacerdote minimè inuento, ipsi baptizant.

TERTIO, obiicit Concilium IV. Carthaginense, can. 100. ubi prohibentur mulieres baptizare. RESPONDEO, ipsum Concilium excipit casum necessitatis, ut ex Petro Lombardo, & Gratiano supra demonstrauimus. Præterea licet Concilium non expressè exciperet, oporteret tamen intelligere eum casum esse exceptum: quemadmodum cum Apostolus prohibet mulierem loqui, 1. Cor. 14. & 1. Timot. 2. intelligitur exceptus

casus

casus necessitatis. Quod autem Caluinus hîc respondet, nullam esse Baptismi necessitatem, iam superiore controuersia refutatum est.

QUARTO, obiicit TERTULLIANVM & EPIPHANIVM, quorum ille in libro de virginibus velandis: *Non permittitur, inquit, mulieri in Ecclesia loqui, sed nec docere, nec tingere, nec offerre, &c.* Et in libro de Baptismo: *Petulans, inquit, mulier, quæ & surpauit docere, non & tunc & tingendi ius sibi pariet.* Epiphanius autem hæres. 42. quæ est Marcionis: *Permittit, inquit, etiã mulieribus, & dent Baptisma, etc.* & hæres. 79. dicit, ne ipsi quidem sanctissimæ Christi Matri datum esse, vt baptizaret, alioqui ipsa potius, quàm Ioannes Christum baptizasset. RESPONDEO, loquuntur isti Patres de publico ministerio, non de priuato in casu necessitatis. Nam Tertullianus dicit, in Ecclesia non licere mulieri loqui, docere, tingere, &c. & præterea coniungit officium dandi Baptismi, cum officio sacrificandi; sacrificium autem semper est publicum. Sicut igitur non licet mulieri sacrificare, quia id munus publicum est, ita nec licet publicè baptizare. Epiphanius quoque apertè indicat se loqui de ordinario, & publico ministerio, quia hæres. 79. vbi dicit, mulieri non licere Baptismum dare, ibidem dicit, id ipsum etiam Diaconis non licere: & tamen constat ex Scripturis id Diaconis licere, saltem extraordinariè.

Nec valet Caluini responsio, quod Epiphanius ludibrium esse pronunciauerit dare scæminis licentiam baptizandi, neque vllum casum exceperit. Nam hoc ipso, quod vocat ludibrium, indicat se loqui de publico ministerio. Id enim verè ludibrium, & probrum esset, si in templo viris præsentibus mulier baptizaret. Nec mirum si non addidit exceptionem necessitatis: nam nec addidit, cùm negauit, Diaconos posse baptizare, quia certum erat, eam per se intelligi potuisse.

CAPVT OCTAVVM.

De Baptismo infantium, contra Anabaptistas.

SEQVITVR controuersia SEXTA de suscipientibus Baptismum: tota autem quæstio est de Baptismo infantium. Tamen si enim iam probauerimus contra Caluinum, Baptismum infantibus necessarium esse, si saluari debeant, supersunt tamen adhuc

48 *Cap. VIII. De Sacram. Baptismi. Lib. I.*

duæ quæstiones. VNA, cum Anabaptistis, vtrum infantes capaces sint Baptismi, siue, an liceat infantes baptizare. ALTERA, cum Lutheranis, & Calvinistis, quæ fides sit necessaria in Baptismo paruulorum.

Quantum ad PRIMAM quæstionem; hæresis fuit tempore S. Bernardi, quæ docebat non licere infantes baptizare. Refert eam, & refellit S. Bernardus, serm. 66. in Cantica, & epist. 240. Eadem est huius temporis Anabaptistarum, non licere Baptismum tradere, nisi adultis, qui Baptismum per se flagitant. In hoc errore conuenire omnes Anabaptistas, licet aliqui in multis rebus inter se dissideant, testatur Calvinus in instructione contra Anabaptistas. Idem etiam Calvinus, lib. 4. Institut. cap. 16. §. 29. testatur Michaëlem Seruetum, & quosdam alios Anabaptistarum Magistros contēdere Baptismum suscipi non debere, nisi anno XXX. quæ ætate Christus Baptismum suscepit. Exorta est hæc hæresis anno Christi M. D. XXVII. vt Ioannes Cochlæus refert in actis Lutheri. Princeps videtur fuisse Balthasar Pacimontranus, qui postea Viennæ crematus fuit. Sic enim eum vocat Cochlæus in actis Lutheri, anni M. D. XXVIII. vbi dicit contra eum Lutherum scripsisse eodem anno, quanquam ex Lutheri scriptis hunc errorem Balthasar se collegisse fatetur: quod & verissimum esse, in sequenti quæstione demonstrabimus.

Ministri Transyluani, qui anno M. D. LXVII. duos libros ediderunt contra Trinitatem, & Incarnationem Domini, ad finem eorum librorum addiderunt 36. argumenta contra Baptismum paruulorū, in quo apparet maxima Satanæ rabies, contra genus humanum, qui non contentus per Lutheranos, & Sacramentarios perdidisse innumerabiles animas hominum adultorum, voluit etiam animas infantium perdere per Anabaptistas.

Præter hos hæreticos duo auctores obliquè id ipsum docuisse videntur. Erasmus præfatione paraphrasis in Matthæū, docuit, homines in infantia baptizatos, vbi adoleuerint, interrogandos esse, an habeant ratum, quod ipsorum homine in Baptismo promissum est: & si ratum non habeant, esse liberos dimittendos. Ludouicus Viues annotatione in cap. 27. lib. 1. de ciuitate Dei, dicit, olim neminem consueuisse baptizari, nisi adulta ætate, & qui per se peteret Baptismum, & intelligeret quid sit baptizari.

Porro Catholica Ecclesia semper docuit infantes baptizandos; quod etiam Concilium Tridentinum, sess. 7. can. 12. 13. & 14. de Baptismo, iterum cum anathematis denunciatio-
ne definiuit. PROBATUR hæc veritas tribus argumentorum generibus. PRIMVM sumitur à Scripturis, habemus autem in Scripturis tria argumenta. PRIMVM, sumitur à figura Testa-
menti veteris. Nam Circumcisio figura erat Baptismi, adeò manifesta, vt Baptismus à Paulo dicatur Circumcisio, Colos. 2. At Circumcisio dabatur infantibus, Genes. 17. cur igitur non etiam Baptismus? Hoc argumentum Anabaptistæ facile possunt eludere, cum à Lutheranis, & Calvinistis proponitur: Lutherani enim & Calvinistæ formam Baptismi esse volunt concionem, vt libro superiore ostendimus, quod de Circum-
cissione dicere non possunt. Inde autem sequitur vt infantes circumcidi potuerint, non autem baptizari. At cum à nobis proponitur, qui ad Baptismi essentiam non requirimus verba concionalia, sed consecratoria, certè eludi argumentum non potest.

SECUNDVM argumentum colligitur ex duobus locis Euan-
gelij, simul iunctis. Ioan. 3. *Nisi quis renatus fuerit ex aqua, &c.* Hic locus probat infantes sine Baptismo in æternum pe-
rire; est enim generalis Domini comminatio. Sed nondum habemus, posse infantes baptizari: dicent enim Anabaptistæ paruulos perire, quod vnici remedij capaces nō sint. At quod paruuli non pereant, Dominus docet, Matth. 19. Marci 10. & Luc. 18. *Sinite paruulos Venire ad me; talium est enim regnum cælorum.* vbi etiam Marcus dicit, Dominum complexū fuisse paruulos, eisq; benedixisse. At quomodo paruulorum est re-
gnum cælorum, quomodo Dominus eos complectitur, eisq; benedicit, si salui esse non possunt?

Ad hunc locum duæ dari possunt responsiones. VNÀ, Anabaptistarum, quod Dominus in personis paruulorum bene-
dixerit paruulos innocentia, & humilitate, non ætate: non enim dixit; Horum est regnum cælorum, sed: *Talium.* Vnde etiam AUGUSTINVS lib. 1. Confess. cap. 19. *Humilitatis,* in-
quit, *signū in statura pueri commendasti Rex noster, cum aisti: Talium est enim regnum cælorum.* ALTERA, quod Euange-
lia non loquantur de infantibus, sed de pueris, qui iam vsu ra-
tionis vtuntur. Vt enim Tertullianus notat, lib. de Baptismo, prope finem, ideo Dominus ait: *Sinite paruulos Venire ad me.*

Non enim veniunt nisi grandiores: infantes enim portari possunt, venire non possunt.

SED neutra solida responsio est. Nam etiam si Dominus in statuta pueri commendare voluerit humilitatem, & innocentiam, vt Augustinus rectè docet, tamen simul etiam indicauit infantilem ætatem non esse alienam à regno & salute. Nam cùm Dominus ait: *Sinite paruulos Venire ad me*, ad literam, & historicè loquitur de veris paruulis, quos, vt tres Euangelistæ testantur, multi offerebant, vt eis Dominus benediceret; & Apostoli prohibere conabantur, ne illi accederent. Quare etiam illa ratio: *Talium est enim regnum cælorum*, debet conuenire veris paruulis. Et præterea ille complexus, & benedictio veris paruulis data, apertè significat eos pertinere posse ad Christi societatem, & regnum. Itaque sicut Isaac, & Ismael sunt allegoricè duo Testamenta apud Paulum, Galat. 4. & tamen historicè duo veri homines fuerunt; sic etiam ætas infantilis typus est humilitatis, & tamen re ipsa idonea est ad regnum cælorum.

Altera solutio non est etiam solida. Nam verba Euangelistarum paruulos, & infantes significant. Matthæus, & Marcus habent *παιδιά*, id est, paruulos. Lucas habet *βρέφη*, id est, infantes. Et ibidem Lucas dicit, eos portatos fuisse, non suis pedibus venisse *προσέφερον δὲ αὐτῷ καὶ τὰ βρέφη*, id est, *Afferebant autem ad ipsum & infantes*. Igitur illa vox, *Venire*, accipitur largo modo pro eo, quod est accedere, & appropinquare. Porro hoc argumentum, quod per se, & reuera solidum est, infirmum tamen est, cùm à Calvinistis produci-
tur. Nam Calvinistæ nolunt intelligi debere de Baptismo locum illum, Ioan. 3. *Nisi quis renatus fuerit*. Sublato autem illo loto, posterior locus, quo solo Calvinus vititur, non conuincit; nam posset respõderi ab Anabaptistis, secundum Caluini principia, paruulos ad Christum pertinere, quia nascuntur sancti, vel quia prædestinati sunt. Viderit igitur Calvinus, quàm solidè resistere possit Anabaptistis.

TERTIVM argumentum colligitur ex locis illis, vbi dicuntur baptizata integræ familiæ, vt Act. 16. dicitur Lydia baptizata, & domus eius. Et ibidem de custode carceris: *Baptizatus est ipse, & omnis domus eius continuo*. 1. Corinth. 1. *Baptizauit*, inquit Paulus, *Stephana domum*. At certè in integris

gris domibus rarum est, vt non sint infantes aliqui. Hoc argumento vtitur etiam Caluinus, sed argumentum est probabile tantum, non autem apertè conuincens. Hæc igitur ex diuinis literis.

SECUNDA classis argumentorum continet testimonia Ecclesiæ, quæ tanquam traditionem Apostolorum id semper, & docuit, & seruauit. Vtitur hoc argumento etiam Philippus in locis, titulo de Baptismo paruulorum, id quæ tanquam firmissimum in prima acie posuit, sed meritò ridetur ab Anabaptistis. Nam si in hac re valere debet traditio, & antiquæ Ecclesiæ testimonium; cur non etiam valeat in aliis articulis? vt in asserendo Purgatorio, inuocatione Sanctorum, &c. Notum igitur est hoc argumentum, non aduersariorum.

Ac primùm habemus testimonium DIONYSII Arcopagitaræ, qui lib. Eccles. hierar. cap. vlt. par. vlt. ab Apostolis traditum affirmat, vt infantes baptizentur. Idem docet Iustinus, seu quicumque est auctor earum quæstionum, q. 56. vbi dicit, paruulos baptizatos saluari, alios non item. Irenæus lib. 2. cap. 39. dicit, saluari omnes, qui renascuntur in Christo, infantes, pueros, iuuenes, & senes. ORIGENES lib. 5. in cap. 6. ad Rom. Ecclesia, inquit, ab Apostolis traditionem accepit, etiam paruulis dare Baptismum. Cyprianus li. 3. epist. 8. ad Fidum scribit, non solum sibi, sed etiam integro Concilio visum esse, paruulos baptizari posse, etiam ante diem octauum. Hieronymus lib. 3. contra Pelagianos extremo, infantes baptizari dicit, & tamen omni peccato carere. Nazianzenus orat. in sanctum lauacrum, Basilii orat. exhortatoria ad Baptismum, Chrysostomus homil. ad Neophytos, AVGVSTINVS lib. 10. de Gen. cap. 23. *Consuetudo, inquit, matris Ecclesiæ in baptizandis paruulis nequaquam spernenda est, nec ulla modo superflua deputanda, nec omnino credenda, nisi Apostolica esset traditio.* Idem Augustinus lib. 4. de Baptismo, cap. 24. iterum repetit, Apostolicam esse traditionem, paruulos baptizandos. & lib. 1. de peccatorum merit. & remis. cap. 26. dicit, Pelagianos ausos non fuisse negare Baptismum paruulorum, quod viderent nimis apertè pugnandū fuisse cum tota Ecclesia, si id negarent. Vide etiam Prosperum lib. 2. de uocatione Gentium, cap. 8. qui (vt etiā Hieronymus & Augustinus) hoc potissimum argumento contra Pelagianos probant, dari peccatum originale, quod infantes baptizentur, cum nullum habeant actuale peccatum.

Iam verò Concilium MILEVITANVM inter alios Canones secundum edidit his verbis: *Placuit, Ut quicumque paru-
los recentes ab ſteris matrum baptizandos negat, anathema
ſit.* Concilium item Gerundenſe, ante annos M. celebratum
can. 5. ſtatuit, etiam ipſo die, quo naſcuntur, poſſe infantes ba-
ptizari, ſi periculum mortis imminere videatur. Concilium
II. Bracarenſe, can. 7. probat etiam infantium Baptiſmum. Vt
etiam Concilium Viennenſe generale, vt habemus in Cle-
mentina I. de ſumma Trinitate, & fide Catholica.

His accedant expreſſa etiam ſanctorum Pontificum de-
creta de re eadem. Clementis I. lib. 6. conſtitut. Apoſtol. cap. 15.
Siricij epist. 1. ad Himerium, cap. 2. Innocentij I. epist. 26. ad
Concilium Mileuitanum; Leonis I. epist. ad Episcopum Aquis-
leienſem 84. aliàs 86. Gregorij I. lib. 3. epist. 9. ad Ioannem Ca-
ralitanum; Innocentij III. in epist. ad Episcopum Arelaten-
tem, & habetur cap. Maiores, de Baptiſmo, & eius effectu. Ex
his colligitur quàm falſum ſit, quod ait Ludouicus Viues, ne-
minem olim admotum ſacro Baptiſmo, niſi in ætate adulta.

TERTIA claſſis argumentorum, conſtat ex rationibus.
PRIMA ratio. Paruuli ſalui eſſe poſſunt: ſed extra Eccleſiam
non eſt ſalus; igitur intrent Eccleſiam neceſſe eſt. PRIMA pro-
poſitio probatur tum ex Scriptura citata Matth. 19. *Talium
eſt enim regnum celorum;* tum exemplo ſanctorum Innocen-
tium, quos ſaluos eſſe ſemper Eccleſia docuit, vt ſuprà proba-
tum eſt, cap. 6. tum etiam quia ſi poſſunt paruuli participes
eſſe peccati Adami, cur non etiam gratiæ Chriſti? Alioqui plus
poſſet culpa quàm gratia, cuius contrarium docet Apoſtolus
Rom. 6. SECUNDA propoſitio certiffima eſt. Nam Matth. 12.
dicitur: *Qui non eſt mecum, contra me eſt;* & idè in Symbolo
coniungimus cum Eccleſia, remiſſionem peccatorum: *Credo
ſanctam Eccleſiam Catholicam, Sanctorum communionem, re-
miſſionem peccatorum.* Idè etiam comparatur Eccleſia cum
Arca Noë; quia ſicut regnante diluuiο periit, qui in arca non
fuit; ita & nunc pereunt, qui in Eccleſia non ſunt, vt ait Hiero-
nymus in epist. ad Damasum de nomine hypotaſis. Idem te-
ſtatur celebre illud CYPRIANI dictum, lib. de vnitæte Eccleſiæ:
Non habet Deum patrem, qui non habet Eccleſiam matrem.
Vide etiam Auguſtinum li. 4. de Baptiſmo, cap. 1. Deniq; Con-
cilium LATERANENSE ſub Innocentio III. cap. 1. *Vna, inquit,
eſt fidelium vniuerſalis Eccleſia, extra quam nemo ſaluatur.*
Habe-

Habemus igitur, oportere infantes intrare Ecclesiam. At id facere non possunt nisi per Baptismum; igitur baptizentur necesse est. Assumptio probari potest PRIMVM ex illo Pauli Rom. 8. *Quos prædestinavit, hos & vocavit; quos vocavit, hos & iustificavit; quos iustificavit, hos & magnificavit.* Hinc enim habemus, omnem prædestinatum vocari, iustificari, glorificari, & è contrario nullum glorificari, nisi antè iustificatum; nullum iustificari, nisi antè vocatum; nullum vocari, secundum propositum, nisi antè prædestinatum. At in paruulis non potest fingi vlla vocatio, nisi per Baptismum. Tunc enim rectè dicuntur vocati, cùm in numerum vocatorum adscribantur. PRAETEREA Act. 2. dicitur: *Qui receperunt Verbum, baptizati sunt, & appositæ sunt in die illa animæ circiter tria millia.* Vbi videmus, baptizari nihil esse aliud, quàm Ecclesiã intrare. Vnde Patres communi consensu distinguunt Catechumenos à fidelibus, ac docent illos, quòd Baptismo careant, nondum esse intra Ecclesiã, nec dici posse fideles. Vide Nazianzenum orat. in sanctum lauacrum, Chrysostomum homil. 24. in Ioan. Cyrillum lib. 12. in Ioan. cap. 50. Augustinum tract. 4. in Ioan. & Concilium Florentinum in instructione Armenorum. DENIQUE non potest homo Ecclesiæ, & Christo coniungi, nisi fide tantum, aut utroque. Sed paruuli consentientibus Anabaptistis, non possunt fide ad Christum, & Ecclesiam adiungi; ergo per Sacramentum adiungi debent.

SECUNDA ratio. Si non possent infantes baptizari, aut impedimentum esset ex parte prohibitionis alicuius diuinæ, aut ex parte Sacramenti, aut ex parte ministri, aut ex parte ipsius susipientis, aut denique ex parte Ecclesiæ, quæ per Baptismum acquiritur in homines, quod non videtur posse fieri sine propria ipsorum voluntate. Nihil autem horum dici potest. Nam nulla exstat diuinã prohibitio. Sacramentum autem non pender nisi à diuina institutione; alioqui non esset certum, nec adferret solidam consolationem: itaque ex se semper est efficax, & idem operatur, siue adulto, siue infanti detur. Minister autem æquè potest infantem aspergere, & verba sacra super eum proferre, ac super adultum. Ex parte susipientis requiritur quidem in adultis dispositio quædam per actualem fidem, & conuersionem in Deum: at hæc non requiritur in infante. Nam in adultis duplici de causa requiritur illa dispositio. PRIMO, propter peccata actualia,

* aut Sacramen-
tantum, *

quæ illi originali addiderunt. Peccatum enim, quod committitur per actualement auersionem propriæ voluntatis à Deo, requirit, si remitti debeat, actualement conuerſionem propriæ voluntatis in Deum. **SECUNDO**, quia Deus agit cum rebus ſecundum earum naturas, & ideò, qui habet uſum liberi arbitrij, non iuſtificatur à Deo, niſi etiam ipſe concurrat per aſſenſum liberi ſui arbitrij. At neutra cauſſa in paruulis reperitur. Illi enim nec habent uſum liberi arbitrij, nec peccauerunt per auersionem actualement propriæ voluntatis à Deo: ſolùm enim habent auersionem habitualement, quæ poteſt tolli per habitum charitatis inſuſum, & peccauerunt aliena voluntate. Vnde æquum eſt, vt eis etiam proſit aliena voluntas.

Denique non obſtat obligatio, quæ naſcitur ex Baptiſmo. Nam in primis non obligatur niſi ad ea, ad quæ alioqui obligatus, vel obligandus erat. Nam ad legem diuinam ſeruandam, ad abrenunciandum Diabolo & pompis eius, omnes tenentur, etiam ſine Baptiſmo. Rurſus omnes tenentur ſuſcipere Baptiſmum, idque diuino mandato, & proinde omnes tenentur ſe ſubiicere Eccleſiæ, & eius præceptis. Hoc ſolum inter adultos, & infantes intereſt, quòd illi, quia ſui iuris ſunt, debent propria voluntate ſe Eccleſiæ ſubiicere; & niſi faciant, peccant: iſti, quia non ſunt iuris ſui, ſed parentum, poſſunt eorum voluntate Eccleſiæ ſubiici. Itaque eſt illis aliena voluntas loco rectæ rationis, quam habere deberent ſi eſſent adulti: proinde nulla eis fit iniuria, ſed ingens beneficium, cùm baptizantur, licet inde conſequatur obligatio obediendi Eccleſiæ. Sed neque infantes illi, qui carent parentibus, & tutoribus, & ab aliquo extraneo baptizantur, queri poſtea poſſunt. Nam qui illos baptizant, agunt eorum cauſſam; ſicut ſi quis incideret in hominem læthaliter vulneratum, qui uſu linguæ, & rationis careret, eumque in domum aliquam portari, & à medicis curari iuberet, certè non poſſet ille poſtea queri de iſto homine, quod eum obligaret ad ſoluendam medicis mercedem: & ſi quereretur, ac ſoluere nollit, ab omni iuſto iudice damnaretur.



CAPVT NONVM.

Soluuntur obiectiones Anabaptistarum.

SED operæ pretium erit soluere argumenta illa triginta & sex, quæ pro se adducunt Ministri Transylvaniæ.

PRIMUM argumentum: *In sacris nullibi inuenitur Padobaptismus, & nullum de eo mandatum, vel exemplum habemus; ergo reiciendus.* RESPONDEO; Argumētum hoc aduersus Lutheranos magnas vires habet, quippe qui eo principio passim vtuntur. At apud Catholicos nihil vnquam valuit. Licet enim non inueniamus expressè mādātum, vt baptizemus infantes; tamen id & colligitur satis apertè ex Scripturis, vt suprā ostendimus; & præterea non minoris auctoritatis est apud nos Apostolorum traditio, quàm Scriptura: eodem enim spiritu Apostoli loquebantur, quo scribebant. Esse autem hanc Apostolicam traditionem, inde scimus, vnde sci-
mus Scripturam Apostolicam esse Scripturam Apostolicam, nimirum ex testimoniis antiquæ Ecclesiæ.

SECUNDVM argumentum: *Mandatum est, vt prius doceamus, postea baptizemus; prius ergo docendi infantes, quàm baptizentur: Itē, docete omnes gentes baptizantes, Matthæi 28.* RESPONDEO; Ponit eo loco Dominus ordinem, quem seruare debeant Apostoli in conuersione Gentilium, vt prius instruerent eos, deinde baptizarent, postremò monerent, non sufficere fidem, & Baptisma, nisi etiam adderent postea legis obedientiam, & opera bona. Idem enim subiungit: *Docentes eos seruare omnia, quacumq; præcepi vobis.* Qui quidem ordo seruandus est, cum fieri potest, vt etiam ab Ecclesia diligenter seruetur, cum adulti ad fidem veniunt. At si vel propter incapacitatem hominum, vel propter defectum aquæ, non possint seruari omnia, vel nō eodem ordine, certè præstat aliquid seruare, quàm nihil. Si quis em̃ in deserto esset cum homine Gentili iam moriente, vbi non esset aqua, posset illum docere, & instruere, vt crederet; nec peccaret contra præceptū Domini: *Docete baptizantes*, quia id intelligitur, cum fieri potest. Quia igitur infantes non sunt capaces doctrinæ, & capaces sunt Baptismi, mutatur in eis ordo, vt prius baptizentur, ne fortè pereant sine hoc vnico præsidio, ac deinde cum ado-
d 5 leuerint,

56 *Cap. IX. De Sacramento Baptismi. Lib. I.*

leuerint, doceantur. Quemadmodum si adultus ad fidem ueniat, & iusta de causa differendus sit Baptismus, tamen docendus erit, & monendus, ut Dei legem obseruet. Et stultus sanè esset, qui diceret, non debere Catechumenos legem Dei seruare, & benè viuere, quia Dominus post Baptisma posuit, ut moneantur de obedientia legis præstanda.

TERTIUM argumentum: *Gloriatur Paulus, & gratias agit Deo, quod neminem baptizauerit præter Caium, & Crispum, & Stephanæ domum. 1. Corinth. 1.* Quàm igitur necessarius sit Pædobaptismus, illinc collige. Et quod præterea Christus ne quidem adultum baptizârit vnquam, vel Ioannes Baptista infantem. **RESPONDEO**; Quòd Christus, Ioannes, & Paulus non baptizârint infantes; aduersarij dicunt, sed non probant, immò contrarium est probabilius, saltē de Paulo, & Ioanne. Nam in domo Stephanæ, quam Paulus baptizauit, probabile est fuisse aliquem infantem. Porro ad Ioannem exibat omnis Hierusalem, immò & omnis Iudæa, ut baptizaretur ab eo, Matth. 3. & Marc. 1. **Quis** autem asserat, inter omnes nō fuisse ullū, qui adduceret filium suum? Christus autem nō baptizabat quidem ordinariè per se, sed per discipulos, Ioan. 4. tamen aliquem, vel aliquos sine dubio baptizauit, ut haberet baptizatos, per quos alios baptizaret, ut scribit Augustinus in epist. 108. ad Seleucianā, & Euodius Apostoli Petri successor in Antiocheno Episcopatu, scribit, B. Virginem, & S. Petrum ab ipso Christo baptizatos, ut refert Nicephorus lib. 2. histor. cap. 3. & Euthymius in cap. 3. Ioannis. **SEDE** esto ita sit, ut illi dicunt, à Christo, Ioanne, & Paulo nullum infantem baptizatum; num ideò non sunt infantes baptizandi? aut num ideò antiquis temporibus non baptizabantur? Ioannes enim fortè nullum infantem baptizauit, quia eius Baptisma non erat infantibus necessarium; Christus, & Paulus maioribus rebus intenti, baptizandi officium aliis committebant: ut patet de Christo, Ioan. 4. & de Paulo, Acto. 19.

QUARTUM argumentum: *Reprobi non sunt baptizandi. Multis ex infantibus sunt reprobi, ergo abstinendum, ne prophanetur Sacramentum per nostram ignorantiam.* **RESPONDEO** **PRIMO**; Eodem argumento probarent, neque adultos esse baptizandos. **SECUNDO**; Rectè probat hoc argumentum contra Caluinum, & Bucerum, & similes, qui volunt Baptisma esse sigillum æternæ beneuolentiæ Dei. At apud nos
nihil

nihil probat. Nam etiam si paruulus fortè sit reprobus, tamen dum baptizatur, verè iustificatur, & proinde Sacramentum non prophanatur, cùm sit equè in illo, atque in quouis electo signum gratiæ verum, & efficax.

QVINTVM argumentum: *Qui non credit, à Baptismo ar-
cendus est, Actor. 8. Si credis licet. Infantes non credunt, Deu-
ter. I. Nec sciunt malum, nec bonum.* RESPONDEO; Hoc ar-
gumentum demonstratio est contra Lutheranos, qui existimant
Sacramenta nihil esse aliud, nisi instrumenta alendæ fidei: sed
quid illi de hac re sentiant, sequenti capite explicabimus, ubi
etiam hoc argumentum soluemus. Interim dico, sufficere in-
fanti fidem alienam sicut ei obfuit peccatum alienum.

SEXTVM argumentum: *Cogi homines ad Baptismum, est
plus tribuere Sacramento, quam par sit, & Papa opinionem sta-
bilire, qui docet neminem sine Baptismo posse saluari.* RE-
SPONDEO; Argumentum verissimè concludit; sed cōtra Cal-
uinum, non contra Catholicos.

SEPTIMVM argumentum; *Coniungēda est aqua cum Spi-
ritu, Ioan. 3. & claus fides cum Baptismo, Marci 16. Qui credi-
derit, & baptizatus fuerit. At infantes spiritu obruti sunt, &
credere non possunt.* RESPONDEO; Quod ad Spiritum atti-
net, locus Ioannis non docet baptizatum debere sentire mo-
tionem Spiritus sancti, ut Anabaptistę credunt, sed solū vim
aquæ in Baptismo esse à Spiritu sancto; & sicut aqua lauat ex-
terius, ita Spiritum lauare interius, quod potest fieri etiam in
dormiente, & non sentiente. Fit enim illa lotio, & renouatio
interior per infusionem habituum, qui sine vllō nostro actu
infundi possunt. Quod autem ad fidem attinet, locus Marci
ultimo intelligitur sine dubio de adultis. Nam præcedit: *Præ-
dicare Euangelium omni creatura: Qui crediderit, &c.* At in-
fantibus stultum esset prædicare. Adde quod hoc ipsum fa-
teri coguntur Anabaptistæ, si sibi constare volunt. Nam do-
cent infantes saluari sine fide, & sine Baptismo, ut Melan-
chthon testatur in locis, tit. de Baptismo paruulorum. Adde de-
nique non deesse fidem illis necessariam, ut suprà diximus, &
infra dicemus.

OCTAVVM argumentum: *Ad fidei articulos tantum cre-
dendos Ecclesia obligatur; ergo cogi ad Padobaptismum nō de-
bet, cùm non sit articulus fidei.* RESPONDEO; Ad fidem per-
tinere infantes posse baptizari. Nam etiam si non haberetur
expressè

58 *Cap. IX. De Sacramento Baptismi. Lib. I.*

expresse in Scripturis; habetur tamen in traditione Apostolica. Præterea deducitur euidēter ex Scripturis, vt diximus. Argumentum tamen rectē concludit cōtra Zvvinglium, & Caluinum, qui non admittunt traditionē, & putant, Baptismum non esse necessarium; & locum Euangelij Ioan. 3. *Nisi quis renatus fuerit, &c.* detorquent ad metaphoras.

NON VM argumentum: *Si infantes baptizandi sunt, ergo & communicandi; Et ostendit Vetustas, quæ eiusmodi inanes lotiones, & cænas pueris obtrudere coacta fuit.* RESPONDEO; Non esse parem rationem Baptismi, & Communionis. Nam Baptismus necessarius paruulis est, quia alioqui pereunt in æternum, si sine Baptismo de hac vita decedant: Communio verò, vt etiam Sacramenta cetera, non sunt necessaria, nisi adultis, post Baptismum. Id quod ex ipsorum natura, & effectis patet. Eucharistia enim (vt de ea solū loquamur) instituta est, vt vitam spiritualem in Baptismo acquisitam conseruet, ac nutriat, quod facit in rebus corporalibus cibis corporalis, qui vitam animalem conseruat. Sicut igitur sine cibo potest aliquandiu viui, nimirum donec naturalis calor non cœperit humorem vitalem consumere; ita quoque sine Eucharistia conseruari potest vita spiritualis, donec concupiscentiæ calor non cœperit humorem gratiæ, & virtutum depasci: quod certē non accidit in infantia, sed in adulta solū ætate. Quare ipse etiam Dominus, vt indicaret Eucharistiam non esse pro infantibus institutam, noluit eam in lacte constituere, quod est vnicum infantium alimentum, sed in pane, & vino, quæ ad solos adultos propriè pertinent. Porro veteres aliqui certis de causis in infantium ora infundebant eo modo quo poterant Eucharistiam, sed neque eæ causæ modò locum habent, & aliis de causis magis vrgentibus Ecclesia id non facit. Verū de hac realibi plura dicenda sunt.

DECIMUM argumentum: *Non datur Baptismus absque pœnitentia, Actor. 2. & Marc. 1. At infantes pœnitere nesciunt.* RESPONDEO; Pœnitentiam necessariam esse in Baptismo adultorum, de quo tractatur in illis locis ob peccata actualia, quæ adulti commiserunt: originale enim peccatum non est materia pœnitentiæ. Nemo enim rectē pœnitentiā agit eius peccati, quod ipse non commisit, & quod in eius potestate non fuit: originale autem peccatum non ipsi committimus, sed trahimus ab Adamo per naturalem propagationem. Vnde Ro-

de Roman. 9. dicitur de infantibus: *Cum nihil boni, vel mali egissent.*

VNDECIMUM argumentum: *Nazianzenus in sermone de Baptismate optat differri Baptismum, donec pueri de fide sua aliquid possint respondere. Augustinus lib. 4. de Baptismo contra Donatistas, paruulorum Baptismum scribit non fuisse à Conciliis stabilitum, incæpisse autem Origenis tempore. Ad-* dunt testimonium Trismegisti, Sybillarum, & Musculi. *RE-* spondeo; Nazianzenus optabat quidem Baptismum differri vsque ad triennium, vt pueri aliquo modo respondere possent; excipit tamen periculum mortis. Vult enim, si periculum conspiciatur, baptizari quocunque tempore; & probat ex Circumcisione, aliisque argumentis. Itaque duo habet Nazianzenus contra Anabaptistas. VNVM, posse infantes baptizari quocunque tempore. ALTERVM, nunquam esse differendum vltra triennium Baptismum infantium. At certè pueri trium annorum nondum vtuntur ratione, neque possunt credere, aut pœnitere, aut alia præstare, quæ cupiunt Anabaptistæ. ADDE, quòd Nazianzeni consilium non est probatum aliis Patribus: utilitas enim illa perexigua est, & periculum ingens incurrere possent eiusmodi infantes, ob inopinatos casus. Idem dici debet ad Tertullianum, qui in libro de Baptismo prope finem, idem consilium dedit, quod postea Nazianzenus. Iam verò AVGVSTINVS perperam & mendaciter citatur ab Anabaptistis. Non enim negat à Conciliis stabilitum Pædobaptismum Augustinus, quòd eum infirmare velit, sed vt ostendat antiquiorem esse omnibus Conciliis. Sic enim loquitur lib. 4. de Baptismo infantium: *Quod vniuersa teneat Ecclesia, nec Conciliis institutum, sed semper retentum est non nisi auctoritate Apostolica traditum rectissimè creditur.* Ex quibus verbis refellitur etiam mendacium de inuento Pædobaptismo Origenis tempore: nam Augustinus neque dicit inuentum Pædobaptismum Origenis tempore, neque dicere potest, cum affirmet descendere ex Apostolica traditione. Porro testimonium Musculi Lutherani non pluris facimus, quàm ipsoꝝ Anabaptistarum testimonia. Trismegistus, & Sybillæ non loquuntur de Christi Baptismo, sed de aliqua Ethnica lotionem, quæ nihil ad nos.

DVODECIMVM argumentum: *Corde creditur ad iustitiam, ore confessio fit ad salutem, Rom. 10. Id paruuli nō possunt.*

RESPON-

60 *Cap. IX. De Sacramento Baptismi. Lib. I.*

RESPONDEO cum Augustino loco citato, lib. 4. de Baptismo, cap. 24. hoc esse, quod Apostoli tradiderunt, infantes saluari per Baptismum, etiam si corde non credant, nec ore confiteantur. Et si enim fidem actualem non habent, habent tamen fidei Sacramentum, quomodo è contrario bonus latro non habuit fidei Sacramentum, & saluus fuit per ipsam fidem, & conuersionem ad Deum. Itaque in necessitate supplet fides, & votum, Sacramenti defectum; & contrà supplet Sacramentum, fidei actualis & propriæ defectum.

DECIMUM TERTIUM argumentum: *Perfecta Sacramenta cum sint, perfectos requirunt. Infantes admodum imperfecti; ergo, &c.* RESPONDEO; Res perfectæ si comparentur ad causam agentem, non conueniunt nisi perfectis; non enim possunt perfecta opera facere, nisi perfecti artifices. At si comparentur ad causam patientem, id est, ad materiam seu subiectum, tunc conueniunt imperfectis, non perfectis: earum enim munus est perficere res imperfectas. Huius generis est Baptismus respectu hominum: est enim perfectum Sacramentum, quod perficit homines imperfectos. Simile est de medicina corporali: perfecta enim medicina non datur perfectis in sanitate, sed valde imperfectis, id est, valde ægrotis. Vnde Apostolus, Hebræ. 6. dicit, imperfectorum esse baptizari: *Intermittentes inchoationis Christi sermonem ad perfectionem feramur, non iterum iacentes fundamentum penitentia Baptismatum, &c.*

DECIMUM QUARTUM argumentum: *Cæna Domini requirit externam fidei confessionem, & propterea ab ea arceantur paruuli. At Baptismus quoque requirit externam confessionem, cum nihil sit aliud, nisi fidei protestatio.* RESPONDEO; Tam Cæna Domini, quàm Baptismus sunt fidei externæ professiones: & idè per eorum susceptionem profiteamur fidem, etiam si nihil omninò verbis diceremus. Quare etiam paruuli dum baptizantur, profitentur fidem; & idem facerent, si communicarent: non enim ista est causâ cur arceantur à communione.

DECIMUM QUINTUM argumentum: *Christi symbola ad ipsius commemorationem, et prædicationem sunt ordinata. Nihil horum possunt paruuli facere.* RESPONDEO; Qui suscipiunt Christi symbola, hoc ipso quod ea suscipiunt, commemorant, & prædicant Christum: quare etiam paruuli id faciunt.

ciunt. Dum enim merguntur in aquam, commemorat Christi mortem, & sepulturam; dum eleuantur ab aqua, commemorant Christi resurrectionem. Neque aliud requirit Apostolus, Rom. 6.

DECIMUM SEXTUM argumentum: *Fides ex auditu: auditus per Verbum Dei. Si dixeris infantes fidem habere, nouam noua fidei reuelationem in illis demonstrabis, quod ex Verbo Dei probare nunquam poteris.* RESPONDEO; Argumentum concludit contra Lutheranos, qui fidem actualem ponunt in infantibus.

DECIMUM SEPTIMUM argumentum: *Christus annorum triginta baptizatur.* RESPONDET Nazianzenus oratione in sanctum lauacrum, non omnia quæ Christus fecit, à nobis eodem modo fieri posse, vel debere. Ieiunauit ille sine omni cibo, idq; mox à Baptismo; nos id facimus alio modo, & alio tempore. Eucharistiam dedit ille in cœnaculo, post Cœnam, & ante passionem: nos in templis ante Cœnam, post resurrectionem. ADDE præterea, Christum distulisse Baptismum ad annum trigesium, tum quia non egebat ipse Baptismo, tum quia non erat ei periculum ne morte præueniretur; tum quia decreuerat in ætate perfecta auspicari prædicationem suam, & ostensionem suam ad homines; in Baptismo autem agnoscere cœpit ob miracula, quæ tunc acciderunt. Nos autem egere Baptismo incipimus continuò ac nati sumus; nec sumus certi de tempore vitæ nostræ: & denique non baptizamur, ut mundo innotescamus, sed ne in æternum pereamus. ADDE, quòd Christus circumcisus est in infantia: quod autem Iudæis erat Circumcisio, nobis est Baptismus.

DECIMUM OCTAVVM: *Quicumq; baptizantur, Christum induunt; an infantes Christum induant, expende.* RESPONDEO; Induunt infantes Christum, quandoquidē per habitum gratiæ illis infusum, exuunt veterem hominem, & induunt nouum. Posse autē id fieri sine proprio mentis actu, docet Apostolus, Rom. 5. *Sicut, inquit, per Vnius inobedientiā peccatores constituti sunt multi, ita & per Vnius obedientiam iusti cōstituentur multi.* Itaq; sicut hoc ipso, quod aliquis nascitur ex Adam, cōmunicatur ei peccatum Adæ, etiam si vsum mentis non habeat; ita hoc ipso quod aliquis renascitur ex Christo per Baptismum, cōmunicatur ei Christi iustitia, & ita Christum induit, licet per ætatem non habeat vsum rationis.

62 *Cap. IX. De Sacramento Baptismi. Lib. I.*

DECIMUM NONVM: *Novi Testamenti Sacramenta sunt spiritualia; infantes toti carnales.* RESPONDEO; Idèd recipiunt Sacramenta spiritualia, vt fiant etiam ipsi spirituales: quales ferè fiunt per habitum, non per actum.

VICESIMVM: *Apostoli hominum piscatores sunt, non infantium.* RESPONDEO; Quasi verò infantes non sint homines. Quanquam piscari propriè non est baptizare, sed prædicare; & fatemur infantibus non esse prædicandum.

VICESIMVM PRIMVM: *Qui accedunt ad Sacramenta, probare seipsos debent, 1. Corinth. II. Infantes id non possunt; ergo, &c.* RESPONDEO; Id solum Apostolus dixit de Eucharistia, quæ requirit, vt homo sine conscientia peccati accedat, alioqui indignè accedit, & vt discernat corpus Domini. Quocirca rectè Ecclesia non communicat infantes, qui non possunt discernere corpus Domini. In Baptismo non requiritur talis probatio. Potest enim quis accedere cum cōscientia peccatorum, dummodò pœniteat eam peccasse, & propositum habeat rectè viuendi: est enim Baptisma institutum, vt purget peccata. Quamuis autè requiratur in adultis ad Baptismum alia quædam probatio, vt non accedant ficto animo, neque cum affectu peccati; tamen in infantibus nulla probatio necessaria est, cum obicem ponere non possint.

VICESIMVM SECVNDVM argumentum: *Qui Christianus fieri vult, induere debet nouum hominem, exuto Veteri. Id non possunt infantes.* RESPONDEO; Iam dixi, assumptum esse falsum. Quanquam nec maior propositio est absolutè vera, cum Christianus sit etiam is, qui est malus, modò Baptismum perceperit, & Christi fidem profiteatur.

VICESIMVM TERTIVM: *Fidelis dispensator dat cibum in tempore suo, & aspicit albas messes, non virides, & tenerrimas.* RESPONDEO; Id optimè seruat Ecclesia, quæ paruulis dat Baptismum, non Communionem: quia Baptismi semper est tempus, non autem Communionis. Porro regiones albæ ad messem, dicuntur homines dispositi, & idonei ad recipiendam salutem; quales semper sunt paruuli; non autem semper tales sunt adulti, qui variis desiderijs, & peccatis impediuntur.

VICESIMVM QVARTVM: *Illi verè dicuntur fratres, qui ex eodem poculo bibere possunt. Infantes non possunt; ergo, etc.* RESPONDEO; Dicuntur fratres qui bibūt ex eodem poculo, sed

sed maiori ratione dicuntur fratres, qui Baptismo eodem renascuntur. Nam Baptismus facit nos Dei filios, & fratres Christi, ac omnium aliorum similiter renatorum: bibere autem ex eodem poculo, solum est signum fraternitatis. Vnde Apostolus utrumque dixit de Baptismo, 1. Corinth. 12. *Omnes vos in vno Spiritu in vnum corpus baptizati estis.* De Eucharistia, 1. Corinth. 10. *Vnus panis, & vnum corpus multi sumus.* Et contra, bibere ex diuersis poculis, ita ut alij bibant calicem Christi, alij calicem dæmoniorum, signum est diuersitatis, & schismatis. Quod si qui ex nullo calice bibant, quod faciunt paruuli, non impedit fraternitatem, quæ aliunde haberi potest, nimirum ex Baptismo, qui verè nos fratres sub vno Patre, immò & membra vnius corporis facit, 1. Corinth. 12. *Omnes nos in vno Spiritu in vnum corpus baptizati sumus.* Id quod etiam in rebus carnalibus videmus; infantes enim interdum fratres sunt hominum adultorum, quia ex eodem Patre geniti sunt, licet non vescantur eodem pane, nec bibant ex eodem poculo.

VICESIMVM QVINTVM: *Qui Sacramentorum externam partem tantum sumit, nihil sumit. Infantes aqua sola tinguntur, cum careant ratione; ergo, &c.* RESPONDEO; Falsa est assumptio. Licet enim infantes careant rationis usu, non tamen carent anima rationali, eiusq; potentiis, in quibus Deus per gratiam habitare potest, & habitat, cum baptizati sunt, ut AVGVSTINVS scribit in epist. 57. ad Dardanum. Vbi dicit mirabile esse, & tamen verum, quod in multis Deus non habitat, qui eum nòrunt, ut in Philosophis, de quibus Roman. 1. *Cum cognouissent, non sicut Deum glorificauerunt: & contra in multis habitat, qui eum non nòrunt, ut in paruulis baptizatis.* Et lib. I. de peccatorum meritis, & remiss. cap. 9. *Dat, inquit, sui Spiritus occultissimam gratiam, quam etiam latenter infundit & paruulis.*

VICESIMVM SEXTVM: *Non debet ad Christum Vocari, qui nò potest à Ioanne Baptista preparari.* RESPONDEO; Verum est, si egeat præparatione; paruuli autè ea non egent. Quocirca Dominus ait Matth. 19. *Sinite paruulos venire ad me: neq; iussit eos exspectare donec à Ioanne præpararentur.*

VICESIMVM SEPTIMVM: *Baptismus est tinctio cum doctrina, & manuum impositione, Hebr. 6.* RESPONDEO; Non hoc dicit Apostolus: sic enim loquitur: *Intermittentes inchoa-*

64 Cap. IX. De Sacramento Baptismi. Lib. I.

tionis Christi sermonem, ad perfectionem feramur, non rursus iacentes fundamentum penitentiae ab operibus mortuis, & fidei ad Deum Baptismatum doctrina, impositionis quoque manuum, ac resurrectionis moriuorum, & iudicij aeterni. Vbi illud: Baptismatum doctrina, coniungendum est cum illis, non rursus iacentes fundamentum. Et sensus est; Non reuertamur iterum ad fundamentum doctrinae de Baptismo tradendae, & de impositione manuum, id est, de Confirmatione: ista enim traduntur Catechumenis initio fidei, nunc ad altiora tendere nos oportet. Vbi non definitur Baptismus, tinctio cum doctrina; sed asseritur, doctrinam de Baptismo ad incipientes, non ad perfectos pertinere, quod est contra Anabaptistas, qui Baptismum perfectorum esse volunt.

VICESIMVM OCTAVVM: Baptismus est mortificatio, & ablutio cum inuocatione nominis Iesu, Act. 22. RESPONDEO; Etiam in paruulis Baptismus mortificat peccatum. Porro inuocatio illa non est de substantia Baptismi, sed conueniens, & adhibenda cum fieri potest.

VICESIMVM NONVM: Baptismus est ablus corpore aqua in certitudine fidei, depulsa mala conscientia, Hebr. 10. RESPONDEO; Non definit Baptismum Apostolus, sed monet eum, qui vult ad Deum accedere, ut habeat plenam fidem, & bonam conscientiam, & praeterea Baptismum. Sic enim ait: Accedamus in vero corde, cum plenitudine fidei, aspersi corda a conscientia mala, & abluti corpus aqua munda.

TRICESIMVM: Baptismus est depositio sordium, & peccatorum, & sepeliri cum Christo, Coloss. 2. RESPONDEO; Id etiam infantibus conuenit, qui habent peccatum originale. Et si enim id Anabaptistae negant: tamen Paulus affirmat, Rom. 5. In quo omnes peccauerunt. Et Ephes. 2. Eramus et nos natura filij irae.

TRICESIMVM PRIMVM: Baptismus est stipulatio bonae conscientiae erga Deum, 1. Petri 3. RESPONDEO; Effectus est ille Baptismi, non ipsa Baptismi essentia. Porro eum effectum in infantibus Baptismus efficit fundamentaliter, ut sic loquamur, facturus deinde, cum ijadoleuerint, etiam formaliter: abluit enim peccatum, ex qua ablutione oritur postea testimonium bonae conscientiae.

TRICESIMVM SECVNDVM: Baptismus est lauacrum regenerationis, & renouationis Spiritus sancti, Tit. 3. & Ioan. 3.

TRICESI-

TRICESIMVM TERTIVM: *Baptismus, qui à Prophetis figuratus est, Ez. ch. 36. Zach. 13. nihil ad infantes pertinet.* RESPONDEO; Falsum assumunt, ex eo quòd putant infantes nō habere peccatum originale: hinc enim negant infantes regenerari, vel mundari debere.

TRICESIMVM QVARTVM: *Sacramenta sunt cibi solidi. Infantes lacte indigent.* RESPONDEO; Sacramentum Eucharistiæ est solidus cibus, ideoque sub specie panis institutum est, nec paruulis datur. At Baptismus non est cibus, sed regeneratio, quæ maximè conuenit paruulis; paruuli enim nāsci solent. Quare Apostolus Hebr. 6. Baptismum imperfectorum esse dicit.

TRICESIMVM QVINTVM: *Prius nos esse oportet animales, deinde spirituales, 1. Corin. 5. Sacramenta sunt instrumenta spiritualia; ergo infantes spiritu renasci non possunt.* RESPONDEO; Vis argumenti hæc videtur esse. Sacramenta sunt spiritualia; ergo spiritualibus tantum conueniunt. Sed infantes non sunt spirituales, vt ex Apostolo colligitur, qui docet nos prius esse animales, & postea spirituales; igitur Sacramenta infantibus non conueniunt; Sed in hoc argumento mala est prima consequentia. Sacramenta enim sic sunt spiritualia, vt homines spirituales ex animalibus efficiāt, cum vim habeant regenerandi, & renouandi, Ioan. 3. & Tit. 3.

TRICESIMVM SEXTVM. Adultos cæcos, surdos, & mutos nemo vnquam baptizare audebit; tantò minus infantes, qui nec ambulare possunt, nec audire, nec loqui. RESPONDEO; Eiusmodi adulti, si indicare possint aliquo modo suam voluntatem, qua baptizari velint, aut certè antea indicaerint, quàm in eum morbum inciderent, omninò baptizari possunt, ac debent: vt apertè tradit Concilium III. Carthag. cap. 34. & Arausicanum l. can. 12. & Augustinus lib. 1. de adulterinis coniugiis, cap. 26. de ægrotis, qui repentinè obmutescunt; Quòd si sciri nequeat eorum voluntas, non baptizantur, quia in iis, qui rationis vsum habent, requiritur eorum consensus, vt suprà diximus; quod in infantibus non requiritur vt quibus sufficit aliorum consensus. Item nescimus de adultis cæcis, mutis, & surdis, an non ponant obicem aliquem; quod de infantibus certè scimus.

CAPVT DECIMVM.

*Quid sentiant aduersarij de fide, qua requiritur
in Baptismo paruulorum.*



ESTAT ALTERA quæstio de fide, qua paruuli baptizantur. Sunt autem de hac re duæ extremæ sententiæ hæreticorum, inter quas media incedit sententia Catholicæ Ecclesiæ.

PRIMA sententia Lutheranorum est, qui fidem actualem, aut aliquid simile actuali fidei paruulis tribuunt. Primus Lutherus anno XX. in lib. de captiuit. Babylon. cap. de Baptismo, cum dixisset: *Omnia Sacramenta ad fidem alendam instituta sunt.* Item: *Sacramenta non iustificant, nec vlli prosunt; sed sola fides.* Item: *Sacramenta non implentur dum fiunt, sed dum creduntur.* vidit repugnare his sententiis paruulorū Baptismum, atq; eum sibi ipse obiecit: *Opponeretur, inquit, forsans, qua dicta sunt, Baptismus paruulorum, qui promissionē Dei non capiunt, nec fidem Baptismi habere possint.* Respondet autem, ac duo dicit. PRIMO, infantes credere. SECUNDO, fidē acquirere, non vi Sacramenti, sed per orationem Ecclesiæ, & fidem offerentium paruulum ad Baptismum; & sic exponit, quod dici solet, paruulis fide aliena succurri. Quod autem loquatur de fide actuali paruulorū, non de aliquo habitu, patet ex illis eius verbis: *Sicut Verbum Dei potens est, dum sonat, etiam impij cor immutare, quod non minus est surdū, & incapax, quam vllus paruulus, ita per orationem Ecclesia offerentis, & credētis, cui omnia possibilis sunt, & paruulus fide infusa mutatur, mundatur, & renouatur.* Hæc ille. At certē impius cum ad vocem verbi Dei immutatur, vt velit conuerti, actualiter immutatur, non habitualiter.

Item Lutherus in lib. contra Cochlæum anno XXIII. Dicimus, inquit, ad Baptismum infantes credere per vim Verbi, quo exorcizantur, & per fidem Ecclesia eos offerentis, & eis fidem orationibus suis impetrantis. Alioqui mera, et intolerabilia essent mendacia, quando baptizans a paruulo quarit, an credat, nō baptizaturus, nisi vice eius respondeatur, Credo. Vt quid interrogat an credat, si certum est, eos non credere? Vt Cochlaus contendit. Esso, Augustinus sic aliquando dicat: sed Cochlaus ris sit, esse sic ab homine dictum: nos volumus hoc dictum diuinis testimo-

*testimoniis probari. Quin asserimus paruulos prorsus non esse baptizandos, si verum est, in Baptismo non credere, ne illudatur maiestatis Sacramentum, & Verbum. Debemus autem & hunc negata in paruulis fidei errorem Sophistas, &c. Vbi aper-
tissime loquitur de fide actuali, non de habituali: neque enim Cochleus, aut Augustinus, aut Scholastici; quos ille Sophistas vocat, fidem habitua-lem in paruulis negarunt. Et preterea vult Lutherus fidem esse in paruulis ante Baptismum, dum exorcizantur, & interrogantur: illa autem non potest esse fides nisi actualis, habitualis enim non infunditur ante Baptismum, sed in ipso Baptismo. Idem etiam scripsit in lib. ad VValdenses, ubi ait, prestare prorsus omittere Baptismum in paruulis, quam baptizare eos sine fide. Nam si sine fide accipias Sacramentum, magno tuo malo accipies. Et probat ex illo Marci ult. Qui crediderit, et baptizatus fuerit. Qui locus de actuali fide intelligitur.*

Hæc sententia visa est admodum dura omnibus aliis, & perierit tres sectas diuersas. Quidam enim negarunt paruulos baptizandos, cum omnino crederent sine fide Baptismum nihil prodesse, vt Lutherus dixerat; & simul experimento certissimo tenerent, paruulos non credere, cum aperte renituntur, & eiulent cum baptizantur. Atque hi sunt Anabaptistæ, de quibus supra diximus.

Alij non negarunt paruulos baptizandos, sed negarunt fidem in paruulis requiri; & ij sunt Sacramentarij, de quibus mox dicemus, dum alteram sententiam referemus.

Denique alij neque fidem, neque Baptismum paruulorum negarunt, sed mollire conati sunt, & exponere Lutheri sententiam. Itaque anno XXXVI. conuenerunt Lutherani ad Conciliabulum VVirtembergense, cuius acta exstant apud Cochleum lib. 3. miscellaneorum, tractat. 8. cap. 2. In ea Pseudosynodo hæc pronunciata habentur. PRIMVM, reiiciendum esse errorem illorum, qui imaginantur saluari infantes sine aliqua actione ipsorum. SECVNDVM, etsi nos non intelligamus qualis sit illa actio paruulorum, tamen certum esse in eis fieri sanctos, & novos motus, sicut in Ioanne Baptista, quando exultauit in utero. TERTIVM, licet non sit imaginandum, quod infantes intelligant, tamen motus eorum, & inclinationes ad credendum, & diligendum Deum, similes esse motibus fidei, & dilectionis: & hoc esse intelligendum, cum dicuntur infantes credere.

Hanc mitigationem sententiæ Lutheri, sequi videntur cõmuniter Lutherani. Philippus in locis anni LVIII. tit. de Baptismo paruulorum: *De infansibus hoc satis est tenere; Spiritus sanctus per Baptismũ eis datur, qui efficit in eis novos motus, novas inclinationes ad Deum pro ipsorum modo.* Idem habet Ioan. Brentius in Apolog. pro confess. VVittember. cap. de Baptismo; & David Chitræus in suo Catechismo, loco 7. de Baptismo. Item Illyricus cum Centuriatoribus, Cent. 2. cap. 4. col. 63. & Cent. 5. cap. 4. col. 517. reprehendit Iustinum, & Augustinum, quod velint infantes in Baptismo non credere fide propria, sed aliena. Denique (vt omittam ceteros) Martinus Kemnitius in 2. part. Exam. Trident. Concilij ad canonem 13. 7. sessionis, pag. 258. & sequentibus, dicit quidem esse difficile intellectu, & explicatu, quemadmodum infantes credant: *Tamen, inquit, quomodo hoc simplicissimè possit intelligi, explicatur in formula Concordia inter Theologos Saxonia, & superioris Germania anno M. D. XXXVI. constituta, &c.* Et ponit breuiter summam eorum, quæ ex conuenticulo VVittembergenſi suprà citauimus.

Est autem hic **OBSERVANDVM**, Kemnitium mira fraude, & artificio, immò aperto mendacio asserere, hanc sententiam conuenticuli VVittembergenſis concordare cum Lutheri sententiis suprà citatis, & rursus Lutherum cum Augustino; & contrà Synodum Tridentinam dissentire in hac re à Synodo generali Viennensi, quod Synodus Viennēsis docuerit infantibus in Baptismo infundi habitus fidei, spei, & charitatis: Synodo autem Tridentinæ ita sorduerit illud decretum, vt ne mentionem quidem eius facere voluerit. Quæ mendacia paulò pōst refellemus; atque hæc de prima sententia.

ALTERA sententia in altero extremo: infantibus nullam fidem in Baptismo esse necessariam. Hanc videtur primus etiam Lutherus docuisse. Nam licet antequam Anabaptistæ exorirentur, illa scripserit, quæ suprà citauimus; tamen postquam illi apparuerunt, scripsit librũ contra eos, anno M. D. XXVIII. & vbi ad hoc argumentum venisset de fide infantum, dixit nihil interesse, siue credant, siue non credant. Baptismum enim non fundari sup̄ fidem dantis, aut recipientis, quæ incertissima est, sed super Dei mandatum, & institutionem. Et similia habet in homiliis de Baptismo anno XXXVII. & XL. habitis; tamen hoc principium Lutheri nõ est solidum. Nam
etiam

etiam si ex eo, quod Sacramentum non pendet à fide nostra, sed à diuina institutione, sequatur illud in se semper esse efficax, non tamen sequitur nobis esse vtile, & fructuosum, nisi cum fide accipiatur; alioqui etiam, qui ficto animo accedunt, vel peccatum deferere nolunt, per Baptismum purgarentur. Ideo Sacramentarij sequuntur quidem Lutherum in eo, quod scribit non requiri fidem: sed ex alio fundamento id colligunt, nimirum ex promissione facta Abraham, & semini eius, vel rectè ex diuina prædestinatione.

Calvinus libro quarto Institut. cap. 16. cupiebat primam Lutheri sententiam, quam supra explicauimus, defendere, sed non est ausus. Vnde sic loquitur §. 18. *Non satis tutum fuerit hoc adimere Domino, ne sese illis quoquomodo exhibere cognoscendum queat.* & §. 19. *Non quod eadem esse fide præditos temerè affirmare velim, quam in nobis experimur, aut omninò habere notitiam fidei similem.* Hæc ille. Vides quomodo reii- cit decretum VVittembergense? Inde §. 21. *Quos electione sua dignatus est Dominus, si accepto regenerationis signo presenti Vita antè demigrent, quàm adoleuerint; eos Virtute sui Spiritus nobis incomprehensa renouat, quomodo expedire solus ipse prouidet.* Similia habet Theodorus Beza in sua confess. cap. 4. artic. 48. & Petrus Martyr, in cap. 1. & 7. prioris ad Corinth. vbi apertè dicit, infantes non intelligere, neque credere, & tamen rectè baptizari, quia iam antea sanctificati sunt, & membra Ecclesiæ effecti per donum electionis diuinæ, & promissionem parentibus factam. Immò VVolfgangus Musculus, qui interfuerat Conciliabulo VVittembergensi, postea Sacramentarius factus, in locis communibus, tit. de Pædo- baptismo, dicit admodum inconsultè scripsisse Lutherum, si constet paruulos non credere, baptizandos non esse: & hanc fuisse occasionem Anabaptismi.

TERTIA sententia Catholicorum est: infantes non habere fidem actualem, nec tamen omni fide carere; sed habere fidem habitualement; & præterea credere fide aliena, & ipsa Baptismi susceptione. Quæ omnia, vt ordine probentur, ponam sequentes propositiones.



CAPVT XI.

Declaratur quæ fides requiratur in Baptismo paruulorum, & refelluntur errores aduersariorum.

P R I M A propositio: *Infantes non habent actualem fidem.* Hæc est contra primam Lutheri sententiam. Probatur P R I M O, quia Scriptura Deut. i. & Ionæ ultimo affirmat, infantes non cognoscere distantiam boni, & mali; nec usquâ excipit tempus Baptismi. Quare sine Scripturæ testimonio id Lutherus affirmat.

S E C U N D O, Patres hanc sententiam reiiciunt, ut Nazianzenus, qui oratione in sancta lumina, dicit, infantes sine sensu sanctificationis sanctificari, & Augustinus, qui epistola 57. ad Dardanum ridet hanc Lutheri sententiam, ut qui iniuriam faciat humanis sensibus: & rursus epist. 23. tractat. 80. in Ioannem, libro quarto de Baptismo, cap. 24. & libro primo de peccatorum meritis, & remis. cap. 20. dicit, paruulos non habere fidem, quæ est in cogitatione: item non habere sensum fidei: denique non habere quod Paulus dicit: *Corde creditur ad iustitiam.* Ex quibus intelligimus Kemnitium pagina 258. omninò temerè, & mendaciter scripsisse, eandem esse in hac re Augustini, & Lutheri sententiam. Nam suprà ostendimus, à Luthero fidem ipsam actualem tribui paruulis; cuius contrarium tot in locis dicit Augustinus. Quid, quod Lutherus in libro contra Cochläum fatetur, contra se in hac quæstione habere Augustinum? & tamen impudens Kemnitius, inuitum Lutherum, cum inuito Augustino concordare suo mendacio voluit.

T E R T I O, est ratio. Nam fides non potest oriri in mente nisi ex diuina reuelatione: quæ quidem aut immediatè sit à solo Deo, aut per organum verbi Dei prædicati, aut lecti. P R I M O modo non dicit Lutherus dari infantibus fidem, sed secundo, cum ait eos credere per vim verbi, quo exorcizantur, adiuuantibus Ecclesiæ precibus. Et præterea primus ille modus non est ordinarius, sed extraordinarius, & rarissimus, ac solis fortè Prophetis, & Apostolis concessus: *Fides enim ex auditu*, inquit Paulus Rom. 10. loquens de ordinario modo, quo gignitur fides. At si omnibus infantibus fides immediatè reuelaretur, iam esset modus ordinarius, & possent omnes
infantes,

infantes, dum baptizantur, dici Prophetæ. Quod autem SECUNDO modo non oriatur in infantibus fides, patet manifesto experimento. Si enim verbum exorcismi gigneret fidem, certè audiretur, & intelligeretur ab infantibus: proinde attentè auscultarent infantes; cuius contrarium videmus. Deinde exorcismus non refertur ad fidem docendam, sed ad Demones coercendos. Denique hoc est ponere nouum miraculum in auribus, & mente infantium. Neq; valet, quod Lutherus adfert de orationibus, & fide offerentium. Nam aliquando contingit, vt offerentes, & parentes, & ipsi baptizantes sint infideles, & tamen verè, & vtiliter detur infantibus Baptismus, vt Augustinus docet, epist. 23. Neq; ea vis est orationum, & fidei offerentium, vt infallibiliter miracula impetrent. Et denique si Deus miraculum facit in mente infantuli, vt corde credat ad iustitiam, cur non facit etiam in lingua, vt ore confiteatur ad salutem? Fortè hoc est impossibile Deo; aut orationibus, & fide impetrari nequit? At facillimum esse, testatur asina Balaam, quæ Deo volente loquuta est sapienter, Numer. 22.

QUARTO, probatur ratione Augustini in epistola 57. quia cum constet infantes, & vocis ciulatu, & motibus corporis reluctari, & obstrepere Baptismo, si verè intelligerent (quod necesse est, si credere debent) quid agatur, rei fierent ingentis sacrilegij, nec abluerentur, sed magis sordidarentur.

SECUNDA propositio: *Non habent infantes, dum baptizantur, illos novos motus, & inclinationes similes actibus fidei, & dilectionis.* Hæc est contra figmentum Conciliabuli VVittembergenfis, & Philippi, Kemnitij, & aliorum Lutheranorum. Probatur PRIMO, quia repugnat verbo Dei. Isti enim volunt hos ipsos motus infantium sine cognitione esse, & dici fidem, licet improprie, & eo modo infantes non iustificari sine aliqua fide. At in tota Scriptura nusquam habetur nomē fidei in ea significatione, vt designet motum quenquam sine sensu, & sine cognitione; sed potius in contraria, vt patet Rom. 10. *Fides ex auditu.* Heb. 11. *Fide intelligimus aptata esse secula verbo Dei.* & sic de aliis locis.

SECUNDO, repugnat rationi. Nam aut illi motus, & inclinationes sunt in corpore, aut in animo. Si in corpore, non possunt esse similes actibus fidei, & dilectionis, qui sunt in animo; nec enim corporalia dicuntur similia spiritualibus,

nisi metaphoricè, & per quandam analogiam. Et præterea non potest fieri, vt motus & inclinatio ad credendum Deo, & diligendum Deum, sint corporales, cum Deus sit obiectum spirituale, & altissimum, quod vix mente attingi aliquo modo potest. Si autem sint in animo, est implicatio contradictionis, quòd sint absque cognitione. Quid enim est motus intellectus, nisi intelligere? non enim aliter moueri potest intellectus, nisi intelligendo; sicut nec oculus, nisi videndo; nec sensus audiendi, nisi audiendo. Et quomodo potest voluntas inclinari, nisi præcedente cognitione? cum obiectum voluntatis non sit aliud, nisi bonum cognitum.

TERTIO, repugnat ipsi Luthero. Nam Lutherus locis antea citatis, illam fidem ponit in paruulis, de qua saepe dixerat, quòd sola iustificet. Certum autem est, fidem iustificantem non esse motum sine cognitione: alioqui etiam bestia iustificari possent. Voluit etiam Lutherus fidem in paruulis gigni ex auditu verborum exorcismi; proinde non sine cognitione posuit fidem. Præterea Lutherus volebat, fidem in paruulis esse ante Baptismum, vt posset verè responderi ministro baptizaturò, paruulum credere: at auctores huius sententiæ dicunt, per Baptismum dari paruulis istos motus. Sic enim loquitur Philippus loco citato: *Spiritus sanctus per Baptismum eis datur, qui efficit in eis novos motus, & inclinationes, &c.* Et similiter Kemnitius pag. 259. dicit, effundi Spiritum regenerationis in infantes, dum baptizantur, & operari in illis sanctos motus, &c. Quare falsò affirmat pagina superiore idem Kemnitius, Lutherum idem sensisse, quod ipse sentit.

QUARTO, repugnat doctrinæ, & principiis communibus omnium Lutheranorum. Nihil enim est apud eos certius, & communius, quàm sola fide iustificari hominem; & Sacramenta nihil esse aliud, nisi instrumèta excitandæ vel nutriendæ fidei. At certè si motus illi infantium sine vera fide illis sufficiunt ad iustificationem, & ad Baptismum vtiliter suscipiendum; falsum est sola fide hominem iustificari. Neque dicere possunt, hos ipsos motus esse fidem. Nam quando loquuntur de fide in materia iustificationis, semper intelligunt per fidem apprehensionem diuinæ misericordiæ, quæ sine cognitione esse non potest. Præterea cum isti motus immediatè excitentur à Deo, vt ipsi volunt, & non per Sacramenta, quæ more concionis prouocent fidem per externos sensus; certè

ruit

ruit illud principium, Sacramenta non iustificare, nisi fidem excitando more concionis. Itaq; si quis rectè iudicer, positis principiis de sola fide iustificante, minus absurda est Lutheri sententia, quæ fidem paruulis tribuit, quàm Conciliabuli VVirtembergensis, quod motum sine cognitione iisdem concedit. Lutherus enim nouum miraculum falsò excogitauit, sed eo posito, omnia illi constant: isti autem & miraculum fingunt, & eo posito destruunt sua ipsorum principia, & cum aperta ratione pugnant.

TERTIA propositio: *Infantes non iustificantur sine vlla fide*. Hæc est contra Sacramentarios: & probatur. PRIMO, quia Scriptura affirmat fidem esse medium ad salutem necessarium. Ioan. 3. *Qui non credit, iam iudicatus est*. Ex quo loco Augustinus probat, infantes baptizatos habere aliquam fidem, lib. I. de peccat. merit. & remiss. cap. 33. Nam eo loco Dominus non loquitur de præcepto credendi, quo sine dubio non tenentur paruuli, sed de medio ad salutem. Nam antea dixerat: *Sicut Moyses exaltauit serpentem in deserto; ita exaltari oportet filium hominis, & omnis qui credit in eum, non pereat, sed habeat vitam æternam*. Et subiunxit: *Qui credit in eum, non iudicatur; qui autem non credit, iam iudicatus est*. Sicut igitur aspicere æneum serpentem, non tam fuit præceptum, quàm remedium vnicum salutis: ita & fides in hoc loco Euangelij asseritur necessaria, vt remediū, non vt præceptum.

SECUNDO, probatur ex illo Hebr. II. *Sine fide impossibile est placere Deo*. Item Rom. 3. *Arbitramur hominem iustificari per fidem*: quod passim repetit, & inculcat Paulus, Quomodo igitur sine vlla fide iustificari & placere Deo possunt infantes? AT, inquiunt Calvinus, & Martyr, Si Deus prædestinauit infantes, & promisit se fore Deum ipsorum, sine dubio dabit illis Spiritum sanctum, eosq; iustificabit modo aliquo sibi noto, licet non per fidem. RESPONDEO; Prædestinationem non impleri, nisi per ea media, quæ in Scripturis nobis sunt reuelata. Porro Apostolus Rom. 8. satis perspicuè explicat media, cum ait: *Quos prædestinauit, hos & vocauit; quos vocauit, hos & iustificauit; quos iustificauit, hos & magnificauit*. Idem verò Apostolus in eadem epistola, cap. 3. 4. 5. 6. 7. 8. 9. & 10. nihil aliud contendit, nisi iustificationem nō contingere sine fide. Quare tribuere paruulis iustificationē sine fide, & ante vocationē, id est, ante Baptismū, quo solo vocari possunt infantes, quid

quid est aliud, nisi contra verbum Dei fingere nouam iustificationem?

QVARTA propositio: *Infantibus in Baptismo infunditur habitus fidei, spei, & charitatis.* Hęc **IN PRIMIS** certa est Catholicis ex auctoritate Conciliorum, & Doctorum. Nam licet aliquando disputatum fuerit, an infantes reciperent cum gratia iustificante habitus harum virtutum, tamen semper fuit communior sententia, infundi paruulis per Baptismum hos habitus. Ita enim S. Thomas 3. part. quæst. 69. art. 6. item Scotus, Durandus, Gabriel, & ceteri ferè omnes in 3. dist. 23. Quocirca Concilium Viennense generale, vt habemus Clement. 1. de summa Trinitate, & fide Catholica, definit hanc sententiam esse probabiliorē, & magis conformem testimoniis tam veterum, quàm recentium Theologorum. Neq; hęc sententia sorduit Tridentino Concilio, vt audacter mentitur in 2. part. Examinis, pag. 261. Nam licet Concilium Tridentinum non fecerit mentionem Concilij Viennensis; tamen illam ipsam sententiā recepit, ac definit vt certam. Nam sess. 5. in decreto de peccato originis, definit infantes in Baptismo iustificari, ita vt si moriatur in eo statu, nihil sit, quod eos ab ingressu cœli remoretur. Deinde sess. 6. cap. 7. definit Concilium, in Baptismo infundi cum remissione peccatorum hæc omnia dona, fidem, spem, & charitatem, eaq; menti inhærere.

SECUNDO, potest hæc eadem sententia colligi ex Scripturis, quibus suprà probauimus, sine fide paruulos non saluari. Cum enim constet, fidem propriè non significare, nisi actum, vel habitum, & simul constet in paruulis actum fidei esse non posse; certè sequitur, vt in eis sit habitus. Item ex Scripturis suprà probauimus, infantes rectè baptizari, & per Baptismum iustificari, & saluari. Item constat ex Scripturis, iustificationem nullam esse sine fide: igitur constare etiam debet, infantes habere saltem habitualement fidem.

TERTIO, probatur ex Patribus, qui licet non meminerint expressè horum habituum, tamen aliis verbis idem dicunt. Primùm enim omnes Græci, & multi Latini dicunt, Baptisma esse illuminationem, & qui baptizantur, illuminari. Vnde etiam Augustinus tractat. 44. in Ioannem dicit, cæcum natum, cum à Christo fuit inunctus, factum esse quodammodo Catechumenum; cum fuit illuminatus, fuisse quodammodo

dammodo baptizatum. Id autem Patres sine dubio dicunt propter fidem, quæ in Baptismo recipitur, quæ est lumen cordis, vt exponit S. Thomas 3. part. quæst. 69. art. 5. Et idem colligitur ex illo Actor. 15. *Fide purificans corda eorum*. Et deniq; quia sola fides ad intellectum pertinet ex virtutibus Theologicis, in quibus consistit iustificatio, quæ acquiritur in Baptismo. At non recipitur actus fidei. Actus enim præcedit in adultis, vt dispositio, in infantibus nullus est fidei actus; igitur Baptismus illuminat ratione habitus, qui in eo infunditur. Adde quod Augustinus lib. 1. de peccatorum meritis, & remissione, cap. 26. in fine, affirmat infantulos per Baptismum non solum purgari, sed etiam illuminari, quod, vt dictum est, non nisi per fidem fieri potest.

QUARTO, probatur ratione. NAM paruuli baptizari verè dicuntur, & sunt fideles, vt Augustinus docet, lib. 1. de peccatorum meritis, & remissione, cap. 33. & Concilium Tridentinū, sess. 7. can. 13. de Baptismo. At fideles non dicimur ab actu, sed ab habitu fidei: alioqui cū dormimus, aut etiam cū vigilamus, sed de fide non cogitamus, non essemus fideles. Vnde AUGUSTINVS loco citato, cū dixisset paruulos esse fideles, addit: *Hoc enim eis acquiritur per virtutē Sacramenti, & offerentium responsionem*. Vbi apertissimè significat paruulos dici fideles, tum ab habitu, qui infunditur virtute Sacramenti, tum ab actu fidei alienæ.

ITEM, Deus in nobis habitat per fidem, & charitatem, Ephes. 3. *Christum habitare per fidem in cordibus vestris*. I. Ioan. 4. *Qui manet in charitate, in Deo manet, & Deus in eo*. At in paruulis baptizatis Deus habitat, vt Augustinus docet in epistola 57. ad Dardanum: igitur habent etiam paruuli baptizati illa dona saltem quoad habitum.

DENIQVE, Deus infundit paruulis suis occultam gratiam, cū baptizantur, vt Augustinus docet lib. 1. cap. 9. de peccatorum meritis, & remissione. Sed gratia iustificationis infusa in cordibus, consensu omnium Theologorum, aut est charitas cum fide, & spe; aut certè est quædam alia qualitas, cum qua infallibiliter coniunctæ sunt tres illæ virtutes.

QUINTA propositio: *Paruuli actu credunt, partim reipsa dum baptizantur, partim aliena fide*. PRIOR pars est Augustini lib. 1. de peccatorum meritis, & remissione, cap. 27. vbi dicit, infantibus ipsum baptizari esse credere, quia nimirum ipsa

ipsa actio est fidei professio. Similia habet epistola 23. *Quem* admodum etiam de sanctis Innocentibus Ecclesia loquitur, cum ait, eos non loquendo, sed moriendo confessos esse. Neque de hac re vlla potest esse controuersia. *POSTERIOR* pars est contra temeritatem Illyrici, Kemnitij, & aliorum, qui errorem Papisticum esse volunt, baptizari paruulos in fide Ecclesie. Sufficit autem ad hanc assertionem probandam, consensus Patrum. Ita enim docet Iustinus quæst. 56. Dionysius de Ecclesiastica hierarchia, cap. vlt. Ambrosius, vel quicumque est auctor, in cap. ii. ad Hebr. Augustinus lib. 3. de libero arbitrio, cap. 23. vbi dicit, hanc esse totius Ecclesie sententiam, Item epistola 23. 57. & 105. lib. 4. de Baptismo, cap. 24. & 25. & serm. 10. & 14. de verbis Apostoli. Prosper de uocatione Gent. lib. 2. cap. 8. & Bernardus serm. 66. in Cantica. & denique Concilium Tridentinum, sess. 7. can. 13.

Est autem hoc loco *OBSERVANDUM*, duplicem fidem requiri in Baptismo. Actuale *VNAM*, quæ præcedit Baptismum, vt dispositio quædam; & ea est, quæ exigitur à baptizandis, cum iubentur recitare Symbolum, & interrogantur an credant. Quæ quidem, vt plurimum, iudicio grauium doctorum, non est ex habitu fidei, sed ex auxilio speciali Dei. Vnde Catechumeni cum ista fide adhuc non dicuntur fideles à Patribus. *ALTRA* est, quæ sequitur Baptismum, quæque est pars essentialis iustificationis, & non est actus, sed habitus; & hanc intelligunt baptizandi, cum interrogati, quid petant, respondent: *Fidem vitam æternam præstantem*; vt habemus in Concilio Tridentino, sess. 6. cap. 7. & in libris, qui tractant de ritu Baptismi. Iam igitur, cum Patres dicunt, paruulos baptizari in fide parentum, aut Ecclesie, non loquuntur de fide posteriore, sed de priore. Et cum dicimus paruulos baptizari in fide parentum, non est sensus, paruulos iustificari formaliter, aut esse fideles aliena fide; vt perperam colligunt Kemnitius, & Illyricus locis citatis, vbi etiam perperam citant illud Habachuc. 2. *Iustus ex fide sua uiuit*. Non enim vllus Catholicorum docuit vnquam, paruulos viuere fide aliena, sed sua habituali. Neque etiam est sensus, vt exponit Lutherus, paruulis impetrari fidem qua iustificentur, à fide & precibus offerentium, & Ecclesie. Fidem enim iustificantem habent paruuli infusam ex opere operato Sacramenti, non ex opere operantis ministri, aut Ecclesie. Sed sensus est, fidem actualem, quæ

quæ requiritur vt dispositio ad Sacramentum, non haberi à paruulis propriam, sed alienam.

DICES; Quid prodest paruulo fides aliena? RESPONDEO; Multum omninò prodest. PRIMVM enim eos ad Baptismum adducit. Vt enim adulti, nisi credant, ad Baptismum non veniunt; sic etiam nisi parentes, aut aliqui alij, qui infantium curam gerunt, credant, non eos ad Baptismum deferent. Itaque sicut propria fides vnicuique prodest, quia est causa proprij Baptismi; ita fides aliena prodest infanti, quia est causa, vt infans baptizetur. Et contrà infidelitas patris multum obest infanti, quia est causa, ne ille baptizetur. Atque hanc utilitatem persequitur Prosper loco citato. ALTERA utilitas est, quod hoc modo Deum honorant, & colunt, dum fidem profitentur, & Satanæ abrenunciant, & implent, quæ ad ritum Baptismi pertinent, saltem per os alienum. Habet enim Deus ratum hoc obsequium per alios præstitum, cum ipsi per se non possint. Et hoc est, quod sæpe inculcat Augustinus locis citatis.

Ex quibus omnibus colligitur, fidem alienam non esse ita necessariam, vt non sit Baptismus verus, aut fructuosus, si ea desit, quandoquidem non est de essentia iustificationis, vel Baptismi; tamen esse necessariam ad solennitatem ritus, ac cæremoniæ, & sæpe, vt diximus, ad ipsum Baptismum paruulis tradendum; quia si nemo haberet fidem, nemo curaret paruulos baptizari. Superest argumenta ipsorum soluere, quæ pauca sunt, & leuia.

Argumentum PRIMVM Lutheri est contra primam propositionem: *Si infantes non crederent, illuderetur Sacramentis sacrilego mendacio, dum respondetur pro infante, Credo.* RESPONDEO; Nullum est ibi mendacium. Non enim qui respondet, *Credo*, significat infantem credere proprio actu, sed alieno. Vt enim Augustinus loquitur serm. 10. de verbis Apostoli: *Accommodat mater Ecclesia infantibus aliorum pedes, & veniant; aliorum cor, & credant; aliorum linguam, & confiteantur.* Idq; non iniuria; cum peccato alieno prægrauentur, id est, ab alio contracto, licet sibi verè & propriè inhærente.

SECUNDVM argumentum: *Matt. 18. Qui scandalizauerit vnum de pusillis istis, qui in me credunt. Igitur pusilli credunt.* RESPONDEO, Pusilli, de quibus loquitur Euangelium, non infantes, sed pueri grandiores erant. Nam vocauit eos Dominus ad se;

78 *Cap. XII. De Sacram. Baptismi. Lib. I.*

ad se; & scandalizari posse dixit; at venire suis pedibus, & scandalici capacem esse, infantibus non conuenit.

TERTIVM argumentum contra secundam propositionem: *Ioannes Baptista exultauit in vtero, Luc. 2. Non igitur mirum, si habeant infantes nonos motus.* Respondeo PRIMO, exemplum vnum non facere regulam generalem, vt Augustinus de hac ipsa re loquens testatur epist. 57. At quia Kemnitius dicit, hoc exemplo non se probare velle, id ita esse in omnibus infantibus, sed tantum esse posse. Respondeo SECVNDO, Ioannem Baptistam non habuisse motum sine cognitione, vt isti fingunt. Nam vt Ambrosius, & Beda in commentario eius loci, testatur, Ioannes cognouit Domini presentiam, & inde exultauit. Ipsum quoque Euangelium, dum ait, exultasse illum in gaudio, satis aperte docet, illum non caruisse cognitione.

QUARTVM argumentum, contra eandem propositionem: *Infantes saluari possunt, dicente Domino, Marci 16. Nisi quis acceperit regnum celorum, sicut paruulus, non intrabit in illud. Igitur oportet infantes recipere Spiritum sanctum, & proinde aliquam eius operationem. At non possunt recipere fidem cum cognitione; ergo nouum motum sine cognitione.* RESPONDEO, vltima consequentia nihil valet: possunt enim recipere, & re ipsa recipiunt infantes habitum fidei, qui neque est fides cum cognitione, neque motus sine cognitione.

CAPVT XII.

Qui sint veri, aut falsi effectus Baptismi.

SEQVITVR SEPTIMA controuersia de effectu Baptismi. Duæ sunt autem quæstiones de hac re. VNA de veris effectibus, quos agnoscunt Catholici. ALTERA de falsis effectibus, quos aduersarij Baptismo tribuunt.

Veri effectus apud Catholicos tres sunt. PRIMO enim Baptismus tollit, ac delet verè omnem culpam, & pœnam. SECVNDO confert ex opere operato gratiam, & dona diuina, quibus verè, & formaliter iustificatur homo. TERTIO imprimi indelebilem characterem, ob quem reiterari non potest. Ad hos reuocantur illi quos Patres enumerant, & maxime Nazianzenus oratione in sanctum lauacrum, & Chryso-

stomus

stomus homil. i. ad Neophytos, vt quòd faciat animam pulchram, Deo dilectam, splendens, quòd eam obfignet regio sigillo, quòd faciat hæredem Dei, quòd aperiat regnum cœlorum, & similia. Aduersarij PRIMVM effectum negant; dicunt enim peccata per Baptismum non verè tolli, sed tantum non imputari. SECUNDVM etiam negant. Nolunt enim iustificari hominem ex opere operato per Sacramenta, sed solum per fidem. TERTIVM absolutè negant, & idcirco non possunt sufficientem causam reddere, cur Baptismus non repetatur. Sed de duobus effectibus posterioribus satis multa diximus in disputatione de Sacramentis in genere: solum de primo hîc agendum est. Atque hæc erit PRIMÆ quæstio; An Baptismus verè tollat peccata.

Porro aduersarij alios quinque effectus Baptismi enumerant. PRIMVM, quòd baptizatus non possit damnari, etiam si velit, nisi nolit credere. SECUNDVM, quòd Baptismus liberet ab obedientia diuinæ legis. TERTIVM, quòd liberet ab humanarum legum obseruatione. QVARTVM, quòd liberet ab omnibus votis. QVINTVM, quòd sola memoria Baptismi iustificet à peccatis, quæ fiunt post Baptisma. Qui certè non tam sunt Baptismi effectus, quam Lutheranorum errores; ac meritò damnantur à Concilio Tridentino, sess. 7. totidem canonibus, id est, 6. 7. 8. 9. & 10. De his igitur effectibus erit altera quæstio.

CAPVT XIII.

Quòd Baptismus verè tollat peccatum.

QUOD igitur attinet ad PRIMAM quæstionem, fuit hæresis antiquissima Origenistarum, peccata non tolli per Baptismum, sed solum regi: tolli autem peccata tandem per mortem. Ita habet Proclus quidam Origenista apud Epiphanium hæres. 64. vbi etiam ponit refutationem huius hæresis ex libro S. Methodij Martyris de resurrectione. Similem hæresim postea excitârunt Messaliani, teste Theodoro lib. 5. de fabulis hæreticorum. Item rursus alij quidam tempore S. Gregorij, vt ipse refert lib. 9. epist. 39. ad Theoctistam Patritiam.

Hoc nostro seculo idem docent omnes Lutherani. Nam Lutherus ipse art. 2. ex iis, quos anno XX. Leo X. damnauit, sic

ait: *In pueropost Baptismum negare remanens esse peccatum, est Paulum, & Christum simul conculcare.* Deinde in assert. eiusdē articuli: *Aliud est, inquit, omnia peccata remitti, aliud omnia tolli; Baptismus omnia remittit, sed nullum penitus tollit, sed incipit tollere.* Similia habet Ioannes Calvinus in Antidoto Concilij Tridentini, scs. 5. vbi refellit decretum de peccato originis: *Manet, inquit, verè peccatum in nobis, neq; per Baptismum statim & no die extinguitur, sed quia deletur reatus, imputatione nullum est.* Idem habet lib. 4. Instit. cap. 15. §. 10. & 11. Idem etiam Philippus in Apologia 2. art. Confessionis Augustanæ. Vbi NOTANDVM est insigne mendacium. Sic enim Philippus: *Augustinus ait, Peccatum in Baptismo remittitur, non ut non sit, sed ut non imputetur.* Atque hoc idem dixerat Lutherus in assert. 2. art. & Ioannes Rossensis, conuincit eum mendacij, ostendens Augustinum non hoc dicere. Editus est autem liber Rossensis anno M. D. XXIII. & tamen Philippus anno M. D. XXX. iterum idem mendacium protulit. Præterea testatur Cochlaus in discussione Confessionis Augustanæ, art. 2. ipsum Philippum ab Eckio conuictum, & confessum esse, locum Augustini malè esse citatum: & tamen idem mendacium toties detectū, & confutatum, iterum scripserunt in libro Concordiæ Latino, pag. 59. edito anno M. D. LXXX. & semper reperunt, cū Apologiam illā imprimunt. Deniq; Martinus Kemnitius in Exam. 5. scs. Concilij Tridentini pag. 430. & seq. idem defendit, quamuis magis cautè. Fateretur enim primò remitti in Baptismo omnia peccata, quin etiam tolli, ac deleri, & solū restare reliquias quasdam peccati originalis. Deinde tamen addit illas reliquias esse quiddam, quod malum sit, & malum culpæ, & secundum Scripturas peccatum dicatur, & quod hominem damnare posset, si Deus imputare illud veller. Quod est dicere; Peccatum in Baptismo remitti, non quia tollitur, sed quia non imputatur.

Contra hunc errorem grauissimum, & perniciosissimum statuit Concilium Tridentinum, scs. 5. decretum, quo affirmat per Baptismum tolli reipsa id omne, quod habet in homine rationem peccati.

Est autem hic OBSERVANDVM, fundamentum aduersariorum non esse aliud, nisi quia putant ipsam concupiscentiam, quam certum est manere etiam in baptizatis, usque ad mortem esse verè, & propriè peccatum, licet ei non consentiamus,

tiamus, sed repugnemus. Quæ quidem quæstio non est huius loci, sed tractari solet, & à nobis tractata est in disputatione de peccato originis. Et quia ita coniuncta est illa cum ista, vt vna explicata, etiam altera terminetur, potuisset fortasse hoc loco ista quæstio præteriri: tamen quia alia sunt argumenta, quibus probatur Baptismus tollere omnia peccata; & alia, quibus probatur concupiscentiam non esse peccatum, nisi improprie, ideò visum est hîc tractare propositam quæstionem, licet, vt dixi, ex definitione vnius consequatur etiam alterius definitio.

PRIMO igitur probatur ex Scripturis, Baptismo reipsa tolli omnia peccata, ita vt non solum non imputetur, sed nec sit, quod imputari possit ad culpam. Et quia Scripturarum testimonia plurima sunt, reducam ea ad aliquot capita.

PRIMUM est eorum, quæ habent vocabula mundandi, lauandi, tollendi, delendi, auferendi, & similia, quæ inprimis pugnant cum modo loquendi aduersariorum, ac præsertim Lutheri; & præterea non possunt nisi ineptissime exponi per non imputari. Non enim dicitur rectè quis tollere ab alio ignorantiam, vel malitiam, quia ignoscit illi, quod aliquid ignoranter, aut malitiosè fecerit. Loca hæc sunt, Psal. 50. *Dele iniquitatem. Amplius lauame.* Michæ 7. *Aufers iniquitatem.* Ioan. 1. *Ecce agnus Dei, ecce qui tollit peccata mundi.* Ephes. 5. *Mundans eam lauacro.* Kemnitius in Examine pag. 501. respondet, Paulum non dixisse, Mundauit, sed; *Mundans*, quia quotidie eam mundat, donec exhibeat eam in die iudicij gloriosam. At non considerauit Kemnitius illud, quod sequitur: *Lauacro aqua in Verbo vite.* Mundatio enim per lauacrum aquæ, id est, per Baptismum non fit quotidie, nisi in diuersis hominibus, qui veniunt ad Baptismum. Solum enim baptizatur quisque semel, & tum mundatur, & efficitur sine macula, & ruga, quamuis Christus id quotidie faciat in diuersis, vt in die iudicij totum corpus suum, id est, omnes electos exhibeat sine macula, & ruga.

SECUNDUM caput est eorum locorum, qui dicunt tolli maculas, aut inquinamenta, aut iniquitates. Nam secundum aduersarios non tollitur per Baptismum peccatū, nisi quoad reatum, id est, quoad obligationē ad pœnam; manere autem volunt ipsam peccati fœditatem, quæ erat causa illius reatus. Voces autem: *Macula, inquinamenti, iniquitatis*, & similia,

82 Cap. XIII. De Sacram. Baptismi. Lib. I.

non significant reatum, id est, obligationem illam, quæ potest tolli per nonimputationem; sed significant ipsam fœditatem, quam illi manere volunt. Cant. 4. *Tota pulchra es amica mea, & macula non est in te.* Similis locus est Euangelij, Ioan. 13. *Qui lotus est, non indiget, nisi, & pedes lauet, sed est mundus totus.* Ponderat hunc locum Gregorius li. 9. epist. 39. Non enim verè potest dici mundus totus, in quo aliquid relinquitur, quod maculæ rationem habeat. Ezech. 36. *Effundam super vos aquam mundam, & mundabimini ab omnibus iniquamentis vestris.* Ephes. 1. *Elegit nos, & essemus sancti, & immaculati.* Coloss. 1. *Reconciliauit vos in corpore carnis eius per mortem, exhibere vos sanctos, & immaculatos, & irreprehensibiles.* Vbi vides, non solum non habere maculam, sed nec aliquid, vnde reprehendi possint. Quod intelligitur quantum attinet ad ipsam iustificationem à Deo acceptam; nam postea bene possunt homines labi, & facere digna reprehensione. Ex quo tollitur euasio Kemnitij, qui respondet, pag. 496. & seq. obiiendo alia loca, vbi iubemur emundari ab omni iniquamento carnis, & spiritus, 2. Cor. 7. & exuere veterem hominem, & induere nouum. Ephes. 4. & Colos. 3. Sed hæc & similia intelliguntur, vel de peccatis, quæ postea fiunt, vel de mortificatione sensuum, & inclinationum, quæ ad malum prouocant, licet formaliter peccata non sint.

TERTIVM caput est ex figuris Baptismi. Nam multiplex figura præcessit. VNA, in Circumcisione, Col. 2. ALTERA, in mari rubro, 1. Cor. 10. TERTIA, in Iordane sanante lepram, 4. Reg. 5. QUARTA, in suffocatione porcorum, Matt. 8. quam allegat Nazianzenus orat. in sanctum lauacrum. QUINTA, in probatica piscina, Ioan. 5. SEXTA, in lotionem, & curationem cæci nati, Ioan. 9. quam explicat Augustinus, tract. 44. in Ioan. At in Circumcisione verè, non autem per solam imputationem abscindebatur caro. In mari rubro, verè, & propriè suffocati sunt Ægyptij, quibus antè Hebræi seruiebant. Quare S. GREGORIUS lib. 9. epist. 39. hunc locum tractans: *Qui, inquit, dicit, peccata in Baptismate, non funditus dimitti, dicat in mari rubro Ægyptios non veraciter mortuos.* Idem quoque de aliis dicendum est.

QUARTVM caput continet ea loca, quæ comparant mundationem iustificationis rebus verè, & propriè mundis. Psal. 50. *Lauabis me, & super niuem dealbabor.* Isa. 1. *Si fuerint pec-*

cata

cata & vestra, & coccinum, sicut nix dealbabuntur: & si fuerint rubra, & vermiculus, sicut lana alba erunt. Isaïe 44. Deleui & nubem iniquitates tuas; & quasi nebulam peccata. At certè cùm solaris radius dissoluit nebulas calore suo, ita eas eua-
scere facit, vt nihil remaneat tenebrarum, sed cœlum verè ié-
renum appareat.

QVINTVM continet similitudinem peccati originalis, Rom. 5. *Sicut per vnius inobedientiam peccatores constituti sunt multi, ita per vnius obedientiam iusti constituentur multi.* At illi verè constituuntur peccatores, & verè iustitiam amit-
tunt, non sola imputatione. Ioan. 3. *Quod natum est ex carne, caro est; quod natum est ex spiritu, spiritus est.* Illi verè sunt
carnales; igitur isti verè spirituales. Confirmatur ex illo, I. Co-
rinth. 15. *Sicut in Adam omnes moriuntur, ita in Christo omnes
viusficabuntur.* Hic locus intelligitur de vera morte, & vera
resurrectione; igitur etiam loca suprâ citata de vero peccato,
& vera iustificatione.

SEXTVM continet similitudinem mortis Christi, Rom. 6. *Consepulti sumus cum Christo per Baptismum in morte.* Et ibi-
dem: *Si mortui sumus, quomodo viuemus in illo?* Idem repeti-
tur, Colof. 2. de quo loco AVEVSTINVS in Enchir. cap. 52. sic
loquitur: *Quemadmodum in illo vera mors facta est, sic in nobis
vera remissio peccatorum: & quemadmodum in illo vera re-
surrectio, ita in nobis vera iustificatio.* At Christi mors, & re-
surrectio vera fuerunt omnibus modis, non autem vera, quoad
aliquid, & quoad aliud falsa; igitur & remissio peccati vera
*mors est peccati, non quoad reatum tantum, sed quoad omnia,
quæ peccati rationem habent.*

*At Christi mor-
uerba enim
non Augustin-
auctor.*

SEPTIMVM continet ea, quæ docent, Baptismo nos rena-
sci. Ioan. 3. *Nisi quis renatus fuerit ex aqua, & spiritu sancto.*
Tit. 3. *Saluos nos fecit per lauacrum regenerationis.* Colof. 2.
Cùm essemus mortui propter delicta, conuinificauit nos Christo.
I. Pet. 2. *Quasi modo geniti infantes.* At certè noua ista genera-
tio, & vita requirit veram mortem peccatorum, & veram mu-
rationem interiorem; nō autem solam imputationem. Quo-
modo enim verè sumus viuificati, & regeniti, si adhuc mors
in nobis manet?

OCTAVVM continet ea, quæ docent, non posse simul ha-
bitare lucem, & tenebras; peccatum & iustitiam. I. Cor. 10. *Non
potestis mensa Domini participes esse, & mensa Damoniorum.*

84 Cap. XIII. De Sacram. Baptismi. Lib. I.

2. Cor. 6. *Qua societas lucis ad tenebras? qua participatio iustitiae cum iniquitate? qua conuentio Christi ad Belial? qui autem confectus templi Domini cum idolo? Vos enim estis templum Dei.* At aduersarij volunt simul & Diabolum in nobis habere per peccatum, quod verè semper est in nobis, & Christum in iustificationem. Responder Kemnitius, pag. 501. Paulum docere non posse esse peccatum mortale simul cum iustitia fieri. Papistas autem perperam hæc loca intelligere, qui nec deducunt non posse simul consistere vetustatē, & nouitatem; carnem, & spiritum. At in utroq; fallitur. Nam cum fatetur non posse esse peccatum mortale cum iustitia fidei, id intelligit de mortali, non secundum naturam suam, sed ex misericordia Dei non imputante. Vult enim cum Magistro suo Luthero semper esse in nobis peccatū dignum ex se morte æterna, sed in credentibus fieri veniale, quia Deus non imputat. At hoc ipsum est contra Paulum. Quia si verè est in nobis post Baptismum peccatum natura sua mortale; ergo est in nobis iniquitas; ergo tenebræ; ergo Belial: ergo est conuentio luci ad tenebras, iustitię ad iniquitatem, Christo ad Belial; non enim iniquitas desinit esse iniquitas, quia non punitur, vt notum est. Porro Catholici non negant esse in homine vetustatem carnis, & nouitatem spiritus, cum fateantur esse in nobis concupiscentiam, quæ est lex membrorum pugnans cum lege mentis, ad Rom. 7. sed eam negant esse peccatum, nisi quando libera voluntate eius desideriis consentimus.

NONVM caput continet ea loca, quæ docent, Deo odio esse peccata. Psal. 5. *Odisti omnes, qui operantur iniquitatem.* Psal. 44. *Dilexisti iustitiam, & odisti iniquitatem.* Sap. 14. *Odio est Deo impius, & impietas eius.* Ex his enim locis efficitur, vt aut Deus in iustificatione penitus tollat peccata, ita vt nihil sit, quod odio habere possit; aut certè nihil omninò remittat, ne obligationem quidem ad pœnam. Si enim peccatum maneret, Deus illud odisset; si odisset, punire vellet; si punire vellet, non ignosceret. Itaque dicere Deum non imputare peccata, quæ verè manent, atq; ea nolle punire, est manifesta contradictio secundum Scripturas sanctas, quæ Deum hostem, & vindicem peccatorum seuerissimum vbique describunt.

Argumenta aduersariorum non aliud probant, nisi concupiscentiam esse verè peccatum, licet ei non consentiamus. Quæ omnia soluta sunt à nobis in disputatione de peccato originis.

CAPVT

CAPVT XIV.

Quòd Baptismus non faciat homines impeccabiles.

N V N c ad effectus Baptismi, quos aduersarij confingunt, veniamus. Et quoniam ea ferè omnia, quæ hîc dicenda essent, ad alia loca propriè spectant, & hîc solùm tractantur propter canones Concilij Tridentini de Baptismo; solùm breuissimè rem attingemus, tot propositionibus constitutis, quot sunt Concilij canones.

Sit igitur PRIM A propositio: *Baptismus non id efficit, &c baptizati non possint gratiam Dei amittere, nisi nolint credere.* Hæc expressè habetur can. 6. Concilij. Sunt autem quædam breuiter annotanda. PRIMVM, fuisse olim duos errores apud veteres. VNVS fuit Iouiniani, qui, vt referunt Hieronymus, lib. 2. contra Iouinianum, & Augustinus libro de hæresibus, cap. 82. docuit, hominem verè baptizatum non posse amplius peccare, & si fortè peccat, non fuisse tinctum, nisi aqua. Argumentum præcipuum erant illa verba, 1. Ioan. 3. *Omnis qui natus est ex Deo, peccatum non facit, quia semen ipsius in eo manet, &c non potest peccare, quoniam ex Deo natus est.* Et 1. Ioan. 5. *Qui natus est ex Deo, non peccat, sed generatio Dei conseruat eum.* Refellit hunc errorem accuratè S. Hieronymus loco notato; & certè Scripturæ diuinæ passim occurrunt, vt illa Rom. 11. *Tu fide stas, noli altum sapere, sed time, &c.* Et Hebr. 6. *Impossibile est eos, qui semel sunt illuminati, &c.* Et 2. Pet. 2. *Melius erat eis non cognoscere viam iustitiæ, &c.* Denique, Actor. 8. apertè legimus, Simonem credidisse, & Baptismum suscepisse: & tamen ibidem legimus eius ruinam. Porro testimonia ex epist. Ioannis accipienda sunt in sensu composito, quemadmodum & illud, Matth. 7. *Non potest arbor bona malos fructus facere:* nimirum dum manserit arbor bona. Solùm enim vult Ioannes ostendere, non posse consistere veram iustitiam & charitatem cum peccato mortali, proinde non esse iustum, qui malè agit. Ita exponunt Augustinus, tract. 5. in epistola Ioannis, & Hieronymus lib. 2. in Iouinianum.

ALTER error quorundam fuit, qui, vt Augustinus refert, lib. 21. de ciu. Dei, c. 25. docebant baptizatos non posse damnari, etiam si perditissimè viuerent, modò ab Ecclesia Catholica nõ

86 Cap. XIV. De Sacram. Baptismi. Lib. I.

recederent. Refellit hunc errorem Augustinus ibidem ex clarissimis testimoniis Scripturarum: & præterea librum integrum scripsit contra errorem, qui inscribitur; De fide, & operibus. Scripturæ præcipuæ sunt, Rom. 8. *Si secundum carnem vixeritis, moriemini.* 1. Cor. 6. *Nolite errare: neque fornicarij, neq; fures, neq; adulteri, &c. regnum Dei possidebunt.* Et similia habentur, Gal. 5. Ephes. 5. 1. Thessal. 4. 1. Tim. 6. & alibi; quæ omnia dicuntur baptizatis, vt ex iisdem locis patet.

NOTA SECUNDO, vtrumq; errorem aliqua ex parte hoc nostro seculo instauratum esse. Nam PRIOREM errorem instauravit Ioannes Calvinus, qui hominem semel verè iustificatum docuit, non posse vnquam excidere à gratia, & salute. Nam in Antidoto Concilij Tridentini, sess. 7. can. 7. de Baptismo, dicit, Baptismo tanquam Dei chirographo nos certiores reddi de perpetua adoptionis graria: & lib. 3. Instit. cap. 2. §. 11. & 12. docet, veram fidem semel habitam amitti non posse, esseq; donum electorum proprium. Sed refutatio istius erroris, non est præsentis loci: non enim id ipse tribuit virtuti Baptismi, sed prædestinationi. Interim repugnat Scripturis apertissimè Caluini sententia, cùm Actor. 8. Simon Magus crediderit, & baptizatus fuerit, & paulò post à fide, & charitate exciderit. Et præterea, si verum esset, quod vult Calvinus, nulli vnquam fuissent Apostata, nec vlli ex Catholicis hæretici fieret, quod non solum pugnat cum totius orbis terræ consensu, sed etiam cum Scripturis. Actor. 20. *Ex vobis ipsis exurgent viri loquentes peruersa, & abducant discipulos post se.* 1. Timoth. 1. *Quidam circa fidem naufragauerunt.* 1. Tim. 4. *In nouissimis temporibus discedent quidam à fide.* Et cap. 6. *Radix omnium malorum est cupiditas, quam quidam appetentes, errauerunt à fide.* Et 1. Ioan. 2. *Ex nobis exierunt.*

POSTERIOREM errorem instauravit Lutherus in lib. de captiuit. Babylon. cap. de Baptismo, vbi habet illa ipsa verba, quæ Concilium in suo can. 6. damnauit. Nec ab ea sententia discordant eius discipuli, etsi modum loquendi non probent. Tribus enim modis potest intelligi illa propositio: *Non potest homo damnari, nisi nolit credere.* PRIMO, vt sensus sit, nullum esse peccatum verè, & in se mortale, nisi incredulitatem. Et hoc nō docent aduersarij, immò è contrario, contendunt omnia opera etiam optimè facta, esse peccata mortalia, si secundum rigorem iustitiæ iudicentur à Deo. Vnde Kemnitius in cen-

in censura canonis 6. Concilij Tridentini, probat ex Scripturis, multa peccata damnare posse hominem præter incredulitatem.

SECUNDO, vt sensus sit, peccata omnia, ita esse coniuncta cum infidelitate; & contrà, fidem ita coniunctam esse cum iustificatione, vt non possit fides consistere cum vilo peccato mortali: proinde qui habet fidem, nullum habere peccatum, nec posse perire, & contrà; quicumque peccat, hoc ipso carere fide. Quod quidem simile est ei, quod Catholici dicunt de charitate: Charitas enim reuera non potest consistere cum peccato mortali, & idèd nemo perit cum charitate, & nemo saluatur sine charitate. Hunc sensum vult esse Kemnitius illius Lutheranae propositionis in 2. parte Examinis, pag. 213. & sequentibus, vbi dicit, Lutherum nunquam sensisse nò amitti gratiam præsentem per quodlibet peccatum mortale, sed id sensisse, posse hominem per veram fidem statim redire ad gratiam. Vt enim peccata destruunt fidem, ita fides reuiuiscens destruit omnia peccata.

TERTIO modo potest intelligi ea propositio, vt sensus sit, posse hominem simul dum peccat, retinere fidem, & per hoc non amittere Dei gratiam præsentem: quia licet peccata ex natura sua hominem reum facerent, & Dei inimicum, tamen fides permanens in corde facit, ne imputentur, & non damnent. Hunc sensum fatetur Kemnitius esse Epicuræum, & meritò damnatam à Concilio eam propositionem in hoc sensu, quod etiam fatetur Caluinus in Antidoto huius canonis 6. Hinc enim datur licentia hominibus baptizatis patrandi quæuis peccata, modò simul credant ea sibi non imputari. Sed nullo modo Kemnitius concedit hanc fuisse mentem Lutheri.

NOTA TERTIO, rectissimè à Concilio damnatam esse illam Lutheri sententiam. Nam & dicta est à Luthero in sensu tertio, licet nolit Kemnitius: & præterea hæretica est etiam in secundo sensu, quem Kemnitius, & Caluinus admittunt. Ac PRIMVM fuisse illam mentem Lutheri, patet ex his locis. In lib. de Babyl. captiuit. cap. de Baptismo, postquam dixerat, hominem baptizatum non posse damnari, nisi nolit credere, subiungit: *Nulla peccata eum possunt damnare, nisi sola incredulitas: cetera omnia si redeat, vel stet fides in promissionem diuinam baptizato factam, in momento absorbentur per ean-*

88 Cap. XIV. De Sacram. Baptismi. Lib. I.

dem fidem. Hæc ille. Vbi vides, eum dicere, *si redeat, vel stet fides.* Putauit igitur Lutherus posse stare fidem, dum quis peccat, & per eam fidem, peccata non imputari, etiam dum fiunt; quanquam Kemnitius non bona fide hanc sententiam referens, omisit illud; *vel stet fides.* Item in lib. de libertate Christiana: *Non facit, inquit, personam bonam nisi fides, nec malā, nisi incredulitas.* Item in quæstione, An opera faciant ad salutem, hæc est prima assertio: *Vt nihil iustificat nisi fides, ita nihil peccat, nisi incredulitas.* Secunda assertio: *Iustificatio propriè est fidei quarto modo; & peccatum incredulitatis.* Item in libro de votis monasticis: *Credientis in Christum nulla sunt tam mala opera, qua possint illum accusare & damnare.* Denique in 1. sermone super Euangelium feriæ 2. Pentecostes super illud: *Sic Deus dilexit mundum. Vbi fides, inquit, est, ibi nullum nocet peccatum.* Et addit; sic Deum nihili facere peccata credentium in se, quomodo pater nihili facit nugas ludentium infantium. Vbi apertè loquitur de peccatis, quæ actu fiunt, & vult ea non nocere, quia per fidem teguntur, vel excusantur.

QVOD autem etiam in secundo sensu falsa sit ea propositio, patet, quia repugnat Paulo, 1. Corinth. 13. *Si habuero omnem fidem, ita & montes transferam, charitatem autem non habuero, nihil mihi prodest.* Vbi Paulus docet, posse fidem esse sine charitate, & proinde hominem cum vera fide damnari. Respondet, Paulum loqui de fide miraculorum, non de fide iustificante. Contrà, quia fides miraculorum nihil est aliud, nisi excellens fides Catholica, & iustificans suo modo. Vnde Paulus infra de eadem fide loquens, annumerat eam aliis virtutibus Theologicis: *Nunc, inquit, manet fides, spes, charitas.* Et hoc loco dicit: *Si habuero omnem fidem.* PRAETEREA, secundum Lutheranos nulla est ratio cur non possit fides ipsa iustificans manere cum peccato. Nam nihil est aliud, nisi fiducia diuinæ misericordiæ, vt ipsi passim definiunt. Quid autem prohibet, quò minus possit aliquis dum furatur, vel mæchatur, confidere, Deum non imputaturum eam actionē ad peccatum. DENIQUE, si potest cum fide manere peccatū factum, quod tamen verè peccatum est, & in iustificatis hæret, vt ipsi dicunt, cur nō etiam peccatum, quod fit? certè si peccatum non posset consistere cum fide, id non esset ratione tēporis præteriti, vel præsentis, sed ratione malitiæ, & sorditatis ipsius peccati.

peccati. At peccatum iam factum cum tota sua malitia, & fœditate manet præfente fide; Ergo fieri etiã potest præfente fide. Quare coguntur, si principia sua destruere nolunt, admittere tertium illum sensum cum Luthero: quẽ tamen fatentur Epicuræum esse ac meritò damnatum à Concilio Tridentino.

C A P V T X V.

Per Baptismum non liberari homines à seruanda lege Dei.

SEQVITVR ALTERA propositio de secundo effectu Baptismi: *Baptismus nõ id efficit, vt homo solius fidei debitor sit, non autem implenda vniuersa legis Christi.* Hæc habetur in 7. can. Concilij Trident. Est autẽ obseruandum PRIM O, duobus modis intelligi posse hominem baptizatum dici liberum à lege diuina seruanda. VN O modo, vt facere contra eam legẽ non sit iniustum, nec peccatũ, quasi lex abrogata esset. Et hoc non docent aduersarij, quippe qui volunt omnia opera iustorum esse peccata, quia nunquã implent legẽ, vt oporteret. Et in hoc sensu fatetur Kemnitius in 2. part. Exam. pag. 216. rectẽ positum esse Concilij canonẽ, & contrariam sententiam esse blasphemam in ipsum Baptismũ. Itaque de hoc sensu non est controuersia.

ALTER O modo intelligi potest, vt facere contra legem sit quidem peccatum, tamen non imputeretur iis, qui fidem habent; nec pendeat iustificatio, aut salus ab impletione legis, sed à sola misericordia, quæ per fidem apprehenditur. Et in hoc sensu Lutherani omnes docent (licet alij timidiũs, alij liberiũs loquantur) non obligari Christianos ad legem diuinã, sed solũ ad fidẽ; immò in hoc constituunt summã libertatis Euangelicæ; vt patet ex lib. Lutheri de votis monasticis, vbi in hoc dicit consistere libertatem Euangelij, quòd pia cõscientia sit libera ab omnibus operibus, non quidem faciendis (volunt em̃ ea fieri, vt fructus fidei) sed accusantibus, & defendẽtibus: quia nulla opera sunt tam mala, quæ credentẽ accusare valeant, & damnare; nulla tam bona, quæ eum queant defendere, & iustificare. Item in comment. 2. cap. ad Galat. instituit hunc dialogũ: *Si conscientia dicat, Peccasti; respõde, Peccaui. Ergo Deus punit, & damnabit; non. At lex Dei hoc dicit; sed nihil mihi cum lege. Quare? quia habeo libertatem.* Idem satis apertò

90 *Cap. XV. De Sacramento Baptismi. Lib. I.*

apertè docet Ioannes Caluinus, lib. 3. Institut. cap. 19. §. 2. 4. & 7.

Nota SECUNDO, quid aduersarij de Concilij canone sentiant. Caluinus in Antidoto Concilij, agnoscit canonem 7. Concilij, contra suam & suorum sententiam esse positum; & apertè contrarium profitetur.

At Kemnitius in Examine eiusdem canonis fraudulenter agens, more suo, prætermittit eum sensum, in quo ipsi negare solent, obligari ad legem implendam: & perperam exponit tam Concilij sententiam: vt eam refellat, quàm Lutheri, vt eam defendat. Itaque duo dicit. PRIMO, Lutherum non docuisse Christianos liberos esse ab obedientia legis Dei, sed id solum, gratiam Baptismi, & iustificationem non pendere à conditione obseruatæ legis, quasi nemo iustificetur, nisi qui antea id meruerit per integram legis obseruationem; sed gratis dari per fidem. SECUNDO dicit, Concilium definire voluisse, pendere iustificationem, quæ fit in Baptismo, à conditione legis impletæ. Et quia Concilium id non apertè dicit, colligit ipse hoc modo; Concilium mutuatur ex cap. 5. ad Galat. illam phrasin: *Qui circumciditur, debitor est vniuersæ legis faciendæ.* Illa autem verba Paulus non dixit ex propria mente, sed ex mente, & abusu Pseudoapostolorum, qui putabant vniuersam legem esse implendam, ad hoc vt circumcisi gratiam Dei obtinerent. Ergo etiam Patres Concilij idem sentiunt de gratia Baptismi, nimirum, quòd pendeat à conditione impletæ legis Christi. Deinde fingit etiam duo sophismata Concilij pro isto dogmate, quæ & soluit. PRIMVM est, quia renūciamus in Baptismo Satanæ, & profitemur nos Deo seruituros. Inde Concilium colligit gratiam Baptismi, non pendere à sola fide, sed etiam à conditione legis. SECUNDVM, quia non baptizamur in Moysem, sed in Christum, id est, non in legem, sed in Euangelium. Concilij Patres pro nomine Euangelij, legem posuerunt, vt indicarent pendere à legis obedientia, gratiam Baptismi.

Sed vtrumq; pronunciatum Kemnitij mendacio plenum est. Ac PRIMVM Lutheri sententia tam disertè ab ipsomet Luthero expressa est, vt nullo modo excusari possit. Sic enim loquitur in libro de libertate Christiana: *Nullo opere, nulla lege Christiano homini opus est, cum per fidem liber sit ab omni lege.* Item in argumento epist. ad Galat. *Summa*, inquit, *ars, et sapien-*

sapientia Christiana est nescire legem, ignorare opera, & totam iustitiam actiuam. Et infra: *Ad nouum hominem nihil pertinet lex.* Similia passim docet in commentario epistol. ad Galat. in lib. de votis monasticis, & alibi. Denique coguntur, velint nolint hoc dicere. Nam cum ipsi existiment legem esse impossibilem, & omnia opera etiam sanctissimorum hominum esse peccata, certe si salus penderet à conditione seruatae legis, nulli saluarentur omnino ex eorum sententia.

Quantumlibet igitur Kemnitius tergiueretur, & mentiarur, confiteri cogitur, nisi Papista fieri velit, non ita obligari Christianos ad legem seruandam, ut ab eius obseruatione pendeat salus. Atque hoc ipsum est, quod Concilium damnat, & anathematizat. Nam mendacium est (ut ad SECUNDO dictum Kemnitij veniamus) Concilij sententiam esse, pendere gratiam Baptismi à conditione legis seruatae. Concilium enim hoc non dicit, nec vlllo verbo insinuat, sed contrarium disertis verbis in infinitis locis asseruit, ac praesertim, sess. 6. cap. 8. ubi dicit, nulla nostra merita esse ante gratiam iustificationis. Et in isto ipso canone 7. de Baptismo, perspicue Concilium dicit, ab ipso Baptismo nasci debitum seruandae Christi legis: ex quo manifestè colligitur non requiri ad gratiam Baptismi consequendam, conditionem legis seruatae, sed solum propositum seruandae post Baptismum. Quod etiam multò antè docuerat Concilium II. Arausicanum, can. 25.

Ad coniecturam Kemnitij ex phrasi desumpta ex epist. ad Galatas respondeo. PRIMO, Concilium Tridentinum non citasse, nec nominasse epistolam ad Galat. SECUNDO dico, in epistola ad Galatas, siue Paulus loquatur ex mente sua, siue ex mente aliorum, non haberi, ante Circumcisionem seruandam legem fuisse, sed post Circumcisionem. Id enim sonant illa verba: *Testificor omni homini circumcidenti se, quod debitor est vniuersae legis faciendae.* Adde TERTIO, quod Kemnitius dicit, loqui Paulum ex abusu Pseudoapostolorum; quod etiam habet Calvinus in Antidoto Concilij ad hunc 7. canonem, esse manifestam Scripturae deprauationem. Nam Paulus serìò testatur ita esse, ut dicit: *Testificor, inquit, omni homini, &c.* Itaque, si id falsum erat, ut Calvinus, & Kemnitius volunt, falsus testis fuit Apostolus Paulus.

Porro duo illa sophismata, quae nomine Concilij Kemnitius sibi ipse obiecit, somnia sunt delirantis. Si enim vigilans, & sanus

92 *Cap. XV. De Sacramento Baptismi. Lib. I.*

sanus fuisset, saltem argumenta finxisset, quæ haberent aliquam speciem argumenti. Illa autem nullam prorsus speciem habent. Ex eo enim, quod renunciamus in Baptismo Satanæ, & promittimus Deo nos deinceps seruituros, nullo modo colligi potest, pendere gratiam Baptismi à conditione impletæ legis; cum è cōtrario profiteamur illa abrenunciatione, & illa promissione, nos ante Baptismum seruasse Satanæ, & non Deo. Legem autem Christi non Euangelium, Concilium nominauit dedita opera, vt damnaret errorem Lutheranorum, qui Euangelium solam promissionem gratiæ esse volunt, non etiam legis nouæ promulgationem: cum tamen Christus ipse dixerit, Matth. vltimo: *Docete omnes Gentes, baptizantes eos, in nomine Patris, & Filij, & Spiritus sancti, docentes eos ser-uare omnia, quacumq; mandauimus vobis.* Vnde & Paulus Christi legem vocat, I. Corinth. 9. *Cum ego sine lege non essem, sed in lege essem Christi.* Et Rom. 7. *Mente seruius legi Dei.*

Nota TERTIO, errorem, qui in 7. canone Concilij damnatur, quòd videlicet non sint Christiani ita debitores legis, vt ab eius obedientia pendeat salus, refellendum esse in disputatione de iustificatione, tanquam in proprio loco. Interim tamen adferri posse apertissima Scripturarum testimonia. Nam Matth. 19. dicitur: *Si vis ad vitam ingredi, serua mandata.* Rom. 8. *Debitores sumus non carni, sed secundum carnem viuamus. Si enim secundum carnem vixeritis, moriemini; si autem spiritu facta carnis mortificaueritis, viuesis.* 2. Cor. 5. *Omnes nos manifestari oportet ante tribunal Christi, ut referat unusquisq; propria corporis, sicut gesserit, siue bonum, siue malum.* Galat. 6. *Nolite errare, Deus non irridetur; quæ seminauerit homo, hæc & metet.* Deniq; nihil sæpius Scriptura clamat, quam Deum unicuique daturum secundum opera sua.

SED insignis omninò Lutheri responsio est ad hæc & similia loca in comment. 3. capitis ad Galatas: *Cum illaqueant, inquit, te argumentis ex Scripturis pro defensione bonorum operum desumptis, simpliciter respondendum est; Hic mecum est Christus, illic vobiscum, Scriptura testimonia pro operibus. Christus autem Dominus est Scriptura, & bonorum operum. Item responde simpliciter; Tu vrges seruum, id est, Scripturam, quam relinquo tibi, ego vrgeo Dominum, qui Rex est Scriptura.* Egregia sanè solutio, quasi Christus, & Scriptura contraria sint, & non potius Christus per Scripturam nos alloquatur. Vt omit-

tam,

tam, quod hic ille est Lutherus, qui in libro de abroganda Missa, & in omnibus ferè scriptis suis, sola Scriptura fretus contemnit omnes Patres, omnia Concilia, omnē Ecclesiā & totius orbis terræ consuetudinē. Nimirum illud assequi voluit, vt ipse vnus non solū pro omnibus Patribus, & Conciliis, sed etiam pro omnibus diuinis literis haberetur.

CAPVT XVI.

Per Baptismum non liberari homines ab obligatione legis Ecclesiasticæ.

TERTIA propositio: *Non liberat Baptismus homines ab obligatione Ecclesiasticæ legis.* Hæc habetur in 8. can. Concilij, estque posita aduersus Lutherum, qui in libro de captiuit. Babylon. cap. de Baptismo, & alibi passim docet, non posse Papam, aut vllum hominum vnā syllabam statuere, qua obligentur conscientia hominum baptizatorum.

Vbi illud est **OBSERVANDVM**, alio modo ab aduersariis liberari fideles ab obedientia legum diuinarum, & alio modo ab obedientia legum humanarum. Nam diuinas leges affirmant obligare in conscientia, ita vt sit peccatum eas violare; sed tamen addunt fidelibus indulgeri eiusmodi prauaricationes, seu nō imputari; ac per hoc idem esse, ac si liberi essent ab earum legum obseruatione. At leges humanas, siue Ecclesiasticas, siue politicas affirmant non obligare in conscientia, nisi ratione scandali, aut contemptus, quæ sunt prohibita lege diuina. Itaque transgredi legem humanam etiam studiose, non modò non imputatur ad peccatum, sed neque est vllum peccatum apud aduersarios. Quare tam Kemnitius, quàm Calvinus, ille in suo Examine, iste in suo Antidoto canonem istum 8. simpliciter reiciunt, ac Lutheri sententiam apertè defendunt.

Sed quoniam hunc errorem nos accuratè refutauimus in disputatione de summo Pontifice, & breuiter in libro de Sacramentis in genere, cap. 59. de cæremoniis, satis erit hoc loco ostendere, obligationem legis humanæ non pugnare cum Baptismo. Id quod fiet soluendo ipsorum obiectionem, quæ est huiusmodi: *Per Baptismū addicimur diuinæ seruituti; ergo liberamur*

94 Cap. XVI. De Sacramen. Baptismi. Lib. I.

*liberamur ab omnibus aliis Vinculis. Atq; hoc est, quod Scriptura passim docent. Matth. ult. Baptizantes eos in nomine Patris, & Filij, & Spiritus sancti, docentes eos seruare quacunque mandauit vobis. 1. Corinth. 7. Precio empti estis, nolite fieri serui hominum. Coloss. 2. Si mortui estis cum Christo ab elementis huius mundi, quid adhuc decretis mundi tenemini iuxta mandata, & doctrinas hominum? Ezech. 20. In preceptis patrum vestrorum nolite ambulare. Matth. 15. Frustrà colunt me mandatis hominum. Et hæc quidem profert Kemnitius: addit verò vnum, quod solum Caluino satis fuit: *Et vnus est Legislator*, inquit Iacobus, cap. 4. *qui potest perdere, & saluare. Vbi hoc falsum esse*, inquit Caluinus, *demonstrauerint, non recusabimus, quin suis nos legibus adstringant.**

At non opus est demonstrare id esse falsum, quod Iacobus dicit, cùm sit verissimum; sed ex illo vero non bene intellecto falsum aliquid, & perniciosum, & verbo Dei repugnans à Caluino perperam esse collectum. Iacobus enim de summo Legislatore loquitur, qui ita fert aliis leges, vt nullas ab alio accipiat, quiq; ita potest perdere, & saluare, quos damnauerit, aut absoluerit, vt nullius ope indigeat, & à nullo impedi queat: talem autem Legislatorem fateamur non esse Papam, neque Imperatorem, sed vnum, & solum Deum. Sed nō inde bene colligitur non esse etiam homines quosdam verè legistatores, licet sub Deo summo Legislatore constitutos; ita vt sicut inferioribus dant leges, ita etiam accipiant ipsi à superiore, id est, à Deo.

Esse autem eum sensum Iacobi patet, PRIMO ex ipso contextu. Nam probare volebat Iacobus nō debere homines aliis hominibus detrahere. Id probat, quia lex Dei id prohibet: *Qui enim*, inquit, *detrahit fratri, detrahit legi*, quasi lex bona non esset. Non esse autem detrahendum legi, probat, quia: *Qui detrahit legi, indicat legem; qui autem indicat legem, non est factor legis, sed index.* Nullum autem esse debere iudicem legis diuinæ, probat, quia: *Vnus est Legislator*, id est, vnus solus est, qui dat omnibus legem, & omnes omninò, illo vno excepto, subiecti sunt legi. Hoc argumentum S. Iacobi bene intellectum, nihil aliud probat, nisi nullum esse præter Deum; talem Legislatorem, qui non ab alio legem accipiat. SECUNDO idem patet, quia Scripturæ, quæ certè secum non pugnant, non rarò nomen legislatoris, & iudicis tribuunt hominibus,

vt Pro-

vt Prouerb. 8. *Per me Reges regnant, & legum conditores iusta decernunt.* Psalm. 2. *Erudimini qui iudicatis terram.* Et confirmatur ex similibus, Matth. 23. *Vnus est Pater Vester, qui est in calis.* Item: *Magister Vester, & vnus est Christus.* Et tamen Apostolus vocat se Patrem, 1. Corint. 4. & Magistrum, 2. Tim. 1.

Ad alia, quæ sunt solius Kemnitij, RESPONDEO, per Baptismum nos Deo addici in seruitutem, ac proinde liberari à seruitute contraria. Contraria autem seruitus, non est obedientia, & seruitus, quæ præstatur hominibus, sed seruitus Diaboli, & peccati; illa enim sola impedit, ne seruiamus Deo, ista autem iuuat potius, quàm impedit. Vnde Roman. 6. dicitur: *Liberati à peccato*, non ab hominibus, *serui autem facti Deo.* Et idem Apostolus, passim imperat, vt obediant post Baptismum serui dominis, filij parentibus, priuati magistratibus, tum politicis, tum etiam Ecclesiasticis, Ephes. 6. Coloss. 3. Rom. 13. Hebr. 13. & alibi.

AD PRIMVM locum ex Matthæi vltimo. Si Kemnitius nosset rationem argumenta conficiendi, ita argumentari deberet. Dominus iubet, vt doceantur baptizati seruare omnia ipsius præcepta. Sed vnum ex eius præceptis est, vt obseruemus leges prælatorum. Luc. 10. *Qui vos audit, me audit;* ergo pugnat cum verbo Domini, & cum professione Baptismi, nolle obligari ad leges Ecclesiasticas obseruandas. Et si enim Dominus Matthæi vltimo non expressè, & nominatim iussit seruari leges Ecclesiæ, tamen generatim, & implicite id mandauit.

AD SECUNDVM ex 1. Corinth. 7. Non prohibet Apostolus seruitutem humanam absolute; nam eandem ibidem approbat tanquam utilem, ad humilitatem; sed solum quatenus contraria esset diuino obsequio; quod fieret, si quis homini seruiret in iis, quæ sunt contra Deum, vel si homini seruiret præcipue propter hominem, cum seruiendum sit etiam homini propter Deum, cuius præcipue serui sumus. Quem sensum expressit Apostolus clarius, Coloss. 3. vbi iubet seruis, vt dominis suis seruiant tanquam Christo, ita vt in homine, cui seruiunt, non tam hominem considerent, quàm Christum, ob cuius amorem libenter subiiciuntur homini.

Ad alia loca respondimus in vltimo capite libri de Sacramentis in genere.

CAPVT XVII.

Per Baptismum non fieri irrita omnia vota.

QUARTA propositio: *Per Baptismum non fiunt irrita omnia Vota.* Hęc habetur can. 9. Concilij Tridentini, estque contra Lutherum in libro de captiuitate Babylonica, cap. de Baptismo, & in libro de votis monasticis, necnon Caluinum in Antidoto, & Kemnitium in Examine huius can. 9. qui docent, per Baptismum liberari hominem ab omnibus votis, non solùm quæ antea, sed etiam quæ postea fecerit, excepto illo vno, quod fit in Baptismo, cùm promittimus nos Dei legem seruatu-
ros.

Fundamenta ipsorum sunt. PRIMO, quia Deus in Testamento veteri disposuit de votis, quomodo fierent, & quando, & de quibus rebus. At in Testamento nouo Christus, & Apostoli nihil præscripserunt, nisi vnicam promissionem, quæ fit in Baptismo, Matthæi vltimo. SECUNDO, quia vel vouere volumus res à Deo præceptas, aut non præceptas. Si præceptas, frustra id facimus, cùm in Baptismoouerimus omnia præcepta. Si non præceptas, iam pugnamus cum Baptismo, qui nos liberauit ab omnibus humanis inuentionibus. TERTIO, in Baptismo plus vouemus, quàm implere possimus; ergo stultus est, qui aliquid aliud vouet, & iniuriam facit Baptismo, quasi votum in eo factum non sit sufficiens.

Sed hæc fundamenta debilia sunt. Nam vt ad PRIMVM respondeamus, etiãsi Christus, & Apostoli nihil de votis præscripsissent, mirum non esset, cùm vota sint de iure naturæ, vt patet ex voto Patriarchæ Iacob, Genes. 28. tamen falsum est Apostolos nihil de votis tradidisse, cùm 1. Tim. 5. B. Paulus omnium interpretum consensu de voto cõtinentiæ loquatur, vbi dicit, viduas quasdam, si nubant damnationem habere, quia primam fidem irritam fecerunt.

Ad SECUNDVM respondeo, voueri posse, tum res præceptas à Deo, tum etiam res non præceptas, modò sint res bonæ. Neque frustra vouentur res præceptæ, tum quia per vorum homo magis ligatur, & certior redditur implendi, tum etiam quia quod fit ex præcepto, & ex voto, est actus duarum virtutum, & proinde excellentius, quàm id, quod fit ex solo
præce-

præcepto. Vouere autem rem non præceptam, non est contra professionem Baptismi, quia vt supra diximus, Baptismus liberat à peccato, non ab iis rebus quæ iuuant ad vitanda peccata, & quæ magis Deo subiiciunt, & cum Deo ligant, vt sunt vota. Neque dici possunt vota, humana inuenta, cum habeant in Scriptura commendationem, Psalm. 75. *Vouere, & reddere.* Et Eccles. 5. *Si quid vouisti Deo, non moreris reddere.* Neque potest responderi vota esse Testamenti veteris: nam liber Psalmorum, & Ecclesiastes, moralia documenta tradunt, quæ omnibus conueniunt. Deniq; violatio votorum pugnat potius cum Baptismo. Nam profitemur in Baptismo, nos seruaturus omnia Dei mandata; vnum autem est ex mandatis Dei, vt vota soluantur, vt patet ex locis citatis.

Ad TERTIUM respondeo, falsum, & blasphemum esse, quod aduersarij assumunt, nos in Baptismo plus promittere, quàm implere possimus; id enim, & pugnat cū verbis Christi, qui Matt. 11. vocat legem suā iugum suaue, & onus suum leue; & cum verbis Pauli, qui dicit Rom. 8. Christum mortuum esse, vt iustificatio legis impleretur in nobis: & cum Concilio Arausicano II. can. 25. vbi definitur posse hominem baptizatum seruare omnia Dei mandata; & cum Basilio oratione in illud: *Attende tibi*, & cum aliis Patribus, qui dicunt, blasphemum esse asserere Dei mandata esse impossibilia. Neque putamus promissionem in Baptismo factam esse insufficiētem. Est enim sufficiens ad suum finem, id est, ad saluandum hominem, licet addi aliquid possit, vt vel facilius, vel excellentius aliquis saluetur; quomodo non idē Baptismus est insufficiens, licet melius sit, baptizari & Eucharistiam sumere, etiā testimonio aduersariorum, quàm solum baptizari: neque verbum Dei est insufficiens, licet melius sit, verbū Dei audire & Sacramenta suscipere, quàm solum Dei verbum audire. Denique si Iudæi in Circumcisione pollicebantur se Dei legem seruaturus, & tamen præter ea vouere poterant multa alia, vt Kemnitius faretur, neque dici poterat Circumcisionis promissio insufficiens, cur non poterunt Christiani vouere aliquid, etiamsi in Baptismo promiserint, se vniuersam Dei legem seruaturus? aut cur dicetur Baptismi promissio insufficiens? Atque hæc hoc loco sufficiant: nam de votis accuratè disseruimus in disputatione de Monachis.

CAPVT XVIII.

*Sola memoria Baptismi non posse dimitti peccata,
qua sunt post Baptismum.*



QUINTA propositio: *Non potest fieri, ut sola memoria, & fide suscepti Baptismi peccata remittantur, qua post Baptismum sunt, sed necessarium est Pœnitentia Sacramentum.* Hac habetur in 10. canone Concilij Tridentini, estq; aduersus Lutherum lib. de captiuit. Babylon. cap. de Baptismo. Caluinum lib. 4. Institut. cap. 15. §. 3. & 4. & in Antidoro Concilij, & Kemnitium in censura huius can. 10.

Est autem PRIMO notandum, quæ sit ipsorum, & quæ Ecclesiæ sententia de hac re. Illi igitur PRIMO docent, Baptismum non aliter iustificare, nisi subiiciendo ante oculos promissionem, & eo modo excitando fidem, quæ sola iustificat. SECUNDO, inde colligunt, cum quis peccat post Baptismum, posse per memoriâ Baptismi iterum redire ad gratiam ipsam Baptismi. Nam sicut ipse Baptismus subiicit ante oculos promissionem, ita etiam facit memoria, & cogitatio Baptismi: proinde ipsa etiam memoria excitat fidem, & eodem modo iustificat. Id quod etiam in aliis rebus videmus: nam si quis visa insigni imagine crucifixi, mouetur ad amorem Christi crucifixi, certè etiam postea cum imaginem non videt, si mēte recogitet, & recordetur eam speciem, mouebitur. TERTIO, inde rursus colligunt Sacramentum Pœnitentiæ nihil esse aliud, nisi ipsum Baptismum memoria, & fide repetitum. Et sicut post Baptismum non remanet vlla satisfactio, nec sunt necessariæ indulgentiæ, nec Purgatorium post hanc vitam; ita existimant post Pœnitentiam, id est, post memoriam Baptismi nullam superesse satisfactionem, &c. QUARTO, inde colligunt non rectè dixisse Hieronymum in cap. 3. Isaia, & in epistol. ad Demetriadem, & ante eum Tertullianum in libro de Pœnitentia, Pœnitentiam esse secundam tabulam post naufragium. Nam Baptismi naus nunquam frangitur; sed qui peccant, ab illa naui excidunt; vnde non est opus, cum resipiscunt, ut quærant aliquam tabulam, sed redire possunt ad ipsam nauim, quæ integra, & incolumis eos expectat. Hec est

est ipsorum sententia, & certè satis delicata, & mollis, vt ne Epicuro quidem meritò displicere queat.

At verò Catholici longè aliter docent. PRIMVM enim affirmant Baptismo remitti peccata ex opere operato, id est, vi Sacramenti, vt antea ostendimus. SECUNDO, inde colligunt Baptismi efficaciam non se extendere ad futurum, sed solum ad præteritum: remittit enim peccata antea commissæ, & nõdum dimissa, id est, ea quæ inuenit in homine, quando reipsa suscipitur. Memoria autem Baptismi utilis quidem est ad agendas Deo gratias, & vt sit quasi frænum ad non peccandũ, sed nullo modo sufficit ad iustificationem. TERTIO, inde colligunt, amissam gratiam Baptismi, non posse iterum recuperari per Baptismum, sed querendum esse aliud remedium magis arduum, & difficile, id est, Sacramentum Pœnitentiæ, post quod remanet luenda temporalis pœna pro satisfactione, & inde consequitur utilitas Indulgentiarum, Purgatorij locus, &c. QUARTO, inde colligunt rectissimè dictum esse a Patribus, Pœnitentiam post Baptismum esse secundam tabulam post naufragium, quia non redeunt, qui pœnitentiam agunt, ad nauim Baptismi, sed magno cum labore nauigant, vt ij, qui arrepta tabula post naufragium, in ea vehuntur.

NOTA SECUNDO, Kemnitium in Examine can. 10. perperam exponere eum canonem, & Catholicorum sententiã. Nam pag. 229. dicit, Catholicos asserere, non posse hominem etiam per veram pœnitentiam redire ad gratiam Baptismi, & fœdus, quod Deus nobiscum in Baptismo pepigit. At non hoc Catholici dicunt: Fatemur enim posse hominem redire per veram pœnitentiam ad gratiam, ad fœdus nobiscum initum in Baptismo, id est, vt iterum simus filij Dei per gratiam, sed negamus id fieri per eadem instrumenta fœderis, id est, per Baptismum, aut eius memoriam, sed per aliud Sacramentum. Nam etiam si, vt plurimum non ita deleantur peccata per Sacramentum Pœnitentiæ, vt non remaneat aliqua pœna temporalis luenda, tamen potest tanta esse pœnitentia, vt planè deleat omnem pœnam; & sic reditur ad gratiam omninò similem ei, quæ in Baptismo habita est.

Ibidem Kemnitius dicit, Catholicos cum peccant post Baptismum, niti propria contritione, & satisfactione, vt redeant ad gratiam. Sed hoc etiã falsò dictum est. Nitimur enim gratia Dei, Christi meritis, & virtute, atque efficacia Sacramenti,

non propria contritione; licet contritionē, vt dispositionem requiramus: sicut etiam cū baptizamur, requirimus fidem, & pœnitentiam, & tamen non iis nitimur, vt causis iustificationis, sed Dei gratia, Christi meritis, & Sacramenti efficacia.

Deinde pag. 235. & 236. Kemnitius dicit, Concilium non fuisse ausum expresse damnare Luheri sententiam, quia metuebat iudicium piarum aurium in tanta luce Euangelij, idē eam deprauasse, ac sic deprauatam damnasse. Deprauasse autem ostendit, quia Concilium anathema dicit illis, qui docent peccata, quæ post Baptismum committuntur, sola recordatione suscepti Baptismi dimitti; hoc est, qui sine pœnitentia in sceleribus perseuerant, & pergunt; illis si tantum perfunctoriē, & historicē recordentur; se aliquando baptizatos esse, tali recordatione peccata dimitti: & addit hanc sententiam verē Epicuream etiam à suis sonora voce damnari. At bonus Kemnitius, dum vult ostendere à Concilio deprauatam sententiam Luheri, deprauat ipse Concilij sententiā, & quidem tam manifesto mendacio, vt mirum sit. Nam Concilium in illo ipso 10. canone, quem Kemnitius iisdem verbis descripsit in suo Examine, non dicit, sola recordatione Baptismi, eaque perfunctoria, & historica dimitti peccata apud Lutheranos: sed dicit, sola memoria, & fide Baptismi. Vbi Concilium addit fidem (quam Kemnitius semper omittit, cū canonem exagitat) & non addit historicam, aut perfunctoriam, quæ de suo Kemnitius addidit. Itaque Kemnitius partim detrahendo, partim addendo, deprauauit canonem Concilij. Concilium autem paucis verbis pro more aliorum canonum simpliciter cōprehendit Luheri sententiam, eamque disertē, & apertē damnauit.

NOTA TERTIO probationem accuratam veritatis Catholicæ, & refutationem erroris Lutheranorum, non esse huius loci, sed ad disputationem de Pœnitentia spectare; hic verò solum breuissimē probandum esse, non posse ad nauim Baptismi redire eos, qui peccant post Baptismum, sed indigere alio remedio. PRIMVM igitur id probatur ex Apostolo, Hebr. 9. *Impossibile est eos qui sunt illuminati, iterum renouari ad pœnitentiam.* Vbi Apostolus non vult dicere, non posse lapsos redire ad pœnitentiam vllo modo: iste enim est error Nouatianorum, quem nec aduersarij probāt; sed vult dicere,

non

non posse renouari ad pœnitentiam, quomodo renouantur, qui baptizantur. Ita enim exponunt Ambrosius, Chrysostomus, & alij interpretes; & eandē expositionem admittit Kemnitius in Examine sequentis canonis, pag. 240. & idem patet ex verbis, *illuminati, & renouari, & crucisfigentes Filium Dei*, quæ sunt propria Baptismi, in quo illuminamur, & renouamur, & Christi mortem imitatur.

DICIT aliquis fortasse pro Kemnitio: Hic locus probat non posse iterari Baptismum; at non probat non posse hominem redire ad reconciliationem per memoriam Baptismi: immò verò hic locus id potissimum probat. Nam aduersarij, & si nolint repeti asperisionem aquæ, tamen repeti volunt Baptismi efficaciam, ita vt verè per Baptismum remittantur peccata postea facta, & remittantur eadem facilitate, & eadem perfectione, ac plenitudine sicut antea, vt non sit vllò modo secunda recôciliatio laboriosior, quàm prima. At hoc ipsum est, quod Apostolus negat. Nam in primis idèd noluit dicere impossibile esse iterum baptizari, sed impossibile esse iterum renouari ad pœnitentiã, scilicet Baptismalem. Præterea propositum Apostoli est, deterrere homines baptizatos à peccatis, quos ea ratione deterret, quia nō poterunt amplius eadem facilitate reconciliari. At secundum Lutheranos eadem facilitas est, immò etiam maior in secunda reconciliatione, quàm in prima: facilius enim est recordari, & cogitare Baptismum, quàm reipsa baptizari.

SECUNDO idem probatur ex testimoniis Patrum, qui semper peccantibus post Baptismum, imposuerunt grauissimos labores, antequam eos reconciliarent, vt patet ex Cypriano in sermone de lapsis, & ex aliis, quos nominare non est opus, cùm Caluinus lib. 3. Institut. cap. 4. §. 38. dicat, omnes ferè veteres, quorum libri exstant, aut in hac parte lapsos, aut nimis asperè, & durè loquutos. Vbi apertè confitetur veteres Patres, & quidem ferè omnes non fuisse in ea sententia, vt esset æquè facilis reconciliatio in Baptismo, & post Baptismum.

TERTIO idem patet ratione. Nulla enim æquitas patitur, vt æquè facilem viam habeant ad gratiam Dei, qui peccant ante Baptismum, & qui post Baptismum; cùm illi Deum ignorarent, isti nossent: illi non haberent gratiam, isti haberent. Nam etsi Catechumeni ante Baptismum Deum per fidem

nouerunt, sæpe etiam charitate flagrant: tamen hæc omnia ad gratiam Baptismi pertinent. Nam & Catechismi doctrina, dispositio ad Baptismum est; & gratia illa, atque charitas, quæ interdum in Catechumenis reperitur, ex voto Baptismi procedit. Sed diluamus etiam breuiter ipsorum obiecta.

PRIMUM argumentum Lutheri sumitur ex illa promissione, Marci ultimo: *Qui crediderit, & baptizatus fuerit, saluus erit.* hæc enim promissio semper manet, & semper est vera. Quare, qui peccando à fide, & à Baptismi fœdere recessit, si iterum incipiat credere, & amplecti fœdus Baptismi sui, certè saluus erit. Confirmat Lutherus, quia hoc modo in Testamento veteri Iudæi, quando redibant ad pœnitentiam, vt reconciliarentur Deo, ad memoriam reuocabant exitum de Ægypto.

RESPONDEO, argumentum nihil concludere: quia licet veritas promissionis sit perpetua, tamen conditionata est, non absoluta. Alioqui omnes Apostatæ saluarentur: de illis enim verum est dicere, Crediderunt, & baptizati sunt. Itaque intelligitur conditio; Si permanserit in fide, & fœdere Baptismali, saluus erit: quod si non permanserit, non saluabitur hoc remedio, sed aliud querere debet. Qui enim semel excidit per peccatum mortale à fœdere Baptismi, non potest iterum ad illud redire: non enim reditur ad fœdus Baptismi per solam cogitationem, seu memoriam Baptismi. Reipsa autem baptizari, quod esset verè redire ad fœdus Baptismi, nullo modo licet. Et patet id exemplo fidei, & aliarum rerum: non enim redire dicitur ad fidem, qui cogitat se aliquando credidisse, sed qui iterum actu incipit credere. Confirmatio autem illa de exitu ab Ægypto, nihil etiam probat: non enim commemorabant exitum illum, quasi ea cōmemoratione peccata purgarentur, sed vt commemorato tam insigni beneficio, arguerent ipsi suam erga Deum ingratitudinem, & eo modo se ad pœnitentiam prouocarent: quod commodum nobis quoque adferre Baptismum non negamus. ADDE, quod si vera esset Lutheri sententia, debuissent Iudæi commemorare potiùs Circumcisionem, quæ erat illis pro Baptismo, quàm exitum de Ægypto.

SECUNDUM argumentum Kemnitij est. Scripturæ cum de Baptismi effectu loquuntur, modò eum describunt per tempus præteritum, modò per futurum, modò etiam per præsens; igitur

igitur Baptismus vim habet purgandi omnia peccata præterita, præsentia, & futura. Antecedens probat; Nam Tit. 3. dicitur in præterito: *Saluos nos fecit per lauacrum regenerationis.* Marc. ult. dicitur in futuro: *Qui crediderit, & baptizatus fuerit, saluus erit.* 1. Pet. 3. dicitur in præsentia: *Saluos nos facit Baptisma.* Et Ephes. 5. *Mundans eam lauacro aqua.* De quo loco AUGUSTINVS lib. I. de nuptiis, & concupiscentia, cap. 33. sic loquitur: *Quod Paulus ait; Mundans eam lauacro aqua, sic accipiendum est, Et eodem lauacro regenerationis, & verbo sanctificationis, omnia prorsus mala hominum regenerantium mudentur, atque sanentur, non solum præterita peccata, quæ omnia nunc remittuntur in Baptismo, sed etiam quæ posterius humana ignorantia, vel infirmitate contrahuntur; non Et Baptismus, quoties peccatur, toties repetatur; sed quia ipso, quod semel datum est, fit, Et non solum antea, Verum etiam postea quorumlibet peccatorum Venia fidelibus impetretur.* Deniq; addit Kemnitiuss id totum clarissimè explicari, Rom. 6.

RESPONDEO, nullum esse Scripturæ locum, quo probari possit, Baptismo deleri peccata futura, aut etiam præsentia, id est, quæ in præsentia committimus nos, qui iam dudum baptizati sumus, quæ quidem respectu Baptismi, futura dici possunt. Quod autem obiicitur ex Marc. ult. *Saluus erit*, vel accipitur de salute in re, id est, de ipsa gloria sempiterna; & eam, non dubium est, futuram esse, sed ea non est effectus, sed finis Baptismi. Nos autem de effectu differimus; effectus enim Baptismi est remissio peccatorum præteritorum, finis autem vita beata futura, iuxta illud Apostoli Rom. 6. *Nunc Verò liberati à peccato, serui autem facti Deo, habetis fructum vestrum in sanctificationem, finem Verò vitam æternam:* vel accipitur de salute in spe, id est, de ipsa gratia iustificationis; & eam certum est mox consequi ad Baptismum; proinde esse quidem futuram respectu Baptismi, sed peccatorum præteritorum, non futurorum. Quemadmodum qui dicit; Si tale pharacum acceperis, curaberis; indicat curationem sequuturam post medicinam, sed eam curationem esse morbi antea contracti, non postea contrahendi.

Quod verò obiicitur ex 1. Pet. 3. *Saluos facit Baptisma*, non est ad rem; nam Petrus cum loquitur de tempore præsentia, non comparat Baptismum cum peccatis, sed tempus Christi cum tempore Noë, ac dicit; quod sicut tempore Noë diluuiū

saluos fecit octo homines per arcam, ita nunc tempore Christi saluat Baptismus credentes, &c.

Quod obiicitur ex cap. 5, ad Ephes. *Mundans eam*, facile explicatur. Nam illud (*mundans*) non refertur ad singulos homines, sed varios, qui vnam constituunt Ecclesiam. Christus enim quotidie mundat Ecclesiam lauacro aquæ, quia quotidie baptizantur aliqui; omnes tamen cum baptizantur, mundantur à peccatis præteritis, non à futuris. Quod si quis referat ad singulos homines, tum dicendum est, Baptismo purgari peccata futura, non immediatè, sed mediatè; quia videlicet, qui baptizatus est, per gratiam quam in Baptismo accepit, impetrat veniam peccatorum venialium, quæ postea facit, si eam petat; & præterea per Baptismi characterem ius habet ad Sacramentum Pœnitentiæ, quo peccata etiam mortalia purgantur, quod Sacramentum percipere non possunt, qui Baptismo carent. Et hoc est, quod AUGUSTINVS dicit eo loco, quem citat Kemnitius. Solùm enim Augustinus dicit, Baptismo peccata futura purgari aliquo modo, quia sine precepto Baptismo, nihil profunt cetera, quæ fiunt ad peccatum purgandum, vt Pœnitentia, Eleemosynæ, Ieiunia, &c. *Quid enim*, inquit, *prodesset, vel ante Baptismum Pœnitentia, nisi Baptismus sequeretur, vel postea nisi præcederet?* Vnde idem Augustinus, cum loquitur de immediato, & proprio effectu Baptismi, disertè contrarium scribit, vt in epist. 23. ad Bonifacium: *Semel acceptam paruulus Christi gratiam, non amittit, nisi propria impietate, si atatis accessu tamalus euaserit; tunc enim etiam propriè incipiet habere peccata, quæ non regeneratione auferantur, sed alia curatione sanentur.*

Quod denique obiicitur ex cap. 6. ad Rom. nihil momenti habet. Nam Apostolus in eo cap. non docet quomodo remittantur peccata post Baptismũ, sed quomodo cauere debeant: dicit enim per Baptismum hominem mori peccato, vt deinceps viuatur Deo; proinde hominem semel renatum in Christo debere omni diligentia cauere, ne iterum inquinetur, & moriatur. Sed quid hæc ad rem de qua agimus?

TERTIVM argumentum est eiusdem Kemnitij. Fœdus Dei cum homine perpetuum est, Isai. 54. *In misericordia sempiterna misertus sum tui.* Rom. 3. *Nunquid illorum incredulitas fidem Dei euacuauit?* 2. Tim. 2. *Si non credimus, ille fidelis permanet, negare seipsum non potest.* Hier. 3. *Tu autem fornicata es cum*

es cum amatoribus multis, tamen reuercere ad me, dicit Dominus. Ergo fœdus nobiscum initum in Baptismo nunquam ita frangitur, quin possimus ad illud redire, illudque renouare. Et confirmat, quia Paulus Galat. 3. & 1. Cor. 12. lapsos post Baptismum reuocat ad promissionem gratiæ Baptismi. Denique addit, ipsam naturam eius promissionis hoc ostendere. Nam promissio Baptismi est: *Vt iustificati gratia Christi habedemus uitam æternam*, Tit. 3. Hæc autem est generalis ratio iustificationis, post quemcunque lapsum; ergo semper iustificamur per Baptismum.

RESPONDEO, Kemnitium sine vlla verecundia ludere in Scripturis, earumq; testimoniis abuti. Nam locus Isa. 54. continet promissionem absolutam, nimirum de fouenda perpetuò Ecclesia; ista enim promissio à nulla conditione pendet. Est enim Matrimonium inter Christum & Ecclesiam planè indissolubile. Similiter locus Roman. 3. continet absolutam promissionem de mittendo Messia in mundum. At promissio Baptismi non est absoluta, sed conditionata, vt patet, quia includit conditionem fidei, perseuerantiæ, &c. Locus autem 2. Tim. 2. pro nobis est. Cùm enim Paulus dicit: *Si non credimus, ille fidelis permanet, negare seipsum nō potest*, significat Deum ita esse fidelem, quia facit quod promisit, dum iustos præmio, impios pœna afficit. Vnde præmisit: *Si sustinemus, & conuiuemus; si negauerimus, ille negabit nos*. vbi vides promissionem conditionatam. Locus Hierem. 3. docet, Deum recipere homines ad gratiam, si redeant; sed non docet recipere eodem modo, & per eadem instrumenta, quibus antea recepit. Locus Galat. 3. nihil facit ad rem. Nam Paulus non docet eo loco, quomodo iustificentur impij lapsi post Baptismum, vt Kemnitius fingit, sed docet homines non iustificari Circumcisione, aliisque operibus legis, sed per fidem Christi; id quod probat, quia qui baptizantur, Christum induunt. Locus autem 1. Corinth. 12. ne vlla quidem specie ad rem præsentem facit. Solùm enim Paulus dicit esse nos omnes vnum corpus, quia in vno spiritu baptizati sumus: nec aliquid addit de lapsis iustificandis post Baptismum. Denique argumentum ex natura promissionis Baptismi, est ineptum sophisma. Et si enim Baptismus promittat salutem per Christum; & quicumq; post quemcunque lapsum iustificatur, per Christum iustificetur; non tamen inde sequitur, eos iustificari per Baptismum,

qui

qui post Baptismum lapsi sunt. Nam latiùs patet iustificari per Christum, quàm iustificari in Baptismo per Christum. Nam etiam Sacramentum Pœnitentiæ, & Eucharistiæ, & cetera promittunt salutem per Christum.

QVARTVM argumentum est Caluini lib. 4. Instit. cap. 15. §. 3. In Baptismo communicatur nobis Christi puritas. Sed ea semper viget, nec ullis maculis opprimitur: igitur semper manet virtus Baptismi nobis semel collati, & semper ad eam redire possumus, & per eam iustificari. Confirmat ex Patribus, qui reprehendunt eos, qui differunt Baptismum vsq; ad mortem. Multi enim olim hoc errore decepti, quòd Baptismus non purget, nisi præterita peccata, nolabant baptizari, nisi in fine vitæ, quando non amplius erant peccaturi. Sed Patres arguunt eiusmodi errorem; proinde credebant Baptismo purgari peccata omnia, etiam futura.

RESPONDEO, argumētum Caluini niti falso fundamento, quòd videlicet iustificemur ipsa Christi iustitia nobis imputata. Illa enim verè semper viget, nec ullis maculis opprimitur: sed falsum est, ea nos iustificari formaliter. Nos enim iustificamur propria, & nobis inhærente iustitia, quæ planè non viget, & maculis obruitur, & aboletur, cùm peccamus. Ad confirmationem respondeo, eam pro nobis facere. Nam si Patres credidissent id, quod credit Calvinus, quando reprehendebant eos qui Baptisma differebant, istam causam reddidissent, quòd Baptismus lauet etiam peccata futura: nihil enim potuit adferri efficacius. At nullus veterum istam reddidit, sed alias quasdam, vt patet ex Basilio in orat. 13. de exhortatione ad Baptismum, & Nazianzeno orat. in sanctum laucrum, & Chrysostomo homil. 1. in Acta, qui hortantur ad non differendum Baptismum, tum ob periculum, & incertitudinem mortis, tum ob multa bona, quæ secum adfert Baptismus.

QVINTVM argumentum est Caluini ibidem, §. 4. Potestas clauium non potest separari à Baptismo; ergo qui post Baptismum lapsi, virtute clauium reconciliantur, per Baptismum reconciliantur. Antecedens probat; Nam potestas clauium non exercetur sine prædicatione Euangelij, qua annunciamus impios mundari Christi sanguine: signum autem, & testimonium sanguinis Christi effusi, est Baptismus; ergo potestas clauium non exercetur sine Baptismo.

RESPON-

RESPONDEO; Si argumentum aliquid valeret, efficeret etiam nullum reconciliari, nisi per Eucharistiam, aut eius memoriam: nam Eucharistia est etiam signum, & testimonium sanguinis Christi effusi. Sed argumentum nihil concludit, tum quia falsum est, clauium potestatem non exerceri nisi prædicatione Euangelij, tum etiam quia latius patet mundari impios Christi sanguine, quàm mundari per Baptismum. Siquidem Christi sanguis est, qui semper mundat, sed is per varia instrumenta applicatur; aliquando quidem per Baptismum, aliquando per alia Sacramenta, aliquando sine Sacramentis per fidem, & veram conuersionem; aliquando per martyrium, vt suprà dictum est.

CAPVT XIX.

De Baptismo Ioannis, qui fuerint errores.

SEQVITVR controuersia OCTAVA de comparatione Baptismi Christi cum Baptismo Ioannis, de qua est primus canon Concilij Tridentini, sess. 7. de Baptismo: *Si quis dixerit, Baptismum Ioannis habuisse eandem vim cum Baptismo Christi, anathema sit.* Tres erunt partes huius controuersia. PRIMO exponemus errores, & opiniones. SECUNDO aperiemus, & confirmabimus veritatem. TERTIO diluemus obiectiones.

Quod ad PRIMVM attinet, fuit antiquus error Petilianæ Donatistæ, vnum esse Baptismum Christi, & Ioannis. Distinguebat enim tres gradus eiusdem Baptismi; ac dicebat, Ioannem baptizasse aqua, Christum spiritu, Paracletum igne; sed hæc tria ad vnum, & eundem Baptismum pertinere. Refert, & refellit Augustinus libro 2. contra literas Petilianæ, cap. 32. 34. & 37.

Hoc nostro tempore Lutherus initio prædicationis suæ apertè distinguebat Baptismum Ioannis à Baptismo Christi. Nam in disputatione de Baptismo legis, Ioannis, & Christi edita anno XX. tria ponit discrimina inter hæc Baptismata. PRIMVM, quòd Baptisma Ioannis non sit Sacramentum, Christi autem sit. SECVDVM, quòd illud non remittat peccata, hoc autem remittat. TERTIVM, quòd baptizati à Ioanne iterum essent baptizandi, non autem baptizati Christi Baptismo.

Cete.

108 Cap. XIX. De Sacram Baptismi. Lib. 1.

Ceterum hæc sententia, quia non bene cohæret cum reliqua doctrina Lutheranorum de Sacramentis, non placuit Lutheri discipulis; omnes enim contrarium docuerunt, nimirum Baptisma Ioannis Sacramentum fuisse, & peccata remisisse, & ab eo baptizatos non fuisse iterum baptizandos. Ita docet Melanchthon in locis anni LVIII. tit. de Baptismo Ioannis: *Esst, inquit, differentia erat in hoc articulo, Ioannes de passuro Christo, Apostoli de passio, & resuscitato prædicant: tamen ministerium fuit idem, & effectus eosdem habuit in credentibus.* Vbi apertè retractat, quod scripserat in locis anni XXII. tit. de Baptismo: ibi enim cum Luthero docuerat Baptismum Ioannis signum fuisse mortificationis, Christi verò Baptismum, signum iustificationis; & propterea debuisse iterum baptizari, quos Ioannes baptizauerat. Idem habet, idem Philippus, & Alefius, & Lossius Lutherani in cap. 1. Ioan. Item Martinus Bucerus, & David Chytræus in cap. 3. Matth. Ioannes Brentius hom. 21. & 29. in Luc. Idem etiam Centuriatores, Cent. 1. cap. 4. col. 156. & cap. 10. col. 361. Item Nicolaus Selneckerus in 2. Pædagogicæ tit. de Baptismo. Item Zwinglius lib. de vera, & falsa religione, cap. de Baptismo, & Calvinus tum in Antidoto Concilij, tum in Instit. lib. 4. cap. 15. §. 7. & 8. Denique Martinus Kemnitius in 2. part. Examinis, pag. 165. & seq. conuenit cum ceteris, quòd Baptisma Ioannis remitteret peccata, & esset idem Sacramentum cum Baptismo Christi, quem Apostoli ministrabant, tamen non audet definire, an baptizati à Ioanne essent iterum baptizandi Christi Baptismo. Nam proposita quæstione, & rationibus pro vtraque parte, tandem ita loquitur pag. 190. in fine: *Relinquatur igitur hæc quæstio in medio, Et quæ in vtramque partem rationes habet.* In quo valde cautè, & solerter egit. Nam hoc modo non apertè repugnauit, aut priori Lutheri & Philippi sententiæ, aut posteriori, & communi sententiæ Lutheranorum: & præterea liberauit se à molestissima quæstione, in qua soluenda alij multum sudant, nec tamen se expediunt, videlicet, quomodo Actor. 19. baptizari iubeantur Christi Baptismo, quos constabat à Ioanne antea baptizatos.

Inter Catholicos fuerunt etiam duæ opiniones de Baptismo Ioannis; quarum altera censetur errònea; altera multum improbabilis. PRIOR fuit Petri Lombardi, qui lib. 4. dist. 2. distinguit duo genera baptizatorum à Ioanne. VNVM eorum, qui

qui sic baptizabatur à Ioanne, vt spem ponerent in eo Baptismo, & non haberent notitiam Spiritus sancti; & hos fatetur baptizandos fuisse Christi Baptismo. *ALTERVM* eorum, qui baptizabantur à Ioanne, sed non ponebant spem in eo Baptismo, & habebant notitiam Spiritus sancti; & hos dicit non fuisse necessarium baptizari Christi Baptismo. Hæc sententia præter argumenta, quæ infra adferemus contra hæreticos, refelli potest ex his, quæ Magister ipse, & omnes Catholici concedunt. Nam consensu omnium, Christi Baptismus post promulgationem suam omnes homines obligat. At Baptismus Ioannis non erat Baptismus Christi, vt eadem distinctione docet Magister, igitur baptizati à Ioanne, obligabantur ad Christi Baptismum suscipiendum. Quare S. Thomas 3. p. quæst. 38. art. vlt. scribit hanc opinionem esse penitus irrationabilem.

ALTEra opinio est, Baptismum Ioannis fuisse Sacramentum quoddam, qualia erant Sacramenta veteris legis. Ita docuit Magister loco notato, & multi Scholasticorum, atq; ipse etiam S. Thomas ibidem: sed meritò postea idem S. Thomas contrarium docuit 3. parte quæst. 38. art. i. Nam Sacramenta veteris legis cœperunt cum ipsa lege, & durauerunt toto tempore quo lex ipsa durauit. Baptismus autem Ioannis cœpit in fine legis, & nō durauit nisi annum vnum; aut paulò amplius. Vnde rectè ait S. Thomas Baptismum Ioannis non pertinuisse ad legem veterem, sed potius ad nouam, vt quandam præparationem ad Christi Baptismum.

DICES, Baptismum Ioannis non fuisse Sacramentum legis veteris, nec nouæ, sed medium inter vtraque. At id fieri nequit. Non enim esse potest Sacramentum medium inter Sacramenta duarum legum, nisi etiam lex ipsa media sit. Lex autem media inter veterem, & nouam nulla fuit: vna enim abrogata, altera continuò successit; quare si Baptismus Ioannis Sacramentum esset, esset omnino legis veteris, aut nouæ. Neque sufficit ad rationem Sacramenti (quod veteres illos fecerint videretur) vt significet Christi Baptismum, vel etiam gratiam dandam per Baptismum. Nam etiam diluuium i. Petri 3. & mare rubrum i. Corinth. 10. significarunt Baptismum, & manna Eucharistiam, & tamen non fuerunt Sacramenta, sed solùm figuræ Sacramentorum. His ergo omissis veniamus ad veritatem constituendam, & probandam contra hæreticos.

CAPVT XX.

*Baptismum Ioannis non fuisse Sacramētum idem
cum Baptismo Christi.*



Ad explicandam, & probandam veritatem, tres propositiones constituendæ erunt. PRIMA propositio: *Baptismus Ioannis non fuit Sacramētum idem cum Baptismo Christi.* Hæc est contra Philippum, Caluinum, Kemnitium, & ceteros, qui idem ministerium asserunt fuisse Ioannis, & Apostolorum. Probatur PRIMO. Baptismus Ioannis ab ipso Ioanne institutus erat; non ergo erat Sacramētum præsertim nouæ legis. Consequentia patet, quia nullus homo purus Sacramēta instituire potest, præsertim nouæ legis, vt suprà ex testimoniis etiam aduersariorum probauimus. Antecedens probatur, quia in Scripturis passim vocatur Baptismus Ioannis, vt Matth. 3. *Videns Ioannes multos Venientes ad Baptismum suum.* Matth. 21. *Baptismus Ioannis de cælo erat, an ex hominibus?* Similiter legimus Marc. 11. Luc. 20. Act. 1. 18. & 19. Ista autem denominatio non potest significare Ioannem ministrum tantum fuisse eius Baptismi, sed etiam auctorem; alioqui Baptismus Christi potuisset etiam vocari, Baptismus Petri, Pauli, Philippi, & aliorum; quod tamen Scriptura diligenter cavit, ne viderentur illi auctores Baptismi, vt Augustinus notauit lib. 5. de Baptismo, cap. 13. & alibi.

DICES; At Baptismus Ioannis à Deo, non ab ipso institutus videtur. Sic enim ipse ait, Ioan. 1. *Qui misit me baptizare, ille mihi dixit.* RESPONDEO cum Augustino loco citato, cap. 9. & 13. & cum Tertulliano lib. de Baptismo, vbi tractat illam quæstionem à Christo propositam, an Baptismus Ioannis esset de cælo, an ex hominibus; Baptismum Ioannis à Deo fuisse institutum, sed mediante ipso Ioanne. Deus enim solum in genere inspirauit, & inspiratione illa mandauit, vt baptizaret; sed ritum in particulari, quo baptizandum esset, ipse Ioannes instituit, non à Deo præscriptum accepit. Vnde merito dicitur proprius Ioannis Baptismus.

SECUNDO; In Baptismo non sola aqua est de essentia ritus, seu Sacramenti, sed etiam inuocatio Trinitatis, vt suprà probatum est; nec dissentiant aduersarij saltem in praxi, cum etiam ipsi ita baptizent. At Baptismus Ioannis non habuit inuo-

inuocationem Trinitatis; non igitur est idem Sacramentum cum Baptismo Christi. Assumptio probatur, quia licet Centuriatores Cent. 1. lib. 2. cap. 6. col. 496. affirmant Ioannem baptizasse in nomine Patris, & Filij, & Spiritus sancti: tamen neque Scriptura, neque vlla Patrum traditio id docuit. Non possumus autem in eiusmodi rebus, nisi valde temerè aliquid fingere sine testimonio Scripturæ, aut traditionis. Fuerunt quidem, qui existimarent, Ioannem in suo Baptismo vsu formæ quadam verborum, nimirum, In nomine venturi Messia, idque propter illa verba Pauli Act. 19. Ioannes baptizauit Baptismo pœnitentiæ populum, dicens, In eum, qui venturus esset post ipsum, vt crederent. Ita enim docet Ambrosius lib. 1. de Spiritu sancto, cap. 3. Hieronymus in cap. 2. Iohelis, & Hugo de S. Victore lib. 2. de Sacramentis, par. 6. cap. 6. Sed isti ipsi, præsertim duo posteriores, monent Ioannem non baptizasse in nomine Patris, & Filij, & Spiritus sancti, & propterea non fuisse illud perfectum Sacramentum. A D D E, quod valde probabile est Ioannem nulla omnino forma verborum vti consueuisse. Illa enim verba Pauli non videntur significare Ioannem baptizasse in nomine venturi, sed tantum admonuisse populum vt crederent in venturum Messiam. Nam etiam Christum baptizauit Ioannes eo ritu, quo ceteros; & certè ridiculum fuisset, Christum baptizasse in nomine venturi.

TERTIO; Baptismus Christi est Sacramentum noui Testamenti, ergo institutum ab ipso auctore noui Testamenti. Neque id negare possunt aduersarij; nam Philippus in locis anni LVIII. titulo de numero Sacramentorum, dicit Baptismum, & Cœnam Domini, & Absolutionem esse Sacramenta instituta in prædicatione Christi, ac proinde esse Sacramenta propriè dicta. Et Kemnitius in definitione Sacramenti propriè dicti, tertiam conditionem posuit, vt in nouo Testamento sit institutum, & mandatum. At Ioannis Baptisma non fuit in prædicatione Christi institutum, nec à Christo mandatum, sed à Ioanne, antequam inciperet noui Testamenti auctor prædicare: non igitur est Sacramentum noui Testamenti, & multò minus idem cum Baptismo Christi.

QUARTO; Baptismus Christi iterari non potest, vt omnes hoc tempore Catholici, & hæretici docent, præter Anabaptistas. At baptizati à Ioanne iterum ab Apostolis iussi sunt baptizari: non igitur erat ille Christi Baptismus, quem Ioannes


ministrabat. Huius argumenti assumptionem negant Caluinus, & alij: sed ea probatur in tertia propositione.

Ceterum Kemnitius negaret consequentiam admissa assumptione. Existimat enim ipse, ut supra diximus, potuisse baptizari Christi Baptismo eos, quos Ioannes baptizauerat; quia licet ministerium sit idem, quoad substantiam, tamen differt quoad significationem. Distinguit enim Kemnitius tria, quæ idem efficiebant sub diuersa significatione, Circumcisionem, Baptismum Ioannis, & Baptismum Christi; quorum Circumcisio significabat Messiam venturum, Baptismus Ioannis Messiam iam esse in via, & venire, Baptismus Christi, Messiam venisse. Inde colligit, quod sicut circumcisi debuerunt veniente Ioanne baptizari eius Baptismate, ut profiterentur se credere Messiam iam venire, licet essent iustificati per Circumcisionem: sic etiam baptizati à Ioanne debuerunt postea Baptismo Christi baptizari, ut profiterentur se credere Messiam venisse, licet iam essent iustificati Baptismo Ioannis.

At contra has Kemnitij argutias nos obiicimus in primis AUGUSTINUM, qui libro 5. de Baptismo, cap. 9. eam consequentiam facit, quam nos fecimus, & quam Kemnitius negat: *Baptizatos*, inquit Augustinus, *à Paulo eos, qui iam Baptismo Ioannis baptizati fuissent, legimus in Actibus Apostolorum, non ob aliud, nisi quia Baptismus Ioannis non fuerit Christi Baptismus.* Præterea, si ratio Kemnitij valeret, probarem etiam baptizatos ab Apostolis ante Christi passionem, & resurrectionem, debuisse iterum baptizari post resurrectionem. Nam Baptismus Christi ante eius passionem, significabat Christi passionem futuram, postea verò significare cœpit Christi passionem præteritam.

CAPVT XXI.

Baptismum Ioannis non habuisse eandem vim, & efficaciam, quam habet Baptismus Christi.



SECUNDA propositio: *Baptismus Ioannis non habuit eandem vim, & efficaciam, quam habet Baptismus Christi.* NOTA, non esse quæstionem, an Baptismus Ioannis potuerit remittere peccata ex deuotione, & fide accedentiū, vel etiam ex contritione, quam homi-

homines concipiebant ex concionibus, & Baptismo Ioannis Id enim facillè fieri potuit; & sic acceperunt illa verba Marci I. *Pradicans Baptismum pœnitentia in remissionem peccatorum*; quidam Patrum, vt Basilii lib. I. de Baptismo, cap. 2. & frater Basilij Gregorius Nyssenus in oratione de laudibus Basilij, & auctor quæstionum noui Testamenti, quæst. 29. in tomo 4. operum S. Augustini. Ipse etiam Augustinus lib. 5. de Baptismo, cap. 10. licet existimet illa verba aliter accipienda, tamen non existimat contentiosè resistendum iis, qui docent Baptismum Ioannis aliquo modo remisisse peccata, modò fateantur magnum esse discrimen inter Baptismum Christi, & Ioannis. Tota igitur quæstio est: an Baptismus Ioannis fuerit efficax, vt Christi Baptismus, ita vt si Baptismus Christi peccata remittat vi sua, seu ex opere operato (vt nos suprà probauimus) idem etiam tribuendum sit Baptismo Ioannis.

Ac aduersarij quidem eandem efficaciam, & eundem effectum tribuunt vtrique Baptismo. Concilium autem Tridentinum sess. 7. can. I. de Baptismo contrarium statuit, his verbis: *Si quis dixerit, Baptismum Ioannis habuisse eandem vim cum Baptismo Christi, anathema sit.* Quæ quidem veritas probatur PRIMO ex Scriptura. Nam Marci I. Ioannes Baptista distinguit suum Baptisma à Christi Baptismate, quòd ipse baptizet in aqua, ille in Spiritu baptizaturus sit: *Ego baptizauis in aqua, ille vos baptizabit Spiritu sancto.*

Respondent ad hunc locum aduersarij, Philippus, Caluinus, & Kemnitius locis notatis, Ioannem Baptistam distinguere voluisse hoc loco ministerium externum quod sibi cõueniebat, ab interno ministerio, quod est solius Christi. Itaque dicunt in Baptismo Ioannis datam fuisse remissionem, sed à Christo per ministerium Ioannis. Et adducit Kemnitius similem locum, ex priore ad Cor. cap. 4. *Ego plantauis, Apollo rigauit, Deus autem incrementum dedit.*

SED facillè refellitur hæc solutio; quia Ioannes de suo ministerio loquitur in præterito tempore; de Christi operatione in futuro: *Ego baptizauis in aqua, ille vos baptizabit Spiritu sancto.* Non igitur per ministerium Christus dedit remissionem; tunc enim dixisset, *Ego baptizauis in aqua, ille baptizauit Spiritu sancto*: sicut Paulus in loco citato à Kemnitio, non dixit, *Ego plantauis, Apollo rigauit, Deus incrementum dabit*, sed *Deus incrementum dedit.* Porro apud alios Euangelistas Matt.

114 *Cap. XXI. De Sacram. Baptismi. Lib. I.*

cap. 3. & Lucæ cap. 3. de se Ioannes dicit in præfenti: *Ego baptizo vos aqua, de Christo semper in futuro: Ille vos baptizabit Spiritu sancto, & igne.*

Hanc nostram solutionem conatur Kemnitius oppugnare duobus modis. PRIMO dicit, pag. 191. per Baptismum Christi in Spiritu sancto, & igne, intelligi donorum visibilibus effusionem, quæ facta est in die Pentecostes. Id probat tum ex vocabulo ignis, tum ex testimonio Christi, & Petri, qui usurpant eandem phrasim Ioannis. Christus enim Actor. I. dixit Apostolis: *Ioannes quidem baptizavit aqua, vos autem baptizabimini Spiritu sancto non post multos dies.* Et Petrus Actor. II. *Recordatus sum, inquit, Verbi Domini, sicut dixit; Ioannes quidem baptizavit aqua, vos autem baptizabimini Spiritu sancto.* Non igitur opponitur Baptismus Ioannis Baptismo Christi; sed Baptismus aquæ, in quo non datur visibiliter Spiritus sanctus, opponitur illi effusioni donorum visibili, quæ sine aqua fiebat in primitiua Ecclesia post Baptismum, cum Apostoli manus imponebant.

HÆC prima solutio non est sufficiens. Nam IN PRIMIS vox, ignis, non impedit, quò minus intelligantur verba Ioannis: *Ille baptizabit in Spiritu sancto, & igne*, de Baptismi Sacramento. Nam omnes ferè interpretes ita intelligunt; ac dicunt additum esse vocabulum ignis, quia post Baptismum Christi, sequitur ignis tribulationis, & ignis diuini iudicij, & ignis Purgatorij; & in primitiua Ecclesia dabatur post Baptismum Spiritus sanctus in forma visibili, ignis per impositionem manuum Apostolorum. Vide Hilarium, Hieronymum, & Chrysostomum in cap. 3. Matth. Ambrosium, & Bedam in cap. 3. Luc. Quod autem attinet ad verba Christi, & Petri, non est certum eodem sensu illa verba dicta fuisse à Ioanne Baptista, & à Christo. Potuit enim Dominus alludere ad verba Ioannis, & tamen in alio sensu illa proferre, ut frequentissimè facit S. Bernardus in verbis Scripturæ usurpandis, ut etiam S. Paulus verba Epimenidis ad Tit. I. citauit in alio sensu, cum ait: *Cretenses semper mendaces; hoc testimonium verum est.* Quocirca Patres, ut dixi, verba Ioannis exponunt de Sacramento Baptismi Christi, verba autem Christi & Petri non possunt exponi nisi de missione Spiritus sancti.

DEINDE, si admittamus & Ioannem, & Christum cum Petro, eodem sensu, verba illa protulisse; tum dicemus secundum

dum Scripturas tria Baptismata distingui. V N V M, in aqua solum, & hoc erat Ioannis, quod in Scriptura perpetuò ita dicitur in aqua, vt distinguatur contra Baptismum in Spiritu. A T E R V M, in Spiritu, & igne solo, id est, non in aqua, & hoc est visibilis missio Spiritus sancti, quæ quidem non continet solum visibilem illam speciem linguarum ignearum, sed etiam internam charitatem, & gratiam à Spiritu sancto infusam, quæ per illa externa symbola significabatur, vt etiam admittit Kemnitius, pag. 192. Vnde Baptisma Ioannis in sola aqua non solum distinguitur contra Baptismum ignis, id est, visibilis formæ ignis, sed etiam contra Baptismum spiritus, id est, internæ gratiæ à Spiritu sancto infusæ. T E R T I V M Baptisma est in aqua, & Spiritu simul; & hoc est Sacramentum Baptismi Christi, quod Ioan. 3. dicitur esse ex aqua, & Spiritu sancto. Itaque videmus verba Ioannis, quomodocunque intelligantur, semper distinguere Baptisma Ioannis tanquam externum, & corporale tantum à Baptismo Christi, quod est partim spirituale, & partim corporale, cum constet vel ex Spiritu, & igne, vel ex aqua, & Spiritu.

Est igitur ALTERA solutio Kemnitij, qui cum vidisset priorem non esse sufficientem, redit pag. 193. ad communem solutionem, quòd illud: *Ipsè vos baptizabit in Spiritu sancto, & igne*, referatur ad operationem Christi internam in ipso Ioannis Baptismo. Et quia huic sensui videtur repugnare illud futurum (*Ipsè vos baptizabit*) conatur ostendere Kemnitius, eandem Scripturam loqui de operatione Christi etiam in præsentem, imò & in præterito tempore. Itaq; citat illa loca Ioan. 1. *Hic est, qui baptizat in Spiritu sancto*. Vbi in præsentem dicitur, *Baptizat*, & tamen tunc non baptizabat per se, nec per discipulos; ergo per Ioannem baptizabat. Item ibidem: *De plenitudine eius omnes accepimus*. Vbi in præterito dicitur: *Accepimus*; ergo operabatur Christus interna operatione, etiam antequam inciperet per discipulos baptizare. Denique Matth. 3. vt intelligeremus non esse sine efficacia Baptiste ministerium; apparuit eo baptizante Spiritus sanctus in forma columbæ. Addit etiam verba Angeli, Lucæ 1. *Multos filiorum Israël conuertet ad Dominum Deum ipsorum*. Ex quo perspicuum esse dicit, non fuisse inefficax Ioannis ministerium.

SED hæc nullo negotio refutantur. Nam I N P R I M I S nunquā reddit causam Kemnitius, cur in futuro dixerint omnes

Euangelistæ: *Ipse baptizabit*, si operabatur interius Christus illo ipso tempore, quo Ioannes exterius.

DE INDE loca allata non faciunt ad rem. Illud enim: *Hic est qui baptizat in Spiritu sancto*, non significat, quod tunc Christus baptizaret, cum Ioannes ita loquebatur; sed significat, quod Christus, quando baptizat, in Spiritu sancto baptizat, non in sola aqua, ut Ioannes, sicut rectè exponit Augustinus tract. 13. in Ioannem, & alibi. Similiter etiam, cum ibidem Ioannes ait: *Ecce agnus Dei, ecce qui tollit peccata mundi*, significabat, Christum sublaturum peccata mundi, cum instar agni immolaretur in cruce; non autem, quod tunc ea tolleretur, cum Ioannes loquebatur. Illud autem: (*De plenitudine eius omnes accepimus*) significat gratiam qua præditus erat Ioannes, à Christo manasse; ut etiam gratiam omnium aliorum Sanctorum. Sed quid hoc ad Baptisma Ioannis? Nam etiam si ob merita Christi præuisa dabatur gratia Sanctis omnibus, non tamen dabatur per Baptismum Ioannis, sed alia via, & per alia instrumenta. Porro columba, quæ apparuit, Ioanne baptizante, nõ testabatur efficaciam ministerij Ioannis, ut impudentissimè, & per summam temeritatem scribit Kemnitius. Alioqui oporteret fateri in ipsum Christum fuisse efficax Ioannis ministerium: tunc enim solum columba apparuit, cum Christus baptizaretur. At hoc impium, & blasphemum est. Non enim eguit efficacia Baptismi Ioannis, Agnus ille innocens, qui tollit peccata mundi, teste eodem ipso Ioanne. Significauit igitur columba illa Christi innocentiam, & puritatem, & quod ipse esset, qui sanctificaret, & purgaret aquas, & per aquas & spiritum homines regeneraret.

DE INQVE verba Angeli Lucæ 1. non agunt de Baptismo, sed de concionibus Ioannis. Nemo autem negat, quin Ioannes efficacissimè prædicauerit, & conuerterit plurimos ad Deum. Sed aliud est prædicatione verbi mouere corda hominum, aliud per Baptismum ea purgare. De primo argumento satis.

SECVNDO probatur testimoniis Patrum. Origenes lib. 5. in epistolam ad Romanos, exponens cap. 6. docet, & probat aliquot argumentis Baptismum Ioannis, non remisisse peccata, & in hoc distingui à Christi Baptismo. Idem docent alij Græci. Iustinus quæst. 37. ad Orthodoxos. Gregorius Nazianze-

rianzenus oratione in sancta lumina. Ioannes Chrysostomus homil. 10. & 12. in Matthæum, & homil. 16. in Ioannem, & homil. 1. & 40. in Acta. Item auctor homiliarum in Marcum, quæ habentur in 2. tomo Chrysostomi homil. 1. Cyrillus Alexandrinus lib. 2. in Ioannem, cap. 57. ubi ex professio hoc tractat, ac dicit, Spiritum sanctum præuidisse futuros aliquando temerarios homines, qui non discernent Christi Baptisma, à Ioannis Baptismate; ideoq; impulsisse ipsum Ioannē, vt aperitissimè diceret, se solū in aqua baptizare. Idē etiam habent Damascenus lib. 4. de fide, cap. 10. & Theophylactus in cap. 3. Lucæ. Denique S. BASILIUS, etiam si lib. 1. de Baptismo dicat, Baptismum Ioannis dedisse remissionem peccatorum, tamen ibidem sic loquitur: *Quanto præstantior est Spiritus sanctus aqua, tantò excedit, qui baptizat in Spiritu sancto, illum qui baptizat in aqua, & ipsum adeò Baptisma.* Et orat. 13. quæ est exhortatio ad Baptismum, sic habet: *Ioannes pœnitentie Baptismum prædicauit, Dominus autem adoptionis filiorum Baptismum longè excellentius annunciat. Item initiatorum erat Ioannis Baptisma, Christi autem perfectiorum. Illud à peccato auocabat, istud cum Deo coniungit, & familiarem reddit.* Hęc ille. Ex quo intelligimus Basilium non tribuisse eandem efficaciam Baptismo Christi, & Ioannis, immò Baptismo Ioannis non tribuisse vllam vim iustificandi, nisi ratione pœnitentiæ, & contritionis. Quomodo etiam intelligi debent verba Nysseni.

Iam ex Latinis TERTULLIANVS in libro de Baptismo: *Nihil, inquit, præstabat cœleste, Baptismus Ioannis, sed cœlestibus præministrabat, pœnitentiæ videlicet præpositus.* Et infrà: *Aut daret, inquit, Spiritum sanctum, & remissionem delictorum, si cœlestis esset.* Vbi Tertullianus contendit, non fuisse cœlestem, sed humanum Ioannis Baptismum, quia nō dabat Spiritum sanctum, nec remissionem delictorum. Et infrà: *Agebatur itaq; Baptismus pœnitentiæ, quasi candidatus sanctificationis, & remissionis in Christo subsequens.* Ex quo intelligemus, quomodo sint acceptanda illa verba eiusdem auctoris, initio libri eiusdem: *Neq; quidquam refert inter eos, quos Ioannes in Iordane, & quos Petrus in Tyberi inxit.* Nam non loquitur de toto Baptismo, sed solū de materia; ac docet nō referre, qua quis aqua baptizetur. Non dissimiliter loquuntur ceteri Latini. Cyprianus in sermone de Baptismo Christi.

Hilarius in cap. 3. Matt. Oportet lib. 5. contra Parmenianum. Ambrosius in c. 3. Luc. & idem Ambrosius in præfatione Psal. 37. Baptismum Christi vocat oculum gratiarum, quia dabat gratiam, Baptismum Ioannis, oculum suppliciorum, quia tantum erat Baptisma poenitentiae. Hieronymus in Dialogo contra Luciferianos similia habet, & in epist. 83. ad Oceanum, & in 2. cap. Iohelis. Idem habent Innocentius I. in epist. 22. cap. 5. Leo epist. 4. cap. 6. Gregorius homil. 7. & 20. super Euangelia. Denique Augustinus epist. 48. & 163. Enchiridij cap. 49. lib. 2. contra literas Petiliani, cap. 37. & lib. 3. cap. 76. lib. 5. contra Donatistas, cap. 9. 10. & 14. de vnico Baptismo, cap. 7. de vnitate Ecclesiae, cap. 18. tract. 5. in Ioan. & alibi.

Ad hæc loca non aliter Caluinus respondet, nisi more suo ea contemnendo. Sic enim loquitur lib. 4. Institut. cap. 15. §. 7. *Quare neminem perturbet, quod alterum (Baptisma) ab altero (Baptismate) discernere Veteres contendunt: quorum non tanti esse nobis debet calculus, ut Scriptura certitudinem quatefaciat. Quis enim Chrysostomo potius auscultet, quam Luca? Nec recipienda est illa Augustini argutia; in spe dimissa fuisse peccata Baptismo Ioannis, Christi Baptismo reipsa dimitti.* At nos rectius dicere possumus; Quis Caluino potius auscultet, quam Chrysostomo, & Augustino, & tot aliis antiquissimis, & doctissimis Patribus? Non enim quaestio est, an sit credendum Lucæ, an Patribus, sed an Lucam melius intellexerit Caluinus, quam tot Patres.

Porro Kemnitius in Examine loco citato tota ferè disputatione conatur ostendere, quaestionem istam non esse necessariam, & proinde parum referre, vtrum hoc, aut illud Patres dixerint. At non ita dicunt ipsi Patres. Nam Hieronymus in Dialogo contra Luciferianos aded non putat rem istam esse leuem, ut dicat eos, qui confundunt hæc Baptismata, in peruersum dogma abire, & cum Baptismo serui plus tribuunt, quam par est, ipsum Baptismum Domini destruere. Augustinus lib. 2. contra literas Petiliani, cap. 37. vbi dixerat, Baptismum Ioannis non esse Baptismum Christi, neque vllam eius partem aut gradum, subiungit, eos, qui contrarium sentiunt, incidere in impiam, & sacrilegam opinionem. Denique Cyrillus Alexandrinus lib. 2. in Ioan. cap. 57. temerarios vocat, qui contra sentiunt.

Sed his omiſſis, TERTIO probatur veritas ex ipſa perſona, & officio Ioannis. Erat enim Ioannes præcurſor Domini, & ſolùm ad hoc venerat, vt pararet vias eius. Id enim prædixit Angelus Luc. 1. *Iſpe præibit ante illum in ſpiritu, & virtute Helia, & conuertat corda filiorum ad patres, parare Domino plebem perfectam.* Idem prædixit pater eius: *Præibis enim ante faciem Domini parare vias eius,* Luc. 1. Idem denique ipſe teſtatur adducens vaticinium Iſaiæ. Ioan. 1. *Ego vox clamantis in deſerto, parate viam Domini, &c.* At certè parare viam Saluatori, non eſt dare ſalutem, & iuſtificare, ſed diſponere ad recipiendum Saluatorem, & ſalutem: alioqui ipſe Saluator, non præcurſor Saluatoris fuiſſet. Vnde pater eius Zacharias Luc. 1. propriè designans officium Baptiſtæ: *Addendam, inquit, ſcientiam ſalutis plebi eius.* non dixit; *Ad dandam ſalutem,* ſed *ſcientiam ſalutis.* Docuit enim Ioannes, quomodo eſſet inuenienda ſalus, nimirum credendo in Chriſtum, cùm illum digito oſtendit, & ait Ioan. 1. *Ecce Agnus Dei, ecce qui tollit peccata mundi.*

CAPVT XXII.

Quod poſt Baptiſmum Ioannis neceſſariò percipiendus erat Chriſti Baptiſmus.

TERTIA propoſitio: *Poſt Baptiſmum Ioannis neceſſariò percipiendus erat Chriſti Baptiſmus.* Hæc eſt contra Kemnitium, qui id in dubium reuocat, & contra Caluinum, & ceteros, qui id apertè negant. Probatur PRIMO ex verbis Ioannis, Matth. 3. Lucæ 3. Marc. 1. *Ego baptizo in aqua, ille vos baptizabit in ſpiritu ſancto, & igne.* Si enim hic fiat collatio Baptiſmi Chriſti, & Ioannis, apertè videmus eoſdem, quos Ioannes baptizauerat, dici baptizandos iterum à Chriſto. Fieri autem collationem duorum Baptiſmatum, eſt communis interpretum ſententia; vt Ambroſij, & Bedæ in Lucam, Hilarij, Hieronymi, Chryſoſtomi in Matthæum, & aliorum Patrum citatorum.

SECUNDO probatur ex hiſtoria Euangelij, & Actorum. Nam vt legimus Marc. 1. & Matth. 3. ac Luc. 3. ibant ad Ioannem vt baptizarentur, tota Hieruſalem, omnis Iudæa, & regiones omnes vicinæ Iordani. Itaque rari admodum erant eo

h 5 tempore

tempore non baptizati à Ioanne. At post Domini Ascensionem ipso primo die Pentecostes, B. Petrus in Hierusalem predicare cœpit necessitatē Baptismi Christi omnibus hominibus: *Pœnitentiam, inquit, agite, & baptizetur unusquisq; vestrum in nomine Iesu*, & baptizati sunt eo tria millia, deinde paulò post quinq; millia, præter eos, quos postea baptizauit Philippus, & alij discipuli in variis locis Iudææ, & Samariæ, vt habemus Actor. 2. 4. 8. & aliis. Igitur necesse est, vt multi à Ioanne baptizati, iterum ab Apostolis baptizati fuerint. Quomodo eîm credibile, vt inter tot millia, quos Apostoli in Hierusalem baptizârunt, nullus fuerit à Ioâne antea baptizatus, si verum est, quod Marcus dixit cap. 1. vniuersos Hierosolymitas à Ioanne baptizatos?

TERTIO probatur ex loco expresso, Act. 19. vbi Paulus iubet baptizari in nomine Domini duodecim viros, qui confessi fuerant, se non habere nisi Ioannis Baptismum.

Ad hunc locū incredibile est, quot explicationes, & quàm diuersas aduersarij excogitauerint: numerâtur enim vt minimum decem apud eos diuersæ opiniones. PRIMÆ est, quod in eo capite, semper Baptismus sumatur metaphoricè, & cùm agitur de Baptismo Ioannis, & cùm agitur de Baptismo Christi. Ita Zyvinglius, qui in libro de vera, & falsa religione, cap. de Baptismo, Baptismum in capite Actorum, accipi vult pro doctrina, vt sensus sit; eos duodecim viros, qui antea solum instituti fuerant in doctrina Ioannis, postea institui cœpisse in doctrina Christi.

SECUNDA est, quod semper ibi accipiaturs Baptismus metaphoricè, sed primo loco pro doctrina, secundo loco pro donis Spiritus sancti, quæ dabantur per manus impositionē. Ita Ioannes Brentius, & Lucas Lossius in cap. 19. Actorum.

HÆ DUÆ expositiones hoc vno argumento satis refelluntur, quod verba historica, & apertissima sine vlla causâ detorquent ad impropriam significationem. Non enim licet, præsertim in historiis, fingere tropos pro arbitrio: alioqui nihil esset certum in vlla Scriptura.

TERTIA expositio. est, accipi Baptismum Ioannis metaphoricè pro doctrina; Baptismum Christi propriè: atque ita illos duodecim viros tantum semel baptizatos, idque à Paulo, non à Ioanne. Ita Henricus Bullingerus in cap. 19. Actorum.

QVARTA est contraria superiori, Baptismum Ioannis accipi propriè, Baptismum Christi impropiè pro doctrina. Ita Kemnitius in 2. parte Exam. pag. 198. & 199. vbi etiam trahere conatur in hanc sententiam Ambrosium lib. 1. de Spiritu sancto, cap. 3. & glossam interlinealem in cap. 19. Actor.

QVINTA est Caluini, lib. 4. Instit. c. 15. §. 18. Baptismū Ioannis accipi propriè, Baptismum Christi impropiè, non pro doctrina, vt dicit Kemnitius, sed pro donis Spiritus sancti.

HÆ tres expositiones, præterquam quod fingunt tropos in historia pro arbitrio, admittunt etiam sædam equiuocationem in eodem capite intra paucas lineas. Neque verum est, quod Kemnitius dicit, esse hanc explicationem Ambrosij, aut glossæ interlinealis. Nam Ambrosius in cap. 3. ad Galat. & lib. 1. de Spiritu sancto, cap. 3. apertè dicit, illos duodecim viros iussu Pauli verè & propriè fuisse baptizatos. Quod etiam admittit Kénitius pagina sequenti; qui proinde in duabus paginis, secum ipse pugnat in Ambrosio citando. Glossa autem interlinealis, solum dicit non fuisse eos viros rebaptizatos, quod congruerent verba Pauli cum doctrina Ioannis. Vbi non negat glossa, fuisse eos viros iussu Pauli verè baptizatos; sed negat fuisse illum Anabaptismum. Anabaptismus enim est repetitio eiusdem Baptismi: illi autem non fuerunt eodem Baptismo distincti, sed diuersissimis. Intellexerant enim ex verbis Pauli alium fuisse Baptismum Ioannis, alium Christi, & hoc ipsum docuisse etiam Ioannem.

SEXTA expositio est, quod in eo capite semper accipiatur Baptismus propriè, sed non agatur nisi de Baptismo Ioannis. Siquidè illa verba (*His auditis baptizati sunt in nomine Domini*) nolunt esse Lucæ narrantis, quid egerint viri illi post verba Pauli audita, sed esse verba eiusdem Pauli narratis, quid agere solerent discipuli Ioannis, auditis verbis eiusdem Ioannis prædicantis Christum venturum: nimirum, baptizabantur ab eodem Ioanne in nomine Christi venturi.

Hanc explicationem recitat, & laudat vt concinnam & piam Nicolaus Selneccerus in 2. parte suæ Pædagogix. SED est quidem vtcunq; arguta, at minimè pia, & probabilis. Nam Paulus primò dicit Ioannem baptizasse populum, secundò addit eundem Ioannem baptizando monuisse populum, vt crederent in Christum venturū. Si ergo verba sequentia (*His auditis baptizati sunt*) pertinent ad populum, cui loquebatur

batur Ioannes; sequetur eum populum bis baptizatū à Ioanne, aut certè Paulum non bene rem illam narrasse: quorum utrumque absurdum est. DEINDE, vel duodecim illi viri sunt iussu Pauli baptizati Baptismo Christi, vel non. Si sunt baptizati, est id quod nos contendimus: si nō sunt baptizati, quorsum pertinet illa narratio Pauli? certè superuacanea videtur. Non enim alia de causa Paulus monuit eos, qui baptizati erant solo Baptismo Ioannis, ipsum Ioannem prædicasse Christum, nisi ut intelligerent esse necessarium præterea Christi Baptismum.

SEPTIMA expositio est, nomen Baptismi accipi propriè in toto illo capite, & eos duodecim viros bis baptizatos; sed idèò factum esse, quòd non habuissent illi verum Baptisma Ioannis, sed corruptum, & adulteratum, quoad formam, nimirum, sine nomine Spiritus sancti. Ita docent Centuriones, Cent. 1. lib. 2. cap. 6. col. 496. & Bucerus in cap. 3. Matthæi. Fauet autem non parum Ambrosius huic sententiæ. Nam in cap. 3. ad Galat. & lib. 1. de Spiritu sancto, cap. 3. dicit eos, quos Paulus baptizari iussit, Act. 19. non fuisse baptizatos antea vero Baptismo Ioannis, sed Baptismo quodam qui Ioannis diceretur.

Hæc expositio nititur falso fundamento, quòd nimirum Ioannes baptizârit in nomine Trinitatis, aut certè in nomine Christi venturi, quod (ut suprà diximus) non est verum. Porro Ambrosius dicit quidem illos duodecim viros nō habuisse verum Ioannis Baptismum, sed non dicit, si habuissent verum, non fuisse iterum baptizandos, quod aduersarij contendunt: immò contrarium colligitur ex testimoniis eius. Nam in cap. 3. Lucæ apertè dicit, Baptismum Ioannis fuisse in sola aqua, & pœnitentiæ, non gratiæ, & diuersum à Christi Baptismo, qui constat aqua, & spiritu, & gratiam confert.

OCTAVA expositio est, Baptismum illorum duodecim virorum fuisse corruptum, nō ratione formæ, sed ratione ipsorum accedentium, qui non accesserant rectè instituti in doctrina Domini, cum ignorarent Spiritum sanctum, & ipsum Christi Baptisma. Ita docet Otho Brunfelsius in annotationibus ad cap. 19. Act. 19.

Refellitur hæc expositio, quia ignorantia non violat Baptismum. Et sanè, ut non malè dicit Calvinus hanc expositionem refellens, lib. 4. cap. 15. §. 18. Institut. non sufficerent flumina,

flumina, si deberent nouo Baptismo corrigi eiusmodi ignorantia.

NONA est, viros illos duodecim fuisse reuera rebaptizatos, sed malè, & per errorem, idque antequam Paulus eò veniret. Ita Musculus in locis, tit. de Baptismo.

Sed hæc expositio corrumpit textum: nihil enim in textu clarius, quàm illos Paulo audito, eiusque iussu baptizatos.

DECIMA est Kemnitij in 2. parte Exam. pag. 196. & 202. vbi dicit, locum istum esse obscurissimum, cum tam variè à Doctoribus exponatur: & propterea quæcunque sit vera expositio, nihil certi inde posse colligi, non enim dogmata probanda sunt ex locis ambiguis.

AT nos opponimus his omnibus deprauationibus, PRIMO ipsum textum, qui si exponatur simpliciter & propriè, & sine præiudicio alicuius præconceptæ opinionis, sine dubitatione eum sensum offeret, què nos defendimus. SECUNDO, consensum vnanimem Patrum suprà citatorum, ac præsertim Augustini, qui locis citatis constanter docet, viros illos iterum baptizatos: quod idem habent omnes veteres expositores Actorum, vt Chrysostomus, Beda, & Oecumenius. Neque potest dici locus ambiguus, quia hæretici non conueniunt in eo explicâdo: ista enim ambiguitas non oritur ex natura rei, id est, ex libri obscuritate, sed ex eorum pertinacia, in suis erroribus defendendis. Alioqui etiam Patres non conuenirent, si esset locus verè ambiguus; & si ambigua dicenda essent omnia loca, in quibus aliqui non conueniunt, nihil omnino ex Scripturis probari posset: nulla enim sunt loca, in quibus non possit vnus ab alio dissentire, si velit pertinaciter agere.

CAPVT XXIII.

Soluuntur obiectiones.



ARGUMENTVM PRIMVM est Caluini in Antidoto, & in Instit. locis suprà notatis. Eadem fuit doctrina, idem ritus, eadem gratiæ oblatio in Baptismo Ioannis, & Christi; igitur idem Baptismus erat, & eiusdem efficaciz. Antecedens probat. Nam Ioannes, quod attinet ad doctrinam, prædicauit Christum esse hostiã pro peccatis nostris, cum ait Ioan. I. *Ecce Agnus Dei, qui tol-*
lit pec-

lie peccata mundi, quæ certè est summa totius doctrinæ Christianæ. Quantum ad ritum, baptizauit in aqua, & in nomine Christi, vt patet Actor. 19. Denique quantum ad oblationem gratiæ, vtrique in pœnitentiam, vtrique in remissionem peccatorum baptizârunt, vt patet de Baptismo Ioannis, Luc. 3. & de Baptismo Christi, Actor. 2.

RESPONDEO, hoc argumentum est fundamentum præcipuum aduersariorum, & eo vtuntur etiam Kemnitius, & Philippus, & alij; sed tamen non difficulter solui potest. Nā quòd attinet ad doctrinā, in duobus errant aduersarij, id est, in antecedente, & consequentia argumenti. Siquidem non est verum eandem fuisse doctrinā Ioannis, & Christi, nisi in eo sensu, quòd nihil contrarium docuit Ioannes Christo. Alioquin enim Ioannes nihil docuit de resurrectione Christi, immò etiam neq; expressè de passione. Nam quod vocauit illū agnū Dei, potuit referri ad innocentiam, & mansuetudinē, etiam si victima non fuisset. Deinde doctrina nihil facit ad Sacramēti essentiā, & veritatem; alioqui hæretici, qui habent falsam doctrinam, haberent falsa Sacramenta, qui est error Donatistarum, & à Caluino etiam, & Lutheranis reiicitur. Sicut igitur diuersitas doctrinæ non facit diuersum Baptisma; ita nec doctrinæ similitudo facit Baptisma esse vnum, vel simile.

Quòd attinet ad ritum, iam suprā ostendimus, non fuisse similitudinem, nisi in materia.

Quantum ad oblationem gratiæ, falsum est quod Caluinus dicit: *Vtriq; in pœnitentiam, & vtriq; in remissionem peccatorum baptizârunt*. Nam Ioannis Baptismus passim dicitur Baptismus pœnitentiæ, vt Matth. 3. Marci 1. Luc. 3. Act. 13. & 19. At Baptismus Christi nusquam dicitur Baptismus pœnitentiæ, sed lauacrum regenerationis, Tit. 3. Quod autem obiicitur ex Actor. 2. non conuincit. Nam Petrus non dicit Baptismum Christi esse Baptismum pœnitentiæ, id est, quod ad pœnitentiam prouocet, vt faciebat Baptismus Ioannis; sed dicit requiri pœnitentiam, vt dispositionem ante ipsum Baptismum. Sic enim ait: *Pœnitentiam agite, & baptizetur unusquisque vestrum*. Itaque pœnitentia contrario modo se habet ad Baptismum Christi, & Ioannis: nam Baptismum Ioannis sequitur pœnitentia, vt eius effectus; Baptismum Christi præcedit, vt eius dispositio. Quòd autem attinet ad remissionem peccatorum, illa tribuitur Baptismo Christi, vt

imme-

immediatus eius effectus. Actorum 2. *Baptizetur unusquisque seipsum in remissionem peccatorum.* Et Ephes. 5. *Mundans eam lauacro.* Et Tit. 3. *Saluos nos fecit per lauacrum, etc.* At Baptismo Ioannis nusquam tribuitur remissio peccatorum, ut effectus immediatus, & proximus: solum enim proferre possunt aduersarij illa verba Marci 1. & Lucæ 3. *Prædicans Baptismum pœnitentia in remissionem peccatorum.* Ibi autem non tribuitur remissio peccatorum Baptismo, sed pœnitentiæ, ad quam prouocabat Baptismus.

Est enim sensus eius loci; Ioannes prædicabat Baptismum pœnitentiæ, id est, quod incitabat, & inuitabat ad pœnitentiam; quam pœnitentiam qui agerent, ut oporteret, consequeretur remissionem peccatorum. Atque ita exponit, qui plurimum tribuunt Ioannis Baptismo, ut Basilius & Nyssen suprà citati. Nam alij, ut Tertullianus in lib. de Baptismo. Augustinus lib. 5. contra Donatistas, cap. 10. Gregorius homil. 20. in Euang. & Beda in cap. 3. Lucæ, illa verba: *In remissionem peccatorum*, referunt ad Baptismum Christi, non Ioannis: dicunt enim Ioannem baptizasse in pœnitentiam, & simul prædicasse Baptismum Christi futurum in remissionem peccatorum.

SECUNDVM argumentum Kemnitij, pag. 183. Apostolus Ephes. 4. per gradationem ostendit in nouo Testamento, ubi vnum est corpus, vnus spiritus, vna spes vocationis, vnus Dominus, vnus Pater, vna fides; ibi etiam vnum esse Baptisma. At illa omnia erant tempore prædicationis Ioannis Baptistæ; igitur idem tunc erat Baptisma.

RESPONDEO, si hoc argumentum valeret, probaret etiam tempore Moyſis, & Dauidis fuisse Christi Baptismum: nam tunc erat idem vnum corpus Ecclesiæ, eadem spes, eadem fides, idem Deus, &c. Præterea probaret hoc argumentum, apud hæreticos non esse verum Christi Baptisma; non enim apud eos est vnum corpus, vnus spiritus, vna fides, &c. Non igitur Apostolus probat idem esse Baptisma, ubi est idem Deus, eadem fides, &c. sed probat debere Christianos seruare cum omni diligentia vnitatem spiritus in vinculo pacis; quia sunt vnū corpus: & vnum spiritum, vnum Deum, vnam fidem, vnam spem, vnum Baptismum habent.

TERTIVM argumentū, quod maximè Kemnitium mouit, ibidem pag. 183. tale est. Quia ea est suauissima consolatio omnium

omnium Christianorum, quòd vnum & idem Baptisma habeant cum suo capite Christo. At hæc tota consolatio perit, si nō est idem Baptisma Ioannis cum Christi Baptismo: Christus enim Ioannis Baptismo baptizatus est, nos autem Baptismo Christi.

RESPONDEO, non est bona consolatio, quæ vel gloriam Christo detrahit, vel etiam contumeliam, & iniuriam irrogat: Baptismum autem Christi ipsi Christo tribuere vix possumus sine eius iniuria. Nam cū sit lauacrum regenerationis, & adoptionis filiorum; si is Christo tribueretur, videretur indignis regeneratione, & adoptione; quæ certè est maxima in Christum blasphemia, cū sit ipse Filius Dei naturalis, & ab ipsa Conceptione sanctissimus semper, & plenus gratia fuerit, ita vt gratia crescere in eo non potuerit.

DICET fortè cum Magistro suo Luthero in cap. 3. ad Galat. & in homil. de Baptismo, Christum fuisse quidem in se sanctum, tamen quia suscepit peccata nostra, fuisse etiam ratione eorum peccatorum, furem, latronem, homicidam, denique maximum peccatorem totius mundi; & sic indignis Baptismo in remissionem peccatorum præ omnibus hominibus, quia propter omnes homines. At ista omnia sunt mera blasphemiæ in Christum. Nam etiam si Christus suscepit in se onus peccatorum nostrorum, tamen non potest verè ipse denominari fur, latro, homicida, peccator, vt impudenter eum vocat Lutherus sine vlllo exemplo Scripturæ, aut Patrum; non enim dicitur fur, qui soluit debitum, quod fur debebat, sed qui furatur rem alienam. Pari ratione peccata nostra Christus purgavit operibus virtutum suarum, non vi alicuius Sacramenti ab alio sibi ministrati.

DICES, potuit Christus accipere suum Baptisma, non ad effectum regenerationis & adoptionis consequendum, sed aliqua alia de causa, quomodo accepit Circumcisionem, qua non indigebat, & Baptismum Ioannis, quod fuit Baptisma pœnitentiæ, cū tamen ipse non egeret pœnitentia; & denique quomodo accepit Eucharistiam, qua similiter non indigebat.

RESPONDEO, quidquid de hoc sit, certè magis gloriosum fuit Christo, non accipere suum Baptisma, quam accipere. Dum enim Baptismum confert, & non accipit, Imperatorem se, & principem huius militiæ ostendit, quippe qui characterem

characterem suum in aliis imprimit. At si acciperet, videretur etiam ipse ad militiam adscribi. Denique maior nobis consolatio esse debet, quod per Baptismum Christum induamus, & similitudini mortis eius configuremur, quàm si cum illo simul ablueremur.

QUARTVM argumentum ibidem; Christus cùm baptizaretur a Ioanne, contactu carnis suæ sanctificauit aquas; & præterea adesse voluit visibiliter præsentiam Spiritus sancti in specie columbæ, & sonare vocem gratiæ, & beneplaciti diuini, quæ inuisibiliter adsunt in nostro Baptismo; non igitur diuersa sunt Baptismata, illud, & nostrum.

RESPONDEO, Patres varias causas attulisse, cur Christus à Ioanne baptizari voluerit. PRIMÆ est, ad exemplum humilitatis, vt ipse ait, Matth. 3. *Sine modo, sic enim docet nos implere omnem iustitiam.* De qua causa vide Augustinũ in Enchirid. cap. 49. & Bernard. serm. 4. de Epiphania. SECUNDA est, vt confirmaret Baptismum Ioannis tanquam bonum, & Deo gratũ, vt docet Hieronymus in cap. 3. Matth. TERTIA, vt ostenderet quanti facere debeant peccatores Baptismum Domini sui, quando ipse Dominus, & iustus, tanti fecit Baptismum serui sui. Ita Augustinus tract. 4. & 13. in Ioannem. QUARTA, vt lauaret nostra crimina in Iordane; vt canit Ecclesia in die Epiphaniæ; & vt scribit Nazianzenus oratione in sancta lumina, vt veterem Adamum suffocaret in aquis, & nouum emergere faceret. Quod quidem fecit, vt supra diximus, non vi Baptismi accepti, sed merito humilitatis suæ. QUINTA, vt ipse in sua persona figuraret Baptismum nostrum, & gratiam, quam in eo accipimus, vt docet Augustinus lib. 15. Trinit. cap. 26.

Sed PRÆCIPUA fuit, vt Baptismum salutare institueret, & consecraret. Instituit enim sanctificando aquas tactu carnis suæ, vt supra ostendimus ex Ambrosio, & Beda, in cap. 3. Lucæ; ex Chrysostomo, & Hieronymo, in cap. 3. Matthæi, & ex aliis multis Patribus: & simul figuratè ostendit effectũ Baptismi sui, dum cælum aperiri voluit, & Spiritum sanctum descendere, & vocem audiri, &c. vt patet ex Hilario in cap. 3. Matth. Sed quid ista faciunt pro Kemnitio? immò quomodo non pugnant cum Kemnitio? Nam antequam Dominus baptizaretur, nunquã apparuit columba, neq; audita est vox de cælo, neque sanctificatæ sunt aquæ; & tamen idem erat

128 *Cap. XXIII. De Sacram. Baptismi. Lib. I.*

Baptismus Ioannis, cum eo, qui postea fuit. Non igitur Baptismus, quem habuit Dominus à Ioanne, idem erat cum nostro: nam illud accepit, non instituit; nostrum autem instituit, non accepit.

QUINTVM argumentum pag. 119. Paulus dicit, 1. Cor. 12. Nos omnes effici vnum corpus per Baptismum. At vnū corpus efficitur non solum inter nos, sed etiā cum Christo; igitur idem Baptisma habemus cum Christo.

RESPONDEO, hanc esse aliam cōtentionem in Christum, quasi ille eguerit Baptismo, vt fieret membrum Ecclesiæ: mirum est, cur non addiderit etiam, debuisse Christum per fidem, & pœnitentiam adipisci remissionem peccatorum. Respondeo igitur, Paulum loqui solum de corpore, non de capite. Nos enim membra Christi, & proinde vnum corpus Christi efficitur per Baptismum, quia hoc Sacramento regeneramur, & annectimur Christo. At ipse caput nostrū factum est, non per Baptismum, sed per gratiam vnionis hypostaticæ. Quemadmodum etiam filij Adæ, & quasi corpus eius efficitur per carnalem generationem; ipse autem non fuit factus caput omnium hominum per carnalem generationem, sed per creationem, & gratiam Dei singularem.

SEXTVM argumentum. Vnum corpus sumus, non solum nunc inter nos, sed etiam cum illis, qui erant prædicāte Ioanne, & baptizāte antequam Dominus baptizare inciperet. At qui vnum corpus efficitur per vnum Baptisma.

RESPONDEO, semper Ecclesiam fuisse vnum corpus mysticum, non tamen semper eodem Sacramento adiungebantur homines huic corpori, sed aliquando per Circumcisionem, aliquando alio modo, nunc autem post Christi tempora, per Baptismum. Itaque tempore Ioannis erant illi vnum corpus per Circumcisionem, nō per Baptismum Ioannis, aut Christi: Paulus autem loquitur de tempore suo.

SEPTIMVM argumentum contra solutionem præcedentis. Etiam tempore Pauli multi erant vnum corpus Christi, qui tamen non habuerant nisi Baptismum Ioannis. Nam Apostoli non sunt baptizati, nisi Baptismo Ioannis, excepto Paulo. Similiter Apollo quidam Actor. 18. non nouerat, nisi Baptisma Ioannis, & tamen non est coactus rebaptizari. Denique ipse etiam Baptista non fuit à Christo, vel à discipulis eius baptizatus.

RESPON-

RESPONDEO, Apostolos baptizatos Christi Baptismo scribunt, & probant Tertullianus in lib. de Baptismo, & Augustinus epist. 108. ad Seleucianum, & lib. 3. de origine animæ, ca. 9. Nam cum Dominus Ioan. 3. tam aperte pronunciauerit, neminem saluandum sine Baptismo, non debet dubitari, quin illi omnes Baptismum Christi acceperint, quos post ea tempora vixisse, & ad Ecclesiam Christi aggregatos constar, etiam si id nusquam scriptum sit. Alioqui negabimus etiam Romanos, Galatas, Ephesios, Philipenses, Timotheum, Titum, Philemonem, & alios, ad quos Paulus scribit, fuisse baptizatos, quia nusquam scriptum legimus, quando, & à quibus baptizati fuerint. Idem dici potest de Apollone, quem baptizatum fuisse Christi Baptismo affirmant Chrysostomus & Oecumenius in cap. 18. Actor. Denique de Ioanne Baptista, sicut non scriptum est baptizatum à Christo, ita neq; contrarium scriptum est. Et cōiectura non leuis est, eum fuisse à Christo baptizatum: quoniam ait, Matth. 3. *Ego à te debeo baptizari.* Sed quidquid de hoc sit, certum est eum à Christo saltem spiritu baptizatum, ut affirmant Nazianzenus oratione in sancta lumina, & Hieronymus, atque auctor operis imperfecti apud Chrysostomum in cap. 3. Matth. Quod si non fuit baptizatus aqua Ioannes, non est mirum, quia mortuus est, antequam lex de Baptismo Christi obligaret.

CAPVT XXIV.

De cæremoniis Baptismi.

DE cæremoniis baptizandorum copiosè scribit Thomas V Valdensis, tomo 3. de Sacramentalibus, tit. 5. cap. 45. & sequentibus septem, contra Ioannem VViclefsum, qui omnes ferè Ecclesiæ Catholicæ ritus, & cæremonias circa Baptismum reiiciebat. Easdem cæremonias fusè tradunt, & explicant Ordo Romanus; Alcuinus in libro de diuinis officiis, cap. de Sabbatho sancto; Amalarius lib. 1. de officiis Ecclesiasticis, & Rabanus lib. 1. de institutione clericorum; & ex veteribus Cyrillus in Catechesibus, & Ambrosius in lib. de Sacramentis.

Eosdem ritus, paucissimis exceptis, damnât etiam hæretici huius temporis, ac præsertim Ioan. Calvinus, lib. 4. Insti. ca. 15. §. 19. & Illyricus Centur. 1. lib. 2. cap. 6. & Centur. 2. cap. 6. qui

tamen non aliud argumentum proferunt, nisi quod ritus isti non sint in diuinis literis, neque præcepto, neque exemplo commendati.

Nos autem illis duo obiicimus. PRIMO, quòd ipsi etiam aliquid præscribant in administratione Baptismi, quod in sacris literis non inuenerunt. Nam in libello de formula Sacramentorum ministrandorum, præscribit Calvinus PRIMO, vt infans adferatur ad Baptismum die Dominico, aut certè alio die, quo populus in Ecclesia ad concionem conuenit, vt coram populo fiat Baptismus. SECUNDO, vt qui infantes adferunt, interrogentur; an spondeant, se infantes illos, cum adoleuerint, instituturos in doctrina fidei, & morum; & sponsione facta pergatur in Baptismo. TERTIO, vt nomen imponatur infanti baptizando. QUARTO, vt forma Sacramenti pronuncietur lingua patria. QUINTO, vt recitetur Symbolum, & Oratio Dominica, aliæq; preces. At nihil horum in Scriptura inueniet. Lutherani addunt etiam abrenunciationem Satanæ, & pomparum eius, vt patet ex agenda Saxonica, & aliis similibus. Vnde Illyricus etiam nō audet reiicere abrenunciationem, Cent. 1. lib. 2. c. 6. col. 497. & ipse etiā Kemnitius in 2. parte Exam. pag. 219. examinans canonem 7. de Baptismo, fatetur inter baptizandum proponendam esse abrenunciationem. Deniq; Lutherus in suo Catechismo voluit etiam pingi signum crucis in fronte, & pectore baptizandi. Ego verò optarem aliquid horum demonstrari testimoniis, vel exemplis diuinorum literarum. Nam Scripturæ recensent Baptismum multorum millium, Act. 2. & 4. Item Eunuchi Reginæ Æthiopum, Act. 8. Sancti Pauli, Act. 9. Cornelij, Act. 10. Lydia, & custodis carceris, Act. 16. & duodecim Asianorum, Act. 19. sed nulla mentio fit diei Dominicæ, neq; Ecclesiæ, aut frequentię populi, aut impositionis nominis, aut susceptorū, & sponsionis, aut precationis Dominicæ, & Symboli Apostolici, aut etiam signi crucis: quæ omnia notauerunt etiam Centuriatores, Cent. 1. lib. 2. cap. 6. col. 496. & 497. non haberi in Scripturis. Neque his repugnat, quod oratio Dominica sit in Scripturis, & Symbolum, saltem quoad sensum. Nam in Scriptura non habetur, vt recitentur ista in Baptismo; immò nulla precatio legitur facta in tot locis Scripturæ, vbi narrantur Baptismata suprā notata. Veligitur aduersarij reiiciant omnes omninò cæremonias, & solum baptizent aspergendo
aquam,

aquam, & recitando verba; aut certe quærant alia argumenta, quibus oppugnent ritus ab Ecclesia approbatos.

SECUNDO, illis obiiicimus testimonium veteris Ecclesiæ. Omnes enim ritus, quibus nunc utimur, antiquissimi sunt, & vel ex Apostolorum traditione manârunt, vel à sanctissimis Patribus instituti sunt, quorum auctoritas, præsertim tot seculis iam confirmata, plus apud nos valere debet, quam nouatorû clamores, cum ipsi nihil probare possint à nobis fieri contra sacras literas. Hoc igitur solum præstandum erit à nobis, vt adferamus pro singulis ritibus testimonia antiquitatis. Quod vt facilius fieri possit, distribuemus cæremonias Baptismi in tres classes. Aliæ enim præcedunt Baptismum, aliæ comitantur, aliæ sequuntur.

CAPVT XXV.

Cæremonia ante Baptismum sunt duodecim.

PRIMA cæremonia est, quodd Catechumeni, qui baptizari cupiunt, dant nomen suû, & ex eo tempore dicuntur Competentes, seu Electi, & recipiuntur ab Ecclesia, vt instruantur, & præparentur ad Baptismum. Hinc sunt duo genera Catechumenorum (vt Rabanus docet loco notato) Vnum eorum, qui audiunt conciones, & volunt fieri Christiani, sed nondum petierunt Baptismum, & ij dicuntur Auditores, seu Audientes. Alij petunt Baptismum, & dicuntur Competentes, seu Electi. Nam S. LEO, epist. 4. cap. 5. & 6. Electos vocat, vt etiam vocantur in ordine Romano; sed AUGUSTINVS ordinariè Competentes vocat; sic enim ait, lib. de cura pro mortuis, cap. 12. *Pascha appropinquabat, dedit nomen inter alios Competentes.* Vide etiam lib. 9. Confess. cap. 6 de fide, & operibus, cap. 6. & serm. de tempore 116. qui est ad Competentes. Eodem nomine vtitur Hieronymus in epist. ad Pammachium, de erroribus Ioannis Hierosolymitani.

SECUNDA cæremonia est, scrutinium; quo nomine significatur propriè examen, & exploratio quædam, an Competentes firmiter credant, & sincere: tamen cõtinet hoc nomen etiam Catechismum, & Exorcismum, & omnes cæremonias, quæ fiunt ab eo die, quo nomen dederunt, vsq; ad eum diem, quo baptizantur. Fiunt autem septem scrutinia, quorû prin-

cipale est tertium, & fieri solet feria quarta post Dominicam quartam Quadragesimæ: tunc enim fiunt ferè omnes cæremonia, de quibus mox dicemus, vt patet ex auctoribus suprà citatis. Porro hac voce scrutiniij non solùm vtùtur Ordo Romanus, Alcuinus, Amalarius, & Rabanus, sed etià antiquiores, Augustinus, lib. de fide, & operibus, ca. 6. & Leo in epist. 4. ad Episcopos Sicilia, cap. 6.

TERTIA est, abrenunciatio Satanæ, & operum eius; quæ sæpe repetitur, tum in scrutiniis, tum etiam postea pauld ante ipsum Baptismum, ac sine dubio de Apostolica traditione descendit. Nam eius meminit Clemens, lib. 7. constitut. cap. 41. & 42. & Dionysius Areopagita de Ecclesiastica hierarchia, cap. de Baptismo. Tertullianus, in libro de spectaculis, cap. 1. cùm inquit: *Aquam ingressi, Christianam fidem in sua legis Verba profiteimur; renunciasse nos Diabolo, & pompis eius, & Angelis eius, ore nostro contestamur.* Similia habet in libro de idololatria, & in libro de corona militis, vbi hoc potissimùm argumento probat, non debere Christianum fieri militē Imperatoris Gentilis, ne cogatur defendere Dæmonum templa, quibus in Baptismo renunciauit.

Eiusdem cæremonia apertè meminerunt Cyprianus, in libro de duplici martyrio. Origen. homil. 12. in Numer. Cyrillus, Catechesi mystagoga 1. Basilius in lib. de Spiritu sancto, cap. 11. & 27. Chrysostomus homil. 21. ad populum. Ambrosius, lib. 1. de Sacramentis, cap. 2. & lib. 2. cap. 7. Hieronymus in cap. 6. Amos. Augustinus, lib. 1. de Symbolo ad Catechumenos, cap. 1. & lib. 1. de peccatorū meritis & remiss. capite 34.

QUARTA cæremonia est, fidei professio, quam sæpius interrogati respondent, & postea etiam in ipso die Baptismi publicè pronunciant recitantes Symbolum. Meminit huius cæremonia Clemens, & Dionysius locis citatis. Item Origenes, homil. 5. in Numer. Cyprianus, lib. 1. epist. 12. Cyrillus Catechesi 1. Hilarius, can. 15. in Matthæū. Hieronymus in Dialogo contra Luciferianos. Epiphanius in Anchorato, & Augustinus libro de fide, & operibus, cap. 11. & lib. 8. Confess. cap. 2. Vbi refert historiam Victorini baptizati, cui cùm offerrent presbyteri, vt si vellent, fidei Symbolum priuatim recitaret; maluit ille publicè ex edito loco de more fidem pronunciare.

QVINTA est, signum crucis in fronte, & pectore: in singulis enim scrutiniis, vel à presbyteris, vel a clericis imprimitur illis signum crucis. Meminit huius cæremoniæ Dionysius loco citato. Basilius, lib. de Spiritu sancto, cap. 27. ubi ponit hanc cæremoniam inter Apostolicas traditiones, vt etiam abrenunciationem, & cetera, quæ in Baptismo fiunt. Augustinus, libro de catechizandis rudibus, cap. 20. alloquens Catechumenum prima die instruendum: *Crucis*, inquit, *signo in fronte hodie tanquam in posse signandus es.* Vide eundem in epistol. 118. in Psalm. 36. concione 2. tract. 3. & 36. in Ioannem, & serm. 19. de Sanctis.

+

SEXTA cæremonia est, Exorcismus, id est, adiuratio Dæmonū certis precibus facta, vt recedant ab homine baptizando. Hanc præter ceteras Caluinus ridet, vt inanē & fictitiam, lib. 4. Instit. cap. 19. §. 24. Sed nos faciliè possumus ostendere ex libris ferè omnium veterum Patrum, omnia, quæ etiam hoc tempore Ecclesia retinet de Exorcismis.

Nam IN PRIMIS accepisse Ecclesiam potestatem à Deo coërcendi Dæmones per Exorcismos, testantur antiquissimi Patres, vt IUSTINVS in Dialogo cum Triphone: *Illi*, inquit, *per nomen Iesu Christi adiurati à nobis, parent.* Idem habet TERTULLIANVS in lib. de corona militis, in lib. ad Scapulam, in Apologetico, cap. 32. & in libro de spectaculis, cap. de munere. CYPRIANVS in lib. ad Demetrianum: *O*, inquit, *si audire eos, & videre velles, quando à nobis adiurantur, & torquentur, spiritualibus flagris, et orationis flagellis exire coguntur.* Similia habet Minutias in Octauio. Lactantius, lib. 2. cap. 16. ubi etiam dicit, interrogatos nomen ab Exorcistis, Dæmones respondere, quo nomine appellentur. Cuius etiam rei meminit Beda in cap. 8. Lucæ. Vide etiam eundem Lactantium, lib. 4. cap. 27. & lib. 5. cap. 22. Augustinum, lib. 10. ciuit. cap. 22. Denique (vt omittam infinitos alios) etiam Prudentius ita cecinit in Apotheosi contra Iudæos:

Torquetur Apollo

*Nomine percussus Christi, nec fulmina Verbi
Ferre potest.*

*Intonat antistes Domini; Fuge callide serpens,
Exue te membris, & spiras solue latentes.*

*Has inter Voces medius Cyllenius ardens
Eiulas, & notos suspiras Iuppiter ignes.*

DEINDE esse in Ecclesia non solum donum Sanctorum quorundam, sed etiam ordinarium officium exorcizandi, & coërcendi Dæmones, testantur Concilia antiqua. Antiochenum, can. 10. & Carthaginense IV. can. 7. & Laodicense, can. 29. & Patres vetustissimi, ut Cyprianus lib. 4. epistol. 7. & Cornelius in epist. ad Fabianum Antiochenum apud Eusebium, lib. 6. historiæ, cap. 33.

TERTIO, Exorcismos non fuisse quolibet preces pro arbitrio Exorcistæ, sed certas, & præscriptas ab Ecclesia, quæ propriè dicuntur Exorcismi, patet ex Concilio Carthaginensi IV. can. 7. & ex Ioan. Micrologo, lib. de observationibus Ecclesiasticis, cap. 7. ubi etiam monet Exorcismos non concludi: *Per Christum Dominum nostrum*, ut alias preces, sed: *Per eum, qui venturus est iudicare seculum per ignem*, quia Dæmones maximè diem ultimi iudicii timent.

QUARTO, ante Baptismum præmitti Exorcismos, testatur DIONYSIVS loco notato, & NAZIANZENSIS oratione in sanctum lauacrum: *Ne despuas*, inquit, *Exorcismi curationem; est enim & ipsa nativa sinceritatis*, &c. CYRILLVS Catechesi I. *Suscipe cœlestem thesaurum, & in Exorcismis studiosè Versare*. Idem repetit pluribus in præfatione Catecheseon. Vide etiam Cyprianum, lib. 4. epistol. 7. Ambrosium, lib. 1. de Sacramentis, cap. 5. Optatum, lib. 4. contra Parmenianum. Augustinum, lib. de fide, & operibus, cap. 6. lib. 2. de nuptiis, & concupiscentia, cap. 18. ubi dicit, in tota Ecclesia esse hanc ipsam consuetudinem. Cœlestinum I. epist. 1. cap. 12. Denique Leonem I. epist. 4. cap. 7. ubi dicit, secundum Apostolicam regulam Catechumenos Exorcismis scrutandos esse.

SEPTIMA cæremonia est exsufflatio, quæ quidem annectitur Exorcismis. Nam & verbis Exorcismorum pelluntur Dæmones, & cæremonia exsufflationis significatur eorū expulsio, & simul significatur afflatio boni Spiritus, quem recipiunt homines, cum recedit spiritus malus.

AUGUSTINVS, lib. 6. contra Iulianum, cap. 2. *Ecclesia*, inquit, *filios fidelium nec exorcizaret, nec exsufflaret, si non eos de potestate tenebrarum, & à principe mortis erueret*. Et infra: *Id tu cōmemorare timuisti, tãquam ipse ab orbe toto exsufflandus esses, si huic exsufflationi, qua princeps mūdī à par-
tulis eiicitur foras, cōtradecere voluisses*. Similia repetit, lib. 2. de pec-

de peccato originali, cap. 40. & lib. 2. de nuptiis, & concupiscentia, cap. 17. & 18. & lib. 5. Hypognotici prope finem.

AMBROSIVS, libro de iis, qui initian. myst. cap. 1. *Odorem, inquit, Vita aeterna vobis inhalatum carpere.* Neque hæc cæremonia rideri potest, nisi Dominus ipse rideatur, qui Ioan. 20. simili cæremonia uti voluit, cum Apostolis Spiritum sanctum dedit; nam insufflauit in eos.

OCTAVA cæremonia est, gustus salis. Datur enim Catechumenis gustandum sal, ut apparet ex Origene, homil. 6. super Ezechielem, & Concilio III. Carthagenensi, can. 5. Et forte ad hunc salem allusit Augustinus, cum de se puero ait, lib. 1. Confes. cap. 12. *Signabar in signo crucis eius, & condiebar eius sale.* Dabatur etiam panis benedictus loco Eucharistiæ, ut Augustinus testatur, lib. 2. de peccatorum meritis, & remis. cap. 26. Quanquam, & ipsum salem datum eis loco Eucharistiæ, constat ex Concilio Carthagenensi citato.

NONA est, cum tanguntur salua nares, & aures, & dicitur eis, Epheta, id est, adaperire. Hanc valde miratur, & conspuat Calvinus, sed eam probat, & explicat Ambrosius, lib. 1. de Sacramentis, cap. 1. & de iis, qui init. myst. cap. 1. ubi etiam adfert exemplum Domini, qui Marci 7. sputo tetigit linguam muti, & aures surdi, & dixit, Epheta. Ergo petenti Caluino curetiam sputo tangamus nares, & aures Catechumenis, respondeamus, ut nobis dicat, cur Dominus sputo tetigit linguam, & aures muti, & surdi, Marci 7. & oculos cæci nati, Ioan. 9. Certè enim sine his cæremoniis potuit Dominus utrumque curare.

DECIMA cæremonia est, impositio manuum ac benedictio Sacerdotalis. Huius meminit Dionysius loco notato, & Clemens, lib. 7. constitut. cap. 39. & Concilium IV. Carthagenense, can. 85. Item CYPRIANVS referens acta Concilij Carthagenensis in testimonio Vincentij à Thibari, asserit manus impositionem cum Exorcismis præcedere debere Baptismi regenerationem. AVGVSTINVS, lib. de peccat. merit. & remis. cap. 26. *Catechumenos, inquit, secundum quendam modum suum per signum Christi, & orationem manus impositionis puto sanctificari.* Atque hæc quidem cæremonia frequentissima est in diuinis literis. Nam & Dominus, Matth. 19. manus imponebat paruulis, & Apostoli semper ferè orationi super aliquos addebant manus impositionem, ut patet, Act. 8. 9. 13. & alibi.

136 *Cap. XXVI. De Sacram. Baptismi. Lib. I.*

VNDECIMA est vnctio. Vnguntur enim Catechumeni oleo benedicto ante Baptismum, in pectore, & scapulis, vngendi postea Chrismate post Baptismum. Meminit huius vnctionis Clemens, lib. 3. recognitionum (etsi enim liber iste incertæ fidei sit, quoad dogmata, tamen antiquissimus est) *Baptizetur*, inquit, *vnusquisque vestrum in aquis perennibus, nomine trina beatitudinis super se inuocato, perunctus primum oleo per orationem sanctificato*. CHRYSOSTOMVS, homil. 6. in cap. 2. epist. ad Coloss. *Inungitur baptizandus more athletarum, qui stadium iam ingressuri sunt*. IUSTINVS, quæst. 107. quærit cur bis inungantur Christiani, semel ante Baptismum, & iterum post Baptismum. Ambrosius quoque vtriusque vnctionis meminit, prioris quidem, lib. 1. de Sacramentis, cap. 2. posterioris autem, lib. 2. cap. 7. Cyrillus vtriusque etiam meminit, prioris Cateches. 2. mystag. posterioris Cateches. 3. mystag. Vtriusque etiam meminit Augustinus, serm. 106. de tempore.

DVODECIMA est, abstinentia vini, & carniū, & etiam rei vxoriæ, aliaque opera pœnitentiæ, non quidem ad satisfactionem, sed vt paratiores accederent ad Sacramentum Baptismi, vt patet ex Cyrillo Catech. 1. Nazianzeno oratione in sanctum lauacrum, & Augustino, lib. de fide, & operibus, cap. 6. & Concilio IV. Carthaginensi, can. 85.

CAPVT XXVI.

De cæremoniis, quæ Baptismum comitantur.

IN ipso autem Baptismo hæc cæremoniæ adhibentur. PRIMO imponitur nomen baptizato; vbi ridiculus sanè fuit Illyricus, Cent. 1. lib. 2. cap. 6. col. 497. qui ex eo probat Apostolorum tempore non fuisse in vlu hanc cæremoniam, quia Eunuchus Regine Candacis, Act. 8. semper vocatur Eunuchus, tam ante Baptismum, quam post: quasi Eunuchus sit nomen proprium personæ, & non potius designet vitiū corporis, quod sanè Baptismo tolli non potest. Sumpta videtur hæc cæremonia ex Testamento veteri. Nam in Circumcisione imponebatur nomen paruulo, vt patet Lucæ 1. de Ioanne; & Lucæ 2. de Christo. Eiusdem apud Christianos meminit Dionysius Areopagita loco citato. Veteres, qui quando baptizabantur, vel in fine vitæ, vel

certè

certè valde adulti, non mutabant nomina in Baptismo, vt patet de Saulo, Act. 9. & de Cornelio, Actor. 10. & de Ambrosio, Augustino, & aliis: tamen cùm baptizabantur infantes, solebant patres eorū imponere nomina Sanctorum, vt modò facimus. Id patet ex Dionysio Alexandrino apud Eusebium, lib. 7. historię, cap. 20. secundum versionem Christophorsoni. Scribit enim is Dionysius, filiis Christianorum sæpe imponi consueuisse nomina Petri, Pauli, Ioannis, &c. Idem etiam patet ex ipsis nominibus multorum veterum, vt Petri Alexandrini, & Petri fratris Basilij; Ioannis Chrysostomi, & Ioannis Cassiani, & aliorum, qui nomina Hebraica habuerunt, cùm ipsi Græci essent. Immodè etiam de hac re exstat etiam Canon XXX. inter Canones Nicæni Concilij nuper ex Arabico in Latinum conuersos, & editos à Francisco Turriano; in quo iubentur Christiani in Baptismo nomina imponere filiis suis, non Gentilium, sed Christianorum.

SECUNDA cæremonia est, vt habeant susceptores, à quibus de sacro fonte leuentur, & postea diligentius in fide instituuntur. Eos vocat Dionysius Areopagita de Eccles. hier. cap. vlt. Susceptores; Tertullianus in lib. de Baptismo, sponsores appellat. De iisdem vide Augustinum, serm. 116. de tempore, qui est tertius de Dominica Palmarum, & lib. 1. cap. 34. de peccat. merit. & remis.

TERTIA est, consecratio aquæ, cuius meminit Dionysius, cap. de Baptismo: *Regenerationis aqua sacris inuocationibus prius consecratur.* Idem habent Cyprianus, lib. 1. epist. vlt. Ambrosius, lib. 1. de Sacram. cap. 5. Basilius, lib. de Spiritu sancto, cap. 27 vbi dicit, hanc esse Apostolicam traditionem. Deniq; Augustinus, lib. 6. in Iulianum, cap. 8. & homil. 27. ex libro 50. homiliarum, & tract. 118. in Ioannem in fine.

QUARTA est, trina mersio, cuius meminit Clemens, can. 49. Apostolorum, Dionysius loco citato, Tertullianus, libro de corona militum, & libro contra Praxeam. Cyrillus Cateches. 2. Basilius de Spiritu sancto, cap. 27. Chrysostomus, homil. 24. in Ioan. Augustinus, serm. 91. & 201. de tempore. OBSERVANDVM est autem Arianos abuti cœpisse hac cæremonia (vt Gregorius scribit, libro 1. epistola 41. ad Leandrum) ad suum errorem stabiliendum. Nam cùm trina mersio fieret à Catholicis ad significandas tres personas diuinas, & triduum sepulturæ Christi, vt Gregorius ibidem dicit: Ariani trina mersione

138 *Cap. XXVI. De Sacram. Baptismi. Lib. I.*

merfione utebantur ad significandas tres naturas trium personarum. Quare & tunc Gregorio visum est, ut in Hispania vna merfio fieret; & idem paulo pòst confirmauit Concilium Toletan. IV. cap. 5. Nunc autem pro regionum varietate, vel vna, vel trina merfio adhibetur: neutrum enim est de essentia Sacramenti, ut Gregorius, & dictum Concilium locis citatis testantur.

QUINTA est, tempus Paschale, & Pentecostes. Et si enim quouis tempore dari possit Baptismus, si necessitas urgeat: tamen veteres diligentissimè seruabant hanc cæremoniam, ut solùm in Sabbathis Paschæ, & Pentecostes ordinariè baptizarent. Exstant de hac re epistolæ decretales Siricij, I. cap. 2. & Leonis I. epist. 4. & epist. 80. & Gelasij, epist. I. cap. 12. vbi seuerissimè reprehendunt Episcopos quosdam, qui audebant extra casum necessitatis Baptismum conferre in Epiphania, aut festis diebus Martyrum, & iubent, ut seruetur antiqua consuetudo, ut solùm in Paschate, & Pentecoste, detur Baptismus. Esse item hanc antiquam, & vniuersalem consuetudinem, patet ex Catechesibus Cyrilli, quæ idè in Quadragesima habitæ sunt, quia præparabant ad Baptismum in Paschate celebrandum. Item ex Hieronymo in epistola ad Pammachium, aduersus errores Ioan. Hierosolymitani, & ex illis verbis Augustini, libro de cura pro mortuis, cap. 12. *Venit Pascha, dedit nomen inter alios competentes.* Denique placuisse Deo hanc cæremoniam intelligi potest ex miraculo, quod narrat Paschasinus Episcopus in epistola ad S. Leonem, quæ habetur ante epistolam 64. S. Leonis. Vbi dicit, in Sicilia suo tempore fuisse sacrum fontem, in quadam perexigua Ecclesia, in quodam monte sita, qui toto anno aridus manebat, & in sola Paschatis vigilia (quo tempore datur Baptismus) aquis redundabat hora baptizandi, cum nulli canales, nullæ foueæ, nunquam aqua vicina conspiceretur. Quod autem Illyricus obijcit ex Actis Apostolorum, qui non seruârunt hæc tempora in baptizando Paulo, Cornelio, & similibus; soluitur ab Ambrosio, in cap. 4. ad Ephes. Vbi dicit, initio Ecclesiæ, ut populus Christianus facillè propagaretur, concessum fuisse omnibus, ut omni tempore baptizarent: tamen paulo pòst Ecclesiis constitutis, ordinem statutum fuisse, ut solùm quidam, id est, presbyteri, & certis diebus baptizarent.

C A P V T XXVII.

De caeremoniis, quæ sequuntur Baptismum.

CÆREMONIAE, quæ sequuntur Baptismum, sunt alia quinque. **P**RIMA videtur fuisse osculum pacis, in signum, quòd baptizatus est frater noster. Meminit huius caeremoniæ Cyprianus, lib. 3. ep. 8. ad Fidum: responder enim quibusdam, qui existimabant non esse baptizandos infantes recens natos, & in argumentum adferebāt, quia oportet osculum dari baptizato; omnes autem horrent infantem recens natum osculari. Respondet autem Cyprianus, nihil esse cur horreat Christianus osculari eum, quem Deus ipse creatiit.

SECUNDA est, vnctio Chrismatis in vertice; quæ quidem introducta videtur, quia nō semper adest Episcopus, qui possit continuò dare post Baptismum Sacramentum Confirmationis. Ideò enim interim vngitur à presbytero baptizatus, non quidem in fronte, sed in vertice, Chrismate ab Episcopo consecrato. Meminit huius caeremoniæ Dāmasus in vita Sylvestri. Innocentius I. epist. 1. cap. 3. Ambrosius, lib. 3. de Sacramētis, cap. 1. & Hieronymus in dialogo contra Luciferianos, vbi dicit, presbyteris non licere sine Chrismate baptizare. Vbi apertè loquitur de vnctione Chrismatis, quæ datur à presbytero in vertice: nam ibidem paulò antè asseruit, Sacramentum Confirmationis non dari, nisi ab Episcopo.


TERTIA caeremonia est, cereus accensus, qui datur baptizato in signum fidei, & gratiæ acceptæ, & quod sit translatus à potestate tenebrarum ad lumen, & sortem Sanctorum. Meminit huius caeremoniæ Gregorius Nazianzenus in orat. in sanct. laucr. & Augustinus in Psalm. 65. in illud: *Transiimus per ignem & aquam.*

QUARTA est, vestis candida, quam ferre solebant à Sab batho sancto, vsque ad Dominicam in Albis. Meminit huius Dionysius de Ecclesiastica hierarchia, cap. de Baptismo. Ambrosius, lib. de iis, qui myst. init. cap. 7. & Augustinus, sermon. 157. de tempore, qui est 1. in Octaua Pascharis.

QUINTA caeremonia olim fuit, delibatio lactis, & mellis, seu vini, quæ tamen hoc tempore non est in vsu. Meminit huius caeremoniæ Tertullianus, libro 1. contra Marcionem, & Hiero-

Hieronymus in Dialogo contra Luciferianos, ubi dicit, id fieri consuevisse in signum nouæ infantiae in Christo. Vnde etiam in Missa Dominicæ in Albis legitur propter Neophytos illud ex epistola Petri: *Quasi modo geniti infantes lac concupiscite*. Sed hæc non videtur fuisse generalis, cum tantum in Occidente eam viguisse scribat Hieronymus, in caput 55. Isaia, in illud: *Emite Vinum, & lac*. Itaque non mirum, si prætermissa tandem fuit; sicut etiam illa, cuius meminit Ambrosius, lib. 3. de Sacramentis, cap. 1. lauandi pedes Neophytis mox à Baptismo, particularis erat quarundam Ecclesiarum, & idcirco facile exoleuit.





DE SACRAMEN- TO CONFIRMA- TIONIS.

LIBER VNICVS.

DE SACRAMENTO CONFIR-
mationis sex Controuersie sunt. PRIMA,
an sit verum, & proprium Sacramentum.
SECUNDA, de materia. TERTIA, de
forma. QVARTA, de effectu. QVIN-
TA, de ministro. SEXTA, de caeremoniis. At, vt à PRI-
MA incipiamus, tres erunt prima Controuersie partes. In
PRIMA referemus errores de Confirmationis Sacramen-
to. In SECUNDA confirmabimus veritatem. In TER-
TIA soluemus obiectiones.

CAPVT PRIMVM.

*De erroribus, & mendaciis circa Sacramentum
Confirmationis.*

HERETICI HVIVS TEMPORIS FERE OMNES
Confirmationem de numero Sacramentorum
auferunt. Et si enim anno M. D. XLVIII. in con-
uentu Lipsiensi, Theologi Lipsienses, & VVitten-
bergenſes receperint septem Sacramenta, & nominatim Con-
firmationem, vt Sacramentum propriè dictum, & gratiam
conferens; tamen non persisterunt in ea Confessione. Siqui-
dem

dem omnes ferè eorum Doctores, & qui ante illud tempus, & qui postea scripserunt, Sacramentum Confirmationis reiciunt.

Quia tamen negare non possunt, fuisse in veteri Ecclesia ritum aliquem, qui diceretur Confirmatio; sinxerunt ipsi, ritum illum non fuisse quidem Sacramentum à Christo institutum, sed fuisse cæremoniam quandam vtiliter ab Ecclesia introductam: quam in sex capita distinguit Kemnitius in 2. parte Examinis, pag. 320. Is enim accuratissimè omnium describit ordinem Lutheranae Confirmationis. PRIMO dicit, paruulos in infantia baptizatos cum perueniunt ad annos discretionis, debere institui in doctrina Catechismi, & ubi saltem principia didicerint, offerri debere Episcopo, qui coram Ecclesia admoneat puerum de suo Baptismo, quid acceperit, quid promiserit, &c. SECUNDO, debere ipsos paruulos publicè recitare confessionem fidei, & doctrinæ, quam didicerunt. TERTIO, debere interrogari de præcipuis doctrinæ Christianæ capitibus, atque ad ea respondere. QUARTO, debere moneri, vt hac professione fidei ostendant, se dissentire ab omnibus ethnicis, hæreticis, fanaticis, & prophanis opinionibus. QUINTO, debere graui exhortatione admoneri, vt in pacto Baptismi, & fidei professione perseuerent, & proficiendo confirmentur. SEXTO, fieri debere publicam precationem pro illis pueris, vt Deus Spiritu suo sancto illos gubernare, & confirmare dignetur in hac fidei professione, & simul addi posse manus impositionem.

Hanc sententiam breuiter indicauit Lutherus in libro de Babyl. captiuit. cap. de Confirmatione. Nam, & negat esse verum Sacramentum; & addit posse recipi pro Ecclesiastica cæremonia, qualis est, consecratio aquæ, & aliarum rerum: non meminit autem Lutherus Catechismi, aut Examinis in ritu Confirmationis. Zwinglius in lib. de vera, & falsa religione, cap. de aliis Sacramentis, negat Confirmationem esse Sacramentum; & addit fuisse ritum in Ecclesia institutum, ad examen puerorum, qui in infantia fuerant baptizati. Quod idem postea docuit Philippus in locis, cap. de Confirmatione; Caluinus lib. 4. Instit. cap. 19. §. 4. Ioannes Brentius in Confessione VVittenberg. cap. de Confirmatione, & alij.

Non sunt autem ipsi primi, qui hoc Sacramentum reiecerunt. Nam Ioannes VViclefus in 4. lib. Trialogi, cap. 14. et si
non

non omninò videatur hoc Sacramentum respuere, tamē non vult posse probari ex Scripturis, & apertè reprehendit Catholicorum sententiam. Immò dicit, quibusdam videri à Diabolo introductam Episcoporum Confirmationem cum omnibus suis ritibus: nec reprehendit, sed potiùs indicat sibi placere sententiā eiusmodi. In alio etiam libro, qui fortè iam non exstat, vnctionem Chrismatis apertè reiicit, vt Thomas VValdenſis testatur, tomo 2. de Sacramentis, cap. 113. Ante VVicleſum VValdenſes hæretici idem hoc Sacramentū reiecerunt, teste Ænēa Syluio in historia Bohemica, cap. 35. & ante hos omnes Nouatiani, de quibus sic loquitur Theodoretus, lib. 3. hæret. fab. *Nouatiani pœnitentiā à suo conuentu arcant pœnitus, & iis, qui ab ipsis tinguntur, sacrum Chrisma non præbent. Quocirca eos, qui ex hac hæresi corpori Ecclesiæ coniunguntur, benedicti patres vngi iusserunt.* Cur autem Nouatiani reiecerint hoc Sacramentum, caussa non fuit aliqua ratio conuincens aut Scripturæ testimonium euidens: sed quia ipse Nouatianus (vt scribit ex Cornelio Papa Eusebius, li. 6. hist. c. 33.) in lecto decumbens baptizatus fuerit sine consuetis Ecclesiæ ceremoniis; nec postea adimpleri curauit, quæ omiſsa fuerant, nec signaculo Spiritus sancti confirmatus fuit. Ob quæ, cū malè audiret apud omnes, hoc remedium excogitauit, vt negaret, Chrismate inungi oportere homines post Baptismum. Donatistas etiam contumeliosos fuisse in S. Chrisma scribit Optatus lib. 2. contra Parmenianum; sed non constat an Donatistæ oderint hoc Sacramentū absolutè, an tantū, vt à Catholicis dabatur. Probabile tamen est eos hoc Sacramentum contempſisse, vt etiam Arianos, & alios multos hæreticos, qui cū ad Ecclesiā veniebant, iuebantur sacro Chrismate inungi, vt infrà dicemus.

Sed ad hæreticos huius temporis redeamus. Doctrinam suam illi tam crassis mendaciis, tantaque impudentia conuiciorum, & blasphemiarum onerant, vt planè perspicuum fiat, eos, qui hoc Sacramentum oppugnant, recipere mali spiritus plenitudinem; sicut è contrario, qui illud reuerenter suscipiunt, sancti Spiritus plenitudinem consequuntur.

Ioannes Caluinus in Antidoto Concilij, scſs. 7. can. 2. Olei, inquit, *qui faciat mentionem, nemo est ex veteribus; immò nec ex media illa ætate, quæ iam multis viris abundabat.* Hæc ille. At qui meminerunt olei plurimi veterum, immò etiam

vetustissimorum. TERTULLIANVS lib. I. contra Marcionem, loquens de Sacramentis Christi: *Ille, inquit, neq; aquam Creatoris respuit, quæ suos abluir, neque oleum, quo suos ungit.* Et AVGVSTINVS lib. 5. contra Donatistas, cap. 20. *Si ad hoc valet, quod dictum est in Euangelio, Deus peccatorem non audit, ut per peccatorem Sacramenta non celebrentur: quomodo exaudit homicidam deprecantem, & super aquam Baptismi, & super oleum, & super Eucharistiam, & super capita eorum, quibus manus imponitur?* Deniq; aded clarè, & sepe meminerunt Chrismatis Tertullianus, Cyprianus, & Cyrillus, ut Kemnitius hoc nomine istos Patres reiiciat, & per contemptum vocet Chrisma Cyrillium.

Idem Caluinus ibidem, can. 3. Tridentinos Patres, asinos & porcos vocat, cum tamen modestissimus videri velit. Porro in Instit. lib. 4. cap. 19. §. 8. *Verbum, inquit, & nectorum est, nullam promissionem in Baptismo percepisse, quæ in agonibus instruantur.* Hæc ille. At QUI hoc nullus Catholicorum docet. Nam quod citat Caluinus ex epist. S. Melchiadis: *In Baptismo regeneramur ad vitam, in Confirmatione armamur ad pugnam,* referendum est ad proprios effectus horum Sacramentorum. Baptismus enim propriè ad vitam regenerat, quamvis gratia illa regenerationis, valeat etiam ad peccata vitanda: Confirmatio autem propriè datur ad augmentum roboris, & ad pugnandum pro fide.

Rursum §. 10. aliud mendacium profert, cum ait: *Nonne scilicet Donatistas produunt, qui vim Sacramenti à ministri dignitate astimant?* quia nimirum dicimus, Sacramentum Confirmationis non posse conferri ordinariè, nisi ab Episcopo. At Caluinus non ignorabat, Donatistas de alia dignitate loqui consueuisse, nimirum de dignitate probitatis, & innocentie, non de dignitate ministerij Ecclesiastici. Alioqui etiam Caluinus Donatista esset, cum velit Baptismum non posse tribui à laico, neq; à fœmina, sed solum à publico Ecclesiæ ministro. Igitur contra mentem, & conscientiam suam loquutus est, ac proinde mentitus.

Ibidem de S. MELCHIADE Papa, & Martyre, cuius verba proximè citauerat, ita loquitur: *Os sacrilegum, tunc pinguedinem fœtore duntaxat anhelitus tui inquinatam, & verborum murmure incantatam, andes Christi Sacramento opponere, & conferre cum aqua verbo Dei sanctificatam?* At parum hoc ipsum

ipsum erat tua improbitati, nisi etiam preferres. Hæc sunt sanctæ Sedis responsa; hæc Apostolici tripodis oracula. Hæc ille. Poterátne Calvinus impudentius blasphemare in sanctissimum virum? poterátne manifestius confiteri, nihil sibi esse commune cum antiqua Ecclesia? Siquidem S. Melchiadi omnis Ecclesiæ, quæ tunc erat, communicavit; ac de eo sic loquitur AUGUSTINVS, in epist. 162. Quælis, inquit, ipsius B. Melchiadis &rima, & prolata sententia, quàm innocens, quàm integra, quàm provida, atque pacifica? Et infra: O virum optimum, ô filium Christianæ pacis, ô patrem Christianæ plebis.

Denique §. II. profert aliud mendacium Calvinus: *Ecce*, inquit, *præterita aqua, & nullo numero habita, & unum oleum in Baptismo magnificiunt.* Hæc ille. Confinxit autem hoc mendacium, occasione accepta ex verbis Magistri Sententiarum, perperam expositis. Nam Magister lib. 4. dist. 7. cap. 2. dicit, Sacramentum Confirmationis esse nobilius Sacramento Baptismi aliquo modo, ratione videlicet ministri, à quo datur, & ratione membri, in quo perficitur; nam Confirmatio non potest perfici, nisi in fronte nobilissimo omnium membrorum. Hæc ita accepit Calvinus, quasi Magister contulerit vñctionem Confirmationis, quæ sit in fronte, cum vñctione Baptismi, quæ sit in vertice; & proinde Sacramentum Baptismi non constituerit in aqua, sed in solo oleo. At noluit intelligere Calvinus verba Magistri; ille enim confert vñctionem Confirmationis, non cum vñctione Baptismi, sed cum ipso Baptismo, qui ex aqua, non ex oleo conficitur. Confert enim inter se Sacramenta, non est autem Sacramentum vñctio in Baptismate, sed aspergio aquæ. At, inquit Calvinus, aspergio aquæ fit etiam in fronte. RESPONDEO, hoc interesse inter Baptismum & Confirmationem, quod Confirmatio non perficitur, nisi in fronte; aspergio autem aquæ Baptismi, potest fieri in fronte, sed potest fieri etiam extra frontem; immò nunc ordinariè cum baptizantur infantes, solum vertici ipsorum infunditur aqua. Vt etiam Confirmatio à solo Episcopo datur; Baptismus ab Episcopo dari potest, sed dari etiam potest à Presbytero: & idcirco tam ratione ministri: quàm ratione subiecti præstat Confirmatio Baptismo, ut rectè dicit Magister. Quare sine vlla causâ mentitur Calvinus, Catholicos nullo numero habere aquam Baptismi.

Ibidem Caluinus dicit, sene vnus quidem stercoreis facere oleum, siue in Baptismo, siue in Confirmatione. *AT QVI* de viroque oleo, omnes Sancti, & antiqui Patres honorificentissimè semper loquuti sunt, vt suprà ostendimus in disputatione de cęremoniis Baptismi, & infrà ostendemus, cū agemus de materia Confirmationis.

Iam verò Martinus Kemnitius multa similiter habet, & mendacia, & conuicia; sed vno tantū loco ero contentus. Igitur in 2. parte Examinis, pag. 298. tria simul mendacia conglutinat. *PRIMUM* est, quòd vnctio Chrismatis ex schola Montani prodierit. *SECUNDVM*, quòd Tertullianus, & Cyprianus in hac re Montanistę fuerint. *TERTIVM*, quòd Hieronymus hanc sententiam refutet in dialogo contra Luciferianos.

At nullus vnquam auctor prodidit hanc fuisse hęresim Montani. Scribunt de erroribus Montani, Tertullianus de pręscript. Epiphanius hęr. 48. Eusebius lib. 4. hist. cap. 14. Clemens Alexandrinus Strom. 4. Philastrius in Catalogo. Hieronymus in epist. ad Marcellam de erroribus Montani. Augustinus hęres. 26. Theodoretus lib. 3. de fabulis hęret. Damascenus in libro de centum hęresib. in nullo autem horum, vllum est verbum de hac re. Sed colligit Kemnitius, vt est solers, hunc fuisse errorem Montani, licet nemo id scripserit, quia Tertullianus fuit Montanista: & ipse est, qui scribit, Spiritū sanctum dari baptizatis per Chrismatis vnctionem. At non omnia, quę Tertullianus scribit, ad Montani errores pertinent, licet ille, in vltima ætate Montanista fuerit. Alioqui Montanistarum hęreses erunt, Christum esse Filium Dei, Baptismum in aqua celebrandum, Eucharistiam in pane & vino; & alia id genus multa, quę Tertullianus scribit.

Deinde quanta est impudentia, S. Cyprianum Martyrem celeberrimū Montanistam hęreticum facere? Quid, quòd ipse Kemnitius in hac ipsa re sibi non constat? nam pag. 317. dicit, hunc errorem confictum ab antiquissimis Patribus, Tertulliano, Cornelio, & Cypriano. At si isti confinxerunt; non ergo à Montano id acceperunt.

Denique, quòd S. Hieronymus hunc errorem refellat in Dialogo contra Luciferianos, crassissimum est mendacium. Nā in eo Dialogo solū explicat S. Hieronymus, quomodo dari dicatur Spiritus sanctus per manus impositionem, cū etiam antè in Baptismo, datus sit: sed neque Montanum, ac

Tertul-

Tertullianum, neque sanctos Episcopos Cornelium, & Cyprianum nominat; tantum abest, ut eos refellat, ut mentitur Kemnitius. Neq; ex eo, quod Hieronymus dicit, in Baptismo dari Spiritum sanctum, sequitur refutari sententiam Tertulliani, & Cypriani, qui dicunt dari in Confirmatione: alioqui Hieronymus refutasset etiam Lucam, qui ait, Actor. 8. *Nondum enim in quenquam illorum generat, sed baptizati tantum erant in nomine Domini IESU. Tunc imponebant manus super illos, & accipiebant Spiritum sanctum.* At nullos refutat Hieronymus: non enim negant Lucas, & alij, in Baptismo dari Spiritum sanctum, nisi in illa plenitudine, qua datur in Confirmatione.

CAPVT SECVNDVM.

Probatur ex Scriptura Sacramentum Confirmationis.

QUINQUE argumentis probandum est, Confirmationem esse Sacramentum verè, ac propriè dictum, ut Concilium Tridentinum docet, sess. 7. can. 1. de Confirmatione. PRIMO, ex Scripturis. SECUNDO, ex traditione, & testimoniis summorum Pontificum. TERTIO, ex testimoniis Conciliorum. QUARTO, ex testimoniis Patrum Græcorum. QUINTO, ex testimoniis Latinorum.

Quod ad PRIMVM attinet: Tria requiruntur ad essentiam Sacramenti Christiani propriè dicti. PRIMO, promissio gratiæ. SECUNDO, signum sensibile cum verbo, quod sit medium, seu organum, quo applicetur promissio. TERTIO, mandatum diuinum, quo id iubeatur ministrari. Hæc tria postulant sibi ostendi ex Scripturis in quæstione de Confirmatione, Calvinus lib. 4. Instit. cap. 19. §. 5. & Kemnitius in 2. part. Examinis, pag. 276. *In hac quæstione, inquit Kemnitius, quæ sint illa media, per quæ credendum sit Spiritum sanctum velle efficacem esse; ante omnia petimus ex verbo Dei nobis monstrari, expressum mandatum, & promissionem diuinam: quando enim illa habemus, tunc scimus mediis illis, & potè diuinitus institutis, reuerenter esse utendum: scimus etiam quid illis tribuendum sit.* Hæc ille. Itaq; nihil aliud requirunt; & meritò: nam ad hæc reuocantur omnia; & omnium consensu Sacramentum est propriè dictum, vbi hæc tria inueniuntur.

Ac promissio quidem, & certè amplissima habetur, Ioan. 14. vbi Dominus promittit Spiritum paracletum, qui consolatur in omnibus aduersis. Item cap. 15. vbi promittit eundem Spiritum sanctum, qui faciat discipulos fortes, atque intrepidos in testificatione veritatis: Et cap. 16. vt arguat mundum de peccato, de iustitia, & de iudicio, id est, qui det robur Apostolis ad arguendam infidelitatem hominum, & testificandam Christi iustitiam, & annunciandum Principem huius mundi iam esse iudicatum. Item Luc. vlt. *Sedete in ciuitate, donec induamini Virtute ex alto.* Deniq; Actor. 1. *Accipietis Virtutem superuenientis Spiritus sancti in vos, & eritis mihi testes, &c.* Hanc certè diuinam esse promissionem, & in Scripturis haberi, & ea promitti hominibus iam baptizatis, & iustis gratiam ampliorem Spiritus sancti, qua fiant fortes in confessione fidei, nullo modo negari potest.

Iam verò medium, seu organum, seu signum sensibile constans ex rebus, & verbis, quibus applicetur illa promissio, fuit manus impositio cum oratione. Nam Apostoli quidem singulari miraculo, & beneficio receperunt illam gratiam promissam sine vlllo medio, seu Sacramento in die Pentecostes, vt notum est ex Act. 2. At verò ceteri recipiebant illam eandem gratiam ministerio Apostolorum per illud medium, vt patet Actor. 8. *Tunc imponebant manum super illos, & accipiebant Spiritum sanctum;* & antea dixerat illos venisse, vt orarent. Idem habetur Act. 19. Et quod hoc medium sit medium, quo applicatur promissio facta de mittendo Spiritu sancto, patet ex effectu: nam cuiusq; baptizato Apostoli manus imponebant, veniebat super eum Spiritus sanctus. Deniq; quod istud donum, quod dabatur tunc omnibus baptizatis per manus impositionem, fuerit illud ipsum, quod promissum fuit Apostolis, patet ex testimonio S. Petri, qui Act. 2. concionabatur populo, & promittebat idem donum, quod ipse acceperat, si crederent, & baptizarentur: & allegabat Ioëlem, qui prædixerat donum illud effundendum, non super Apostolos tantum, sed super omnem carnem. Idem etiam Petrus Act. 11. testabatur, Cornelium, & eius comites accepisse idem donum, quod acceperunt Apostoli in Pentecoste: *Nihil, inquit, discreuit inter nos & illos, & tamen Scriptura nusquam meminit alterius medij, seu signi sensibilis, quo daretur donum illud, nisi manus impositionis cum oratione.*

Restat

Restat mandatum. Sed pro mandato damus illis mandati executionem. Nunquam enim Apostoli ita ordinariè, & securè imposuissent omnibus baptizatis manus, ut veniret super eos Spiritus sanctus, nisi Dominus hoc eis mandasset. Quemadmodum etiam hic in terris cum famulus aliquid agit, quod non potest nisi iussu Domini, & non est stultus; omnes intelligunt, eum habere mandatum, etiamsi is non dicat se habere mandatum; ut si lictores capiant magnum aliquem virum in medio foro, aut si viatores indicant senatoribus tali die habendum senatum, &c. Fuisse autem ritum illum ordinarium, & communem omnibus baptizatis, patet ex cap. 8. & 19. Actor. & ex epistola ad Hebr. cap. 6. Itaque ipse etiam Calvinus cum lib. 4. Institut. cap. 19. §. 5. postulasset mandatum sibi ostendi, respondet ipse sibi nomine Catholicorum, §. 6. *Tuentur*, inquit, *se quidem Apostolorum exemplo, quos nihil temerè fecisse existimant*; ac responsionem admittens, ait: *Id sanè rectè; nec à nobis reprehenderentur, si se Apostolorum imitatores ostenderent, &c.*

Nunc videndum est, quid ad hoc argumentum respondeant aduersarij. PRIMÆ solutio est Caluini loco citato; quod illa manus impositio non fuerit Sacramentum, sed quædam oblatio baptizatorum Deo: solebant enim per manus impositionem offerre Deo, quos baptizauerant.

AT hæc solutio facile refellitur. Nam IN PRIMIS id Calvinus tantum dicit, sed nec probat, nec potest probare ullo testimonio, nisi sua ipsius auctoritate. Sic enim ait: *Huic manus impositioni non aliud subesse mysterium cogito, sed huiusmodi caeremoniam ab illis adhibitam interpreter, et ipso gestu significarent se Deo commendare, & velut offerre eum, cui manus imponebant.* DEINDE Scriptura dicit, quod ad illam manus impositionem, sequebatur continuò effusio doni mirabilis; immò etiam asserit Scriptura, per illam impositionem manuum datum Spiritum sanctum, Act. 8. sicut dicit Tit. 3. per lauacrum regenerationis saluos nos fieri. Ut igitur lauacrum non est simplex oblatio, sed mysterium conferens gratiam; ita etiam impositio manuum. PRÆTEREA offerre Deo baptizatum, non est aliquid maius, quam baptizare, præsertim secundum Calvinum, qui dicit nihil subesse mysterij in hac caeremonia: ergo poterant offerre illi ipsi, qui baptizauerant. At Scriptura contrarium docet. Nam Act. 8. Philippus baptizat,

& tamen non potest imponere manus, sed veniunt ad hoc faciendum Petrus & Ioannes. Et Act. 19. Paulo præsente baptizantur duodecim viri, & non exprimitur à quo, quia quilibet poterat id facere: at baptizatis Paulus ipse manus imponit. **DENIQUE** quid opus erat noua oblatione, cum hoc ipso, quod quis baptizatur, offerat se Deo, eiusque legibus, & obsequio se subiiciat?

SECUNDA solutio est eiusdem Caluini ibidem, & Brentij in Confess. VVittenberg. cap. de Confirmatione, qui dicunt, Deum initio nascentis Ecclesiæ per manus Apostolorum dedisse fidelibus dona quædam visibilia Spiritus sancti, vt donum linguarum, donum miraculorum, & similia; ex quo sequitur illam impositionem manuum non fuisse Sacramentum, quia non dabat gratiam iustificationis. Et confirmant ex similibus; nam vmbra Petri curabantur homines, Actorum 5. & per sudarium Pauli Actor. 19. & tamen non facimus inde Sacramenta.

SED hæc etiam solutio facile reiici potest. Nam quod dicunt, illam impositionem manuum non dedisse nisi dona quædam loquendi linguis, & miraculorum; falsum est. Nam in primis dona illa gratis data non dicuntur in Scriptura simpliciter Spiritus sanctus, nec dicitur Spiritus sanctus habitare in eo, in quo non sunt nisi illa dona; quin potius è contrario Spiritus sanctus effugiet fictum, nec habitabit in corpore subdito peccatis. Sapient. 1. dona autem illa gratis data, etiam in peccatoribus interdum inueniuntur; vt patet Matth. 7. At per manus impositionem Apostolorum dabatur ipse Spiritus sanctus Actor. 8. & 19. non igitur solum dona illa gratis data. **SECUNDO.** Id dabatur per manus impositionem, quod promiserat Dominus Ioannis 14. 15. 16. & Lucæ ultimo, vt supra ostendimus. At quod promisit Dominus, non erat donum linguarum, aut curationum (id enim fuit additamentum quoddam) sed gratia roborans, & confirmans in fide. **TERTIO.** Dona illa non erant communia omnibus, vt patet ex Rom. 12. & 1. Corinth. 12. *Nunquid omnes prophetant? nunquid omnes loquuntur linguis?* At Spiritus sanctus per manus impositionem dabatur omnibus, vt apertè colligitur ex locis notatis Actorum 8. & 19. **QUARTO.** Apostolus Hebr. 6. numerat impositionem manus cum Baptismo, cum fide, cum pœnitentia, cum aliis rebus, quæ pertinent ad salutem; immò etiam

etiam ad fundamenta religionis, vt ibidem Apostolus dicit. At certè loqui linguis, & prophetare, non pertinet ad salutem, multò minùs ad fundamenta religionis. QUINTO. Si nihil aliud conferebat Spiritus sanctus datus per manus impositionem, nisi dona illa miraculorum; certè nūquam Apostoli primarij Petrus, & Ioannes ex Hierusalem in Samariam descendissent, vt manus imponerent. Nam satis multa miracula operabatur Philippus in Samaria, vt non essent ibi necessarij alij, qui miracula facerent. SEXTO. Idem ostendunt exempla, quæ aduersarij proferunt de vmbra Petri, & sudario Pauli; nusquam enim legimus per ea instrumenta datum esse Spiritum sanctum, sed solùm temporalem sanitatem.

TERTIA solutio est ea, quam attingit quidem loco citato Calvinus, sed latius eam persequitur Kemnitius, pag. 290. In Apostolis priuilegium singulare fuit, vt Spiritum sanctum darent per manus impositionem: habuerunt enim illi peculiare mandatum, & promissionem de hac re. At nos non habemus eiusmodi mandatum, & promissionem; igitur temerè imitari conamur. Confirmatur argumentum ex euentu. Nam ad eorum manus impositionem sequebatur effectus; ad nostram nihil sequitur; etiamsi enim quis millies manum imponat, non descendunt linguæ igneæ. Cessauit igitur donum illud: proinde ociosa, & inanis cæremonia remansit.

HÆC quoque solutio facilè reiici potest. Nam IMPRIMIS non ostendent aduersarij, vbi mandauerit Dominus Apostolis, vt manus imponerent ad Spiritum sanctum recipiendum. Legimus quidem Marci vlt. *Super agros manus imponent, & bene habebunt;* sed illa dicuntur omnibus fidelibus, non autem solis Apostolis: *Signa, inquit, eos qui crediderint, hæc sequentur, &c.* & præterea ista est impositio manus ad morbos pellendos, non ad Spiritum aduocandum. Legimus item Ananiam Actor. 9. accepisse mandatum, vt Paulo manus imponeret; quem locum perperam Calvinus exponit de manus impositione, de qua nunc agimus, cùm in Antidoto Concilij Tridentini, sess. 7. can. 3. de Confirmatione, tùm in Institut. lib. 4. cap. 19. §. 10. Sed is locus nihil facit ad rem. Nam illa impositio manus fuit curatiua ad depellendam cæcitatem corporalem, non ad dandum Spiritum sanctum: vnde

etiam ante Baptismum facta est. SECUNDO, neq; ostendent Apostolis vsquam factam esse promissionem, vt cui manus imponent, daretur Spiritus sanctus. Promisit quidem Apostolis Dominus Spiritum sanctum, quem & acceperunt in die Pentecostes: at vt ipsi aliis darent, nusquam legimus; & tamē dabant, & quidem ordinariē. Non igitur requirebatur peculiaris promissio. TERTIO, promissio generalis est nō solis Apostolis, sed toti Ecclesiæ facta; igitur, & cæremonia, qua applicatur promissio, generalis esse debet, & pperua. Probatur antecedens. Nam etiam si Dominus Apostolos alloquebatur, cū promittebat Spiritum sanctum, tamen in eis Ecclesiam totam alloquebatur, vt ait S. Leo, serm. 9. de Quadragesima: *Tota, inquit, Ecclesia salutare suum in iis qui aderāt, vniuersaliter audiebat.* Vnde etiā Dominus ait Matth. ult. *Vobiscū sum omnibus diebus, & sūq; ad mundi consummationem.* Vbi alloquitur eos, qui erant omnes morituri intra centum annos, & tamen dicit se cum eis semper futurum, quia nimirū, & ipsi semper erunt in posteris suis. Item ex eo, quod ait Luc. 22. *Hoc facite in meam commemorationem;* quod certē ad alios etiam pertinet, qui Apostoli non erant. Vnde beatus Petrus, qui eas promissiones rectissimē intelligebat Act. 3. omnibus pollicebatur Spiritum sanctum, si crederent, & baptizarentur; & allegabat vaticinium Ioēlis: *Effundam de Spiritu meo super omnem carnem.* ACCIDIT etiam ratio euidēs. Nam causā, cur Deus promisit, & dedit Spiritum sanctum, non minus locum habet in nobis, quā in Apostolis, siquidē omni tempore egent fideles virtute Spiritus sancti ad resistendum in persecutione & confitenda fide. Neque Dominus providere potuit, aut voluit Ecclesiæ suæ ad annos decem, aut viginti, & non perpetuū, quando illa auxilio indigeret.

SED respondet Kemnitius, promissionem quidem esse generalem, sed organum, quo illa applicatur, non esse iam impositionem manus, sed alia instrumenta, nimirum Baptismū, & Eucharistiam. ATQV hoc est temerē, & pro arbitrio, immō etiam contra verbum Dei fingere organa, quibus applicētur diuinæ promissiones. Nam si Baptismus, & Eucharistia applicant promissionem prædictam, cur Apostoli utebantur manus impositione? deerant fortasse illis Baptismus, & Eucharistia? DEINDE Apostoli ante Christi passionē baptizati fuerant, & Eucharistiam sumpserāt, & tamen post illa omnia promit-

promittitur eis Spiritus sanctus. Non igitur acceperant hoc donum, nimirum in ea plenitudine, quæ danda erat in Sacramento Confirmationis, per Baptismum, & Eucharistiam. PRAETEREA Act. 8. Samaritani baptizati erant, & tamē Lucas disertis verbis dicit, Spiritum non venisse in quēquam illorum, nisi post manus impositionē Apostolorum. DENIQUE cum ipsa Scriptura tam apertē doceat, medium ad recipiendum hoc donum esse manus impositionem; quanta temeritas est hoc medium reiicere, & alia confingere?

AT, inquit, cessauit effectus ille, qui sequebatur ad impositionem manus. RESPONDEO; Cessauit quoad visibilia symbola, non quoad inuisibilem gratiam. Nam posse dari etiam inuisibiliter Spiritum sanctum, constat ex facto Domini, Ioan. 20. ubi insufflauit, & dixit: *Accipite Spiritum sanctū*; debuisse autem dari semper, saltem inuisibiliter, paulò antè probatum est. Fuit autem causa rationabilis, quare tunc daretur visibiliter, nunc solū inuisibiliter; quia initio Ecclesiæ ad fidem plantandam, & nutriendam, eiusmodi miracula necessaria erant. Vnde AVGVSTINVS, lib. 3. de Baptismo, cap. 16. *Neg, enim temporalibus, inquit, & sensibilibus miraculis attestantibus, per manus impositionem, modò datur Spiritus sanctus, sicut antea dabatur ad commendationem rudis fidei, & Ecclesia primordia dilatanda. Quis enim nunc hoc expectat, & ij, quibus manus ad accipiendum Spiritum sanctum imponitur, repente incipiant loqui linguis? Sed inuisibiliter, et latenter intelligitur per Vinculum pacis eorum cordibus diuina charitas inspirari.* Deniq; idem patet ex similibus. Nam initio Ecclesiæ, qui credebant, operabantur miracula iuxta illud Marci ultimo: *Signa, eos, qui crediderint, hac sequentur; super agros manus imponent, & bene habebunt.* Nunc cessauit iste effectus fidei. Nec tamē est fides otiosa, & inanis, quia habet effectum suum principale, qui est viuificare: *Iustus enim ex fide uiuit*, Hebr. 10. Vide Gregorium in homilia Euangelij Ascensionis. Pari ratione in principio Ecclesiæ puniebantur peccatores visibilibus pœnis, ut patet de Anania, & Sapphira, Act. 5. de Elima Mago Act. 13. de iis, qui indignè communicabant, 1. Corinth. 11. At num hoc tempore, quia non puniuntur ista peccata visibilibus pœnis, idēd impunita manebunt; & non saltem inuisibiliter punientur, & hīc, & in alia vita? Ita igitur & in bonis.

QUARTA solutio est Kemnitij, pag. 291. totum locum Act. 8. & 19. nihil pro nobis facere, cum nos impositionem manus reiecerimus, & in ejus locum vñtionem Chrismatis subiecerimus.

Hæc solutio nulla est. Nam vt omitram, quæ infrà de Chrismate dicenda sunt, falsum est reiectam esse manus impositionem. Bisenim Episcopus manus imponit confirmandis, vt ex Pontificali Romano intelligi potest, semel cum super eos manus extendit, atque orat: & rursum cum signat in fronte, atque vngit; ipsa enim vñtio, & signatio cum manu fiat, manus impositio rectissimè dicitur, vt docet Hugo lib. 2. de Sacramentis, pag. 7. cap. 2. Vnde etiam Marc. 7. cum postulassent quidam, vt Dominus manus imponeret lunatico; ille id fecit, nam digito tetigit linguam, & aures eius.

CAPVT TERTIVM.

Probatur veritas testimoniis summorum Pontificum.

NON SECUNDò probanda est veritas ex veterum, & sanctorum Pontificum responsis. Adferemus autem testimonia, quæ non quidem disertis verbis affirmant, Confirmationem esse Sacramentum (id enim neque necessarium est, & facillè posset detorqueri ad significationem Sacramenti largo modo accepti) sed testimonia adferemus, quæ rem ipsam demonstrent; id est, cæremoniam dantem gratiam, & à Baptismo distinctam.

PRIMVS igitur sit S. CLEMENS Romanus in epistol. 4. *Omnes, inquit, festinandum est sine mora renasci, et demum consignari ab Episcopo, & septiformem Spiritus sancti gratiã recipere.* Et infra, causam reddit, quia non potest aliquis sine eo Sacramento esse perfectus Christianus. Vide eundem lib. 3. constit. cap. 10. 16. & 17. & lib. 7. cap. 44.

SECUNDVS sit S. VRBANVS in epistola sua decretali: *Omnes, inquit, fideles per manuum impositionem Episcoporum Spiritum sanctum post Baptismum accipere debent, & pleni Christiani inueniantur.*

TERTIVS sit S. CORNELIVS Papa & Martyr, in epistola ad Fabianum Antiochenũ apud Eusebium lib. 6. hist. cap. 33.

Non

Non fuit, inquit, signaculo Chrismatis consummatus, unde nec Spiritum sanctum potuit promereri.

QUARTVS sit MELCHIADES Papa & Martyr, in epist. ad Episcopos Hispaniæ: interrogatus, vtrum maius Sacramentum esset Baptismus, an Confirmatio; respondit his verbis: *Scito te vtrumq; magnum esse Sacramentum.* & addit, Confirmationem in eo præstare Baptismo, quod solùm à summis sacerdotibus, id est, Episcopis confertur. Vbi apertissimè docet, Confirmationem esse Sacramentum verè, & propriè dictum; quia confert cum Baptismo, & aliquo modo etiam Baptismo anteponebat: Baptismum autem omnes fatentur Sacramentum esse verè, ac propriè dictum.

QVINTVS sit S. EVSEBIUS Papa in epist. 3. *Manus, inquit, impositionis Sacramentum magna veneratione tenendum est, quod ab aliis perfici non potest, nisi à summis sacerdotibus.* Et probat ex Actis Apostolorum.

SEXTVS sit S. INNOCENTIUS I. in epist. 1. ad Decetium, cap. 3. *Presbyteris, inquit, Chrismate baptizatos ungere licet, sed quod ab Episcopo fuerit consecratum; non tamen frontem ex eodem oleo signare, quod solis debetur Episcopis, cum tradunt Spiritum sanctum Paracletum.* & adducit exemplum Apostolorum Act. 8. Vbi Innocentius apertè distinguit Episcopalem Confirmationem, qua tradi dicit Spiritum sanctum, ac proinde Sacramentum esse, ab vnctione, quæ fit in Baptismo, quæ non est Sacramentum, sed quid Sacramentale; & præterea ab Apostolorum doctrina hoc descendere.

SEPTIMVS sit S. DAMASVS in epist. 4.

OCTAVVS sit S. LEO epist. 86. alias 88.

NONVS sit S. IOANNES III. in epist. ad Episcopos Germaniæ. Hi tres Pontifices declarârunt non licere Chorepiscopis, sed solis Episcopis dare Spiritum sanctum per manus impositionem, & vnctionem Chrismatis in fronte. Ac Ioannes III. citat Damasum, & Leonem, & causam reddit, cur tam ipse, quàm illi ita declarauerint; quia in Actis cap. 8. soli Apostoli dabant Spiritum sanctum per manus impositionem: vbi videmus eos loqui de illa cæremonia, quæ Apostolis fuit in vsu.

DECIMVS sit S. GREGORIUS, qui lib. 3. epist. 9. monet, ne presbyteri signare audeant Chrismate baptizatos in fronte, cum ad Episcopi munus id pertineat. Et in cap. 1. Cantic. in illud: *In vineis Engaddi, inquit, balsamum nascitur, quod cum*
oleo

oleo Pontificali benedictione Chrisma efficitur, quo dona sancti Spiritus exprimuntur. ADDE etiam Innocentium III. cap. Cum venisset, extra de sacra vnctione.

CAPVT QVARTVM.

Idem probatur ex Conciliis.

PRIMUM est ELIBERTINVM Concilium antiquissimum can. 38. Postquam enim dixerat posse laicum in necessitate baptizare, addit: *Si superuixerit, ad Episcopum cum perducatur, ut per manus impositionem perfici possit.* Idem etiam infra canone 77. iubet Diacono, si quos baptizauerit.

SECUNDVM est Concilium ARELATENSE I. tempore S. Syluestri celebratum, quod can. 8. iubet hæreticis ad Ecclesiã redeuntibus, si baptizati fuerint in nomine Patris, & Filij, & Spiritus sancti, non iterum tradi Baptismum, sed manus ab Episcopo imponi, ut accipiant Spiritũ sanctũ: quia nimirum hæretici illi Baptismũ dare solebant, sed non Confirmationẽ.

TERTIVM est ARELATENSE II. sub eodem Syluestro, quod idem statuit, can. 17. nisi quod exprimit etiam Chrisma cum manus impositione.

QVARTVM sit LAODICENVM etiam antiquissimum, ubi can. 7. iubentur Nouatiani sancto Chrismate inungi; & can. 48. *Oportet, inquit, baptizatos sacratissimum Chrisma percipere, & celestis regni participes fieri.*

QVINTVM sit AVRELIANENSE Concilium apud Gratianum de consecr. dist. 5. can. Ut ieiuni: *Ut ieiuni, inquit, ad Confirmationẽ veniant perfecte ætatis, ut moncãtur cõfessionẽ prius facere, ut mundi donũ Spiritus sancti valeãt accipere.*

SEXTVM sit MELDENSE Concilium apud eundem Gratianũ eadem dist. can. Ut Episcopi: *Ut Episcopi, inquit, nõ nisi ieiuni per impositionem manuum Spiritum sanctum tradant.*

SEPTIMVM sit Conciliũ II. HISPALENSE, can. 7. ubi idẽ repetitur quod suprã ex Leone I. citauimus.

OCTAVVM sit Conciliũ, quod celebrauit S. Bonifacius Episcopus, & Martyr, quod exstat in vita ipsius in tomo 3. Suriij, ubi statutũ est, ut Episcopi circũirent dioceses Confirmando.

His accedant Concilia tria Generalia, VI. Synodus, can. 7. Florentinum, in instruct. Armenorum, & Trident. sess. 7. can. 1. de Confirmatione.

CAPVT QVINTVM.

Idem probatur ex Patribus Græcis.

PRIMVS ex Patribus Græcis sit DIONYSIVS Areopagita. Is de Ecclesiast.hierar. cap.2.part.2. sic habet: *Baptizatum indutum alba veste ad Pontificem ducunt; ille diuino, ac deifico prorsus vnguento circum signat. & par.3. Perficiens illa vñctio facit perfectum, & cap.4.par.3. Sed et ipsis, qui sacratissimo regenerationis mysterio consecrantur, aduentum Spiritus sancti cōsummans vnguenti inunctio elargitur.* Hic vides cæremoniam, & eius effectum, ac proinde Sacramenti propriè dicti rationem.

SECUNDO loco prodeat CLEMENS Alexādrinus, qui teste Eusebio lib.3.hist.cap.17. secundū versionē Christophorsoni, refert historiā iuuenis cuiusdā à S.Ioanne Apostolo cōmendati curæ, ac diligentia Episcopi nuper creati, ac inter alia sic loquitur: *Qui (Episcopus) eum Baptismi Sacramēto illuminauit, postea vero sigillo Domini tanquam perfecta, & iuxta eius animi custodia obsignauit.* Vbi apertè loquitur de Sacramēto Confirmationis, quod est sigillum Dominicum in fronte impressum, & custodiam præbens per gratiam quam confert.

III. IUSTINVS q.137. Orthodoxorum, scribit peractis mysteriis Baptismi, consignari fideles sacro vnguento.

IV. ORIGENES homil.8. in Leuiticum prope finem: *Sic ergo, inquit, cōuersis à peccato purificatio quidem per illa omnia datur, qua superius diximus: donum autem gratia Spiritus per olei imaginem designatur, Et non solum purgationem consequi possit is, qui conuertitur à peccato, sed & Spiritu sancto repleti.* Et homil.9.vltra medium: *Omnes, inquit, quicunque vnguento sacri Chrismatis delibuti sunt, sacerdotes effecti sunt, sicut & Petrus ad omnem Ecclesiam dicit; Vos autem genus electum, regale sacerdotium.*

V. CYRILLVS Hierosolymitanus ex quinq; catechesibus mystagogicis, 1. & 2. scripsit de Baptismo, 3. de Sacramēto Cōfirmationis, 4. & 5. de Eucharistia, quæ sunt tria Sacramenta, quæ eodem die percipiuntur à Neophytis. Vnde apparet Cyrillum non tantum habuisse Confirmationem pro Sacramento, sed etiam pro Sacramento propriissimè dicto, quandoquidem illud in numero ponit cum Baptismo, & Eucharistia. Præterea Catechesi 3. iam citata, sic loquitur: *Quemadmodum*

modum panis Eucharistia post sancti Spiritus inuocationē non amplius est panis communis, sed est corpus Christi; sic & sanctum hoc unguentum, non amplius est unguentum nudū, postquam iam consecratū est, sed est Chrisma Christi, quod aduentu Spiritus sancti per ipsius diuinitatem energiam habet, quo frons, & alij sensus tui symbolicè inunguntur, & corpus quidem isto visibili unguento perungitur, anima verò sancto ac viuifico Spiritu sanctificatur. **NOTA** ad hunc locum. **PRIMO**, conferri hic etiam Chrisma cum Eucharistia; quod est argumentum vtrumque esse æquè propriè Sacramentum. **SECUNDO** nota, unguentum consecratum vim habere sanctificandi, quod est proprium verorum Sacramentorum, quæ sunt instrumenta sanctificationis. **TERCIO**, non solum vim habere sanctificandi, sed etiam reipsa verè animam sancto Spiritu sanctificari, cum frons Chrismate perungitur. **QUARTO** nota, hunc auctorem cautè loquutum, cum ait, panem Eucharistiæ post consecrationem esse corpus Christi; unguentum autem post consecrationem non dixit esse Spiritum sanctum, ne putaremus à Cyrillo fingi similem transubstantiationem unguenti, qualis sit in pane: sed dixit, non esse nudum unguentum, sed Chrisma Christi habens energiam sanctificandi à Spiritu sancto.

Idem Cyrillus ibidem docet, quemadmodū Christus primò Baptismum accepit; secundò descendit in eum columba; tertio excepit eum tentatio: ita nobiscum etiam fieri, qui primò baptizamur, deinde per Chrisma recipimus Spiritū sanctum, & sic tandem ad prælium descendimus cum Diabolo. Ibidem etiam dicit, Christianū propriè denominari à Chrismate. Cum enim Christianus dicatur quasi vnctus, non videtur dignus hoc nomine, qui non est vnctus hoc unguento, quo Christiani perficiuntur. Denique ibidem etiam rectè dicit, Ioannem in sua epist. 1. cap. 2. cum ait: *Et vos vñctionem, quam accepistis ab eo, in vobis maneat, & vñctio docebit vos de omnibus.* ad hoc sanctum Chrisma alluisse per quod datur Spiritus sanctus, qui docet nos de omnibus.

VI. GREGORIUS Nazianzenus oratione in sanctum lacuum: *At si tu, inquit, per Baptismum te ipsum obsirmaueris, ac præclarissimo, & firmissimo auxilio tibi in futurum caueris, animum scilicet, & corpus vñctione, & Spiritu consignatus, quemadmodum olim Israël nocturno illo, primigenosq;*

tuyente

tuente cruore; quid tibi accidet? & quod tibi praesidium comparatum erit? audi Salomonis paræmiæ; Si sederis, ait, intrepidus eris; si dormieris, suavis eris somnus tuus.

VII. AMPHILOCHIVS in vita S. Basilij, si tamen is est verus auctor eius libri: Baptizavit, inquit, Maximinus Episcopus Basilium, & Ebulu, & vestivit albis, atq; unguens eos sancto Chrismate, tradidit eis vniuscam communionem.

VIII. THEODORETVS in comment. I. cap. Cantic. Qui initiantur Baptismo post Satana abnegationem, & confessionem fidei, veluti signo, ac nota regia spiritualis unguenti Chrismate inuncti, sub ea visibili unguenti specie inuisibilem sanctissimi Spiritus gratiam percipiunt.

IX. IOANNES DAMASCENVS lib. 4. de fide, cap. 10. Oleum, inquit, in Baptismate assumitur, unctione significans, & Christos nos efficiens, & misericordiam Dei nobis annuncians per Spiritum sanctum. Vbi apertissime loquitur de Sacramento Confirmationis, quod datur post Baptisma. Nam paulò antè dixit, Apostolis in forma ignis datum Spiritum sanctum; & mox subiungit, nobis dari per oleum. Certè autè Confirmatio Apostolorum in die Pentecostes non respōdet Baptismo, sed Cōfirmationi per Chrisma. Et paulò pōst idē auctor dicit, sicut columba attulit ramum oliuæ post diluuium; ita nobis post Baptismum, cuius figura fuit diluuium, aduenire Spiritum sanctum per oleum, cuius figura fuit illa columba cum ramo oliuæ. Deniq; verba Græca. ὁ ἐλαίου βαπτίσματι παραλαμβάνεται, rectiùs verterentur: Oleum Baptismati succedit, quàm, Oleum in Baptismate assumitur, vt Oecolapadius vertit. Nam in Græco non est, in Baptismate; & verbū παραλαμβάνω, propriè dicitur de eo, quod assumitur, vt alteri succedat.

CAPVT SEXTVM.

Idem probatur ex Latinis.

IERTVLLIANVS in lib. de resurrectione carnis, videtur totum ritum breuissime comprehendere, id est, unctionem, signum crucis, & impositionem manus: Caro, inquit, ungitur, & anima cōsecratur; caro signatur, & anima muniatur; caro manus impositione adumbratur, & anima Spiritu illuminetur. Et ibidem coniungit hoc Sacramentum cum Baptismo, & Eucharistia:

adeſt, Veritas ſigno, & Spiritus Sacramento. Et infra: Et huius
 Vnctionis beneficio, & ſapientia nobis, & intellectus diuinitus
 datur, conſilium, & fortitudo cælitus illabitur, ſcientia, et pie-
 tas, & timor inſpirationibus ſupernis inſunditur. Hoc oleo Vn-
 ctis cum ſpiritualibus nequitiiſ colluctamur.

IV. EVSEBIUS Emiſſenus, ſeu quicumq; fuit auctor (nam
 ſine dubio Latinus fuit, & inſignis) in ſermone de Pentecoſte:
*Quod, inquit, nunc in confirmandis Neophytis manus impoſi-
 tio tribuit ſingulis, hoc tunc Spiritus ſancti deſcenſo in creden-
 tium populo donauit vniuerſis. Et infra: Ergo Spiritus ſanctus,
 qui ſuper aquas Baptiſmi ſalutiſero deſcendit illapſu, in fonte
 plenitudinem tribuit ad innocentiam, in Confirmatione au-
 gmentum præſtat ad gratiam.*

V. PRUDENTIUS in *Πυχρομαχιᾱ*, cū pugnam luxurię
 & ſobrietatis deſcribit:

*Poſt inſcripta, inquit, oleo frontis ſignacula, per quæ
 Vnguentum regale datum eſt, & Chriſma perenne.*

Et in hymno ante ſomnum:

*Cultor Dei memento
 Te fontis, & lauacri
 Rorem ſubiſſe ſanctum,
 Te Chriſmate innotatum.*

VI. PACIANUS in lib. de Baptiſmo: *Lauacro, inquit, pec-
 cata purgantur, Chriſmate ſanctus Spiritus ſuperinſunditur:*
Erraque verò iſta, manu & ore antiſtitis impetramus. Item in
 i. epiſt. ad Sympronianum Nouatianum: *Si ergo & lauacri,
 & Chriſmatis poteſtas, maiorum longè Chariſmatum ad Epi-
 ſcopos inde, (ex Apoſtolorum forma) deſcendit; & ligandi quo-
 que ius adfuit, atque ſoluendi.* Vbi vides, Chriſma non ſolū
 coniungi cum Baptiſmi & Pœnitentiæ Sacramento, ſed eti-
 am antepoſiti Sacramento Pœnitentiæ: dicit enim eſſe pote-
 ſtatem maiorum Chariſmatum, poſſe Chriſmate inungere,
 quā ſoluere, vel ligare: & inde probat poſſe Episcopum ſol-
 uere, & ligare, quia poteſt baptizare, & Chriſmate conſigna-
 re, quæ ſunt maiora munera. Idem in epiſt. 2. *Veſtra plebi,* in-
 quit, *Vnde Spiritus, quam non conſignat vnctus ſacerdos?*

VII. AMBROSIVS lib. 3. de Sacramētis, cap. 2. *Sequitur, in-
 quit, ſpirituale ſignaculum, quia poſt fontem ſequitur & per-
 ſectio fiat, quando ad inuocationem ſacerdotis Spiritus ſan-
 ctus inſunditur.* Et libro de iis, qui iniciantur myſteriis, cap. 7.

Repete, quia accepisti signaculum spirituale. Et infra: Serua quod accepisti, signauit te Deus Pater, confirmauit te Christus Dominus.

VIII. HIERONYMVS in Dialogo contra Luciferianos, posteaquam dixerat, Episcopos baptizatis per impositionem manuum dare Spiritum sanctum, subiungit: *Exigis, Vbi scriptum sit? In Actibus Apostolorum. Sed etiam si Scriptura auctoritas non subesset, totius orbis in hanc partem consensus instar praecepti obtineret.*

IX. AVGVSTINVS li. 15. Trinit. c. 26. dicit, Ecclesiā adhuc seruare, quod fecerunt Apostoli Act. 8. vt eius praepositi manus imponant ad Spiritum sanctum accipiendum. Ibidē etiam meminit Chrismatis. Item in praefatione 2. concionis in Psal. 26. dicit, hac vnctione spiritualiter homines perfici. Item lib. 3. de Baptismo, cap. 16. & tract. 6. in epist. Ioannis dicit, nūc quidem non loqui linguis, quibus imponuntur manus post Baptismum, tamen reuera accipere Spiritum sanctum, & latenter, atque inuisibiliter infundi charitatem. Sed praecipuus locus est libro secundo contra literas Petiliani, cap. 104. *In hoc Unguento, inquit, Sacramentū Chrismatis vult Petilianus interpretari: quod quidem in genere visibilium signaculorum sacrosanctum est, sicut ipse Baptismus; sed potest esse in hominibus pessimis. Et infra: Discerne igitur visibile sanctum Sacramentum, quod esse & in bonis, & in malis potest: illis ad praeium, istis ad iudicium, ab inuisibili vnctione charitatis, qua proprie bonorum est.*

V. BEDA lib. 6. in Lucam, exponens illa verba Luc. 22. *Et egressus ibat secundum consuetudinem in montem oliuarum. In montem, inquit, oliuarum discipulos educit, vt omnes in morte sua baptizatos altissimo sancti Spiritus Chrismate confirmandos esse designet.*

His accedant qui de hoc Sacramento ex professo tractant. XI. Rabanus lib. 1. de Institut. clericorum, cap. 30. XII. Amalarius lib. 1. de officiis Ecclesiasticis. XIII. Hugo libr. 2. de Sacramentis, pag. 7. & XIV. Magister cum omni Schola lib. 4. Sentent. distinct. 7.

His accedant tria miracula ad huius Sacramenti confirmationem à Deo ostensa. PRIMVM exstat apud Optatum lib. 2. vbi refert, ampullam S. Chrismatis ab Arianis per fenestram proiectam, Angelica manu sustentatam collidi nō potuisse,

tuisse. **A L T E R U M** exstat in vita S. Remberti Bremensis Episcopi apud Surium tomo I. in mense Februario, quæ scripta est ante annos DCC. Ibilegitimus S. Rembertum inter confirmandum cæcum illuminasse. **T E R T I U M** exstat in vita S. Malachia à S. Bernardo scripta: *Puerum*, inquit Bernardus, *mente captum, ex his quos lunaticos vocant, inter confirmandum sacra unctione curauit.* Loquitur autem de Malcho Episcopo S. Malachia præceptore.

CAPVT SEPTIMVM.

Diluuntur solutiones aduersariorum ad Patrum testimonia, quæ sunt etiam argumenta ipsorum contra veritatem.

N V N C quid aduersarij ad tam multa Patrum testimonia respondeant, & quid nobis obijciant, videamus. Calvinus **P R I M O** simpliciter reiecit Patres. Nam lib. 4. cap. 19. §. 4. Hieronymum dicit in eo hallucinari, quod Apostolicam obseruationem esse putauerit, ritum Confirmationis. Et §. 8. & 10. vehementissimè inuehitur in S. Melchiadem, vt supra cap. I. notauimus. Denique §. 12. ita loquitur: *Itam verò cum verbo Dei, & probabili ratione defici se vident, prætexunt, quod solèr, vetustissimam esse hanc obseruationem, & multorum seculorum consensu firmatam. Etiam si id verum esset, nihil tamen efficiunt. Non è terra est Sacramentum, sed è cælo; nò ex hominibus, sed ab vno Deo.* Hæc ille. **Q V A S I** verò nos adferamus Patres, vt Sacramentum ab iis institutum doceamus. Fatemur Sacramenta esse de cælo, non de terra: sed tamen testes Sacramentorum homines adhibemus. Quanquam neq; testimonium hoc de terra dici debet, sed de cælo: non enim hoc testimoniū ex capite suo ipsi constringunt, sed ex Apostolorum doctrina, & traditione deducunt. Adde, quod nec admittimus nos destitui verbo Dei, vt in 2. cap. ostendimus.

S E C V N D O, Idem Calvinus ibidem negat Patres agnouisse hoc Sacramentum: *Sed quid, inquit, vetustatem obiectant, cum veteres dum propriè eloqui volunt, nusquā plura duobus Sacramentis recenseant? Si ab hominibus petendum esset nostra fidei præsidium, habemus arcem inexpugnabilem, nunquam veteribus agnita fuisse pro Sacramentis, quæ isti Sacramenta emen-*

riuntur. De manuum impositione loquuntur veteres, sed an Sacramentū vocant? Augustinus apertè affirmat lib. 3. de Baptismo, cap. 16. nihil aliud esse, quàm orationem. Addit Kemnitius pag. 319. Gratiani auctoritatē, qui can. Arianos 1. q. 1. ex hoc loco Augustini colligit, manus impositionem, non esse Sacramentum, quia repeti potest; cū nihil sit, nisi oratio quādā.

HÆC secunda solutio duobus clarissimis mendaciis constat. Quod enim Calvinus ait, veteres non agnoscere nisi duo Sacramenta propriè dicta, constat esse mendacium ex testimoniis citatis, & idem mendacium refutauimus cū ageremus de numero Sacramentorum. Quod autem Calvinus negat veteres Sacramentum appellasse ritum Confirmationis, mendacium esse patet ex testimoniis Melchiadis, & Eusebij, Cypriani, atque Augustini suprà citatis. Ad locum ex Augustino citatum, RESPONDEO, Augustinum loqui de simplici manus impositione, quæ fiebat in reconciliatione penitentium, non de manus impositione cum Chrismate, quæ est propriè Sacramentum Confirmationis.

At instat Calvinus, atque ait: *Neq; hic mihi putidis suis distinctionibus obganniat, non ad Confirmationem illud Augustinum retulisse, sed ad curatoriam, vel reconciliatoriam. Exstat liber, &c.* Ac probat hîc agi de vtraque simul, quia loquitur Augustinus de hereticis, qui ad Ecclesiā redeunt, qui quidem non rebaptizantur: tamen imponuntur eius manus, & eo modo datur eis Spiritus sanctus. Et confirmat hoc idem ex lib. 5. cap. 23. de Baptismo.

RESPONDEO, hæc omnia si quid probarent, probarent solum Confirmationem esse Sacramentum iterabile; non autem probarent, non esse Sacramentum propriè dictum, quod Caluino probandum erat. Nam sic loquitur AUGUSTINUS: *Manus autem impositio non sicut Baptismus repeti non potest: quid enim est aliud, nisi oratio super hominem?* Vbi Augustinus ex eo, quod manus impositio est oratio, non colligit non esse Sacramentum, quod repeti non potest. Alioqui Sacramentum esse manifestè probatur. Nam hîc est materia sensibilis, impositio manuum; est forma, oratio; est effectus, gratia Spiritus sancti, vt ipse Calvinus contendit. Cur ergo non est Sacramentum? At neque ex hoc probari potest Confirmationem esse Sacramentum iterabile. Nam (vt dixi) non agitur hîc de Confirmatione, sed de reconciliatio-

ne pœ-

ne pœnitentium. Id quod probo his rationibus.

PRIMO, Augustinus passim docet Confirmationem fieri Chrismate, vt patet ex locis suprà allegatis. Hîc autem nō solum non meminit Chrismatis, sed apertè indicat se loqui de impositione manuum sine Chrismate; alioqui non diceret: *Quid est aliud, nisi oratio?* posset enim responderi, est consecratio, & consignatio per Chrismatis vnctionem.

SECUNDO, Sacramentum Confirmationis semel datum nō potest repeti, vt ex Concilio Tarraconensi, & ex rescripto Gregorij II. testatur Gratianus dist. 5. de consecrat. can. Dictum est, & can. De homine. Et præterea idem apertè colligitur ex Augustino lib. 2. contra literas Petiliani, ca. 104. vbi dicit, Sacramentum Confirmationis, sicut etiā Baptismi interdum in pessimis hominibus esse, & manere, licet ad iudiciū. Quod si manet etiam in pessimis, non debet, nec potest eis dari, cū reconciliantur, quia iam habent, nec amiserunt. At hoc loco dicit, manus impositionem repeti posse: non igitur loquitur de manus impositione Confirmatoria.

TERTIO, Augustinus loquitur de reconciliatione hæreticorum, vt Calvinus fatetur, & ex utroq; loco citato perspicuum est. Sed manus impositio reconciliatoria distincta erat, præsertim in Ecclesia Occidentali à manus impositione Confirmatoria; ergo non loquitur Augustinus de Confirmatoria. Assumptio probatur tum ex Vigilio Papa in epist. i. cap. 3. vbi hoc expressè testatur: tum ex Gregorio lib. 9. epist. 61. vbi dicit, Arianos in Ecclesia Orientali, consueuisse recipi per vnctionem Chrismatis; in Occidentali per solā impositionem manuum. Cuius diuersitatis ratio assignari solet, quia Ariani Occidentales nō confirmabantur per Chrisma in sua secta, Occidentales autem confirmabantur; & ided in Oriente oportebat eos ungere, cū redibant ad Ecclesiā, quia hoc eis deerat. Vnde etiam in Concilio Nicæno ex Arabico nuper translato can. 31. iubentur Ariani inungi, cū ad Ecclesiam veniunt. Vel certè si etiam in Occidente Ariani reiciebant Confirmationem; tamen cū ad Ecclesiam redibant, nō statim Chrismate ungebantur, sed postea per oportunitatem, vt modò facimus cum Lutheranis. Vel denique illa vnctio in Ecclesia Orientali non erat Sacramentum, sed ritus quidam. Quidquid sit, Gregorius expressè dicit, in Occidente nō inungi, sed simpliciter reconciliari per impositionem manus. Quare sanctus

Augustinus, qui de Ecclesia Occidentali erat, cū loquitur de reconciliatione hæreticorum per impositionē manuum, non agit de Confirmatione, quæ non fit sine vnctione, sed de simplici reconciliatione.

At duo videntur ob stare huic nostræ explicationi. VNUM, quod Augustinus lib.3. de Baptismo, cap.16. id est, in illo ipso capite, vbi dicit, impositionem manuum nihil esse, nisi orationem, dicit etiam per eam manuum impositionem nunc non expectari, vt homines loquantur linguis, vt fiebat tempore Apostolorum, sed satis esse si infundatur Spiritus sanctus inuisibiliter: quem locū nos suprā citauimus pro Sacramento Confirmationis. Ergo Augustinus loquitur de manus impositione Confirmatoria; vel certè æquiuocè accipit in vno, & eodem capite manus impositionem; quod videtur absurdum. ALTERVM est, quod lib.5. de Baptismo, cap.23. Augustinus dicat per manus impositionem reconciliatoriam dari Spiritum sanctum. At hîc per nos est effectus Confirmationis; ergo eadem erat apud Augustinum impositio manus Confirmatoria, & reconciliatoria.

Respondeo ad PRIMUM, vario modo accipere Augustinum in eo capite manus impositionem, sed sine vllō vitio. Nam propositum eius erat soluere argumentum S. Cypriani, qui ex eo, quod in sola Ecclesia Catholica dari potest, & accipi Spiritus sanctus, colligebat Sacramenta hæreticorum non esse vera, & rata. Ad hoc argumētum diluendum Augustinus initio capitis explicat, quid intelligi debeat per Spiritum sanctum cū dicitur non posse dari, vel accipi, nisi in Ecclesia Catholica per manus impositionē: ac dicit intelligi donum charitatis; hoc enim non possunt habere nisi boni, & idēdō nisi in Ecclesia Catholica, quia extra illam nulli sunt boni. Hoc autem loco accipit Augustinus manus impositionem in genere, siue sit Confirmatoria, siue reconciliatoria, siue (vt sic loquar) Ordinatoria: semper em̃ per eam datur gratia, & charitas, nisi ponatur obex. Deinde vult Augustinus ostendere per manus impositionem dari reuera donum charitatis; & declarat exemplo manus impositionis Confirmatoriæ, cū dicit; nunc non expectari, vt loquantur linguis, quibus manus imponitur, sed latenter eis infundi charitatem. Itaq; hîc iam accipit manus impositionem magis strictè (id est, pro sola Confirmatoria) nec tamen est vitiosa æquiuocatio; quia
quod

quod conuenit toti generi, rectè declaratur exemplo vnus speciei. Postea redit ad argumentum Cypriani, & distinguit tria; Sacramentum, donum Spiritus sancti gratis datum, vt prophetiam;& donum gratum faciens, id est, charitatem; ac dicit extra Ecclesiam, vel in malis hominibus esse posse duo priora, non tamen tertium;& idcirco debere ad Ecclesiam redire, vt in ea per manus impositionem reconciliatoriam illud accipiant. Et quia poterat aliquis suspicari, non posse repeti hanc manus impositionem, sicut non potest repeti Baptismus, nec Confirmatio, nec Ordinatio, idcirco Augustinus subiungit, posse repeti manus impositionem, id est, reconciliatoriam, quia nihil est aliud, nisi oratio super hominem, id est, non est consecratio aliqua, quæ maneat, & characterem imprimat, vnde repeti non possit, sed est tantum cæremonia adiuuans orationem.

Ad ALTERVM argumentum respõdeo, vt iam dixi, Spiritum sanctum dari, per omnem impositionem manuum, sed ad varios effectus. Nam per impositionem manuum Confirmatoriam datur ad roborandam animam in fidei confessione; per Recõciliatoriam datur ad remissionem peccatorum; per Ordinatoriam datur ad potestatem ministrandi Sacramenta.

Ad locum Grariani à Kemnitio additum RESPONDEO; Gratianum velle dicere non esse Sacramentum Ordinis, vel etiam Confirmationis, impositionem manuum, de qua loquitur Augustinus; id quod rectè ille dicit, ac rectè etiam probat ex eo, quod repeti potest. Non autè negat esse Sacramentum reconciliationis: nam alioqui etiam Eucharistia repeti potest, & tamen est verissimum Sacramentum.

TERTIA solutio est, quòd apud veteres Confirmatio fuerit tantum Catechesis puerorum, qui in infantia baptizati fuerant. Ita Calvinus ibid. §.4. & 13. vbi citat Leonem epist. 35. & 77. & Hieronymum contra Luciferianos: quam eandem solutionem omnes alij amplectuntur. At vanissima est: nam PRIMO nec Scriptura, nec vllus veterum meminit huius Catechesis. Scriptura Act. 8. & 19. dicit, Apostolos orasse, & imposuisse manus, & eo modo dedisse Spiritum sanctum: examinis puerorum nulla mentio. Similiter loquuntur Patres, vt supra ostendimus. Porro etiam S. Leo epist. 35. & 77. nihil dicit de hac re; nam loquitur de reconciliatione hereticorum, non de examine puerili. Hieronymus quoq; examẽ non nominat.

PRAETEREA ista solutio non solum non est conformis Patrum doctrinae, sed etiam ei repugnat. Patres enim dabant Confirmationem per unctionem, & manus impositionem etiam infantibus, ut expressè docent Innocentius I. epist. I. & liber de Ecclesiasticis dogmatibus, c. 52. & Ordo Romanus. Et **PRAETEREA** id certissimum est, quia dabant olim infantibus etiam Eucharistiam, ut patet ex Cypriano in serm. de lapsis, & tamen Eucharistiam non dabant, nisi post Confirmationem, ut ex Dionysio, Ambrosio, & aliis patet. At certè infantes non sunt capaces examinis, nec Catechismi; nec aduersarij volunt examen etiam infantium, sed puerorum iam adultorum; igitur euident est, omnes Patres non loqui de ritu Confirmationis, quam sibi hæretici hoc tempore confinxerunt. **DENIQUE**, omnes ferè Patres meminerunt Chrismatis, & signaculi crucis in fronte, & in hoc ponunt essentiam huius Sacramenti, ut ex eorum testimoniis constat.

Iam verò Kemnitius in 2. p. Examinis, pag. 297. & deinceps differit de sententijs Patrum, ac ad quinque capita reuocat omnes suas solutiones. **PRIMO** dicit, multos auctores qui citantur pro Sacramento Confirmationis, esse apocryphos, & supposititios. At id nihil est. Nam etiam si epistolę citatę Clementis Romani, Melchiadis, Eusebij, & Urbani, necnon liber Dionysij Arcopagitę, homilię Eusebij Emisleni, & sermones Cypriani de operibus Cardinalibus Christi, sint apud nonnullos dubię, vel etiam supposititię: tamen multos habemus alios certissimos, & probatissimos auctores; & isti ipsi sunt antiquissimi, & optimi, licet non sit certum, an sint illi, quorum nomina præferunt.

SECUNDO Kemnitius addit, alios auctores qui de Chrismate agunt, certos quidem esse, sed ex schola Montani prodiisse, ut Tertullianum, & Cyprianum. **SED** hoc esse impudens mendacium, demonstrauius cap. I.

TERTIO dicit, alios esse auctores certos, & probatos, qui de unctione mentionem faciunt, sed eam vocare Sacramentum improprie, & largo modo, quia est humana cæremonia quædam in Baptismo adhiberi solita: sicq; exponit loca Augustini à nobis citata ex lib. 15. Trinitat. cap. 26. & lib. 2. contra literas Petilianı, c. 104. At multum hîc errat Kemnitius. Suprà enim ostendimus, Patres ferè omnes distinguere Confirmationem à Baptismo, & effectum spiritualem ei tribuere, qui non conuenit

uenit nisi verè ac propriè dictis Sacramentis. Id quod etiam manifestè patet ex locis Augustini citatis, quæ suo more Kemnitius truncata, & imperfectè citauit. Nam in priore loco dicit, Præpositos Ecclesiæ imponere manum, & Chrismate inungere ad hoc, vt detur Spiritus sanctus, vt olim fecerunt Apostoli Actor. 8. At certè Apostolorum actio non fuit humana cæremonia adiuncta Baptismo, sed alia, & quidem diuina, & efficacissima. In posteriore loco Augustinus multum laborat, vt ostendat veram Confirmationem possedari, & accipi à malis, vt ipsùm etiam Baptismum. At quid opuserat hoc probare de humana, & sterili cæremonia? quis enim de eo dubitare poterat? Deinde ibidem Augustinus dicit, malos accipere Sacramentum Confirmationis visibile, sine inuisibili gratia Spiritus sancti, id quæ ad iudicium. At certè non distingueret Sacramentum visibile ab inuisibili gratia in malis, nisi crederet in bonis ista coniungi, & vnum per alterum dari: neque ad iudicium sumitur cæremonia humana, etiamsi à malis sumatur. Denique ibidem Augustinus dicit, Sacramentum Chriftomatis esse sacrosanctum, sicut ipse Baptismus. At quanta blasphemia fuisset æquare humanam cæremoniam Sacramento Baptismi?

QUARTO Kemnitius dicit, etiam si veteres variè loquantur de hac re, tamen nullum esse in puriore antiquitate Patrè, qui detrahat Baptismo suos effectus, vt eo tribuat Chriftmati, vt modò faciunt Papistæ. Et quia Cyrillus videbatur illi valde obstare, in dubium reuocat, an sint eius illæ Catecheses, & an ipse aliquando errauerit in fide; & tandem reiicit tanquam falsa, quæ dicit Cyrillus. SED hæc omnia meræ nugæ sunt. Nam nec nos dicimus detrahendos esse Baptismo suos effectus, sed damus vtriq; Sacramento effectus proprios. De Catechesibus autem Cyrilli nemo vnquam dubitauit, neque profert Kemnitius vllam rationem, vel coniecturam, cur dubitandum sit. De fide autè, & probitate Cyrilli exstat egregium testimonium in epistola Concilij Constantinopolitani ad Damasum apud Theodoretum lib. 5. cap. 9. vbi tota illa Synodus Oecumenica Cyrillum vehementer commendat, quòd multa, & varia certamina cum Arianis ob fidem Catholicam gesserit.

QUINTO Kemnitius dicit, Patres loqui valde dissimiliter ab auctoribus recentioribus. Nam veteres inculcant manus imposi-

impositionem, quæ tamen nunc abolita est; item veteres nominant oleum, sed nullus probatus auctor addit mixtionem cum balsamo, vt modò faciunt omnes recetiores: veteres tribuunt Baptismo eos effectus, quos recetiores tribuunt Confirmationi, vt dare gratiam, dare Spiritum sanctum, perficere, armare contra Diabolum, &c. denique veteres Vnctionem annectunt Baptismo; recentiores separant, ac si duo essent Sacramenta. At hîc etiam valde hallucinatur Kemnitius. Nam INPRIMIS falsum est, esse abolitam manus impositionem, vt suprà ostendimus, cap. 2. DEINDE balsami cum oleo mixti expressè meminit Gregorius I. Papa in cap. I. Canticor. qui certè probatissimus auctor est; sed de hac re postea. PRAETEREA falsum est eosdem effectus tribui à Patribus Baptismo, quos nos tribuimus Confirmationi, etiam si nomina effectuum sæpe sint eadem. Nam Baptismus dat gratiam, & Spiritum sanctum, sed ad alios effectus, quàm Confirmatio. Vnde etiã Dominus Ioan. 20. dedit Apostolis Spiritum sanctum per insufflationem; & tamen eodem tempore promisit illis Spiritum sanctum, Act. 1. & dedit Act. 2. sic etiam Baptismus armat, quia dat gratiam benè operandi: sed Confirmatio addit peculiare robur ad profitendam fidem. Vnde dicitur Apostolis iam baptizatis Luc. vii. *Sedete in ciuitate, donec induamini virtute ex alto.* DENIQUE Baptismus perficit in suo genere, quia facit verè, & integrè iustos, & Dei filios; & tamen Confirmatio adhuc perficit in alio genere: quomodo infans perfectus homo est, quoad essentiã, & tamen non est perfectus, quoad molem. Itaq; iidem Patres, qui magnificè loquuntur de Baptismo, magnificè etiam loquuntur de Confirmatione, vt ex locis citatis patet.

Quod autem Kemnitius obiicit de coniunctione vnctionis cum Baptismo, ostendit eius imperitiam. Nam solebant veteres etiam Eucharistiam coniungere cum Baptismo, siue adultos, siue infantes baptizarent: & tamen nemo negat Sacramenta esse distincta, Baptismum, & Eucharistiam. Hoc tempore cum baptizantur adulti, eodẽ die datur Baptismus, Confirmatio, & Eucharistia, vt veteres faciebant: sed cum baptizantur infantes, differuntur alia duo Sacramenta, donec ad vsum rationis peruenerint, qui ea percepturi sunt; quia nõ sunt ea Sacramenta infantibus necessaria, & maiori cum fructu, & reuerentia percipiuntur ab adultis. Neque in hoc à nobis Lutherani dissentiunt.

CAPVT OCTAVVM.

De materia Sacramenti Confirmationis.

SEQVITVR ALTERA quæstio de materia huius Sacramenti, de qua, etsi quædam iam dicta sint in superiori quæstione, tamen accuratius res explicanda est. Igitur materiam huius Sacramenti remotam Catholici communi consensu esse docet, oleum balsamo admixtum, atq; ab Episcopo consecratum: materiam verò proximam, quæ propriè est altera pars Sacramenti, vñctionem ex prædicto oleo in fronte adhibitam ad formam, seu figuram crucis. Hæretici hoc totum non modò reiiciunt, sed etiam ridet, vt ex locis quæstione superiori indicatis intelligi potest; vbi pinguedinem per contumeliam vocant, & Kemnitius pagin. 324. non putat impium, qui calices in itinere torrefactos, Chrismate isto inungat: & reipsa in Gallia Caluiniſtæ dicuntur ocreas suas Chrismate inunxisse. Vt autem commodius hæc veritas probari possit, statuam sequentes propositiones.

PRIMA propositio: *Chrisma, siue Vñctio, materia est Sacramenti Confirmationis.* Hæc certissima est Catholicis, ex Concilio Florentino in Instructione Armenorū, & Concilio Tridentino, sess. 7. can. 2. de Confirmatione. Probatur PRIMO ex duobus locis Scripturæ, vbi vel expressè fit mentio huius vñctionis, vel certè ad eam alluditur. PRIOR est, 2. Cor. I. *Qui confirmat nos Deus, & vnxit nos, & signauit, & dedit pignus Spiritus in cordibus nostris.* Hunc locū exponunt de Sacramento Confirmationis, Ambrosius lib. de iis, qui initiatur mysteriis, cap. 7. & Anselmus, ac Theodoretus in comment. & verba ipsa satis apertè hoc significant. Nam in primis verbū (*Confirmat*) proprium est huius Sacramenti, in quo robur datur. Deinde (*Vnxit nos*) vel refertur ad ipsam vñctionem externam, vel si referatur ad internam, fit allusio ad externam; idè enim interna illa illustratio, & operatio Spiritus sancti dicitur vñctio, quia per vñctionem externam, dari, & significari solet. Illud autem (*Signauit nos*) referri potest tum ad internam obſignationem per characterem, tum ad externum signaculum crucis, quod in hoc Sacramento in fronte imprimitur. Denique illud (*Dedit pignus Spiritus in cordibus*) apertissimè designat effectum principalem huius Sacramenti, qui est donum charitatis. POSTERIOR locus est L. Ioan. 2. Et vos vñctionem, quam

acce-

accepistis ab eo, maneat in vobis, &c. Hunc locum de hoc Sacramento exponit Cyrillus catechesi 3. mystag. & Augustinus tract. 3. in epist. Ioan. vbi dicit, esse quoddam Sacramentum vñctionis, cuius tantum virtus inuisibilis sit.

SECUNDO probatur, & quidem efficacius ex communi consensu Pontificum, Conciliorum, & Patrum Græcorum, ac Latinorum, quos supra citauimus. Tametsi enim Scripturæ testimonia primum locum habent, quando perspicua sunt: tamē cum ea non sunt ita manifesta, plus momenti habet Ecclesiæ auctoritas, quam ipsa Scriptura apertissimè commendat.

SECUNDA propositio: *Materia Confirmationis non est oleum simplex, sed oleum mixtum balsamo.* Probatur PRIMO ex traditione maiorum. Nam in primis DIONYSIVS Areopagita, etiamsi non nominat balsamum, tamen apertè describit ab effectu, seu proprietate: siquidem in Eccles. hierar. cap. 4. part. 3. dicit, *Chrisma componi ex variis rebus, & odoriferum esse: Discimus, inquit, vnguenti compositionē esse collectionem suauiter spirantium materiarum.* SECUNDO CLEMENS lib. 7. constit. Apostol. cap. 44 in benedictione Chrismatis mentionem facit fragrantia odoris. TERTIO FABIANVS Papa, & Martyr in epist. 2. ad Orientales apertè dicit, Christum ipsum instituisse, vt Chrisma conficeretur ex oleo admixto balsamo.

QUARTO CYPRIANVS, vel quicumq; est auctor, in serm. de vñctione Chrismatis: *Hodie, inquit, in Ecclesia sacrum Chrisma conficitur, in quo mixtum oleo balsamum sacerdotalis, & regie gloria exprimit vñctatem.* QUINTO GREGORIUS Turonicus lib. de gloria Martyrum, cap. 40. enarrans ingens miraculum, quod exstat etiam apud Prudentium in lib. contra Iudæos, pro eo, quod Prudentius dixerat: *Lotus, & vñctus* (sic enim requirebat ratio carminis) ille ait: *Baptismo lotus, & balsamo vñctus.* Vbi videmus, Gregorio interprete, tempore Prudentij in Chrismate fuisse balsamum; immò etiam diu ante Prudentij tempora. Is enim narrat historiam, quæ tempore Ethnici Imperatoris acciderat; qui cum victimarum intestina inspiceret, & inde per artes dæmonum responsa quæreret, nihil efficere potuit; quod dæmones timuerint præsentiam adolescentis, qui cum Imperatore aderat, qui & Baptismo lotus, & Chrismate in fronte delibutus fuerat. SEXTO GREGORIUS Papa, vt supra citauimus, in 1. cap. Cant. disertis verbis asserit, Chrisma ex oleo, & balsamo confici: neque aliquid noui

noui instituit, sed solum refert, quod in usu Ecclesiæ erat. **S E-
P T I M O** Concilium II. Bracarense, can. 4. celebratum paulò
post Gregorij mortem, expressè etiam meminit balsami; ut
etiam Concilium Florentinum in instructione Armenorum,
& omnes Scholastici ac recentiores auctores.

Ceteri Patres veteres, etiam si non expressè balsamum no-
minent, tamè satis apertè idem significare videntur, cum non
oleum, sed Chrisma appellant vnctionem, quæ datur in Sa-
cramento Confirmationis: nam ex Ecclesiæ usu Chrisma non
significat simplex oleum, sed vnguentum confectum ex plu-
ribus rebus. Id patet ex Innocentio III. cap. Pastoralis, extra
de Sacramentis non iterandis; ubi referens quendam in Sa-
cramento Confirmationis per errorem vnctum simplici oleo
benedicto, non autè vnguento ex oleo & balsamo, ut est con-
suetudo; scribit eum vnctum fuisse simplici oleo benedicto,
non Chirmate: ubi distinguit Chrisma ab oleo propter alte-
rius liquoris admistionem. Sic etiam Concilium II. Cartha-
ginense, can. 3. & Concilium III. Carthaginense, can. 36. di-
cunt, non licere presbytero Chrisma conficere. Quid autem
est Chrisma conficere, nisi ex pluribus liquoribus vnum vn-
guentum facere?

S E C U N D O accedit figura Testamenti veteris. Nam vnguen-
tum, quod Deus iussit fieri Exodi 30. quo vngeretur taberna-
culum, & sacerdotes; figura erat Chirmatis, quo vngitur Ec-
clesia, quæ est verum Dei tabernaculum, ut docent Cyprianus
sermone de vnctione Chirmatis, & Petrus Damianus serm. 1.
de dedicatione. Illud autem erat ex oleo oliuarum cum admi-
stione odoriferorum succorum, quorum vnum erat שמן
quod stacten, & etiam balsamum fuisse dicitur.

D E N I Q U E accedit etiam congruentia, quam dum ridicu-
lam videri vult Kemnitius, ipse se ridiculum probat. Ratio
Theologorum, & ipsius etiam S. Thomæ, 3. par. quæst. 72. art.
2. est, quia debet materia Sacramenti significare effectum Sa-
cramenti. Porro effectus huius Sacramenti præcipuus est con-
firmatio in fide, quæ duo requirit; puritatem, & feruorem fi-
dei in corde, & constantem confessionè in ore: primum aper-
tissimè significatur oleo, quod liquor purissimus, & subtilis,
lucidus, & calidus est: secundum non minus aptè significatur
balsamo, quod bonum odorem effundit ad alios.

Præterea huius Sacramenti effectus significati sunt in illis
igneis

igneis linguis, quæ apparuerunt super Apostolos in die Pentecostes. Et si enim Apostoli sine Sacramento confirmati sint illo die ab ipso Deo immediatè; tamen non sine visibili symbolo effectum inuisibilem significante. Illis ergo duobus symbolis, igni & linguis, seu potius vni ex duabus partibus constanti, id est, linguis igneis respondent optimè in Sacramento nostro oleum, & balsamū, seu Chrisma ex oleo, balsamoq; confectū.

Hanc rationem his verbis Kemnitius irridet pag. 286. *Arripe aures, optime lector, magnum enim, & in signe audies acumen.* Et infra: *Miraberis scio, & bi audieris; Igni in Pentecoste respondet in Pontificia Confirmatione oleū. Quaratione? quia oleum nutrit ignem. Sed idem facit etiam baculus quercineus fumo benè induratus. Speciei linguarum respondet balsamum, quia est odoriferum. Sed quid lingua commune est cum odoribus? num lingua odoratur?* Hæc ille.

At non mirum si absurdus homo, absurdè intellexit, quæ bene à doctis viris dicta, & scripta sunt. Non enim dicimus oleum respondere igni, quia nutrit ignem; sed quia sicut in Scripturis per ignem significatur sapientia, & charitas, & ipse Spiritus sanctus illustrans, & calefaciens corda, ut ignis illustrat, & accendit corpora: ita etiam in Scripturis oleum, siue vnctio significat eandem charitatem, & sapientiā, & ipsum Spiritum sanctum. Nam oleum res facit lucidas, & perspicuas, & simul fouet, emollit, penetrat, &c. Itaq; de igne legimus Luc. 12. *Ignem veni mittere in terrā,* & Hebr. 12. *Deus noster ignis consumens est.* & similiter de vnctione legimus, Act. 10. *Vnxit eum Spiritu sancto, & virtute.* & 1. Ioan. 2. *Vnctio docebit vos de omnibus.* Non inueniet autē Kemnitius, ubi in Scripturis Spiritus sanctus baculo quercineo comparatur. Quod attinet ad linguas & balsamum, in eo posita est similitudo, quod sicut per linguam communicatur vox, & eo modo foras prodit confessio fidei: ita per balsamum communicatur odor, & eodem modo significatur exterior protestatio veræ fidei. Sed de nugis Kemnitianis satis.

TERTIA propositio: *Chrisma, quod est materia Sacramenti Confirmationis, prius consecratum ac benedictum esse debet.* In hac etiam Catholici omnes conueniunt. Et quia Calvinus, & Kemnitius hanc benedictionem superstitiosam, & magicam vocant, ita ut Calvinus lib. 4. Instit. cap. 19. §. 8. vocet Chrisma consecratum, oleum Diaboli mendacio pollutum; & Kemnitius

tius pagina 287. dicat appellari debere Chrisma excantatum: probanda est hæc veritas testimoniis veterū, sanctorum Pontificum, Conciliorum, Patrum.

Igitur probatur PRIMO ex traditione Ecclesiastica sanctorum Pontificum. Clemens Romanus satis fusè de ista consecratione tractat, quam etiam Apostolis tribuit lib. 7. Apostol. constit. cap. 42. & 44. Idem docet Fabianus Papa, & Martyr, in epist. 2. suprà notata, qui etiam addit singulis annis feria V. in Cœna Domini nouum Chrisma consecrandum. Damasus I. epist. 4. Innocentius I. epist. 1. c. 3. Leo I. epist. 88. Gelasius I. epist. 1. Ioannes II. in epist. vnica. Gregorius I. in c. 1. Cant. & Innocentius III. c. Cùm venisset, extra de sacra vnctione, disertis verbis docent, Chrisma esse consecrandum, idq; à solo Episcopo.

SECUNDO probatur ex Conciliis. Concilium Nicænum can. 69. secūdum Arabicum codicem in Latinum nuper conuersum, expresse meminit triplicis consecrationis, quæ etiam nunc in Ecclesia viget, id est, olei Catechumenorum, olei infirmorum, & Chrismatis. Concilium Laodicense can. 48. sacratissimum Chrisma vocat; quo nomine non illud appelleret, nisi consecratum esset. Concilium Romanum sub Syluestro can. 5. prohibet presbyteris, ne Chrisma faciant, quia nimis id ad munus Episcopi pertinet. Porro Chrisma facere non est solum miscere oleum cum balsamo, sed etiam simul consecrare: nam alioqui etiā pharmacopolæ Chrisma facere possent. Idem paulò post prohibuerunt Concilia Carthagenensia II. can. 3. & III. can. 36. Concil. IV. Carthagenense can. 36. iubet Parochis, vt omni anno ante Pascha petant Chrisma ab Episcopo proprio, idque non per clericos iuniores, sed per seipsos, aut per illum, qui sacrario præest. Vbi videmus in hoc Concilio, quod apud omnes est maximæ auctoritatis, idem haberi de Chrismate singulis annis renouando, quod habetur in epist. Fabiani, quam nonnulli apocrypham esse volunt. Videmus præterea quantam reuerentiam huic sancto oleo Conciliū detulerit, cùm prohibuerit deferri à clericis iunioribus, sed expresse præceperit, vt ipse, qui præest parœciæ, aut certè qui præest sacrario, illud accipiat ab Episcopo. Idem habet Concilium Varsense can. 3. vbi etiam dicit, non decere, vt summa infimis cōmittantur, & idèd non debere Chrisma deferre clericum vllum, nisi vt minimum sit Subdiacónus. Concilium Toletanum I. can. 20. iterum declarat soli Episcopo licere Chrisma consecrare, & ab eo petendum singulis annis

paulò ante Pascha. Concilium II. Hispalense can. 7. I. Bracarense can. 37. Concilium S. Bonifacij Martyris, quod exstat in vita ipsius, & VVormaciense Concilium can. 2. & 8. ac denique Florentinum in instruct. Armenorum idem habent.

NOTANDVM autem est, hæc Concilia non solùm antiquissima esse, præter Florentinum, sed in diuersissimis prouinciis celebrata. Nicænum, & Laodicenum in Græcia, Romanum, & Florentinum in Italia, Carthaginensia in Africa, Toletanum, & Hispalense in Hispania, Bracarense in Lusitania, Vassense in Gallia, Concilium S. Bonifacij, & VVormaciense in Germania. Ex quo intelligi potest omninò, totam veterem Ecclesiam conculcare hæreticos huius temporis, qui Chrismatis consecrationem vt rem magicam execrantur.

TERTIO probatur ex Patribus. DIONYSIVS Areop. toto 4. c. hier. Eccles. de ista consecratione agit, quã etiam ab Apostolis se didicisse affirmat. THEOPHILVS Antiochenus Episcopus ab Apostolo Petro VI. in lib. I. ad Autolycum (qui habetur in V. tomo bibliothecæ sanctorum Patrum) vocat S. Chrisma diuinum oleum; vbi etiam dicit Christianos ab hac vñctione denominari. Quod est NOTANDVM contra Kemnitium, qui pag. 305. arguit Cyrillum mendacij contra verbum Dei, quod dixerit non esse dignos nomine Christiani, qui non sunt vñcti Chrismate: *Cùm tamen constet*, inquit Kemnitius, *nomē Christianum oriū esse Antiochia, teste Luca Act. II.* Quasi verò non potuerit Antiochia primùm hoc nomen imponi, & tamen à Chrismate deriuari. Certè melius nouerat res Antiochenas Theophilus Antiochenus, & p̃ximus Apostolicis temporibus, quàm Kemnitius Germanus, & qui paulò antè viuere cœpit.

TERTVLLIANVS lib. de Baptismate: *Exinde*, inquit, *egressi de lauacro perungimur benedicta vñctione.* CYPRIANVS lib. I. epist. 12. *Oleum*, inquit, *in altari sanctificatur; sanctificare autem olei creaturam nō potuit, qui nec altare habuit, nec Ecclesiã.* Vnde nec vñctio spiritualis apud hæreticos esse potest, quando constet oleum sanctificari; & Eucharistiam fieri apud illos omninò non posse. Auct̃or serm. de vñctione Chrismatis, apud eundem Cyprianum: *Hodie* (id est, feria V. in cœna Domini) *unguentum ad sanctificationem paratur.* BASILIVS lib. de Spiritu sancto, cap. 27. *Benedicimus*, inquit, *aquam Baptismatis, & oleum vñctionis.* CYRILLVS catechesi 3. mystag. *Sanctum unguentum non amplius est unguentum nudum, posteaquam consecratum est, sed Christi Chrisma.* OPTATVS li. 2. *Vt omnia*, inquit,

Inquit, *sacrosancta Episcopi vestri violarēt, Eucharistiam infuserunt canibus infundi; & ampullam Chrismatis per fenestrā, & eam frangerent, proiecerunt.* At certè nec sacrosanctum Chrima vocaretur, nec cum Eucharistia conferri posset, nisi consecratum. AVGVSTINVS li. 5. de Baptismo, cap. 19. & 20. tractans argumentum Cypriani, quo ille probare volebat, hæreticos non habere vera Sacramenta, quia non possunt consecrare oleum, quo inunguntur baptizati, vt accipiant Spiritum sanctum: non ait (quod certè dicere debuit secundum Caluinum, & Kemnitium) non esse opus oleum consecrare, immò superstitionem, & incantationem esse olei consecrationem; sed responder, posse hæreticos oleum consecrare, quia nimirum potestas consecrandi non est in illis ab hæresi sed ab ordinatione, quam veram, & sanctam susceperunt. Et probat à simili: nam si possunt sacerdotes homicidæ, & adulteri in Ecclesia, etiam Cypriano consentiente, oleum consecrare; cur non hæretici, modò sint verè ordinati? *Cur, inquit, ad verba, quæ procedunt ex ore homicidæ, possit Deus oleum sanctificare, & in altari quod hæretici posuerunt, non possit, nescio.* Vide etiam tract. 118. in Ioan. prope finem.

His accedant Beda in c. 8. Act. Rupertus li. 5. de diuinis officiis, c. 17. & 18. Isidorus li. 1. de diuinis officiis, c. 28. Rabanus li. 2. de Instit. cler. c. 26. Alcuinus lib. de diuinis officiis, c. de feria V. in cœna Domini, & Amalarius lib. 1. de officiis Eccles. c. de eadem feria V. & Petrus Damiani serm. 1. de dedicatione templi.

QUARTA propositio: *Vnctio Chrismatis ad crucis figuram in fronte hominis baptizati fieri debet, & sit vera, & proxima Sacramenti huius materia.* Hæc satis patet ex locis suprâ citatis. Expresè enim nominant signaculū in fronte ex Pontificibus Damasus, Innocētius, Leo, Ioannes III. & Gregorius I. Ex Conciliis II. Hispalense, & Florentinum, ex Patribus TERTVLLIANVS lib. de præscr. *Signat, inquit, in fronte milites suos;* Cyrillus, catech. 3. mysta. Prudentius in *Ἰουχομαχία*, Augustinus in Psal. 141. in illa verba: *In via hac, qua ambulabam, absconderunt laqueum mihi;* vbi dicit, Sacramenta varia, in variis partibus accipi, quædā toto corpore, vt Baptismum, quædam in ore, vt Eucharistiam, quædam in fronte, vt signaculū crucis in Confirmatione. Et causam reddit, quia frons est locus pudoris: datur autem hoc signaculum, vt non erubescamus Dominum confiteri, etiam coram persecutoribus. Idem habet Rabanus, Petrus Damiani, & alij omnes.

CAPVT NONVM.

Soluuntur obiectiones contra materiam Confirmationis.



P RIMA obiectio Brentij in Confess. VVitteimb. cap. de Baptismo. Vfus Chrismatis ad elementa huius mundi pertinet, & ad Iudaicas cęremonias, à quibus nos reuocat Paulus Col. 2. *Si mortui estis cum Christo, ab elementis mundi huius, quid adhuc his detinemini?* RESPONDEO; Si argumētum valeret, probaret etiam non esse vtendum aqua in Baptismo, nec pane in Eucharistia, quia his rebus vtebantur etiam Iudei, cū haberent aquam expiationis, & panes propositionis: quare sicut potuit aqua, & panis deseruire vmbrae, & veritati, sic potest etiam oleum. Paulus autem reuocat nos à cęremoniis Iudaicis, quę verē elementa erant, & egena, vt ipse alibi dicit, cū iustificare non possent: non autem à Sacramentis Christianis, licet in eadem materia consistant.

S E C V N D A obiectio. Dionysius Areopagita non obscure significat ritum Chrismatis desumptum ab athleticis vnctionibus Ethnicorum, & partim ex lege Mosaica. At Moses Deut. 12. *Caue, inquit, ne imiteris Gentes, & requiras cęremonias eorum, &c.* RESPONDEO; Dionysium tribuere Chrismatis doctrinam Apostolis Christi, non Ethnicis, aut Iudæis, vt supra ostendimus. Quod autem ait de Iudæis, pertinet ad figuram huius Sacramenti, non ad ipsam essentiam, & veritatē. Quod verò de athleticis dicit, non pertinet ad cęremoniā, & cultum, vt somniat Brentius, sed ad effectum Sacramenti per similitudinem explicandū: vt enim athletę vngebantur, vt vincerent in certamine corporali, ita nos vngimur sancto Chrismate, vt vincamus in certamine spirituali. Qua similitudine vtuntur plurimi Patres, Chrysostomus, Ambrosius, Augustinus, & alij. Non igitur facit ad rem testimonium Deuteronomij: non enim athletę vnguntur, vt ea cęremonia Deum colant.

T E R T I A obiectio. Acta Conciliorum testatur Chrisma institutū esse à Syluestro; non igitur Apostolis in vsu esse potuit, vt Fabianus scribit. RESPONDEO; Acta Conciliorum, seu potius Damasus in vita Syluestri, solū testatur, Syluestrum præcepisse, vt presbyteri tangerent verticem baptizati Chrismate, quę vnctio distincta est à Sacramento Confirmationis, quod in fronte ab Episcopo datur. Non potuisse autem Chrisma à Syluestro

Syluestro

Syluestro instigui, euidenter patet ex Tertulliano, Theophilo Antiocheno, Cypriano, Cornelio, & aliis suprà citatis, qui fuerunt ante Syluestrum, & expressè Chrismatis meminerunt.

PRIMUM argumentum obiicit Kemnitijs contra propositionem primam ex Scripturis. Nam Act. 2. & 10. datur Spiritus sanctus sine vllò Chrismate. Item Act. 8. & 19. fit mentio impositionis manuum, non autem Chrismatis.

RESPONDEO; Quòd attinet ad cap. 2. & 10. Act. non fuisse in his locis ministerio Sacramentorum datum Spiritum sanctum, sed singulari priuilegio datum à Deo effectum Sacramenti sine Sacramento.

Quod verò pertinet ad alia duo loca, duæ dari solent resolutiones. PRIOR est aliquorum Scholasticorum, qui dicunt Apostolos vario modo ministrasse hoc Sacramentum; ac primis quidem temporibus, quia visibiliter descendebat Spiritus sanctus, non vfos fuisse eos vlla vnctione, sed simplici manus impositione: siquidem, effectum internum satis testabatur externus ille ignis, qui diuinitus apparebat. At postea cùm formæ illæ visibiles cessassent, tum adhibere eos cœpisse vnctionem, vt per eam significarent id, quod antea visibili specie diuinitus apparente significabatur. Si obiicias non potuisse Apostolos instituere materiam Sacramenti: Respondent, eos non instituisse, sed à Christo id mandatum accepisse, vt modò vterentur manus impositione, modò Chrismate, prout opportunum esse iudicarent. Hæc solutio non est omnino improbabilis, & ab ea non abhorret S. Thomas 3. part. q. 72. art. 2. & fortasse possent huc trahi testimonia Concilij Florentini, & Innocentij cap. Cùm venisset, extra de sacra vnctione, qui dicunt dari in Ecclesia Sacramentum Confirmationis loco manus impositionis Apostolicæ.

Est tamen ALIA solutio, quæ longè mihi probabilior videtur, Thomæ VValdensis tomo II. de Sacramentis, cap. 113. & Hugonis de S. Victore lib. 2. de Sacramentis, p. 7. cap. 2. qui dicunt idem esse vnctionem Chrismatis, & manus impositionem; qui enim inungit, manus imponit: & idcirco vtrumq; significari, etiam si alterum tantùm exprimi videatur. Hæc solutio probabilior est. Nam constat Apostolos in Confirmatione vfos esse Chrismate, cùm id asserant Dionysius, & Clemens; & præterea vnctionis meminerint antiquissimi auctores, Theophilus Antiochenus, Tertullianus, Cyprianus, Cornelius, Origenes, & alij, ante quos non fuit vllum Concilium

Oecumenicum, in quo id institui potuerit. Constat etiam oprandum esse, vt possit defendi, Apostolos semper eadem materia vsos, & non modò vna, modò altera: id enim tutius, & expeditius est. At cur, quæso, id non potest defendi? *Quia*, inquiunt, *Lucas meminit impositionis manuum, & non meminit Chrismatis.* Sed nec vsquam Lucas, aut alia Scriptura, aut etiam vllus veterum dicit, Apostolos vario modo hoc Sacramentum ministrasse. Et præterea in verbis Lucæ posse intelligi etiam Chrisma, multis modis probare possumus; Apostolos autem mutasse materiam, nescio an vllò modo probari possit, nisi recentiorum auctoritate.

PRIMO igitur sic probò, Apostolos semper manus imponendo signalisse Chrismate, ac proinde Lucæ ritum illum compendio perstrinxisse, & ex vna parte rem totam intellexisse. Nam Patres, qui vno in loco dicunt per impositionem manus dari Spiritum sanctum, iidem in alio loco dicunt dari per vnctionem Chrismatis, & aliquândo vtrumq; simul coniungunt; ex quo apparet vtrumq; ad ritum hunc pertinere, & illis perinde esse, siue vnum, siue alterum expriment. Tertullianus libro de resurrectione carnis suprà citato, tractans hunc ritum, dicit, carnem vngi, signari, & manus impositione obumbrari: tamen in lib. de præscript. solum exprimit signari in fronte; & lib. i. in Marcionem, solum exprimit vnctionem; lib. de Baptismo exprimit vnctionem, & manus impositionem. Ita videmus vnum auctorem modò vnam partem, modò duas, modò tres eiusdem ritus exprimere; & tamen semper rem eandem significare. Cyprianus lib. i. epist. vlt. solum meminit vnctionis; lib. 2. epist. i. solum meminit manus impositionis, cum de vna re, & eadem loquatur; in epist. verò ad Iubaianum, cum manus impositione addit signaculum dominicum, de quo nihil dixerat in prioribus duabus epistolis. Sic etiam Concilium I. Arelatense, can. 8. tantum nominat manus impositionem; & tamen Concilium II. Arelatense paulò post celebratum, & eandem rem tractans, can. 17. nominat vnctionem Chrismatis. Damasus; & Leo suprà citati, dicunt non licere Chorepiscopis vngere frontem baptizatorum Chrismate: & tamen Ioannes III. hoc ipsum decretum citans, & nominatim allegans Damasum, & Leonem, ne semel quidem meminit Chrismatis, aut frontis, sed perpetuò hunc ritum vocat manus impositionem; ac eiusmodi exempla plurima possent adferri. Quid igitur mirum si S. Lucas ex vna parte totum ritum significarit?

SECUNDO idem probo alia ratione. Nam Patres, quando dicunt solos Episcopos, per vñctionem Chrismatis dare Spiritum sanctum, semper allegant verba Lucæ Act. 8. vt patet ex Innocentio epist. 1. Damaſo epist. 4. Leone epist. 88. Cypriano ad Iubaianum, Augustino li. 15. Trinit. cap. 26. & ex aliis suprà citatis. Ergo aut Apostoli Act. 8. manus imponendo vñgebant Chrismate, aut isti omnes Patres malè argumentantur. DICES; Benè illi argumentantur, quia licet Apostoli Act. 8. non vterentur Chrismate, tamen Chrisma successit in locum manus impositionis, qua illi utebantur. SED contrà; nam si ita esset, saltem aliquis Patrum aliquando id significasset, vt intelligeremus vim argumenti ipsorum.

TERTIO idem probo ex aliis similibus Scripturæ locis, vbi breuissimè aliquid comprehenditur, & tamè necesse est plura intelligere. Exemplum esse potest, quod Paulus in epistolis ad Tim. & ad Titum semper Ordinationem vocat manus impositionē. Exemplum adfert Augustinus lib. de fide, & operibus, cap. 9. exc. 8. Act. Ibidem enim legimus Eunuchum à Philippo baptizatum, cùm dixisset: *Credo Filium Dei esse Iesum*. Augustinus autem rectè notat Lucam per compendium rem attigisse, sed omninò credendū esse de multis aliis interrogatum Eunuchum, & multas alias cæremonias adhibitas in illo Baptismo. Alterum exemplū esse potest id, quod Lucas ait, Apostolos baptizasse in nomine Christi Act. 8. 19. & alibi. Nam vt suprà ostendimus, Apostoli baptizabant in nomine Patris, & Filij, & Spiritus sancti: sed Lucas id per compendium dicere maluit, sciens rem esse notissimā. Aliud exemplum esse potest in eo, quod Paulus ait ad Tit. 3. nos saluari per lauacrum regenerationis: vbi nihil dixit de verbo, & tamè intellexit sine vllò dubio lauacrum cum verbo, vt ipse idem alibi expressit Ephes. 5. Et multa sunt huiusmodi, quæ longum esset recensere.

Vna est hîc difficultas, quòd videtur hæc nostra solutio repugnare Innocentio III. cap. Cùm venisset, extra de sacra vñctione, & Concilio Florentino in instruct. Armenorum. Nam Innocētius dicit, per frontis Chrismationē, designari manus impositionem Apostolorū: Concilium autem dicit loco illius manus impositionis dari nunc in Ecclesia Confirmationem.

RESPONDEO; In primis, non omnia quæ habentur in Decretis, aut Conciliis ad fidem pertinere, sed solū ea, quæ definiuntur: hoc autem, de quo agimus, non definitur, sed tantū obiter dicitur ad rem explicandam.

Dico tamen SECUNDO & melius, ac tutius, Innocentium, & Concilium non velle dicere, Chrisma esse loco impositionis manuum, quasi Apostoli nō vterentur Chrismate, & nos non utamur impositione manus: sed velle dicere, id ipsum quod Apostoli faciebant, cū dicebantur imponere manus, facere nunc Episcopos, cū dicuntur Confirmare, vel Chrismare. Distinguitur enim in his locis, non ritus à ritu, sed modus loquendi à modo loquendi; & personæ à personis; & deniq; illa particularis impositio manuum ab ista, quæ modò est: siquidem tunc communiter dicebatur hoc Sacramentū, impositio manus, nunc dicitur communiter Confirmatio; præterea illam dabant Apostoli, istam Episcopi; denique illa erat efficacior, quia cū effectu interno, dabat etiam externum, & cum gratia gratum faciente dabat etiam dona gratis data linguarum, & miraculorū, &c. Hac ergo ratione dici potest, id quod nunc fit, esse loco eius, quod tunc fiebat, licet sit idem, quoad substantiam. Et quod hic sit sensus eorum locorum, probatur dupliciter. PRIMO, quia Concilium & Innocentius, non dicunt, Chrisma esse loco impositionis manuum, sed Sacramentum Confirmationis esse loco impositionis manuum. At certè Apostoli omnium consensu dabant Sacramentum Confirmationis, siue adhibuerint Chrisma, siue non. SECUNDO, quia Concilium & Innocentius ibidem dicunt Episcopos esse in Ecclesia loco, seu vice Apostolorum. At certè Apostoli veri Episcopi erant, licet aliquid etiam amplius haberent.

SECUNDA obiectio Kemnitij contra eandē propositionem sumitur ex Patribus. Nam ut ipse dicit, Tertullianus in lib. de Baptismo dicit, hanc vñctionem sumptam esse ex veteri disciplina, id est, ex Testamento veteri; proinde nō à Christo institutā. Cyprianus in serm. de ablutione pedū, dicit has cæremonias non à Christo, sed ab hominibus institutas. & in serm. de Chrismate dicit, relictam esse hanc vñctionem ex Testamento veteri. Basilii ait, nullum exstare λόγόν γεγραμμένον de vñctione Chrimatis. Atq; ex his auctoribus dicit Kemnitius satis apertè refelli mendacium Fabiani Papæ, & Martyris, qui asseruit hanc vñctionem à Christo ipso Apostolis traditam.

RESPONDEO; Tertullianum id solum asserere, præcessisse in Testamento veteri figuras huius Sacramenti; ex quo non sequitur non esse à Christo institutum: nam ibidem asserit diluuium fuisse figuram Baptismi, & tamen fatetur Kemnitius non negasse Tertullianum Baptismum à Christo institutum.

Cypria-

Cyprianus in sermone de ablutione pedum non loquitur de Sacramēto Confirmationis, cū dicit cērimonias Sacramētorum ab hominibus institutas, sed intelligit alios ritus, quos adhibemus: immò contrariū colligitur ex hoc auctore. Nam in isto sermone de ablutione pedū, dicit Christum esse auctorem sui Sacramenti, & sermone sequēti, qui est de Chrismate, dicit hanc vnctionem esse diuinitus institutam; & esse Sacramentum: ex quo certè colligitur à Christo institutam. Neque obstat, quòd asserat manasse ex Testamēto veteri, quia id intelligit ratione figurarū, vt dixim⁹ de Tertulliano. Porro Basiliius nihil affirmat contra nos, aut S. Fabianum: neq; em̃ aut S. Fabianus, aut nos dicimus esse scriptā in diuinis literis institutionem Chrismatis, sed dicimus haberi ex traditione nō scripta, & tñ certissima; & cui fides habēda est, vt ipsi verbo scripto, vt ibidē scribit Basil. lib. videlicet de Spiritu sancto, c. 27.

TERTIA obiectio Kemnitij cōtra secundam propositionem. Natiuum balsamū vnā cum arboribus iam periisse cōstat. Scribit enim Plinius lib. 12. cap. 25. verum balsamum solū in duobus hortis Iudææ nasci solitum; qui horti iam dudum vastati sunt: *Periit igitur, inquit Kemnitius, materia Confirmationis, si ea necessario balsamum requirit: neq; potest suppleri artificioso, & factitio balsamo balsamum naturale: quemadmodum nec aqua Baptismi factitia aqua, nec Vinum Eucharistia factitio aliquo Vino.* His addunt quidā Catholici, non esse probabile Christum instituere voluisse Sacramētum aliquod in re tam incerta, rara, pretiosa, quæ vix magno labore, & sumptibus obtineri potest.

RESPONDEO; Quæstionem esse inter Theologos, vtrum balsamum requiratur in Chrismate necessitate Sacramēti, an solū necessitate præcepti. Et quidē veteres omnes Theologi dist. 7. lib. 4. sent. & Iureconsulti in cap. Pastoralis, extra de Sacramentis non iterandis, docēt balsamum requiri necessitate Sacramenti, ita vt Sacramentum irritum sit, si absq; balsamo detur. Tamen recentiores quidā, Caietanus in 3. par. q. 72. art. 2. Dominicus à Soto, lib. 4. sent. dist. 7. q. 1. art. 2. & Franciscus Victoria in summa de Sacramento Confirmationis, putat balsamum non requiri ad essentiam Sacramenti, sed necessario adhibendū ex diuino præcepto. Vtriq; nituntur quodam textu Iuris canonici, cap. Pastoralis, extra de Sacramentis non iterandis; quē textum vtraq; opinio ad se trahit. Neutra opinio est de fide, vel contra fidem; & fallitur Kemnitius

pag. 309. vbi docet, Concilium Florentinum definiuisse contra Scholasticos, balsamum requiri in Chrismate. Nam Concilium non expressit, quo modo requiratur, sed dixit materiã esse oleũ cum balsamo, vt etiã in Eucharistia dixerat materiã esse vinum cum aqua: & tamen omnes fatentur aquam non esse ita de essentia, vt sine ea sit irritum Sacramentum.

Ad argumentum autẽ Kemnitij nego balsamum verum, & natiuũ periisse. Nam etsi aliquando opinione Plinij tantũ in duobus hortis Iudææ nascebatur balsamum; tamen in Indiis nascitur, & inde adhuc aduehitur. Neq; refert si id Plinius ignorauit: nec enim ille omnia scire potuit. Neq; balsamum, quod affertur ex Indiis artificiosum, aut factitium dici debet, licet fortẽ non sit eiũsdẽ specie cum eo, quod nascitur in Palæstina. Variæ enĩ possunt esse species balsami, vt sunt variæ species vini; & quãlibet idonea est ad Sacramẽtum conficiendũ. ADDE, Plinium id, quod refert de duobus hortis, referre de tempore antiquo: nam suo tempore fatetur multas fuisse arbores balsami in Palæstina: & Hieronymus, qui trecẽtis annis fuit post Plinium, in cap. 27. Ezechielis; immò & Gregorius qui ducentis annis post Hieronymum, & quingentis post Plinium, in cap. 1. Cantic. affirmat tempore suo in vineis Engaddi balsamum gigni solitum. Falsum igitur est balsamum natiuum periisse. Ad cõfirmationem respondet praxis Ecclesiæ. Licet enim rarum, & pretiosum sit balsamum: tamen adhuc nunquam defuit Ecclesiæ, neque ex penuria balsami prætermissa est aliquando Confirmatio. Quod si per annos mille, & ferẽ sexcentos Deus prouidit, certẽ non deerit deinceps.

QUARTA obiectio est contra tertiã propositionem, quia videtur esse quædam species magiæ & incantationis, ritus cõsecrandi Chrismatis. Sed de hoc argumento suprà diximus in materia de Sacramentis in genere, & dicemus etiam postea cùm agemus de cæremoniis huius Sacramenti.

QUINTAM obiectionem contra quartam propositionem sumit Kemnitius ex Cyrillo, & Ambrosio. Cyrillus enim catechesi 3. mystagog. dicit, Chrismate inungi omnes ferẽ corporis sensus; Ambrosius autem libro de iis, qui initiantur mysteriis, cap. 6. dicit, caput inungi, & inde vnguentum ad barbam defluere. Non igitur certum est, quod nos diximus, Chrisma in fronte adhibendum esse. RESPONDEO; Cyrillum loco citato, præcipuẽ velle frontem inungi, vt ipse expressẽ ait, deinde alios sensus; quod quidem non est contra

nos: siquidem id solum asserimus, nisi in fronte adhibeatur Chrisma, Sacramentum nullum esse; non tamen negamus, quin deinde possit iuxta varios Ecclesiæ mores inungi etiam alia aliqua corporis pars. Porro Ambrosius loco citato à Kénitio, non agit de Confirmatione, sed de vñctione, quæ fit in Baptismo, quam etiam nos fatemur in vertice capitis faciendam: de Confirmatione autem agit Ambrosius, cap. sequenti.

CAPVT DECIMVM.

De forma Sacramenti Confirmationis.

FORMA huius Sacramenti, sunt hæc verba: *Consigno te signo crucis, & confirmo te Chrismate salutis in nomine Patris, & Filij, & Spiritus sancti.* Neque dubitari potest, quin hæc sit conueniens forma, cum apertè explicet & causam principalem, quæ est sancta Trinitas, & causam ministerialē, quæ est ille, qui verba ipsa profert, & denique effectum Sacramenti, qui est, facere Christi militem insigniendo illum cruce, & roborare, atque armare confirmando Chrismate. Habetur autem hæc forma disertis verbis in Concil. Florent. in Pontificali Romano, & apud S. Thomam 3. parte, quæst. 72. art. 4.

Apud antiquiores auctores non habentur hæc omnia verba, & hoc ordine, tamen habetur idem sensus, & hoc sufficit. Nam vis formæ Sacramentalis posita est in sensu, nō in sono, aut numero literarū: alioqui si quis Græcè, aut Hebraicè, aut alio idiomate ista verba proferret, nihil efficeret. Igitur Ordo Romanus, qui est antiquissimus liber, cum ab Alcuino, & Amalario citetur, qui fuerunt ante annos DCCC. in officio Sabbathi sancti describens ritum Confirmationis, dicit Episcopum per modū orantis hæc verba pronunciare: *Signa eos Domine signo crucis*; ac deinde cum tangit pollice frontem, dicit: *Ego te confirmo, in nomine Patris, & Filij, & Spiritus sancti.* Vbi videmus planè eundem sensum verborum. Neque refert, quod ibi dicatur: *Signa eum*, & nos dicamus: *Signo te*: nam semper significamus Deum esse, qui signat principaliter, & hominem qui signat ministerialiter: vnde etiā forma Græcorum, qua in Baptismo vtūtur: *Baptizetur seruus Christi*, censetur ab omnibus legitima, etiā si nos alio modo dicamus. Quod etiam in Ordine Romano non habetur (*Chrismate salutis*) non videtur multū referre: nam includitur in verbo
(*Confir-*

(*Confirmo*) & satis ostenditur ipsa actione, Chrismate illum confirmari; quomodo idem esset si quis diceret, baptizo te, vel baptizo te aqua. Quare non videtur illa particula essentialis, licet omitti non debeat, quia Ecclesia præscribit, vt dicatur: quemadmodum in forma Baptismi: *Ego te baptizo, &c.* illud (*ego*) nõ est de essentia, & in forma Eucharistiæ: *Hoc est enim corpus meum*, illud (*enim*) & in forma calicis (*mysterium fides*) & quædam alia non sunt de essentia.

Ex quo duo quædam intelligimus. PRIMO ALCVINVM in libro de diuinis officiis, cap. de Sabbatho sancto, vbi dicit, Romæ Pontificem, cum confirmat, solitum ungere frontē, & dicere: *In nomine Patris, & Filij, & Spiritus sancti*, nõ integram formā retulisse, sed solū partem: nam citat Ordinē Romanum, in quo expressè habentur plura, vt iā dixi. SECUNDO intelligimus, falli quosdā, qui existimant AMBROSIVM posuisse formā Confirmationis, cum ait: *Venisti ad sacerdotem; quid tibi dixit? Deus Pater omnipotens, qui te regenerauit ex aqua, & Spiritu sancto, concessitq; tibi peccata tua, ipse te unget in Vitam æternam.* lib. 2. de Sacram. cap. 7. Nam hæc verba quæ Ambrosius ponit, in Ordine Romano dicuntur à presbytero, cum linat verticē baptizati; postquam cæremoniam sequitur postea Cōfirmatio Episcopalis. Vnde etiam Amalarius lib. 1. de officiis Ecclesiasticis. ca. 27. dicit, ista verba esse presbyteri, qui solū forma deprecatoria vtitur. Episcopus enim nõ solū deprecatoriè, sed etiā ex potestate sua, quā à Deo accepit, dicit: *Ego te confirmo.* Porro ex Patribus AMBROSIVS satis aperte huius formæ meminit, cum ait in libro de iis, qui initiātur mysteriis, cap. 7. *Serua quod accepisti; signauit te Deus Pater, confirmauit te Christus Dominus.* Neque est mirū, quod quædam omiserit: nam eo loco non referebat ipsam formam, sed tantū reuocabat in memoriam Confirmatorum ipsum ritum, quo fuerant confirmati; ad id autem satis erat si principalia verba commemoraret.

Non debet autem mirum videri, si Patres non expressè ponunt hanc formā: nam neq; aliorum Sacramentorum formas describūt, tum quod res essent omnibus Christianis notæ ob quotidianum vsum, tum etiam ne Gentilibus, qui libros nostros videbant, proderent eiusmodi mysteria sine necessitate. Itaq; nullus ferè est veterū, qui disertis verbis scripserit formā Baptismi esse: *Ego te baptizo, in nomine Patris, et Filij, et Spiritus sancti.* tantū dicunt Baptisma dari cum inuocatione

Trinitatis. Immò DIONYSIVS, cap. vlt. hierar. Ecclesiast. dicit, fas non esse literis mandare verba, quibus in administratione Sacramentorū vtitur Ecclesia. Et INNOCENTIUS I. in epist. I. cap. 3. de Confirmatione loquens: *Verba, inquit, dicere nō possum, ne magis prodere videar, quàm ad consulationem respondere.* Denique ipse etiam Magister sentent. lib. 4. dist. 7. noluit verba formæ huius Sacramenti ponere: tantum ait, formam esse manifestam, nimirum verba, quibus Episcopi ubiq; vtuntur, cum hoc Sacramentum administrant.

Sed obiectiones hæreticorum videamus.

PRIMA obiectio Caluini est lib. 4. Instit. cap. 19. §. 5. vbi postquam recitauerat formā illam: *Consigno te signo crucis, etc. Pulchrè, inquit, & venustè, sed vbi Dei verbum?* RESPONDEO; Dei verbum non scriptū, sed traditum, satis testari morē vniuersæ Catholicæ Ecclesiæ. Nam neq; aliorū Sacramentorū formæ expressè in Scripturis habentur: nusquā enim scriptū est, in Baptismo dicendū esse: *Ego te baptizo.* Et PRAETEREA Caluinus faretur, Ordinationem ministrorum esse Sacramentum, in eodem cap. 19. lib. 4. Instit. §. 31. & tamen nusquā inueniet verbum in Scriptura, quod cum elemento faciat Sacramentum, vt ipse requirit de Confirmatione. AD DO præterea, nos in genere verbum habere Act. 8. vbi dicuntur Apostoli orasse, cum manus imponent. Nam formæ Sacramentorum passim à Patribus dicuntur preces mysticæ, licet interdū proferantur per verbum indicantis: nam semper à Deo expectatur, & petitur principalis operatio in Sacramentis. DENIQUE 2. Corinth. I. alludens Paulus ad formam huius Sacramenti, expressit principalia verba, cum ait: *Qui nos confirmat Deus, & signauit, &c.*

SECUNDA obiectio §. 7. Vnde, inquit, *Vocant oleum salutis? quis eos in oleo salutem quarere docuit?* Et infra: *Hoc verò non à me, sed à Domino, audacter pronuncio; qui oleum Vocant oleum salutis, salutem, qua in Christo est, abiurant, Christum abnegant, partem in regno Dei non habent. Oleum Veniri, & Venter oleo; Virumq; Dominus destruet.* RESPONDEO; Totum hoc argumentū niti Caluini auctoritate. Nam verbū Dei nō protulit, quamuis se ex Dei nomine loqui mētiatur, vbi dicatur salutē, quæ est in Christo, abiurare, qui oleum Confirmationis vocant oleum salutis. Et quidem si in oleo sine Christo salutem quæreremus, aliquid Caluinus diceret; sed cum oleū

faciamus instrumentum duntaxat applicandæ gratiæ Christi; mirum est vnde suspicari potuerit Calvinus, Christum negare, qui oleum vocat oleum salutis. Adde, quod eiusmodi phrasæ sunt in Scripturis frequentissimæ, vt 4. Reg. 5. 13. sagitta salutis, 2. Cor. 6. dies salutis, Act. 13. verbum salutis, Luc. 1. sciëntia salutis. Adde etiam, quod Caluini argumentum nõ minùs valet contra aquam Baptismi, & panem Eucharistiæ, quàm contra oleum Confirmationis: nam & illa dicitur, lauacrum regenerationis, & renouationis, Tit. 3. & panis Eucharistiæ dicitur panis vitæ, Ioan. 6. Responder ibidem Calvinus in Sacramentis duo spectanda esse, naturã elementorum, & eam esse corruptibilem, & salutem adferre non posse; & vim spiritalem à verbo Dei impressam, & ratione illius aquam in Baptismo, & panem, ac vinum in Eucharistia salutem adferre. At cur, quæso, non idem nos de oleo dicere possumus?

TERTIA obiectio est Kemnitij in 2. part. Exam. pag. 288. forma huius Sacramenti: *Signo te signo crucis, &c.* non habetur in vetustis scriptoribus, nec in ipsis Canonibus, &c. RESPONDEO; iam reddidi causam huius rei.

QUARTA obiectio ibidem. In ipsis Pontificalibus non est eadem forma. Nam Gabriel recitat quosdam pro *Chrismate salutis*, dicere: *Chrisma sanctificationis.* & Gerson habet formam: *Firmo te signo crucis, &c. Chrismate salutis.* RESPONDEO; Ista omnia in idem coincidere cum nostra forma: semper enim est idem sensus, siue dicas: *salutis*, siue *sanctificationis*, siue *cōfirmo*, siue *firmo*, &c. quamuis enim oporteat præscriptis verbis uti, & nihil mutare, & qui secus faciunt, peccent, tamen (vt sæpe diximus) dū idem sensus manet, semper Sacramētum conficitur: & potest facillè fieri, vt in variis Ecclesiis sit aliqua varietas in vocibus, modò maneat sententia eadem: vt etiam patet in forma Baptismi Latinorum, & Græcorum.

CAPVT XI.

De effectu huius Sacramenti.



DUPLEX est Sacramenti huius effectus. VNVS, quod gratiam confert gratum facientem, & quidẽ maiorem, quàm ipse Baptismus, in ordine ad roborandam animam cōtra Diaboli impetus: sed minorem in ordine ad remissionem peccati, quia non remittit totam pœnam, vt facit gratia Baptismi. Neq; est opus hĩc aliquid addere, cū id satis copiose probatum sit suprà in prima

ma Controuersia: inde enim probauimus, Confirmationem esse Sacramentum propriè dictum, quia Scripturæ, & Patres omnes affirmant, dari per hanc cæremoniam copiosissimam gratiam, atque aded ipsium Spiritum sanctum.

ALTER effectus est character, quo adscribimur in Christi militiam, sicut per Baptismum in Christi familiam. Probatur autè iste character Confirmationis, eo modo, quo character Baptismi, ex eo, quodd nō potest repeti Confirmatio. Nam supra ostendimus, rationē, cur Sacramenta quædam sint initerabilia, nullam posse reddi sufficientem, præter characterem; quocirca etiam ab effectu demonstratur euidenter character, cum ostendimus aliquod Sacramentum esse initerabile.

Esse autem initerabilē Confirmationem. PRIMO expressè probatur ex Apostolo Hebr. 6. *Non iterū iacentes fundamentum penitentia ab operibus mortuis, & fidei ad Deum, baptismatū doctrina, impositionis quoq; manū, &c.* vbi teste Chrysostomo, Theodoro, Theophylacto, & aliis, Apostolus per impositionē manuum intelligit Cōfirmationem, quæ dabatur statim post Baptismum; ac docet non licere ei, qui labitur post Baptismū, & Confirmationē, iterum redire ad Baptismū, & Confirmationē: hæc enim sunt fundamenta, quæ non iaciuntur nisi semel. SECUNDO idem patet ex Cōcilio Toletano VIII. can. 7. vbi apertè dicitur, *Chrisma semel collatū, repeti non posse, vt nec sacrum Ordinem.* Item ex Cōcilio Tarraconenfi, & ex decreto Gregorij II. apud Gratianū, dist. 5. de consecr. can. de hist. & can. de homine: quibus adde Conciliū Florentinum in instruct. Armenorum, & Trident. sess. 7. can. 9. TERTIO idem patet ex Patribus. Nam CYPRIANVS, seu quicumq; fuit auctor, in ferm. de ablutione pedum: *Baptismum, inquit, repeti Ecclesiastica prohibent regula: nemo sacros Ordines semel datos iterū renouat: nemo sacro oleo lita iterum linat, aut consecrat: nemo impositioni manū, vel ministerio derogat sacerdotum: quia contumelia esset Spiritus sancti, si euacuari posset, quod ille sanctificat, & aliena sanctificatio emendaret, quod ille semel statuit, & confirmat.* AVGVSTINVS lib. 2. contra literas Petiliani, cap. 104. (vt suprā notauimus) apertè docet, Sacramētum Chrismatis semel datum, permanere etiam in pessimis, nec vnquam aboleri: ex quo manifestè sequitur repeti non posse. Similia docent Rabanus lib. 1. de Instit. clericorum, cap. 30. Amalarius lib. 1. de officiis Ecclesiasticis, cap. 27. & alij recentiores.

CAPVT XII.

De ministro huius Sacramenti.

SEQVITVR Controuersia QVINTA; Vtrum minister Sacramenti Cōfirmationis sit solus Episcopus. Et quidem hæretici licet hunc ritū è numero Sacramentorum auferant, tamen etiam si Sacramentum esset ipsorum quoq; opinione, negant ad solos Episcopos eius ministeriū vllo modo pertinere. Ioā. VViclef lib. 4. Trialogi, cap. 14. apertè negat esse Episcoporū propriū munus confirmare. Idem habet Calvinus lib. 4. Instit. cap. 19. §. 10. Kemnitius in 2. par. Examinis, pag. 324. & alij, fortè omnes, præsertim cū ipsi vix agnoscant differentiam inter Episcopum, & presbyterum, vt in libro de clericis ostendimus.

Ex Catholicis solus est Richardus Armachanus, qui in lib. 11. Armenicarum q. cap. 4. existimat, commune esse Episcopis, & Presbyteris munus confirmandi, atq; ab hoc Armachano arbitratur Thomas VValden. lib. 2. de Sacramentis, cap. 114. haussisse VViclefum suam hæresim: Fuit enim Armachanus paulò antiquior VViclefo, quamuis eodem seculo vixerint. Ceteri omnes communi consensu docent, solum Episcopum esse proprium huius Sacramenti ministrum.

Est quidē inter Catholicos quæstio, an saltem ex dispensatione possit presbyter hoc Sacramentū conferre. Nam S. Bonauentura, Durandus, & Adrianus in 4. dist. 7. contendunt id nullo modo committi posse presbyteris; sed S. Thomas 3. p. q. 72. art. 11. & omnes eius discipuli, & multi alij Theologi in 4. dist. 7. vt Richardus, Paludanus, Marsilius, & alij, & oēs Canonistæ in can. 1. dist. 95. contrariū docent: & quidem lōgè verius est, quod isti posteriores affirmant. NAM Ambrosius in cap. 4. ad Ephes. testatur in Ægypto presbyteros confirmare in absentia Episcoporū, neq; reprehendit eum vsū. GREGORIUS, lib. 3. epist. 26. apertissimè permittit presbyteris Sardinia, vt in absentia Episcoporū confirmet: & quia corruptus est hic locus Gregorij, fortè à fautoribus contrariæ sententiæ (nam dicit se permittere, *vt baptizandos vngant*, cū dicere deberet, *vt baptizatos*) conferatur hic locus cum epist. 9. eiusdem lib. 3. inde enim manifestè apparebit corruptio. Siquidē in epist. 26. dicit, se permittere, quod in epist. 9. prohibuerat: prohibuerat autem, ne presbyteri vngerent in fronte baptizatos. Vnde etiam Gratianus, & S. Thomas hunc locū ita citant, vt esse

esse debet, nō vt modò legitur in codicibus impressis. PRAETEREA Concilium Arausicanum I. can. 1. & 2. & Toletanū I. can. 20. & Martinus Bracarenfis, cap. 52. Græcarū Synodorū, & Florentinū in instruct. Armenorum, idem habēt. DENIQUE Concilium Trident. sess. 7. can. 3. de Confirmatione, idē ait, ordinarium ministrum esse Episcopum, vt indicaret, posse extraordinaria potestate idem fieri etiam à presbytero. Ex quo apparet error Kemnitij, qui in suo Exam. part. 2. pag. 325. dicit, Concilium definiuisse contra S. Thomam, & alios quosdam doctores, immò & contra ipsum S. Gregorium, solum Episcopum esse ministrum Confirmationis.

Sed his omisfis, probatur Catholica veritas apertissimo Scripturæ testimonio. Nam Act. 8. missi sunt Petrus, & Ioannes, vt per impositionē manuum darent Spiritum sanctū iis, quos Philippus in Samaria baptizauerat. & Act. 19. Paulus ipse Apostolus manus imponit illis, quos alij baptizauerant. At certē nulla videtur posse fingi causa, cur soli Apostoli manus imponant; imò cur ad hoc ipsum veniant ex vno loco ad aliū, nisi quia hoc munus propriè pertinet ad primū gradum Ecclesiasticum, qui est sine controuersia Episcopalis.

AD HOC VViclefus respōdet, illos, quos Philippus baptizauerat, fortē nō fuisse legitimè baptizatos, & idē rursus fuisse baptizandos ab Apostolis, vt acciperent Spiritum sanctum.

SED hæc solutio ineptissima est. Nam quis credat, Philippum Diaconū post acceptum Spiritum sanctum nō rectè baptizasse? & deinde si erant rebaptizandi, quid opus erat, vt Apostoli venirent ex Hierusalem? non poterant significare per literas, aut alium mittere, qui illos ritè baptizaret? Deniq; Apostoli cur tantū imposuerunt manus, & non etiam baptizârunt, si illi non erant ritè baptizati? Neq; obstat, quòd dicatur baptizati in nomine Domini Iesu, & non in nomine Trinitatis. Nam (vt suprā ostendimus) Lucas breuiter describit ritum Baptismi, ex parte intelligi volens totum.

Calvinus loco citato respōdet, quod Apostoli fecerunt, nō posse tribui Episcopis, aut certē nō solis Episcopis. Nā Episcopi nō sunt Apostoli: quod si tenent, quoad aliqd, locū Apostolorum, eundem locū tenent etiā presbyteri. Nam alioqui nō liceret presbyteris, sed solis Episcopis cōmunicare sub vtraq; specie: id enim soli Apostoli in Cœna Domini fecerunt.

RESPONDEO; Episcopos solos simpliciter, & absolutè Apostolis succedere. Obseruandū enim est in Apostolica aucto-

ritate contineri oēm Ecclesiasticam potestatem. Erant enim Apostoli PRIMVM Christiani, & membra Ecclesiæ. SECUNDO erāt Sacerdotes. TERTIO summi Sacerdotes. QUARTO summi non vno in loco, sed in toto orbe terrarū: poterant em̄ ubique prædicare, baptizare, ordinare, leges ferre, punire, &c. Sed hoc vltimum in solo Petro fuit ordinarium munus, in ceteris extraordinariū, & quasi delegatū: & idcirco soli Petro succedi videmus, non autē vlli alteri Apostolo in illa summa in totum orbē potestate. Cetera tria erāt omnibus ordinaria. Quare licet oēs Christiani aliquo modo succedāt Apostolis, quatenus illi fuerunt primi Christiani: & omnes Sacerdotes eisdē Apostolis succedant, quatenus illi fuerunt primi Sacerdotes: & omnes Episcopi eisdem succedant, quatenus illi fuerunt primi summi Sacerdotes: tamē soli isti simpliciter illis succedunt, quia succedunt in tota eorum ordinaria auctoritate, in qua sola succedi potest. Idq; patet etiā ex praxi, & testimonio Sanctorū. Nam si quis petat, quis successit Apostolo Iacobo? omnes respondent, Episcopus Hierosolymæ. Quis Apostolo Ioanni? Episcopus Ephesinus. Ad hæc Concilium Neocæsariense can. 13. Damasus in epist. 4. de Chorepiscopis. Hieronymus in epist. ad Marcellā de erroribus Montani. Leo epist. 88. Augustin. in Psal. 44. in illud: *Pro patribus nati sunt tibi filij.* & alij veteres passim affirmāt, Episcopos Apostolis succedere.

Sed DICES, vnde scimus Apostolos manus imposuisse, Act. 8. vt Episcopos, & non vt Presbyteros, vel vt Apostolos per extraordinariā potestatem? RESPONDEO; quod nō vt presbyteri, inde constat, tum quia Scriptura nunquā tribuit hoc officium nisi ipsis Apostolis, cū alia officia, vt prædicandi, & baptizandi tribuat etiā aliis inferioribus ministris: quod nō vt Apostoli per extraordinariam potestatem; colligitur tum eo, quod Hebr. 6. numeratur hæc manus impositio cum reliquis ordinariis Ecclesiæ ritibus; tum ex eo, quod semp in Ecclesia māsit ista consuetudo, vt Episcopi manus imponerent baptizatis.

SECUNDO, probatur eadē veritas testimoniis, & traditione Ecclesiastica. Nam Cōcilia, Pontifices, & Patres citati in prima controuersia, cōmuni cōsensu docent, solos Episcopos esse propriē Sacramenti huius ministros: idq; pbant ex cap. 8. Actor.

TERTIO, probatur etiam ratione. Nam Confirmatio est complementum, & perfectio Baptismi; proinde cōuenit, vt à primo ministro detur: sic enim in omnibus aliis rebus vltima forma imprimitur à primo agente. Præterea in Confirmacione

matione adscribimur ad Christi militiam; adscribere autem ad militiam, proprium est Ducum, & Imperatorum.

Neq; argumenta Caluini, & Kénitij difficulter soluuntur. Argumentū PRIMVM Caluini. Error est Donatistarum, quod Sacramentū pendeat à dignitate ministri. RESPONDEO; Si de dignitate morali agatur, verū est, si de Ecclesiastica, falsissimū. Alioq; esset etiā error Donatistarū, quod soli presbyteri ministrarent corpus Dñi, immò & Baptismū, secundum Caluinum.

SECUNDVM argumentum. Presbyteri succedunt Apostolis, vt patet de ministerio Eucharistię, quod solis Apostolis cōmissum fuerat. RESPONDEO; Apostolos in vltima Cœna presbyteros creatos fuisse, non autē Episcopos; Episcopi em̃ post resurrectionē facti sunt, cū eis diceretur, Ioan. 20. *Ecce ego mitto vos, &c.* Itaque presbyteri in aliqua re Apostolis succedunt, sed non in omnibus, neque absolutē, vt diximus.

TERTIVM argumentum, I. Tim. 4. Paulus ait: *Noli negligere gratiam, qua data est tibi per impositionē manuum presbyterij.* & Ananias Act. 9. imposuit manus Paulo, & tamen nō erat Episcopus. RESPONDEO ad hoc argumentum, quod est Armachani; Non tractari eo loco de Confirmatione, sed de Ordinatione Timothei; & præterea per illā vocē (*Presbyterij*) intelligi chorum presbyterorum, id est, Episcoporum, vt exponunt Chrysostomus & alij: multi enim Episcopi, vnū Episcopum ordinant; vnus autem solus confirmat.

AD illud de Anania, quod mutuo accepit Calvinus à VViclefo, vt ille ab Armachano; dico Ananiam imposuisse manū Paulo ad hoc, vt visum reciperet, vt ibidē legimus. Quare non fuit confirmatoria, sed curatoria illa impositio manus: vnde facta est ante Baptismum, nō postea, vt fieri debet Confirmatio: neq; descendit tunc visibiliter Spiritus sanctus, sed ceciderunt tanquam squamæ ab oculis eius: At, inquiunt, *Ananias cū imponeret manus, dicebat; Saulo frater, Dominus Iesus misit me, &c. videas, & implearis Spiritu sancto: igitur finis illius impositionis manus fuit donū Spiritus sancti.* RESPONDEO, Ananiā exposuisse simul finem proximū, & remotum sui aduētus. Finis em̃ proximus erat, curatio à cœcitate, finis remotus, perfecta iustificatio, & infusio Spiritus sancti, quam paulò post cōsequutus est Paulus per Baptismū. Vnde paulò antea describitur visio Pauli, qua antè præuidit, quod futurum erat: *Et vidit, inquit Lucas, & virum introeuntē ad se, Ananiam nomine, & imponentem sibi manum, & visum recipiat.* & ca. 22.

Actorum, ubi narrat ipse Paulus totam hanc historiam, nihil se accepisse dicit ab Anania, nisi depulsionē cæcitatē, & postea Baptismum. Est autem valde probabile Paulum, ut ceteros Apostolos, immediatē à Deo accepisse Confirmationem sine humana impositione manuum.

Argumentum *Q V A R T V M*. Si iure diuino Episcoporum est proprium cōfirmare, quomodo id etiā presbyteris Gregorius concessisse legitur? *R E S P O N D E O*; Iure diuino solos Episcopos esse ordinarios ministros huius Sacramenti. At nō inde sequitur, quin extraordinaria concessione id possit etiam presbyteris cōuenire: sicut etiam iure diuino proprium est Episcoporum prædicare; & tamē eorum concessione prædicat etiam Presbyteri, & aliquando etiam Diaconi.

Sed instant quidam Catholicorum; Confirmare, aut conuenit Episcopo ratione ordinis, aut ratione iurisdictionis. Si ratione ordinis, nullo modo potest id concedi iis, qui nō habent eum ordinem, ut patet in similibus; nec enim potest vlla dispensatione fieri, ut Diaconus cōsecret Eucharistiam. Si ratione iurisdictionis; ergo posset Episcopus non consecratus confirmare; quia habet ipse ordinem presbyteralē, & iurisdictionem Episcopalem. *R E S P O N D E O*; Confirmare esse actum ordinis, & eum ordinem esse etiam in presbytero, saltem inchoatum, & imperfectū. *O B S E R V A N D V M* est enim, characterem Episcopalem, siue sit alius à presbyterali, siue idem extensior, & maior; esse potestatem absolutam, & perfectam, & independentem conferendi Sacramenta Confirmationis, & Ordinis, & idēd non solum posse Episcopū sine alia dispensatione confirmare, & ordinare; sed etiam non posse impediri ab vlla superiori potestate, quin reuera Sacramenta ista cōferat, si velit, licet peccet si id faciat, prohibente summo Pōtifice: characterem autem presbyteralem esse quidem potestatem absolutam, perfectam, & independentem, quoad Sacramentum Baptismi, & Eucharistiæ; esse autem potestatem inchoatam, imperfectā, & dependentem à volūtate superioris, quoad Sacramentum Confirmationis. Quocirca nisi perficiatur per dispensationem superioris ea potestas, presbyter confirmādo nihil ageret: at si perficiatur, iam ex ipso suo characterē confirmabit. Id quod minus mirū videbitur, si cogitemus, characterem non esse Physicam aliquam potentiam, quæ Phisicē aliquid operetur, (tunc enim difficile esset intelligere quomodo posset perfici per dispensationem Pontificiam) sed esse

esse signum diuini cuiusdam pacti, quo Deus concurrat ad effectum Sacramentalem producendum cum eo, qui habet characterem, & non cum aliis: facile enim est intelligere, vnum characterem esse signum pacti absoluti, alium autem esse signum pacti conditionati. Sed de his haecenus.

QVINTVM argumentū est Kemnitij, loco citato. Scriptura ignorat differentiam Episcopi, & Presbyteri. RESPONDEO; Nō Scriptura id ignorat, sed Kemnitius Scripturam ignorat. Nam 1. Tim. 6. cū dicitur: *Aduersus presbyterum accusationem noli recipere, nisi sub duobus, aut tribus testibus*: apertissimè tantum discrimen ponitur inter Episcopum, & presbyteros, quantum est inter principem, & eius subditos. Quocirca Aëriani ob hoc ipsum hæretici dicuntur ab Epiphanio hæres. 75. & Augustino hæres. 53. quod negauerint hoc discrimen.

SEXTVM argumentum eiusdem Kemnitij. Hieronymus in dialogo contra Lucifer. dicit, ob honorem sacerdotij fieri, vt soli Episcopi manus imponant, non ob legis necessitatē. RESPONDEO; Locum hunc pro nobis maximè facere. Nam HIERONYMVS non negat, solis Episcopis licere Confirmationem dare post Baptisma; immò hoc affirmat, & infrà id ipsum probat exemplo Apostolorum, qui in Samariam profecti sunt, vt eos confirmarent, quos Philippus baptizauerat. Et præterea causam reddit, cur id voluerit Dominus propriū esse Episcoporum; quia id requirebat honor summi sacerdotij. Nam vt paulò pōt ipse idem magis explicat, necesse est in singulis Ecclesiis esse vnum Episcopum, ne si multi sint pares, & non ad vnum summa referatur, schismata fiant: hinc igitur Dominus voluit quædam esse propria Episcoporū, vt inde eorum eminentia supra ceteros appareret. Illud autē (*non ob legis necessitatem*) non refertur ad legem ministrandi Confirmationem, sed ad legē consequendæ salutis: significat enim Hieronymus non esse necessarium ad salutem absolutè, vt quis ab Episcopo confirmetur; nam etiā sine tali Confirmatione per solum Baptisma saluari potest. Vnde continuò subiūgit, explicās quod dixerat: *Non ob legis necessitatem; alioqui lugendi essent, qui in Vinculis à presbyteris vel diaconis baptizati antè moriuntur, quàm ab Episcopis inuisantur*. Quod si id non placeat, dici potest, loqui Hieronymum de lege, quæ sumatur ex natura rei, vt sensus sit; id esse tributū solis Episcopis, non ob legis necessitatē, id est, non quod id necessariò requirat natura rei, quasi aliter fieri nō posset; sed quia voluit Dñs hac re honorare Episcopalem dignitatem.

SEPTIMUM argumentum. A multis iam annis in Germania nulli ferè Episcopi confirmant, sed suffraganei quidam, qui sunt fictitij Episcopi, & larvæ Episcoporum potiùs, quàm Episcopi. RESPONDEO; Suffraganeos esse veros Episcopos, quia & Ordinationem habèt, & iurisdictionem, licet careant possessione propriæ Ecclesiæ. Quocirca licet non possint extra suam Ecclesiam confirmare sua auctoritate, possunt tamen si ad id inuitentur à proprio Episcopo.

CAPVT XIII.

De cæremoniis Confirmationis.

DUPLICES sunt cæremoniæ in hoc Sacramento. PRIMVM enim multæ cæremoniæ adhibentur in consecratione Chrismatis feria V. in Cæna Domini. DEINDE quædam etiam adhibentur in ipsa collatione huius Sacramenti.

ACVt à PRIMO genere incipiamus, tractant de ritu consecrationis omnes, qui scribunt de diuinis officiis, cap. de feria V. in Cæna Domini, vt Isidorus, Alcuinus, Amalarius, Rabanus, Rupertus, & alij.

Fiunt autem quatuor cæremoniæ. PRIMO benedictiones olei, & balsami per orationes: & hoc reprehendi non potest, cùm Apostolus, 1. Tim. 4. dicat omnia sanctificari per verbum Dei, & orationem.

SECUNDO, fiunt etiam benedictiones olei, & balsami per signum crucis: ac ne id quidem reprehendi potest, cùm sine hoc signo nihil consecrari possit, vt testantur omnes ferè Patres, sed præcipuè Chrysostomus homil. 55. in Matth. & in lib. quod Christus sit Deus; & Augustinus tract. 118. in Ioannem, & serm. 181. de tempore, cap. 3.

TERTIO, halat Episcopus aliquoties super ampullâ Chrismatis. Et quidem hæc cæremonia ridicula, & magica videtur hæreticis: nã id apertè scribit Kemnitius pag. 285. & Caluinus ad hanc cæremoniam respexit, cùm ait li. 4. Instit. cap. 19. §. 10. Chrisma fœtido anhelitu inquinari: tamen & antiquissima est, cùm eius meminerint auctores citati, Amalarius, & alij, & præterea ab exemplo Dñi sumpta, qui in Apostolos insufflauit Ioan. 20. vt ea cæremonia demonstraret, Spiritum sanctum in eos descendere. Et sanè cū vult Ecclesia descensum sancti Spiritus designare ad aliquid sanctificandum; quo meliori signo uti potest, quàm eo, quo Christus ipse ad rem eandem designandam

dam uti voluit? Quòd si magica est hæc cæremonia, Christum Magiæ doctorem faciemus, quod est impium, & blasphemū. Neque magica dici potest vlla cæremonia, nisi cùm effectus mirabilis exspectatur à Diabolo, cum quo fœdus ineunt Magi: nos autem effectum à Diabolo nullum exspectamus, sed à solo Deo, à quo id per orationes petimus, ut sæpe dictum est.

QUARTA cæremonia est, quòd Chrisma iam consecratum, salutatur ab Episcopo, & presbyteris, his verbis: *Aue S. Chrisma*. atq; hanc cæremoniam idololatricam esse dicunt aduersarij. Tilmannus Heshusius lib. de erroribus Pontific. tit. 22. nu. 26. *Chrisma*, inquit, *tantum non adorandum: Siquidem hæc Verba dici iubent, Aue S. Chrisma*. Reprehēdit etiam hanc cæremoniā Kemnitius pag. 289. & Calvinus lib. 4. Instit. c. 19. §. 21. Sed ineptè in primis ad idololatriam hoc referunt, cùm aliud sit salutare, aliud adorare: alioqui etiam Dominus, qui Matt. ult. dixit mulieribus: *Auete*, eas adorasse diceretur. Adhibetur quidem Chrimati consecrato reuerentia, quia est res sacra, & vim habet ut Dei instrumentum sanctificandi: sed non adoratur ut Deus, alioqui etiam Hebræi idololatræ fuissent, qui arcam Domini ligneam adorabant; idque faciebant Propheta monente Psal. 98. *Adorate scabellum pedum eius, quoniam sanctum est*. DICES; ridiculum videtur salutare rem inanimam. RESPONDEO; id esse vsitatissimum, in signum gratulationis etiam res inanimas salutare, ac si viuerent & sentirent. Ita Nazianzenus oratione ad CL. Patres cùm Episcopatu se abdicaret, valedicit cathedræ, templo, psalmodiæ, aliisque id genus rebus. Hieronymus in epist. de obitu Paulæ, describit salutationem, quam B. Paula ad Bethlehem habuit, cùm eam primum vidit. Immo & Æneas apud Virgilium in 7. Æneidos Italiam salutat, cùm eam primum ingreditur. Suntque eiusmodi exempla planè infinita.

IAM verò in ipsa Confirmatione præter cæremoniam essentialē vngendi, & signandi frontem cruce; adhibentur etiam aliæ octo cæremoniæ. PRIMÆ, ut Susceptor adsit, sicut in Baptismo, qui confirmandum offerat Episcopo. Estq; hæc cæremonia antiquissima, ut patet ex decretis antiquorum Pontificum, & Conciliorum, quæ citantur à Gratiano 30. quæst. 1. can. Si quis. & can. de his. & quæst. 4. can. Si quis ex vno. & de consec. dist. 4. can. In Catechismo.

SECUNDA, ut variæ preces dicantur super confirmandos, & quidem cum manus impositione; quæritum solùm aduersarij non reprehendunt.

TERTIA

TERTIA, vt confirmato pax detur ab Episcopo, in signum acceptæ gratiæ Spiritus sancti, cuius effectus est pax.

QUARTA, vt confirmatum Episcopus manu leuiter cedat, vt is intelligat se contra ignominiam, & verbera pro Christo ferenda, patientia præcipuè armandum.

QUINTA, vt fascia ligetur frons, tum ne Chrisma facile defluat, tum vt significet, acceptam gratiam diligenter conseruandam, iuxta illud, 1. Ioan. 2. *Vnctionem, quam accepistis, maneat in vobis.* Sed in hac re seruanda est Ecclesiæ consuetudo: alicubi enim ad septem dies frontis fascia conseruatur, alicubi ad tres, alicubi continuè abluitur, & exiccatur Chrisma à sacerdotibus, vt fascia opus non sit.

SEXTA, vt ad septem dies, nō lauatur caput, seu frons Cuius ceremoniæ meminit Hugo lib. 2. de Sacramentis par. 7. cap. 6. Tertullianus lib. de Baptismo scribit à die Baptismi per totam hebdomadā Christianos lauacro abstinere solitos: quod quidem faciebant non tantum ob Baptismum, sed etiam, & fortasse præcipuè ob Chrisma, quod eodem die dari solebat.

SEPTIMA, vt in Sabbatho Paschæ, & Pentecostes detur Confirmatio, quia videlicet iis diebus dari debet Baptismus, vt supra diximus. Hoc tamen tempore, quia vt plurimum non dantur simul hæc Sacramenta, laudabilis est consuetudo multorum Episcoporum, vt in festis Pentecostes præcipuè confirment, quia nimirum in eo festo data est prima Confirmatio à Deo sanctis Apostolis.

OCTAUA, vt à ieiunis detur, & accipiatur Confirmatio; de qua re exstant canones Conciliorum, apud Gratianum de consecrat. dist. 5. can. Vt Ieiuni. & can. Vt Episcopi.

Ad hæc omnia Kemnitius addit pag. 323. mirū esse cur Pontificij malint has suas ceremonias, quam examen puerorum, professionem fidei, & adhortationē, ac tragicè queritur, à nobis ista omnia reiici, nec pati nos velle, vllam emendationem. Sed sunt ista omnia verba ociosa. Nos enim nihil horum reiicimus, sed volumus omnia fieri suo loco, & tempore; nec patimur nobis eripi Sacramentum à Christo institutum, & ceremonias à Patribus traditas prætextu examinis puerilis. Ac de Sacramento Confirmationis satis dictum est.

ERRATA.

Fol. 44. versu 16. Apostolos. f. 53. v. 22. aut Sacramento tantum, aut utroq; f. 83. v. 24. At Christi mors, &c. *Es sequētia Verba illius paragraphi, sunt Auctoris, nō Augustini.* f. 84. v. 1. luci. Ibid. v. 8. qui inde.

